





THE ALDINE EDITION
OF THE BRITISH
POETS



THE POEMS OF GEOFFREY CHAUCER
IN SIX VOLUMES
VOL V

THE POETICAL WORKS OF
GEOFFREY CHAUCER

EDITED BY RICHARD MORRIS LL.D.

*Member of the Council of the Philological Society, Editor
of "Specimens of Early English,"
§c., §c., §c.*

WITH MEMOIR BY SIR HARRIS NICOLAS

IN SIX VOLUMES

VOL. V.



LONDON

GEORGE BELL AND SONS, YORK STREET

COVENT GARDEN

1891

CHISWICK PRESS:—G. WHITTINGHAM AND CO., TOOKS COURT
CHANCERY LANE.



PK
1270
1931
55

CONTENTS.

VOL. V.

	Page
T ROYLUS AND CRYSEYDE.	
Book V.	1
Chauceres A. R. C.	78
Chaucer's Dream	86
The Boke of the Duchesse	155
Of Quene Anelyda and False Arcyte	196
THE HOUSE OF FAME.	
Book I.	209
Book II.	224
Book III.	242
THE LEGENDE OF GOODE WOMEN.	
The Prologue of Nine Goode Wymmen	276
Legenda Cleopatrie Martiris, Egipti Regine	294
Legenda Tesbe Babilon, Martiris	298
Legenda Didonis, Martiris Carthaginis Regine	305
Legenda Ypsiphile et Medee, Martiris	318
Legenda Lucrecie Rome, Martiris	328
Legenda Adriane de Athenes	335
Legenda Philomene	345
Legenda Phillis	351
Legenda Ypermystre	356



TROYLUS AND CRYSEYDE.

INCIPIT LIBER QUINTUS.

I.

APROCHIEN gan the fatel destyné,
That Joves hath in dispossisioun,
And to yow, angry Parcas, sustren thre,
Comitteth to don execueioun ;
For whiche Criseyde most out of the towne,
And Troilus shal dwellen forth in pyne,
Til Laehesis his thred no longer twyne.

II.

The golde tressed Phebus, heigh on lofte,
Thries hadde alle with his bemes clere,
The snowes molte ; and Zephirus as ofte 10
Ybrought ayeyn the tender leves grene,
Syn that the sone of Ecuba the queene
Bygan to love hire firste, for whom his sorwe
Was alle, that she departe sholde a mörwe.

III.

Ful redy was at prime Dyomede,
Criseyde unto the Grekes oste to lede ;
For sorwe of which she felt hire herte blede,

As she that nyste what was best to rede ;
 And trewely, as men in bokes rede,
 Men wiste never womman han the care, 20
 Ne was so loth out of a town to fare.

IV.

This Troilus, withouten reed or lore,
 As man that hath his joyes ek *forlore*,
 Was waytynge on his lady everemore,
 As she that was sothfaste, crop and moore
 Of al his lust or joyes here tofore :
 But Troylus, now farewel al thy joye !
 For shaltow nevere se hire eft in Troye.

V.

Soth is, that while he bode in this manere,
 He gan his wo ful manly for to hyde, 30
 That wel unnethes it sene was in his chere ;
 But at the yate ther she sholde oute ryde,
 With certeyn folk he hoved hire tabide,
 So *wo* bygon, al wolde he nought hym pleyne,
 That on his hors unneth he sat for peyne.

VI.

For ire he quook, so gan his herte gnawe,
 Whan Dyomede on horse gan him dresse,
 And seyde unto hymself this ilke sawe,
 ‘ Allas ! ’ quod he, ‘ thus foule a wretchednesse !
 Whi suffre Ich it ? whi nyl Ich it redresse ? 40
 Were it not bet at oones for to dye,
 Than everemore in langoure thus to crye ?

VII.

‘ Why nyl I make atones rich and pore
 To have inough to done or that she go ?
 Whi nyl I brynge alle Troie upon a rore ?
 Whi nyl I slen this Dyomedede also ?
 Whi nyl I rather with a man or two,
 Stele hire away ? Whi wol I this endure ?
 Whi nyl *I* holpen to myn owene cure ?’

VIII.

But whi he nolde don so fel a dede, 50
 That shal I seyn, and whi hym liste it spare ;--
 He hadde in herte alweyes a manere drede,
 Leste that Criseyde, in rumour of this fare,
 Shold han ben slayn ; lo ! this was al hise care ;
 And elles certeyn, as I seyde yore,
 He hadde it done withouten wordes more.

IX.

Criseyde when she redy was to ride,
 Ful sorwfully she sighte, and seyde, ‘ Allas !’
 But forth she mot, for ought that may betide,
 And forth she rite ful sorwfully a pas ; 60
 Ther is non other remede in this cas.
 What wonder is, though that hyre soore smerte,
 When she forgothe hire owen swete herte ?

X.

This Troilus, in gise of curteysie,
 With hauke on hond, and with an huge route
 Of knyghtes, rood and dide hyre compaynye,

Passynge alle the valeye fer withoute ;
 And ferther wold han riden out of doute
 Ful fayn, and wo was hym to gon so soone,
 But torne he moste, and it was eke to done. 70

XI.

And right with that was Antenor ycome
 Oute of the Grekes oste, and every wight
 Was of it glad, and seyde he was welcome :
 And Troilus, al nere his herte lighte,
 He peyned hym with *al* his fulle myght
 Hym to with-holde of wepyng at the leeste,
 And Antenor he kyste, and made feeste.

XII.

And therwithal he most his leve take,
 And caste his eye upon hire pitously,
 And neer he rood, his cause for to make, 80
 To take hire by the honde al sobrelly :
 And Lorde ! so she gan wepen tendrelly !
 And he ful soft and sleighely gan hire seye,
 ‘ Now hold youre day, and do me not to dye.’

XIII.

With that his curser turned he aboute,
 With face *pale*, and unto Dyomede
 No worde he spak, ne non of al his route ;
 Of whiche the sone of Tideus tooke hede,
 As he that couthe moore than the crede
 In swiche a craft, and by the reyne hire hente, 90
 And Troilus to Troye homwarde he wente.

XIV.

This Dyomede, that ledde hyre by the bridel,
 When that he saugh the folk of Troye awaye,
 Thoughte, 'Al my laboure shal not been on ydel,
 If that Y may, for somewhat shal I seye ;
 For at the werste, it may yit shorte oure weye ;
 I have herde seyde ek, tymes twyes twelve,
 He is a fool that wol foryete hyme-selve.'

XV.

But natheles, this thoughte he wel ynoughe
 That 'certeinliche I am aboute noughte, 100
 If that I speke of love, or mak it tough ;
 For douteles, if she have in hire thoughte
 Hym that I gesse, he may not ben ybrought
 So soone awaye, but I shal fynde a meene,
 That she nat wit as yet shal what I meene.'

XVI.

This Dyomede, as he that koude his goode,
 When this was don, gan fallen forth in speche
 Of this and that ; and axed whi she stood
 In swiche disese, and gan hire ek byseeche
 That if that he eneresse myght or eehe, 110
 With any thyng hyre ese, that she sholde
 Comaunde it hym, and seyde he don it wolde.

XVII.

For troweliche he swor hire as a knyghte,
 That ther nas thyng with whiche he myght hire
 plesa,
 That he nolde don his peyne and al his myght,

To don it, for to don hire hert an ese :
 And preyde hire she wold hire sorwe apese,
 And seyde, ‘Iwis we Grekes kan have joye
 To honouren yow, *as wel as folk of Troye.*’

XVIII.

He seyde ek thus:—‘I woot yow thynketh
 straunge,—

120

No wonder is, for it is to yowe newe,—
 Thaequeyntaunce of this Troyans to chaunge
 For folk of Greece, that ye nevere knewe :
 But wolde nevere God, but if as trewe
 A Greke ye shold amang us *alle* fynde,
 As any Trojan is, and ek as kynde.

XIX.

‘And by the *cause* I swor yow righte lo now
 To ben youre frende and helper to my myghte,
 And for that more acqueyntaunce ek of yow
 Have Ich had than another straunger wight,
 So fro this forth I preye yow, day and nyght,
 Comaundeth me, how sore that me smerte,
 To don al that may like unto youre herte ;

130

XX.

‘And that ye me wolde as youre brother trete,
 And taketh nought my frendeschipe in dispit.
 And though youre sorwes ben for thynges grete,
 Not I nat whi, but out of more respit,
 Myn herte hath for tamende it grete delit ;
 And if I may youre harmes nat redresse,
 I am right sory for youre hevynesse.

140

XXI.

‘ For though ye Trojans with us Grekes wroth
 Han many a day ben, alwey yet, pardé !
 O god of love, in soth, we serven both :
 And for the love of God ! my lady fre,
 Whom so ye hate, as beth not wroth with me ;
 For trewely ther kan no wight yow serve,
 That half so loth youre wreth wolde disserve.

XXII.

‘ And ner it that we been so neigh the tente
 Of Calkas, which that sen us bothe may,
 I wold of thys yow telle alle myn entente, 150
 But this enseled til another day :
 Yeve me youre honde, I am and shal ben ay,
 God helpe me so ! whil that my lif may dure,
 Youre owen, aboven every creature.

XXIII.

‘ Thus seyde I nevere or now to womman borne ;
 For God myn herte as wisly glade so !
 I lovede never womman here beforne,
 As paramoures, ne nevere shal no mo :
 And for the love of God ! beth not my fo,
 Al kan I nought to yow, my lady deere, 160
 Compleyne aright, for I am yit to leere.

XXIV.

‘ And wondreth nought myne owen lady bryghte,
 Though that I speke of love to yow thus blyve ;
 For I have herde or this of many a wighte,

Hath loved thyng he nevere saugh his lyve :
 Ek I am not of power for to stryve
 Ayenis the god of love, but hym obeye
 I wol alwey, and mercy I yow preye.

XXV.

‘ Ther ben so worthy knyghtes in this place,
 And ye so faire, that everich of hem alle 170
 Wol peynen hym to stonden in youre grace ;
 But myght to me so faire a grace falle,
 That ye me for youre servaunt wolde calle,
 So lawely, ne so trewely yow serve
 Nyl non of hem, as I shal til I sterve.’

XXVI.

Criseyde unto that purpos lite answerde,
 As she that was with sorwe oppressed so,
 That, in effect, she nought his tales herde
 But here and ther, now here a worde or two :
 Hire thought hire sorwful herte braste a-two ; 180
 For when she gan hire fader fer espie,
 Wel neigh down of hire hors she gan to sye.

XXVII.

But natheles, she thonkede Dyomede,
 Of alle his travaile and his goode chere,
 And that hym liste his frendschip hyre to bede ;
 And she accepteth it in goode manere,
 And wol do fayn that is hym lief and deere ;
 And trusten hym she wolde, and wel she myghte,
 As seyde she, and from hire hors shalighte.

XXVIII.

Her fader hath hire in his armes ynome, 190
 And twenty tyme he kyste his doughter swete,
 And seyde :—‘ O dere doughter myn, welcome !’
 She seyde ek, she was fayn with hym to mete,
 And stood forth muwet, mylde, and mansuete ;
 But here I leve hire with hire fader dwelle,
 And forth I wol of Troilus yow telle.

XXIX.

To Troye is come this woful Troylus,
 In sorwe aboven alle sorwes smerte ;
 With felon look, and face dispitouse,
 Tho sodeinly doun from his hors he sterte, 200
 And thorwgh his paleys, with a swollen herte,
 To chaumbre he wente, of nothyng took he hede,
 Ne non to hym dar speke a worde for drede.

XXX.

And ther his sorwes, that he spared hadde,
 He yaf an issue large, and ‘ Deth !’ he criede ;
 And in hise throwes, frenetike and madde,
 He curseth Jove, Apollo, and ek Cupide ;
 He curseth Ceres, Bachus, and Cipride,
 His birthe, hymself, his fate, and ek nature,
 And save his lady, every creature. 210

XXXI.

To bedde he goth, and weyleth ther and torneth
 In furie, as doth he Ixion in helle ;
 And in this wyse he neigh til day sojourneth,

But tho bigan his herte alite unswelle,
 Thorough teres, whiche that gonnen up to welle ;
 And pitously he cryed upon Criseyde,
 And to hym-self right thus he spake and seyde.

XXXII.

‘ Where is myn owene lady, lief and deere ?
 Where is hire white breste, where is it, where ?
 Where ben hir armes, and hire eyen clere, 220
 That yesternight this tyme with me were ?
 Now may I wepe allone many a tere,
 And graspe aboute I may, but in this place
 Save a pilow, I fynde naught tembrace.

XXXIII.

‘ How shal I don ? when shal she com ayein ?
 I not allas ! whi lete Ich hire to go ?
 As wolde God Ich hadde as tho ben sleyn !
 O herte myn Criseyde ! O swete fo !
 O lady myn ! that I love and namo,
 To whom for evere mo myn herte I dowe, 230
 Se how I dye ! ye nyl me not rescowe.

XXXIV.

‘ Who seth yow now, my righte lode-sterre ?
 Who sit right now or stante in youre presence ?
 Who kan conforten nowe youre hertes werre ?
 Now I am gon, whom yeve ye audiens ?
 Who speketh for me right now in my absens ?
 Allas ! no wight ; and that is al my care,
 For wel woot I as yvel as I ye fare.

XXXV.

' How shold I thus ten dayes fulle endure
 When I the firste nyght have al this tene? 240
 How *shal* she don ek, sorwful creature?
 For tendrenesse, how shal she thus sustene
 Swiche wo for me? O, pitous, pale, and grene,
 Shal ben youre fresche wommanliche face,
 For langour, er ye torne unto this place.'

XXXVI.

And when he fille in any sloumberynges,
 Anon bygynne he sholde for to grone,
 And dremen of the dredefulleste thynges
 That myghte ben: as mete he were allone
 In place horrible, makynge ay his mone; 250
 Or meten that he was omanges alle
 His enemys, and in hire honde falle.

XXXVII.

And therwithalle his body sholde sterte,
 And with the sterte alle sodeynliche awake;
 And swiche a tremour fele aboute his herte,
 That of the fere his body sholden quake:
 And therwithal he sholde a noyse make,
 And seme as though he sholde falle depe,
 From heigh of loft, and than he wolde wepe,

XXXVIII.

And rewen on hymself so pitously, 260
 That wonder was to here hise fantasye.
 Another tyme he sholde myghtely

Conforte hymself, and seine it was folie,
 So causeles, swiche drede for to drye ;
 And eft bygynne his aspre sorwes newe,
 That every man myghte on his sorwes rewe.

XXXIX.

Who koude telle arighte, or ful discryve
 His wo, his pleynt, his langoure, and his pyne ?
 Nought al the men that han or ben on lyve ;
 Thow redere maist thi-self fulle wele devyne, 270
 That swieh a wo my wit kan not defyne ;
 On ydel for to write it shold Y swynke,
 When that my wit is wery it to thynke.

XL.

On hevене yet the sterres weren seene,
 Although ful pale ywoxen was the moone ;
 And whiten gan the orisounte sheene
 Al esterwarde, as it wonte is to done ;
 And Phebus, with his rosi carte, soone
 Gan efter that to dresse hym up to fare,
 When Troilus hath sente efter Pandare. 280

XLI.

This Pandare, that of al the day byforne
 Ne myght han comen Troilus to see,
 Although he on his hed it hadde sworne ;
 For with the kynge Priam alday was he,
 So that it lay nought in his liberté
 Nowher to gon ; but on the morwe he wente
 To Troilus, when that he for hym sente.

XLII.

For in his herte he koude wel devyne,
 That Troilus al nyght for sorw wooke,
 And that he wolde telle hym of his pyne ; 290
 This knew he wele ynowgh withouten booke ;
 For which to chaumbre streight the wey he tooke,
 And Troilus tho sobrelieh he grette,
 And on the bed ful soone he gan hym sette.

XLIII.

‘ My Pandarus,’ quod Troilus, ‘ the sorwe
 Which that I drye, I may not longe endure ;
 I trow I shal not lyven til to morwe ;
 For whiche I wolde always, on aventure,
 To the devysen of my sepulture
 The fourme, and of my moble thow dispone 300
 Right as the semeth best is *for* to done.

XLIV.

‘ But of the fir and flaumbe funeral,
 In which my body brennen shal to glede,
 And of the feste and pleyes palestral
 At my vigile, I preye the take gode hede
 That that be wel : and offre Mars my stede,
 My swerd, my helme : and, leeve brother decre,
 My shelde to Palas yef, that shyneth clere.

XLV.

‘ The poudre in which myn herte ybrend shal turne,
 That preye I the thow tak, and it conserve 310
 In a vesselle, that men clepeth an urne

Of gold ; and to my lady that I serve,
 For love of whom thus pitouslyche I sterve,
 So yeve it hire ; and do me this pleasaunce,
 To preyen hire kepe it for a remembraunce.

XLVI.

‘ For wel I fele by my maladye,
 And by my dremes now and yoore ago,
 Al certainly that I mot nedes dye :
 The owle ek, which that hette *Ascapילו*,
 Hath efter me shrigh al this nyghtes two ; 320
 And god *Mercurie* ! of me now, woful wreche,
 The soule gide, and when the list it fecche.’

XLVII.

Pandare auswerde and seyde, ‘ Troilus,
 My deere frende, as I have told the yoore,
 That it is folie for to sorwen thus,
 And causeles, for whiche I kan namore ;
 But who so wol nat trowen rede ne lore,
 I kan not sen in hym no remedie,
 But lat hym worchen with his fantasie.

XLVIII.

‘ But, Troilus, I preye the telle me nowe, 330
 If that thow trowe er this that any wight
 Hath loved paramours as wel as thow ?
 Ye, God woot ! and fro many a worthy knyght
 Hath his lady gon, ye, a fourtenyghte,
 And he not yit made halvendel the care ;
 What nede is the to maken alle this fare ?

XLIX.

‘ Syn day by day thow maist thy-selven see
 That from his love, or elles from his wyf,
 A man mot twynnen of necessité,
 Ye, though he love hire as his owen life ; 340
 Yet nyl he with hymself thus make stryfe ;
 For wel thow woost, my leve brother decre,
 That alwey frendes may nought ben ifcere.

L.

‘ How don this folk that seen hire loves wedded
 By frendes myght, as it bitit ful ofte,
 And sen hem in hire spouses bed ybedded ?
 God woot, they take it wysely, faire, and soft ;
 For-whi goode hope halt up hire herte oloft ;
 And for they kan a tyme of sorwe endure,
 As tyme hem hurt, a tyme doth hem cure. 350

LI.

‘ So sholdestow endure, and laten slyde
 The tyme, and fonde to be glad and light ;
 Ten dayes nys so longe nought tabide ;
 And syn she the to comen hath behight,
 She nyl hire heste breken for no wight ;
 For drede the nought, that she nyl finden weye
 To come aycin, my lif, that dorst I leye.

LII.

‘ Thy swevenes ek, and alle swich fantasie
 Dryve oute, and late hem faren to myschaunce ;
 For they procede of thy malencolye, 360

That doth the feele in slepe al this penaunce :
 A straw for alle swevenes signifaunce !
 God help me so, I counte hem nought a bene,
 Ther wot no man aright what dremes mene.

LIII.

‘ For prestes of the temple tellen this,
 That dremes ben the revelacions
 Of Goddes ; and as wel they telle ywis,
 That they ben infernals illusiouns.
 And leches seyn that of complexions
 Proceeden they, or fast, or glotonye ;
 Who woot in-soth thus what they signific ?

371

LIV.

‘ Ek oother seyn, that thorwgh impressions,—
 As if a wight hath fast a thyng in mynde,—
 That therof cometh swiche avisions :
 And oother seyne, as they in bokes fynde,
 That efter tymes of the yere, by kynde,
 Men dreme, and that theffect goth by the moone ;
 But leve no dremen, for it is nought to done.

LV.

Wel worth of dremes ay this olde wyves,
 And, troweliche, ek augurye of thise foweles, 380
 For fere of which men wenen leese hire lyves,
 As ravenes qualm, or schrychyng of thise owlis,
 To trowen on it, bothe fals and foul is ;
 Allas, allas, so noble a creature
 As is a man, shal dreden swich ordure !

LVI.

‘ For which with al myn herte I the besече,
 Unto thi-self that alle this thow foryive ;
 And ryse now up, withouten more speche,
 And lat us cast how forth may best be dryve
 This tyme ; and ek how fresshly we may lyve, 390
 When that she cometh, the whiche shal be right
 soone ;
 God help me so ! thy best is thus to doone.

LVII.

‘ Ris, lat us speke of lusty lif in Troye
 That we han led, and forth the tyme dryve,
 And ek of tyme comynge us rejoye,
 That bryngen shal oure blisse now so bilive ;
 And langour of this twye dayes fyve
 We shal therwith so foryete *or* oppresse,
 That wel unneth it don shal us duresse.

LVIII.

‘ This town is ful of lordes al aboute, 400
 And trewes lasten al this mene-qwyle ;
 Go we pleye us in som lusty route,
 To Sarpedon, not hennes but a myle ;
 And thus thow shalt the tyme wel bygile,
 And dryve it forth unto that blisful morw,
 That thow hire se, that cause is of thi sorwe.

LIX.

‘ Now ris, my dere brother Troilus ;
 For certes it non honour is to the
 To wepe, and in thy bed to jouken thus ;

For treweliche of o thyngge trust to me,— 410
 If thow thus ligge, a day, or two, or thre,
 The folk wol wene that thow for cowardyse
 The feynest sik, and that thow darst not rise.'

LX.

This Troilus answerde, 'O brother deere!
 This knowen folk that han isuffed peyne,
 That though he wepe, and make sorwful cheere
 That feeleth harm and smert in every veyne,
 No wonder is; and though Ich evere pleyne,
 Or alwey wepe, I nam nothyngge to blame,
 Syn I have lost the cause of al my game. 420

LXI.

'But syn of fyne force I moot aryse,
 I shal aryse, as soone as ever Y may;
 And God, to whom myn herte I sacrificse,
 So send us hastely the tenthe day;
 For was ther nevere fowl so fayn of May
 As I shal ben, when that she cometh in Troye,
 That cause is of my tormente and my joye.

LXII.

'But whider is thi reed,' quod Troilus,
 'That we may pleye us best in al this town?
 'By God, my conseile is,' quod Pandarus, 430
 'To ryde and pleyen us with kynge Sarpedoun.'
 So longe of this they speken up and down,
 Til Troilus gan at the last to assente
 To ryse, and forth to Sarpedon they wente.

LXIII.

This Sarpedoun, as he that honourable
 Was evere hys lyve, and ful of heigh prowesse,
 With al that myght yserved ben on table,
 That deynté was, al cost it grete rychesse,
 He fed hem day by day; that swich noblesse
 As seyden bothe the meest and ek the leste, 440
 Was nevere er that day wiste at any feeste.

LXIV.

Nor in this world ther is noon instrumente
 Delicious, thorough wynde, or touch on corde,
 As fer as any wight hath ever wente,
 That tonge telle, or herte may recorde,
 But at that feste, it nas wel herd acorde
 Nof ladyes ek so faire a compaignye
 On daunce, er tho, was nevere yseyn with eye.

LXV.

But what availleth this to Troylus,
 That for his sorwe nothyng of it roughete, 450
 But evere in oon, as herte pietus,
 Ful bisily Criseyde his lady soughte?
 On hire was evere al that his herte thoughte,
 Now this, now that, so faste ymagynynge,
 That glad, ywis, kan hym no feestyng.

LXVI.

Thise laydyes ek that at this feeste ben,
 Syn that he saugh his lady was awaye,
 It was his sorwe up-on hem for to sen,

Or for to here on instrumentz so pleye ;
 For she that of his herte bereth the keye, 460
 Was absente, lo ! this was his fantasie,
 That no wight scholde maken melodye.

LXVII.

Nor ther nas houre in al the day or nyghte,
 When he was ther as no *man* myght hym here,
 That he ne seyde, ‘ O lufsom lady bryghte,
 How have ye faren syn that ye were here ?
 Welcom, ywys, myn owen lady deere !’
 But, walaway ! al this nas *but* a maze,
 Fortune his howen entended bet to glaze.

LXVIII.

The lettres ek that she of olde tyme 470
 Hadde hym isente, he wold allone rede
 An hondreth sythe attwexen none and prime,
 Refigurynge hire shap, hire wommanhede,
 Withinne his herte, and every worde or dede
 That passed was ; and thus he droofe tan ende
 The ferthe day, and seyde he wolde wende.

LXIX.

And seyde, ‘ Leve brother Pandarus,
 Intendestow that we shal here bileve,
 Til Sarpedon wol forth congeyen us ?
 Yet were it fayrer that we toke oure leve : 480
 For Goddes love, lat us now soone at eve
 Oure leve take, and homwarde lat us torne ;
 For trewely I nyl not thus sojorne.’

LXX.

Pandare answerde, ‘ Be we comen hyder
 To fecchen fir and rennen hom ayein ?
 God help me so ! I kan *nat* tellen whider
 We myghte goon, if I shal sothely seyn,
 Ther any wight is of us moore feyn
 Than Sarpedon ; and *if* we hennes hye
 Thus sodeynly, I holde it vilenye. 490

LXXI.

‘ Syn that we seyden that we wolde bleve
 With hym a wowke, and now thus sodeynly
 The ferthe day to take of hym oure leve,
 He wolde wondren on it trewely :
 Lat us holden forth oure purpos fermely ;
 And sen that ye byhighten hym to bide,
 Holde forward now, and efter lat us ride.’

LXXII.

This Pandarus, with *alle* peyne and wo
 Made hym to dwelle ; and at the wekes end,
 Of Sarpedon they tok hire leve tho, 500
 And *on* hire weye they spedden hem to wende :
 Quod Troilus, ‘ Now Lorde me graee sende,
 That I may fynden at myn home comynge,
 Criseyde comen !’ and therwith gan he synge.

LXXIII.

‘ Ye, *hasil-wode* !’ thoughte this Pandare,
 And to hymself ful softly he seyde,
 ‘ God woot, refreyden may this hoot fare,

Er Calkas sende Troilus Criseyde !
 But natheles he japede thus and seyde,
 And swor, iwis, his herte hym wel bihighte, 510
 She wolde com as soone as evere she myghte.

LXXIV.

When they unto the paleys were ycomen
 Of Troilus, they doun of hors alighte,
 And to the chaumbre hire wey than han they
 nomen ;
 And into tyme that it gan to nyghte,
 They spaken of Criseyde, the lady brighte ;
 And efter this, when that hem bothe leste,
 They spedde hem fro the soper unto reste.

LXXV.

O morw, as soone as day bigan to clere,
 This Troilus gan of his slepe to breyde, 520
 And to Pandare, his owen brother deere,
 ‘ For love of God,’ ful pitously he preyede,
 ‘ As go we sene the paleys of Criseyde ;
 For syn we yit may have namoore feeste,
 So lat us seen hire paleys at the leste.’

LXXVI.

And therwithalle, his meynye for to blende,
 A cause he fonde in towne for to go,
 And to Criseydes hous they gonnen wende ;
 But Lorde ! this cely Troilus was wo !
 Hym thought his sorwful herte braste atwo ; 530
 For when he saugh hire dorres spered alle,
 Wel neigh for sorwe adoun he gan to falle.

LXXVII.

Therwith, when he was ware, and gan biholde
 How shet was every wyndow of the place,
 As frost hym thoughte his *herte* gan to colde ;
 For which, with chaunged deedlich pale face,
 Withouten word, he forth bygan to pace ;
 And as God wolde he gan so faste ryde,
 That no wight of his contenance espiede.

LXXVIII.

Than seyde he thus :—‘ O paleys desolat ! 540
 O hous of housses, whilom beste yhight !
 O paleys empti and disconsolat !
 O thow lanterne, of which queynte is the light !
 O payleys, whilom day, that now ert nyght !
 Wel oughtestow to falle, and I to dye,
 Syn she is wente that wonte was us to gye.

LXXIX.

‘ O paleys, whilom crowne of houses alle,
 Enlumyned with sonne of alle blisse !
 O rynges, fro which the ruby is out falle !
 O cause of wo, that cause has ben of blisse ! 550
 Yit syn I may no bet fayn wold I kysse
 Thi colde dores, dorst I for this route ;
 And farewel shryne, of which the seint is oute !

LXXX.

Therwith he caste on Pandarus his ye,
 With chaunged face, and pitous to beholde ;
 And when he myght his tyme aright espie,

Ay as he rode, to Pandarus he tolde
 His newe sorwe, and ek his joyes olde,
 So pitously, and with so dede an hewe,
 That every wight myght on his sorwes rewe. 560

LXXXI.

Fro thennes-forth he rydeth up and down,
 And every thyng com hym to remembraunce,
 As he rode forth by the places of the town,
 In which he whilom had alle his plesaunce:—
 ‘Lo! yonder saugh Ich myn owen lady daunce;
 And in that temple, with hire eyen clere,
 Me caughte firste my righte lady deere.

LXXXII.

‘And yonder have I herd ful lustili
 My deere herte laugh; and yonder pleye
 Saugh Ich hire oones ek ful blisfully; 570
 And yonder oones to me gan she seye
 ‘Now goode swete! love me wel, I preye;
 And yonder so gladly gan she me beholde,
 That to the deth myn herte is to hir holde.

LXXXIII.

‘And at that corner in the yonder *house*,
 Herde I myn alderlevest lady deere,
 So wommanly, with vois melodyous,
 Syngen so wel, so goodely and so clere,
 That in my soule yit me thynketh Ich here
 The blisful sown; and in that yonder place 580
 My lady first me tooke unto hire grace.’

LXXXIV.

Than thought he thus, 'O blisful lord Cupide!
 When *I* the processe have in memorye,
 How thow me hast weryed on every syde,
 Men myght a book mak of it lyk a story!
 What nede is thee to seke on me victorye,
 Syn I am thyn, and holly at thi wille?
 What joye hastow thyn owene folk to spille?

LXXXV.

'Wel hastow, *lord*, ywroke on me thyn ire,
 Thow myghty god! and dredeful for to greve!
 Now mercy, god! thow woost wel I desire 591
 Thy grace moost, of alle lustes leeve!
 And lyve and dye I wol in thi beleve;
 For which I naxe in guerdon but a boone,
 That thow Criseyde ayein me sende soone.

LXXXVI.

'Destreyne hire herte as faste to retourne,
 As thow doost myn to longen hire to see;
 Than woot I wel that she nyl naught sojourne:
 Now blisful lorde! so cruwel thow ne be
 Unto the blode of Troye, I preye the, 600
 As Juno was unto the blode Thebane,
 For which the folk of Thebes caught hire bane.'

LXXXVII.

And efter this he to the yates wente,
 Ther as Criseyde oute rode a ful goode pas,
 And up and doun ther made he many a wente,

And to himself ful oft he seyde, ‘Allas!
 Fro hennes rod my blisse and my solas!
 As wolde blisful God now for his joye,
 I myght hire seen ayein com into Troye!’

LXXXVIII.

‘And to the yonder hille I gan hire gyde; 610
 Allas! and ther I took of hire my leeve;
 And yonde I saugh hire to hire fader ryde,
 For sorwe of which myn herte shal to-cleve;
 And hider hom I com when it was eve;
 And here I dwelle, out-cast from alle joye,
 And shal, til I may seen her eft in Troye.’

LXXXIX.

And of hym-self ymagyned he ofte,
 To be defet, and pale, and waxen lesse
 Than he was wont, and that men seyde sotte,
 ‘What may it be? who kan the sothe gesse, 620
 Why Troylus hath alle this hevynesse?’
 And al this nas but his melencolye,
 That he hadde of hym-self swich fantasye.

XC.

Another tyme ymagynen he wolde,
 That every wyght that wente by the weye
 Hadde of him routhe, and that they seyne sholde,
 ‘I am right sory, Troilus wol deye.’
 And thus he drof a day yit forth or tweye,
 As ye han herde; swich lyf right gan he lede,
 As he that stood bitwixen hope and drede. 630

XCI.

For which hym liked in his songes shewe
 Thencheson of his wo, as he best myghte,
 And made a song of wordes but a fewe,
 Somwhat his woful herte for to lighte :
 And when he was from every mannes sighte,
 With softẽ vois, he of his lady deere,
 That absent was, gan synge as ye may here.

XCII.

‘ O sterre, of which I lost have alle the lighte,
 With herte soore, wel oughte I to bewaylle,
 That evere derk in tormente, nyght by nyght, 640
 Towarde my deth, with wynde in steere I saylle ;
 For whiche the tenthe nyght if that I faile
 The gidyngẽ of thi bemes bright an houre,
 My ship and me Caribdes wol devoure.’

XCIII.

This songe when he thus songen hadde soone
 He fel ayein into his sikes olde ;
 And every nyght, as was his wone to doone,
 He stood, the bryghtẽ mone to beholde ;
 And al his sorwe he to the moone tolde,
 And seyde, ‘ Iwis, when thow ert horned newe 650
 I shal be glad, if alle the world be trewe.

XCIV.

‘ I saugh thyne hornes old ek by the morwe,
 Whan hennes rode my rightẽ lady deere,
 That cause is of my torment and my sorwe ;

For which, O bryghte *Lucina* the cleere!
 For love of God! renne fast aboute thy spere;
 For when thyne hornes newe gynnen sprynge,
 Than shal she come that may my blisse brynge.'

XCV.

The day is moore, and longer evere nyght
 Than they ben wonte to be, hym thoughte tho; 666
 And that the sonne wente his course unright,
 By longer weye than it was wonte to go;
 And seyde, 'Iwis, me dredeth everemo
 The sonnes sone, Pheton, be on lyve,
 And that his fader carte amys he dryve.'

XCVI.

Upon the walles fast ek wold he walke,
 And on the Grekes oost he wolde se;
 And to hymself right thus he wolde talke:—
 'Lo, yonder is myn owene lady free,
 Or elles yonder, ther the tentes bee, 670
 And thennes cometh this eyr that is so soote,
 That in my soule I feele it doth me boote.

XCVII.

'And hardyly, this wynde that moore and moore
 Thus stoundemele encresseth in my face,
 Is of my ladys depe sykes sore;
 I preve it thus, for in noon nother place
 Of al this town, save oonly in this space,
 Feele I no wynde that souneth so lyke peyne;
 It seith 'Allas! whi twynned be we tweyne?'

XCVIII.

This longe tyme he dryveth forth right thus, 680
 Tille fully passed was the nynthe nyght ;
 And ay bysyde hym was this Pandarus,
 That bisily dide al his fulle myght
 Hym to confort, and mak his herte light ;
 Yevynge hym hope alweye, the tenthe morwe
 That she shal come, and stenten al his sorwe.

XCIX.

Upon that other syde eke was Criseyde
 With wommen few omange the Grekes stronge,
 For which ful oft a day, 'Allas!' she seyde,
 'That I was borne! wel may myn herte longe
 After my deth, for now lyve I to longe ; 691
 Allas! and I ne may it not amende,
 For now is wers than evere yit I wende.

c.

'My fader nyl for nothyng do me grace
 To gon ayein, for nought I kan hym queme ;
 And if so be that I my terme pace,
 My Troilus shal in his herte deme
 That I am fals, and so it may wel seme.
 Thus shal Ich have unthonke on every syde ;
 That I was borne, so walawey the tyde ! 700

CI.

'And if that I me put in jupartye
 To stele away by nyghte, and it befall
 That I be caught, I shal be hold a spye ;

Or elles, lo ! this drede I moost of alle,
 If in the hondes of som wreche I falle,
 I nam but lost, al be myn herte trewe :
 Now myghty God, thow on my sorwe rewe !'

CII.

Ful pale ywoxen was hire brighte face,
 Her lymes lene, as she that al the day
 Stood when she dorste, and loked on the place ⁷¹⁰
 Ther she was borne, and she dwelte had ay,
 And al the nyght wepynge, allas ! she lay ;
 And thus, despeyred oute of alle cure,
 She ledde hire lyf, this woful creature.

CIII.

Ful oft a day she sighte ek for destresse,
 And in hire-self she wente ay pourtreynge
 Of Troilus the grete worthinesse,
 And alle his goodely wordes recordynge,
 Syn first the day hire love bigan to sprynge ;
 And thus she sette hire woful herte afire, ⁷²⁰
 'Thorough remembraunce of that she gan desire.

CIV.

In al this world ther nys so cruwel herte,
 That hire hadde herd compleyne in hire *sorwe*,
 That nold han wopen for hire peynes smerte ;
 So tendrely she wepte, bothe eve and morwe,
 Hire nedede non teris for to borwe ;
 And this was yet the werste of al hyre peyne,
 Ther was no wight, to whom she dorst hire pleyne.

CV.

Ful *rewfully* she loked upon Troye,
 Byhelde the toures heigh, and ek the hallis ; 730
 ‘ Allas !’ quod she, ‘ the plesaunce and the joye,
 The which that now al tourned into galle is,
 Have Ich hadde oft withinne tho yonder wallis !
 O Troilus, what dostow now ?’ she seyde ;
 ‘ Lord ! whether thow thynke yet upon Criseyde !

CVI.

‘ Allas ! I *nadde* ytrowed on youre lore,
 And wente with yow, as ye me redde or this,
 Thanne hadde I now not siked half so sore :
 Who myght han seyde, that I hadde don amys,
 To stele away with swich oon as he is ? 740
 But al to late cometh the latuarye,
 When men the cors unto the grave *carye*.

CVII.

‘ To late is now to speke of that matere,
 Prudens, allas ! oon of thyn eyen thre
 Me lakked alwey, er that I com here :
 On tyme ypassed wel remembred me,
 And present tyme ek koude Ich wel ysee ;
 But future tyme, er I was in the snare,
 Koude I not sen ; that causeth now my care.

CVIII.

‘ But natheles, bitide what bitide, 750
 I shal to morw at nyght, by est or weste,
 Out of this oost stele, on som maner side,

And gon with Troilus, wher as hym leste ;
 This purpos wol I hold, and this is beste,
 No fors of wikked tonges janglerye,
 For evere on love han wreches hadde envye.

CIX.

‘ For who so wole of every worde tak hede,
 Or rulen hym by every wightes wit,
 Ne shal he nevere thryven, out of drede ;
 For that *that* som men blamen evere yit,
 Loo ! other maner folk comenden it ;
 And as for me, for alle swich variaunce,
 Felicité clepe I my suffisaunce.

760

CX.

‘ For which, withouten any wordes moo,
 To Troye I wol, as for conclusion.’
 But, God it woot ! er fully monthes two,
 She was ful fer fro that entencioun !
 For bothe Troilus and Troyes town
 Shal knotles thoroughout hire herte slyde,
 For she wol take a purpos for tabide.

774

CXI.

This Dyomede, of whom yow telle I gan,
 Goth now withinne hymself ay arguynge,
 With al the sleighte and alle that evere he kan,
 How he may best with shortest tarynge,
 Into his net Criseydes herte brynge ;
 To this entente he koude nevere fyne,
 To fisshen hire he layde out hook and lyne.

CXII.

But natheles, wel in his herte he thoughte,
 That she nas nat without a love in Troye,
 For nevere sithen he hire thennes broughte, 780
 Ne koude he sen her laughe, or maken joye ;
 He nyst how best hire *herte* for tacaoie,
 But for tasaie, he seyde ‘ nought it ne greveth,
 For he that nought nasayeth, nought nacheveth.’

CXIII.

Yet sayde he to hymself upon a nyght,
 ‘ Now am I nought a fool, that woot wel how
 Hire wo for love is of another wight,
 And hereupon to gon asaye hire nowe,
 I may wel wete it nyl not ben my prow ;
 For wyse folk in bokes it expresse, 790
 Men shal nought wowe a wight in hevynesse.

CXIV.

‘ But who-so myghte wynnen swich a floure
 From hym for whom she morneth nyght and day,
 He myghte seyn he were a conqueroure.’
 And right anon, as he that bolde was ay,
 Thought in his herte, ‘ happe how happe may,
 Al shold I dye, I wol hire herte seche ;
 I shal namore lesen but my speche.’

CXV.

This Dyomede, as bokes us declare,
 Was in his nedes prest and corageous, 800
 With stierne vois, and myghty lymes square,

Hardy, testif, strong, and chivalrus
 Of dedes, like his fader Tydeus ;
 And som men seyn he was of tonge large,
 And heire he was of Calcidoyne and Arge.

CXVI.

Criseyde mene was of hire stature
 Therto of shap, of face, and ek *of* cheere,
 Ther myghte be no fairer creature ;
 And ofte tyme this was hire manere,
 To gon ytressed with hire heres clere 819
 Doun by hire coler, at hire bak byhynde,
 Which with a threde of gold she wolde bynde.

CXVII.

And save hire browes joyneden ifeere,
 Ther nas no lakke in ought I kan esprien ;
 But for to speken of hyre eyen clere,
 Loo ! trewely they writen that hire seyen,
 That Paradys stood formed in hire yen ;
 And with hire riche beauté everemore
 Strof love in hire, ay whiche of hem was moore.

CXVIII.

She sobre was, ek symple, and wyse withalle, 820
 The best ynorissed ek that myghte be,
 And goodely of hire speche in general,
 Charytable, estatliche, lusty, and free ;
 Ne neveremoo ne lakked hire pyté,
 Tendre herted, slidyng of corage ;
 But trewely I kan not telle hire age.

CXIX.

And Troilus wel woꝝen was in heichte,
 And complet formed by proporcioun,
 So wel that Kynde it nought amenden myghte;
 Yong, fresshe, strong, and hardy as lyon; 830
 Trew as steele in ech condicioun;
 On *of* the best enteched creature,
 That is or shal, while that the world may dure.

CXX.

And, certainly, in story it is yfounde,
 That Troilus was nevere unto no wight,
 As in his tyme, in no degré secunde
 In during do, that longeth to a knyghte;
 Al myght a geaunt passen hym of myght,
 His herte ay with the firste and with the beste
 Stod paregal, to dure do that hym leste. 840

CXXI.

But for to tellen forth of Dyomede:—
 It fel, that efter on that tenthe day
 Syn that Cryseyde out of the cité yede,
 This Dyomede, as fressh as braunche in May,
 Com to the tente ther as Crisseyde lay,
 And feyned hym with Calkas han to doon;
 But what he mente I shal yow tellen soone.

CXXII.

Criseyde, at shorte wordes for to telle,
 Welcomed hym, and down by hire hym sette,
 And he was ethe ynough to maken dwelle; 850

And efter this, withouten longe lette,
 The spices and the wyn men forth hem fette,
 And forth they speke of this and that yfeere,
 As frendes don, of whiche som shal ye here.

CXXIII.

He gan firste fallen of the werre in speche
 Bytwyxen hem and the folk of Troye toun,
 And of thassege he gan ek hire beseche
 To tellen him what was hire opinyoun :
 Fro that demaunde he so descendeth doun
 To axen hire if that hire straunge thoughte 860
 The Grekis gyse, and werkes that they wroughte?

CXXIV.

And whi hire fader tarieth so longe
 To wedden hire unto som worthy wighte ?
 Criseyde that was in hire peynes stronge,
 For love of Troylus, hire owene knyghte,
 Als ferforthe as she konnyng hadde or myght,
 Answerde hym tho ; but, as of his entente,
 It semede not she wiste what he mente.

CXXV.

But, natheles, this ilke Dyomedes
 Gan in hymself assure, and thus he seyde :— 870
 ‘ If Ich arighte have taken of yow hede,
 Me thynketh thus, O lady myn Crisseyde !
 That, syn I firste hond on youre bridel layde,
 When ye out com of Troye by the morwe,
 Ne koude I nevere sen yow but in sorwe.

CXXVI.

· Kan I not seyn what may the cause be,
 But if for love of som Troyan it were ;
 The which right soore wolde athynken me,
 That ye for any wighte that dwelleth there,
 Sholden spille a quarter of a teere, 880
 Or pitously youre-selven so bygile ;
 For dredeles it is nought worth the while.

CXXVII.

‘ The folk of Troye, as who seith alle and some,
 In prison ben, as ye youre-selven see ;
 Fro thennes shal not oon on lyve come,
 For al the gold atwixen sonne and see ;
 Trusteth wel, and understondeth me,
 Ther shal not oon to merey gon on lyve,
 Al were he lord of worldes twyves fyve.

CXXVIII.

‘ Swich wreeche on hem for fecchyng of Eleyne
 Ther shal ben take, er that we hennes wende, 891
 That Manes, which that goddes ben of peyne,
 Shal ben agaste that Grekes wol hem shende ;
 And men shul drede, unto the worldes ende
 From hennesforth, to raysshyn any queene,
 So cruel shal our wreeche on hem be seene.

CXXIX.

‘ And but-if Calkas lede us with ambages,
 That is to seyn, with dowble wordes slye,
 Swich as men elepe ‘ a worde with two visages,’

Ye shal wel knowen that I nought ne lye, 900
 And al this thyng right sen it with youre ye,
 And that anoon, ye nyl not trow how soone,
 Now taketh hede, for it is for to doone.

CXXX.

‘ What! wene ye youre wyse fader wolde
 Have yeven Antenor for yow anoon,
 If he ne wiste that the eité sholde
 Destrued ben? why, nay! So mot I gon!
 He knewe ful wel ther *shal* not seapen oon
 That Trojan is; and for the grete feere,
 He dorste not ye dwelte lenger there. 910

CXXXI.

‘ What wol ye moore, lufsom lady deere?
 Late Troye and Trojan fro youre herte pace;
 Dryve oute that bittre hope, and make goode chere,
 And clepe ayein the beauté of youre face,
 That ye with salte teeris so deface,
 For Troye is brought in swich a jupartye,
 That it to save is now no remedye.

CXXXII.

‘ And thenketh wel, ye shal in Grekes fynde
 A moore parfite love, or it be nyght,
 Thanne any Trojan is, and moore kynde, 920
 And bet to serven yow wol don his myght;
 And if ye vowchesaufe my lady bryghte,
 I wol ben he to serven yow me-selve,
 Ye! levere than ben a lord of Grekes twelve.’

CXXXIII.

And with that worde he gan to wexen rede,
 And in his speche a litel *while* he quooke,
 And caste aside a litel with his hed,
 And stynte a while; and efterwarde he wooke,
 And sobreliehe on hire he threw his looke,
 And seyde, ' I am, albeit yow no joye, 930
 As gentil man as any wighte in Troie.

CXXXIV.

' For if my fader Tydeus,' he seyde,
 ' Ylived hadde, Ich hadde ben or this,
 Of Calcidoyne and Arge a kyng, Criseyde;
 And so hope I that I shal yit, ywys:
 But he was slayne, allas! the moore harme is,
 Unhappilye at Thebes al to rathe,
 Polymyte, and many a man to scathe.

CXXXV.

' But herte myn! syn that I am youre man,
 And ben the firste of whom I seehe grace, 940
 To serve yow as hertely as I kan,
 And evere shal, while I to lyve have space,
 So er that I departe out of this place,
 Ye wol me graunte that I may to morwe,
 At better layser telle yow my sorwe.'

CXXXVI.

What sholde I telle hise wordes that he seyde?
 He spake inowgh for a day atte meeste;
 It preveth wel he spak so, that Criseyde

Graunted on the morwe at his requeste,
 For to speken with hym atte leste, 950
 So that he nolde speke of swiehe matere ;
 And thus she to hym seyde, as ye mow here,

CXXXVII.

As she that hadde hire herte on Troilus
 So faste, that ther may it noon arace ;
 And straungely she spak and seyde thus :—
 ‘ O Diomedé, I love that ilke place
 Ther I was borne ; and, Joves, for his grace
 Delyvere it soone of alle that doth it care !
 God for thi myght so lene it wel to fare !

CXXXVIII.

‘ That Grekes wolde hire wrath on Troye wreke,
 If that they myght, I know it wel, ywis ; 961
 But it sehal nought byfallen as ye speke ;
 And God toforne, and ferther over this,
 I woot my fader wyse and redy is,
 And that he me hath bought, as ye me tolde,
 So deere I am the more unto hym holde.

CXXXIX.

‘ That Grekes ben of heigh condicioun,
 I wot ek wel ; but certein men shal fynde
 As worthy folk withinne Troye town,
 As konnyngé, as parfite, and as kynde, 970
 As ben betwyxen Orcades and Inde ;
 And that ye koude wele youre lady serve,
 I trow ek wel hire thonke for to desserve.

CXL.

‘ But as to speke of love, iwis,’ she seyde,
 ‘ I had a lord to whom I wedded was,
 He whos myn herte al was til that he *dēyde* ;
 And other love, as help me now Pallas !
 Ther in myn herte nys, ne nevere was ;
 And that ye ben of noble and heigh kynrede,
 I have wel herd it tellen, out of drede. 980

CXLI.

‘ And that doth me to han so grete a wonnder,
 That ye wol scornen any womman so ;
 Ek, God woot, love and I ben fer asonder ;
 I am disposed bet, so mot I go,
 Unto my deth to pleyne and maken wo ;
 What I shal efter done I kan not seye,
 But trewelich as yet me luste not pleye.

CXLII.

‘ Myn herte is now in tribulacion,
 And ye in armes bysi day *by* day ;
 Here-efter whan ye wonnen han the town, 990
 Paraunter than, so it happen may,
 That when I se that I nevere er sey,
 Thanne wol I werke that I never er wroghte ;
 This word to yow ynough suffisen oughte.

CXLIH.

‘ To morwe eke wol I speke with yow fayne,
 So that ye touchen naught of this matere ;
 And when yow luste, ye may com here ayeynne,

And er ye gon, thus muche I seye yow here ;—
 As helpe me Pallas, with hire heres clere,
 If that I sholde of any Greke han routhe, 1000
 It sholde be youre-selven, be my trouthe !

CXLIV.

‘ I say not therefore that I wol yow love,
 Ny say not nay ; but, in conelusioun,
 I mene wele, by God that sitt above !’
 And therwithal she caste hire eyen down,
 And gan to syke, and seyde, ‘ O Troye town !
 Yet bid I God, in quiete and in reste
 I may yow sen, or do myn herte kreste !

CXLV.

But in effect, and shortly for to seye,
 This Diomedes alle freschly newe ayein 1010
 Gan presen on, and fast hire merey preye ;
 And efter this, the sothe for to seyne,
 Hire glove he toke, of wiche he was ful fayne ;
 And, finally, when it was woxen eve,
 And alle was wel, he roos and tooke his leve.

CXLVI.

The brighte Venus folwed and ay taughte
 The wey ther brode Phebus doun alighte ;
 And Cynthea hire char hors over raughte,
 To whirle out of the Leon, if she myghte ;
 And Signifer his candels sheweth brighte, 1020
 When that Criseyde unto hire bedde wente,
 In-with hire fadres faire bryghte tente.

CXLVII.

Retournynge in hir soule ay up and doun
 The wordes of this sodeyn Diomede,
 His grete estate, and peril of the town,
 And that she was allon, and hadde nede
 Of frendes help; and thus bygan to brede
 The cause whi, the sothe for to telle,
 That sche tok fully the purpos for to dwelle.

CXLVIII.

The morwen com, and gostly for to speke, 1030
 This Diomede is com unto Criseyde;
 And shortly, leste that ye my tale *breke*,
 So wel he for hymselfe spake and seyde,
 That alle hire sykes soore adown he layde;
 And finaly, the sothe for to seyne,
 He refte hire of the grete of al hire peyne.

CXLIX.

And efter this, the storrye telleth us,
 That she him yaf the faire baye steede,
 The whiche she ones wan of Troilus;
 And eke a broch (and that was litel nede) 1040
 That Troilus was, she yaf this Diomede;
 And ek the bet from sorw hym to releve,
 She made hym were a pensel of hire sleve.

CL.

I fynde ek in stories elleswhere,
 When thorgh the body hirte was Dyomede
 Of Troilus, tho wepte she many a teere,

When that she saugh hise wyde woundes blede,
 And that she toke to kepen hym good hede,
 And for to helen hym of his sorwes smerte,
 Men seyn, I not, that she yaf hym hire herte. 1050

CLI.

But trewelyche, the storye telleth us,
 Ther made nevere womman more wo
 Than she, when that she falsede Troylus ;
 She *seyde*, ‘ Allas ! for now is clene ago
 My name of trouthe in love for everemo ;
 For I have falsed oon the gentileste
 That evere was, and oon the worthyeste.

CLII.

‘ Allas ! of me unto the worldes ende
 Shal neither ben ywriten nor ysonge
 No good worde, for this bokes wol me shende :
 Irolled schal I ben on many a tonge ; 1061
 Thoroughout the world my belle schal be ronge ;
 And wommen most wol haten me of alle ;
 Allas ! that swich a cas me sholde falle !

CLIII.

‘ They wol seyn, in as muche as in me is,
 I have hem don dishonoure, walaway !
 Al be I not the firste that dide amys,
 What helpeth that to don my blame away ?
 But syn I se ther is no better way,
 And that to late is now for me to rewe, 1070
 To Dyomede algate I wol be trewe.

CLIV.

‘ But, Troilus, syn I no bettre may,
 And syn that thus departen ye and I,
 Yet preye *I* God so yeve yow right good day;
 As for the gentileste trewely,
 That evere *Y* say, to serven faithfully,
 And beste kan ay his *lady* honour kepe ;’
 And with that word she braste anon to wepe.

CLV.

‘ And certes, yow to haten shal I nevere,
 And frendes love, that shal ye han of me, 1080
 And my goode worde, al shold I lyve evere ;
 And trewely I wol *right* sory be,
 For to sen yow in adversité ;
 And giltelees I wot wel I yow leeve,
 And alle shal passe, and thus tak I my leve.’

CLVI.

But trewely how longe it was betweyne,
 That she forsoke hym for this Dyomede,
 Ther is non auctour telleth it, I wene ;
 ‘ Tak every man now to his bokes hede,
 He shal no time fynden, out of drede ; 1090
 For though that he bigan to wow hire soone,
 Er he hire wan, yet was there more to doone.

CLVII.

Ne me ne list this sely womman chyde
 Ferther thanne the storie wol devyse ;
 Hire name, alas ! is *publyshed* so wyde,

That for hire gilte it ought ynough suffise ;
 And if I myght excuse hire any wyse,
 For she so sory was for *hire* untrouthe,
 Iwis I wold excuse hire yet for routhe.

CLVIII.

This Troilus, *as* I before have tolde, 1100
 Thus dryveth forth as wel as he hathe myght ;
 But ofte was his herte hote and colde,
 And namely that ilke nynte nyght,
 Whiche on the morwe she hadde hym byhight
 To com ayeyn : God woot, ful litel reste
 Hadde he that nyght ! nothyng to slepe hym leste.

CLIX.

The laurer-crowned Phebus, with his hete
 Gan in his course ay upwarde as he wente,
 To warmen of the este se the waves wete,
 And Nysus doughter song, with fressh entente,
 When Troilus his Pandare efter sente ; 1111
 And on the walles of the town thei pleyde,
 To loke if they kan sen ought of Criseyde.

CLX.

Til it was none they stode for to se
 Who that ther come, and every manere wight
 That com fro fer, they seyden it was she,
 Til that thei koude knowen hym aright :
 Now was his herte dul, now was it light,
 And thus bijaped stonden for to stare,
 Aboute nought, this Troilus and Pandare 1120

CLXI.

To Pandarus this Troilus tho seyde,
 ' For ought I woot, byfor noon sykerly,
 Into this town ne cometh not here Criseyde ;
 She hath ynough to doen, hardily,
 To wynnen from hire fader, so trow I ;
 Hire olde fader wol yet make hire dyne
 Er that she go, God yeve his herte pyne !'

CLXII.

Pandare answard, ' It may wel be certein,
 And forthy lat us dyne, I the beseche,
 And after noon than maistow com ayein : ' 1130
 And hom they go, withouten moore speche,
 And comen ayein ; but longe may they seche,
 Er that thei fynde that they efter gape ;
 Fortune hem bothe thenketh for to jape.

CLXIII.

Qued Troilus, ' I se wel now that she
 Is taried with hire olde fader so,
 That, er she come, it wol neigh even be.
 Come forth, I wol unto *the* yate go ;
 These portours ben unkennynge everemo,
 And I wol done hem holden up the yate, 1140
 As nought ne were, although she come late.'

CLXIV

The day goth fast, and efter that cometh eve,
 And yet com nought to Troilus Criseyde ;
 He loketh forth by hegge, by tre, by greve,

And fer his hed over the walle he layde,
 And at the laste he torned hym, and seyde,
 ‘ By God, I wot hire menynging now, Pandare !
 Almost iwys al newe is my care.

CLXV.

‘ Now, douteles, this lady kan hire good ;
 I wote she meneth riden prively ; 1150
 I comende hire wysdom, by myn hode !
 She wol not maken peple nyceely
 Gaure on hire when that she comth ; but softly
 By nyght into the town she thenketh ride,
 And dere brother thenke not longe tabide,

CLXVI.

‘ We han nought elles for to don, iwys ;
 And Pandarus, now woltow trowen me ?
 Have here my trouthe, I se hire ! yonde she is !
 Heve up thyn eyen man, maystow not se ?’
 Pandare answerde, ‘ Nay, so moot I the ! 1160
 Al wronge, by God ! what seistow man ? wher arte ?
 That I se yonde is but a fare carte.’

CLXVII.

‘ Allas ! thow saist right soth,’ quod Troilus ;
 ‘ But hardely it is not al for nought,
 That in myn herte I now rejoysse thus,
 It is ayenis som good, I have a thought ;
 Not I not how, but sen that I was wroughte,
 Ne felt I swich a confort, dar I seye ;
 She comth to nyght, my life that dorste I lye !’

CLXVIII.

Pandare answerd, ' It may be wel ynough,' 117
 And helde with hym of al that ever he seyde,
 But in his herte he thought, and softly lough,
 And to hymself ful sobrelieche he seyde,
 ' From hasel woode, ther jolye Robin pleyde
 Shal com al that that thow abydest here !
 And farewel al the snowgh of ferne yere !'

CLXIX.

The wardeyn of the yates gan to calle
 The folk which that withoute the yates were,
 And bad hem dryven in hire bestes alle,
 Or al the nyght they moste bleven there ; 1180
 And fer withinne the nyght, with many a teere,
 This Troilus gan homwarde for to ride,
 For wel he seth it helpeth nought tabyde.

CLXX.

But natheles, he gladded hym in this,
 He thoughte he mysaccounted hadde his day,
 And seyde, ' I understonde have al amys,
 For thilke nyght I laste Criseyde seye,
 She seyde, ' I shal ben here, if that I may,
 Er that the moone, O deere herte swete,
 The Leon passe oute of this Ariete ;' 1190

CLXXI.

' For which she may yet holde al hire biheste.'
 And on the morwe unto the yate he wente,
 And up and down, by weste and ek bi este,

Upon the walles made he many a wente,
 But al for nought ; his hope alwey hym blente ;
 For which at nyght, in sorwe and sikes sore,
 He wente hym home, withouten any moore.

CLXXII.

This hope al clene out of his herte fledde,
 He nath wheron now lenger for to honge ; 1199
 But, for the peyne, hym thought his herte bledde,
 So were his throwes sharpe, and wonder stronge ;
 For when he saugh that she aboode so longe,
 He nyste what he juggen of it myghte,
 Syn she hath broken that she hym byhighte.

CLXXIII.

The thridde, ferthe, fyfte, *and* sexte day
 After tho dayes ten, of whiche I tolde,
 Betwixen hope and drede his herte lay,
 Yet somewhat trusten on hire hestes olde ;
 But when he saugh she nold hire terme holde,
 He kan now sen non other remedye, 1210
 But for to shape hym sone for to dye.

CLXXIV.

Therwith the wykked spirit, God us blesse !
 Which that men clepeth wode jalousie,
 Gan in hym crepe, in al this hevynesse ;
 For whiche, because he wolde soone dye,
 He ne ete ne dranke for his meleneolye,
 And ek from every compaynye he fledde ;
 This was the lyf that al the tyme he ledde.

CLXXV.

He so defet was, that no maner man
 Unneth hym myghte knowen there he wente ; 1220
 So was he leen, and therto pale and wan,
 And fieble, that he walketh by potente,
 And with his ire he thus hymselfen shente :
 But who so axed hym whereof hym smerte,
 He seyde his harme was al aboute his herte.

CLXXVI.

Priam ful ofte, and ek his moder deere,
 His bretheren and his sustren gonne hym freyne
 Whi he so sorwful was in al his cheere,
 And what thyng was the cause of al his peyne ?
 But al for nought, he nold his cause pleyne ; 1230
 But seyde, he felte a grevous maladye
 Aboute his herte, and fayne he wolde dye.

CLXXVII.

So on a day he layde hym down to slepe ;
 And so byfel, that in his slepe hym thoughte,
 That *in* a forest faste he welke to wepe,
 For love of hire that hym thise peynes wroughte ;
 And up and doun as he that forest soughte,
 He mette he saugh a boor, with tuskes grete,
 That slepte ayein the bryghte sonnes hete.

CLXXVIII.

And by this boor, fast in hir armes folde, 1240
 Lay kyssyng ay his lady bryght Criseyde ;
 For sorw of which, whan he *it* gan biholde,

And for despit, out of his slepe he breyde,
 And loude he criede on Pandarus, and seyde,
 ‘ O Pandarus, now know I, crope and roote !
 I nam but ded, there is non other boote !

CLXXIX.

‘ My lady bryghte, Criseyde, hath me bytrayed,
 In whom I trustede moost of any wighte ;
 She elleswhere hath now hire herte apeyde ;
 The blisful goddes, thorwgh hire grete myghte,
 Han in my drem yshewed it ful righte ; 1251
 Thus, in my drem, Criseyde have I biholde ;
 And al this thyng to Pandarus he tolde.

CLXXX.

‘ O my Criseyde, alas ! what subtilté ?
 What newe lust ? what beauté ? what science ?
 What wrathe of juste cause have ye to me ?
 What guilte of me ? what fel experience
 Hath fro me raft, alas ! thyn advertence ?
 O trust, O feith, O depe aseuraunce !
 Who hath me reft Criseyde, al my plesaunce ?

CLXXXI.

‘ Allas ! whi lett Ich yow from hennes go ? 1261
 For which wel neigh out of my wit I breyde ;
 Who shal now trowe on any othes moo ?
 God woot I wende, O lady bright Criseyde,
 That every word was gospel that ye seyde !
 But who may beste bigile if hym liste,
 Than he on whom men weneth best to triste ?

CXXXLII.

What shal I don, my Pandarus, allas ?
 I fele nowe so sharpe a newe peyne,
 Syn that ther is no remedye in this cas, 1270
 That bet were it I with myn hondes tweyne
 My-selven slewe, *than* alway thus to pleyne ;
 For thorwgh the deth my wo shold have an ende,
 Ther every day with lif myself I shende.'

CLXXXIII.

Pandare answerde and seyde, ' Allas, the while
 That I was born ! have I not seyde or this
 That dremes many a maner man bigile ?
 And whi ? For folk expounden hem amys :
 How darstow seyn that fals thy lady is,
 For any dreme, right for thyn owen drede ? 1280
 Lat be this thought, thow kanst no dremes rede.

CLXXXIV.

' Paraunter ther thow dremest of this boor,
 It may so be that it may signifye
 Hire *fadir*, whiche that old is and ek hoor,
 Ayein the sonne lyth o poynte to dye ;
 And she for sorwe gynneth wepe and crye,
 And kysseth hym, ther he lyth on the grounde ;
 Thus sholdestow thy dreme aright expounde.'

CLXXXV.

' How myght *I* than don,' quod Troilus,
 ' To know of this, ye, were it nevere so lite ?' 1290
 ' Now seyestow wisely,' quod this Pandarus ;

‘ My rede is this, syn thow kanst wel endite,
 That hastily a letre thou hire write,
 Thorough whiche thow shalt wel bryngen it aboute
 To knowe a soth of that thow ert in doute.

CLXXXVI.

‘ And se now why : for this I dar wel seyn,
 That if so is, that she untrewed be,
 I kan not trowen that *she* wol write ayein ;
 And if she write, thow shalt ful soone see,
 As whether she hath any liberté 1300
 To come ayein, or elles in som clause
 If she be let, she wol asigne a cause.

CLXXXVII.

‘ Thow hast not writen hire syn that she wente,
 Nor sche to the ; and this I dorste laye,
 Ther may swich cause ben in hire entente,
 That hardily thow wolt thy-selven seye,
 That hire abood the best is for yow tweye :
 Now write hire than, and thow shalt fele soone
 A sothe of al ; ther is namoore to doone.’

CLXXXVIII.

Acorded ben to this conclusion, 1310
 And that anon, thise ilke lordes two ;
 And hastily sit Troilus adoun,
 And rolleth in his herte to and fro,
 How he may best descryven hire his wo ;
 And to Criseyde, his owen lady decre,
 He wrote righte thus, and seyde as *ye* may here.

THE COPY OF THE LETTER.

CLXXXIX.

‘ Right fresshe floure ! whos I ben have and shal,
 Withouten part of ellesewhere servyse,
 With herte, body, lyf, lust, thought, and alle !
 I, woful wight, in everych humble wyse 1320
 That tonge telle, or herte may devyse,
 As oft as matere occupieth place,
 Me recomaunde unto youre noble graee.

CXC.

‘ Liketh *it* yow to wyten, sweete herte,
 As ye wel knowe, how longe tyme agon
 That ye me left in aspre peynes smerte,
 When that ye wente, of which *yit* boote non
 Have I non had, but evere wors bigoon
 Fro day to day am I, and so mot dwelle,
 While it yow liste, of wele and wo my welle ! 1330

CXCI.

‘ For which to yow, with dredeful herte trewe,
 I write (as he that sorwe drifto to write)
 My wo, that every houre eneresseth newe,
 Compleynynge as I dar, or kan endite ;
 And that defaced is, that may ye wite,
 With teres, which that fro myn eyen reyne ;
 They wolden speke, if that they koude, and pleyne.

CXCI.

‘ Yow first beseche I, that youre eyen clere,
 To look on this defouled ye nat holde :
 And over al this, that ye, my lady dere, 1340

Wol vouche-saufe this letre to beholde ;
 And by the cause ek of my cares colde,
 That sleth my wit, if ought amys masterte,
 Foryeve it me, myn owen swete herte.

CXCIII.

[‘ Yf any servaunt durst, or aught aryght
 Upon hys lady pitously compleyne,
 Than wene I that I oughte be that whyght ;
 Considered thys, that ye thys monethes tweyne
 Han taryed, there ye seyde, sothe to seyne,
 But dayes ten ye nolde in hoste sojourne ; 1350
 But in two monethes yit ye not retourne.

CXCIV.

‘ And, for as moche as me mote nedys lyke
 Alle that you lust, I dar not pleyne more,
 But humbly, wyth sorowful sykes syke,
 You write I myn unresty sorowes sore ;
 Fro day to day, desiring evermore
 To knowen fully, yif youre wille it were,
 How ye han ferde and don while ye ben there.

CXC.V.

‘ The whos welfare and hele eke God encrece
 In honour suehe, that upward in *degré* 1360
 Hit grow alwey, soo that it never cese,
 Ryght as your herte ay can, my lady fre,
 Devise, I prey to Gode so mote it be,
 And graunt it, soone that ye upon me rewe,
 As wisly as in al I am unto you trewe.

CXCVI.

‘ And yf it lyke yow to knowen of the fare
 Of me, whos woo ther may no wyght discryve,
 I can no more, but cheste of every care,
 At wrytyng of thys letre I was on lyve,
 Al redy oute my wooful gost to dryve, 1370
 Wych I delay, and holde hym yit in honde,
 Upon the syght of matere of youre sonde.

CXCVII.

Myn eyen twoo, in veyne wyth wych I see,
 Of sorowfule terys salte ar woxen welles ;
 My songe *in* pleynt of myn adversité,
 My good in harme, myn ese eke woxen helle is,
 My joye in wo ; I can sey you *nought* ellys,
 But tournede is, for wych my lyf I warye,
 Every joye or ese in hys contrarie.

CXCVIII.

‘ Wych with your commyng *hom* ayen to Troye
 Ye may redresse, and, more *a* thousand sithe, 1381
 Than ever I hade, enerecen in *me* joye ;
 For was ther never herte yit so blithe
 To have hys lyf, as I shal ben as swyth
 As I you see ; and though no manere routhe
 Com in *to* you, yit thenkyth on youre trouthe.

CXCIX.

‘ And yef so be my gilt dethe have deserved,
 Or yf you lust no more upon me see,
 In guerdon yit of that I have you served,

Beseche I you, myn *owne* lady free, 1390
 That herupon ye wolde write me,
 For love of Gode, my ryghte lodestere,
 That dethe may make an ende of al my were.

cc.

‘ If other cause aught dothe you for to dwelle,
 Than with youre letre ye *may* me reconforte ;
 For though to me youre absence is an helle,
 Wyth paciencie Y wyl my woo conforte,
 And with youre letre of hope I wyl disporte :
 Now writeth, swete, and lat me thus not pleyne ;
 Wyth hope, or dethe, delivereth me from peyne.

ccI.

‘ Iwys, myn *owne* dere herte trewe, 1401
 I wote that whan ye next *upon* me se,
 So lost have I myn hele and eke myn *hewe*,
 Criseyde shal not *conne* knowe me ;
 Iwys, myn hertes day, my lady fre,
 Soo thrusteth ay myn herte to beholde
 Your beauté, that unnethe my lyf I holde.

ccII.

‘ I sey no more, al have I for to seye
 To you wel more than I tellen may ;
 But whether that ye do me lyve or deye, 1410
 Yit prey I Gode so yeve you ryght gode day ;
 And fareth wel, godely feyre fresshe may,
 As she that lyf or deth me may comaunde,
 And to your trouthe ay I me recomaunde.

CCIII.

· Wyth hele swych, but that ye yeven me
 The same hele, I shal noon hele have ;
 In you lieth, whan you list that it so be,
 The day on wyche me clothen shal my grave ;
 In you my lif, in youre myght for to save
 Me fro disese of alle peynes smerte ; 1420
 And fare now wele, myn owne swete herte !
‘ Le vostre T.’

CCIV.

Thys letre forth was sent unto Criseyde,
 Of wych hir answeere in effect was thys :—
 Ful pitously she wrote ayen and seyde,
 That al so sone as *that* she myght ywys,
 She wolde come, and mende that was amys ;
 And finally, she wrote hym and seyde thanne,
 She wolde come, ye, but she nyste whanne.]

CCV.

But in hire letre made she swich feeste, 1420
 That wonder was, and swerth she loveth hym beste,
 Of which he fonde *but* botmeles biheste.
 But Troilus thou mayst now, est or weste,
 Pipe in an ivy leef, if that the leste.
 Thus goth the world ; God shilde us fro meschaunce,
 And every wight that meneth trouthe avaunce !

CCVI.

Encressen gan the wo fro day to nyght
 Of Troilus, for tarynge of Criseyde ;
 And lessen gan his hope and ek his myght,

For which al doun he in his bed hym leyde ; 1440
 He ne ete, ne dronk, ne slepe, ne worde seyde,
 Ymagynynge ay that she was unkynde,
 For which wel neigh he wex out of his mynde.

CCVII.

This dreame, of which I tolde have ek biforne,
 May nevere come out of his remembraunce ;
 He thought ay wel he had his lady lorne,
 And that Joves, of his purveiaunce,
 Hym shewed hadde in slepe the signiffiaunce
 Of hire untrouth, and his disaventure,
 And that the boor was shewed hym in figure. 1450

CCVIII.

For which he for Sibille his suster sente,
 That called was Cassandre al aboute,
 And al his dreame he told hire or he stente,
 And hire bysought assoylen hym the doute
 Of the stronge boor, with tuskes stoute ;
 And finaly, withinne a litel stounde,
 Cassandre bygan right thus his dreame expounde.

CCIX.

She gan first smyle, and seyde, ‘ Brother dere,
 If thow a soth of this desirest knowe,
 Thow most a fewe of olde stories here, 1460
 To purpos how that fortune overthrowe
 Hath lordes olde, thorwgh which withinne a throuwe
 Thow wel this boor shalt know, and of what kynde
 He comen is, as men in bokes fynde.

CCX.

‘ Diane, which that wroth was and in ire,
 For Grekes nolde don hire saerifise,
 Ne incens upon hire auter sette afire,
 So for that Greekes gonne hire so despise,
 Wrak hir in a wonder cruwel wyse;
 For, with a boor, as grete as ox in stalle, 1470
 She made up frete hire corne and vynes alle.

CCXI.

‘ To sle this boor was al the contré raysed,
 Omanges which ther come this boor to se
 A maide, on of this worlde the bestè preyed;
 And Meleager, lorde of that contré,
 He lovede so this fresshe mayden free,
 That with his manhode, or he wolde stente,
 This boor he slough, and hire the hed he sente.

CCXII.

‘ Of which, as olde bokes tellen us,
 Ther roos a contek and a grete envye; 1480
 And of this lorde deseended Tideus
 By ligne, or elles olde bokes lye:
 And how this Meleager gan to dye
 Thorwgh his moder, wol I yow nought telle,
 For al to long it were for to dwelle.’

CCXIII.

She told ek how Tideus, or she stente,
 Unto the stronge cité of Thebes,
 To cleymen kyngdom of the cité, wente

For his felawe daun Polimytes,
 Of whiche the brother daun Ethiocles 1490
 Ful wrongfully of Thebes held the strengthe.
 This tolde she by proces al by lengthe.

CCXIV.

She told ek how Hemonydes asterte,
 When Tideus slough fifty knyghtes stoute ;
 She told ek al the prophecies by herte,
 And how that seven kynges with hire route
 Besegeden the cité alle aboute ;
 And of the holy serpent, and the welle,
 And of the furies alle she gan hym telle.

CCXV

Associat profugum Tideus primus Polynycem, 1500
Tidea legatum docet insidiasque secundus,
Tercius Hemoniden canit, et vates latitantes,
Quartus habet reges ineuntes prelia septem ;
Mox furie lenne quinto narrantur et anguis,
Archimori bustum sexto ludusque leguntur.
Dat Grayos Thebes et vatem septimus umbris,
Octavo cecidit Tideus, spes, vita Pelasgis ;
Ypomedon nono moritur cum Parthonopeo,
Fulmine percussus decimo Cappaneus superatur,
Undecimo sese perimunt per vulnera fratres, 1510
Argiva flentem, narrat duodenus et ignem.

CCXVI.

Of Archinoris burynge, and the pleyes,
 And how Amphiorax fil thorwgh the grounde,
 How Tideus was slayn. lord of Argeyes,

And how Ypomedon in litel stounde
 Was dreynt, and dyed Parthonope of wounde ;
 And also how Cappaneus the proude,
 With thunder dynt was slayn, that criede loude.

CCXVII.

She kan ek telle hym how that either brother,
 Ethiocles and Polymyte also, 1520
 At a scarmyche eeh of hem slough other,
 And of Argyves wepynge and hire wo,
 And how the town was brente she told ek tho ;
 And so descendeth doun from gestes olde
 To Diomede, and thus she spak and tolde.

CCXVIII.

‘ This ilke boor bitokneth Diomede,
 Tideus sone, that doun descended is
 Fro Meleagre, that made the boor to blede ;
 And thy lady, wher-so sche be, ywis,
 This Dyomede hire herte hath, and she *his* : 1530
 Wepe if thow wolt, or lefe, for out of doute
 This Diomede is inne, and thow ert oute.’

CCXIX.

‘ Thow saist nat soth,’ quod he, ‘ thow sorceresse !
 With al thi false goost of propheeie !
 Thow wenest ben a grete devineresse !
 Now sestow nat this fool of fantasie,
 Peyneth hire on ladys for to lye ?
 Away !’ quod he, ‘ ther Joves yeve the sorwe !
 Thow shalt be fals paraunter yet to morwe !’

CCXX.

‘ Als wel thow myghtest lyen on Alceste, 1540
 That was of creatures (*but men lie*)
 That ever weren, kyndest, and the beste ;
 For when hire housbonde was in jupartye
 To dye hymself, but if she wolde dye,
Sho ches for hym to dye, and gon to helle,
 And starf anon, as us the bokes telle.’

CCXXI.

Cassandre goth, and he, with cruel herte,
 Foryat his wo for angre of hire speche ;
 And from his bed al sodeynly he sterte,
 As though al hool hym hadd ymade *a leche* ; 1550
 And day by day he gan enquire and seche
 A soth of this, with al his *fulle* cure,
 And thus he driveth forth his aventure.

CCXXII.

Fortune, which that permutacioun
 Of thynges hath, as it is hyre committed,
 Thorwgh purveiaunce and disposicioun
 Of heigh Jove, as regnes shal ben flitted
 Fro folk in folk, or when they shal ben smitted,
 Gan pulle away the fetheres bright of Troie,
 Fro day to day, til they ben bare of joie. 1560

CCXXIII.

Amange al this, the fyne of the parodye
 Of Ector gan *approchen* wonder blyve ;
 The fate wold his soule shold unbodye,

And shapen hadde a mene it out to dryve,
 Ayeins which fate hym helpeth not to stryve ;
 But, on a day, to fighten gan he wende,
 At which allas ! he caughte his lyves ende.

CCXXIV.

For which me thenketh every manere wight
 That haunteth armes oughte to bewayle
 The deth of hym that was so noble a knyght :
 For, as he drough a kyng by thavantaille, 1571
 Unware of this, Achilles, thorwgh the maylle,
 And thorwgh the body, gan hym for to ryve ;
 And thus the worthy knyght was brought of lyve.

CCXXV.

For whom, as olde bokes tellen us,
 Was made swiche wo, that tonge it may not telle ;
 And namely, the sorwe of Troilus,
 That next hym was of worthinesse welle ;
 And in this wo gan Troilus to dwelle,
 That what for sorwe, and love, and for unreste,
 Ful oft a day he bad his herte breste. 1581

CCXXVI.

But, natheles, though he gan hym despaire,
 And drede ay that his lady was untrewe,
 Yet ay on hire his herte gan repaire,
 And as thise lovers don, he sought ay newe
 To gete ayein Criseyde, brighte of hewe ;
 And in his herte he wente hire excusynge,
 That Calkas caused alle hire tarynge.

CCXXVII.

And ofte tyme he was in purpos grete,
 Hymselfen like a pilgrym to degyse, 1590
 To sen hire ; but he may not conterfete,
 To ben unknowen of folk that weren wyse,
 Ne fynde excuse aright that may suffise,
 If he omange the Grekes knowen weere ;
 For whiche he wepte ful oft and many a teere.

CCXXVIII.

To hire he wroot yet ofte tyme al newe,
 Ful pitously, he left it nought for slouthe,
 Beseehyng hire, that syn that he was trewe,
 That she wol come ayein, and hold hire trouthe ;
 For which Criseyde upon a day for routhe, 1600
 I take it so, touchyng al this matere,
 Wroot hym ayein, and seyde as ye may here.

CCXXIX.

‘ Cupides sone, ensauple of goodlyhede,
 O swerde of knyghthod, sours of gentillesse,
 How myght a wight in tormente and in drede,
 And heleles, yow sende as yet gladnesse ?
 I herteles, I sik, *I* in destresse,
 Syn ye with me, nor I with yow may dele,
 Yow neither sende Iche herte may, nor hele.

CCXXX.

‘ Your letres ful, the papir al ypleynted, 1610
 Conceyved hath myn hertes pité ;
 I have ek seyn, with teeris alle depeynted,

Your letre, and how that ye requeren me
 To come ayein ; which yet ne may not be ;
 But whi, leste that this letre founden were,
 No mencion ne make I nowe for fere.

CCXXXI.

‘ Grevous to me, God woot, is youre unreste,
 Your haste, and that the Goddes ordinaunce
 It semeth nat ye take it for the beste ;
 Nor other thyng nys in youre remembraunce,
 As thenketh me, but oonly youre pleasaunce ; 1621
 But beth not wroth, and that I yow beseche,
 For that I tarye is al for wikked speche.

CCXXXII.

‘ For I have herde wel more than I wende
 Touchynge us two, how thynges han ystonde,
 Whiche I shal with dissimulynge amende ;
 And, beth not wroth, I have ek understonde,
 How ye ne don but holden me in honde ;
 But now no fors, I kan not in yow gesse,
 But alle trouthe and alle gentillesse. 1630

CCXXXIII.

‘ Com I wole, but yet in swich disjoynte
 I stonde as now, that what yere or what day
 That this shal be, that kan I nought apoynte ;
 But in effect I preye yowe, as I may,
 Of your good word, and of youre frendship ay ;
 For trewely while that my lif may dure,
 As for a frend, ye may in me assure.

CCXXXIV.

‘ Yet preye I yow, an evyl ye *ne* take
 That it is short which that I to yow write ;
 I dar not ther I am wele letres make, 164C
 Ne nevere yet ne koude I wel endite ;
 Ek grete effect, men write in place lite,
 The entente is alle, and not the letres space ;
 And farth now wel, God have you in his grace !
‘ La vostre C.’

CCXXXV.

This Troilus this letre thought al straunge,
 Whan he it saugh, and sorwfullyche he sighte ;
 Hym thought it like a kalendes of change ;
 But, finaly, he ful ne trowen myghte,
 That she ne wold hym holden that she hyghte ;
 For with ful yvel wil list hym to leve, 1651
 That loveth wel, in swiche cas, though hym greve.

CCXXXVI.

But natheles, men seyn that, at the laste,
 For any thyng, men shal the sothe see ;
 And swich a cas betid, and that as faste,
 That Troilus wel understood that she
 Nas not so kynde as that hire oughte be ;
 And finaly, he woot now out of doute,
 That al is lost that he hath ben aboute.

CCXXXVII.

Stood on a day in his malencolye 1660
 This Troilus, and in suspicioun
 Of hire, for whom he wende for to dye ;

And so bifel, that thorwghout Troie town,
 As was the gyse, iborn was up and down
 A manere cote armur, as seith the storie,
 Biforn Deiphebe, in signe of his victorie.

CCXXXVIII.

The whiche cote, as telleth Lollius,
 Deiphebe it hadde rent fro Diomede
 The same day ; and when this Troilus
 It saugh, he gan to taken of it hede, 1670
 Avysinge of the lengthe and of the brede,
 And al the werke ; but, as he gan biholde,
 Ful sodeynli his herte gan to colde,

CCXXXIX.

As he that on the coler fonde withinne
 A broche, that he Criseyde yaf that morwe
 That she from Troie moste nedes twynne,
 In remembraunce of hym, and of his sorwe ;
 And she hym layde ayein hir feith to borwe,
 To kepe it ay ; but now ful wel he wiste,
 His lady nas no langer on to truste. 1680

CCXL.

He goth hym hom, and gan ful soone sende
 For Pandarus ; and al this newe chaunce,
 And of this broche, he told hym word and ende,
 Compleynynge of hire herte variaunce,
 His longe love, his trouth, and his pennaunce ;
 And after Deth, withouten wordes moore,
 Ful fast he cried, his rest hym to restoore.

CCXLI.

Than spak he thus:—‘ O, lady myn Criseyde,
 Wher is youre feith, and wher is youre biheste?
 Wher is your love, where is youre trouth?’ he seyde,
 ‘ Of Diomedes have *ye* now al this feeste! 1691
 Allas! I wold han trowed at the leeste,
 That syn ye nold in trouthe to me stonde,
 That ye thus nold han holden me in honde.

CCXLII.

‘ Who shal now trow on any othes mo?
 Allas! I nevere wold han wende, or this,
 That ye, Criseyde, koude han chaunged so,
 Ne but I hadde agilt, and don amys;
 So cruel wende I nought youre herte, iwys,
 To sle me thus! allas! youre name of trouthe 1700
 Is now fordon, and that is al my routhe.

CCXLIII.

‘ Was ther non other broch yow liste lete,
 To fesse with youre newe love,’ quod he,
 ‘ But thilke broch that I, with teris wete,
 Yow yaf, as for a remembraunce of me?
 Non other cause, allas! ne hadde ye,
 But for despit; and ek for that ye mente
 Al outerly to shewen youre entente.

CCXLIV.

‘ Thorwgh which I se, that clene out of youre mynde
 Ye han me caste, and I ne kan nor may 1710
 For al this world withinne myn herte fynde

To unloven yow a quarter of a day ;
 In cursed tyme I borne was, walawey !
 That yow, that dothe me al this wo endure,
 Yet love I best of any creature.

CCXLV.

‘ Now God,’ quod he, ‘ me sende yet the grace,
 That I may meten with this Diomede !
 And trewely, if I have myghte and space,
 Yet shal I make, I hope, his sides blede :
 O God !’ quod he, ‘ that oughtest taken hede 1726
 To ferthren trouthe, and wronges to punice,
 Whi nyltow don a vengeaunce of this vice ?

CCXLVI.

‘ O Pandarus, that in dremes for to truste
 Me blamed hast, and wonte oft ert upbreyde,
 Now maistow sen thi self, if that the liste,
 How trew is now thi nece, bright Criseyde !
 In sondry formes, God it woot !’ he seyde,
 ‘ The goddes shewen bothe joye and teene
 In slepe ; and by my dreame it is now scene.

CCXLVII.

‘ And certeinly, withouten more speche, 1730
 From hennesforth, as ferforth as I may,
 Myn owen deth in armes wol I seehe ;—
 I recche nat how sone be the day ;
 But trewely, Criseyde, swete may,
 Whom I have ay with al my myght yserved,
 That ye thus don, I have it not deserved.’

CCXLVIII.

This Pandarus, that al thise thynges herde,
 And wiste wel he seyde a soth of this,
 He nought a word ayein to hym answarde,
 For sory of his frendes sorwe he is, 1740
 And shamed for his nece hath don amys ;
 And stont astoned of thise causes tweye,
 As stille as stone ; a word ne koude *he* seyde.

CCXLIX.

But at the laste thus he spak and seyde,
 ‘ My brother deere, I may do the namore ;
 What shold I seyn ? I hat, iwis, Criseyde !
 And, God woot, I wol hat hire everemore :
 And that thow me bisoughtest don of yore,
 Havynge unto myn honour ne my reste
 Right no rewarde, I dide al that the leste. 1750

CCL.

‘ If I dide ought that myghte lyken the,
 It is me lief; and of this treson now,
 God woot that it a sorwe is unto me ;
 And, dredeles, for hertes ese of yow,
 Right faine I wolde amende it, wiste I how :
 And fro this worlde, Almighty *God* I preye,
 Deliver hire soone ! I kan namore seyde.’

CCLI.

Grete was the sorwe and pleynte of Troilus ;
 But forth hire cours fortune ay gan to holde ;
 Criseyde loveth the sone of Tydeus, 1760

And Troilus mot wepe in cares colde.
 Swieh is this world, who-so it kan biholde !
 In eeh estat is litel hertes reste !
 God leve us for to take it for the beste !

CCLII.

In many eruel bataille, out of drede,
 Of Troilus, this ilke noble knyght,
 (As men may in this olde bokes rede)
 Was seen his knyghthod and his grete myghte ;
 And, dredeles, his ire day and nyghte,
 Ful eruely the Grekes ay aboughte, 1770
 And alwey moost this Diomedé, he soughte.

CCLIII.

And ofte tyme I fynde that they mette
 With bloody strokes, and with wordes grete,
 Assayinge how hire speres weren whette ;
 And, God it woot, with many a eruel hete
 Gan Troilus upon his helm to bete ;
 But, natheles, Fortune it nought ne wolde,
 Of otheres honde that either dyen sholde.

CCLIV.

And if I hadde taken for to write
 The armes of this ilke worthi man, 1780
 Than wold Ich of his batailles endite ;
 But for that I to writen first bygan
 Of his love, I have seyde as I ean.
 His worthy dedes, who-so lest hem here,
 Rede Dares ; he kan telle hem alle ifeere.

CCLV.

Besechyng every lady bright of hewe,
 And every gentil womman, what she be,
 That al be that Criseyde was untrewē,
 That for that gilt she be not wroth with me.
 Ye may hire gilt in otheres bokes se, 1790
 And gladlier I wol write, if yow leste,
 Penelopes trouthe, and good Alceste.

CCLVI.

Ny sey nat this al only for thise men,
 But moost for wommen that betrayed be
 Thorwgh false folk, (God yeve hem sorwe, amen !)
 That with hire grete wit and subtilité
 Betraise yow : and this commeveth me
 To spek ; *and* in effect yow alle I preye
 Beth war of men, and herkeneth what I seye.

CCLVII.

Go, litel boke, go, litel myn tregedie ! 1800
 Ther God my maker, yet er that *I* dye,
 So sende *me* myght to maken som comedye !
 But litel book, no makynge thow nenvye,
 But subgit be to alle poesie,
 And kysse the steppes, wheras thow seest space,
 Of Virgile, Ovyde, Omer, Lucan, and Stace.

CCLVIII.

And, for ther is so grete dyversité
 In Englishsh, and in writynge of our tonge,
 So preye I to God, that non myswrite the,

Ne the mys-metere, for defaute of tonge ! 1810
 And red wher so thow be, or elles songe,
 That thow be understonde, God I beseche !
 But yet to purpos of my rather speche.

CCLIX.

The wrath, as I bigan yow for to seye,
 Of Troilus, the Grekes boughten deere ;
 For thousandes his hondes maden dye,
 As he that was withouten any peere,
 Save Ector in his tyme, as I kan here ;
 But, walawey ! save only Goddes wille,
 Dispitously hym slough the fiers Achille. 1820

CCLX.

And when that he was slayn in this manere,
 His lighte gost ful blisfully is wente
 Up to the holughnesse of the seventhe spere,
 In convers letyng everych elemente ;
 And ther he saugh, with ful avysemente,
 The erratyk sterres, herkenyng armonye,
 With sownes ful of hevenyssh melodie.

CCLXI.

And down from thennes faste he gan avyse
 This litel spot of erth, that with the se
 Embraced is ; and fully gan despice 1830
 This wreched world, and helde al vanyté,
 To respect of the pleyne felicité
 That is in hevене above : and at the laste,
 Ther he was slayn his lokyng down he caste.

CCLXII.

And in hymself he lough right at the wo
 Of hem that wepten for his deth so faste,
 And dampned al our werk that folweth so
 The blynde luste, the which that may not laste,
 And sholden al our herte on hevене caste ;
 And forth he wente, shortly for to telle, 1840
 Ther as Mercurie sorted hym to dwelle.

CCLXIII.

Swich fin hath, lo ! this Troilus for love !
 Swich fyn hath al his grete worthynesse !
 Swich fyn hath his estat real above !
 Swich fyn his luste, swich fyn hath his noblesse !
 Swich fyn hath false worldes brotelnesse !
 And thus bigan his lovyng of Cryseyde,
 As I have tolde, and in this wise he deyde.

CCLXIV.

O yonge fresshe folkes, he or she,
 In which that love up groweth with youre age, 1850
 Repeireth hom fro worldly vanyté,
 And of youre herte up casteth the visage
 To thilke God, that after his ymage
 Yow made, and thynketh al nys but a faire,
 This worlde that passeth soon, as floures faire.

CCLXV.

And loveth hym the which *that* right for love,
 Upon a crois, oure soules for to beye,
 First starfe and roos, and sitt in heven above,
 For he nyl falsen no wight, dar I seye,
 That wol his herte alle holly on hym leye ; 1860

And syn he best to love is, and most meke,
 What nedeth feyned loves for to seke ?

CCLXVI.

Lo ! here of payens corsed olde rites !
 Lo ! here what alle hire goddes may availle !
 Lo ! here this wreched worldes appetites !
 Lo ! here the fyn and guerdon for travaille,
 Of Jove, Apollo, of Mars, *and* swich reseaille !
 Lo ! here the forme of olde clerkes speche
 In poetrie, if ye hire bokes seche.

LENVOYE DU CHAUCER.

CCLXVII.

O MORAL Gower, this boke I directe 1870
 To the, and to the philosophical Strode,
 To vouchen-sauf, ther nede is, to correete,
 Of youre benignites and zeles goode.
 And to that sothfast Criste that sterf on roode,
 With al myn herte, of merey evere I preye,
 And to the Lord right thus I speke and seye:—

CCLXVIII.

Thow Oon, and Two, and Thre, eterne on lyve,
 That regnest ay in Thre, and Two, and Oon,
 Uneircumscrip, and al maist circumscrip !
 Us from visible and invisible foon 1890
 Defende, and to thi merey everiehon,
 So mak us, Jesu, for thy merey digne,
 For love of Maide and Moder thyn benigne !




CHAUCERES A. B. C.

CALLED

LA PRIERE DE NOSTRE DAME.

A.

 LMYGHTY and alle mereyable Quene,
To whom al this worldefleeth for socoure
To have relees of synne, *of sorowe*, of
teene!

Gloriousse Virgyne, of alle floures flour,
To the I flee confounded in errour!
Help, and releve, thow mighty debonayre,
Have mercy of my perilouse langour!
Venquysshed hath me my cruel adversayre.

B.

Bountee so fix hath in thine hert his tent
That wel I wote thow wolte my socour be;
Thow kanst not werne hym that, with good entent,
Axeth thyn helpe, thyn herte is ay so free!
Thow art largesse of pleyn felieitee,
Havene and refute of quyete and of reste!
Loo how that theves seven chacen me!
Helpe, Lady bryght, er that my shippe to-breste!

C.

Comfort ys noon, but in yow, Lady dere !
 For loo my synne and my confusioun,
 Which oughte not in thy presence for to appere,
 Han take on me a grevouse accioun,
 Of verray ryght and disperacioun !
 And, as by ryght, they myghten wel sustene,
 That I were worthy my damnaeioun,
 Nere mercye of yow, blysful hevnes quene !

D.

Doute is there noon, Quene of misericorde,
 That thou narte cause of graee and mercye here ;
 God vouchedsaufe thurgh the with us taorde :
 For certes, Cristes blysful moder dere !
 Were now the bowe ybent in swiche manere,
 As hyt was first, of justice and of ire,
 The rightful God nolde of no mercye here ;
 But thurgh thee han wee grace as we desire.

E.

Evere hath myn hope of refute in the be :
 For here before ful often in many a wyse,
 Unto merey hastow receeyved me.
 But merey, Lady ! at the grete assise,
 Whan we shal come before the hye justise !
 So litel good shal then in me be founde,
 That, but thou er that day correete me,
 Of verray ryght my werke wol me confounde.

F.

Fleyng, I flee for socour to thy tent,
 Me for to hide fro tempest ful of drede,

Besekyng yow, that ye yow nat absente,
 Though I be wikke. O help yet at this nede !
 Alle have I ben a best in wytte and dede,
 Yet, Lady ! thow me clothe with thyn grace,
 Thyne enemy and myn, Lady, take hede !
 Unto my dethe in poynte ys me to chace.

G.

Glouriose mayde and moder ! whiche that never
 Were bitter nor in erthe nor in see,
 But ful of swetnesse and of mereye ever,
 Help, that my fader be nat wrothe with me !
 Speke thow, for I ne dar nat him yse ;
 So have I doon in erthe, allas the while !
 That certes, but that thow my socour be,
 To synke eterne he wol my goost exile.

H.

He vouchedesauf, telle hym, as was hys wylle,
 Become a man as for oure alliaunce,
 And with his bloode he wroote that blysfyl bille
 Upon the crois, as general acquytaunce
 To every penytent, in ful creaunce :
 And therefore, Lady bryght ! thow for us pray,
 Than shalt thou bothe stynte alle grevaunce,
 And maken our foo to faylen of hys pray.

I.

I wote hyt wel thow wolt ben oure socour,
 That art so ful of bountee in certeyne ;
 For, whan a soule falleth in errour,
 Thy pitee gooth and haleth hym ageync,

That makestow hys pees with his sovereyne,
 And bryngest him out *of the crookede strete* :
 Who so the loveth he shal nat love in veyne,
 That shal he fynde, as he the life shal lete.

K.

Kalendres enlumyned ben bothe they
 That in this worlde ben lyghted with thi name,
 And who-so goothe with yow the ryghte wey,
 Hym thar nat drede in soule to be lame ;
 Now, Queene of comfort ! sithe thou art that same,
 To whom I seche for my medeigne,
 Lat not my foo no more my wounde entame ;
 Myn hele into thyn hande al I resygne.

L.

Lady, thy sorwe kan I not purtreye
 Under the crois, ne his grevous penaunce :
 But, for youre bothe peynes, I yow preye,
 Lat not our aller foo make his bobaunce,
 That he hath in his lystes, with meschaunce,
 Convicte that ye both han boght so dere ;
 As I seyde erste, thou grounde of our substaunce !
 Continew in us thy pitouse eyen clere.

M.

Moises that saugh the bussh with flambes rede
 Brennyng of which there never a *stikke* brende,
 Was signe of thyn unwemmed maydenhede.
 Thou art the bussh, on which ther gan discende
 The Holy Goost, *the* which that Moises wende

Had ben afire : and this was in figure.
 Now, Lady ! fro the fire thou us defende,
 Which that in helle eternally shal dure.

N.

Noble princesse, that never haddest pere !
 Certes yf any comfort in us be,
 That cometh of the, Christes moder dere !
 We han none other melodie or gle,
 Us to rejoyse in oure adversite,
 Ne advocate noon, that wol and dar so preye
 For us, and that for *as* litel hire as ye,
 That helpen for an Ave Marie or tweye.

O.

O, verray light of eyen that ben blynde !
 O verray lust of labour and distresse !
 O tresorere of bounté to mankynde,
 The whom God chees to moder for humblesse !
 From his ancile he made the maistresse
 Of heven and erthe, our bille up for to bede ;
 This world awaiteth ever on thy godenesse,
 For thou ne failest never wight at neede.

P.

Purpos I have sommetyme for to enquire,
 Wherefore and why the Holy Goost the soughte,
 Whan Gabrieleles voys come to thyn ere ;
 He nat to werre us swich a wonder wroughte,
 But for to save us, that he sithen boughte :
 Than nedeth us no wepene us for to save,

But oonly there as we dide nat as we ought,
Do penytence, and mercy axe and have.

Q.

Queene of comfort, yet whan I me bethynke,
That I agilte have bothe hym and thee,
And that my soule ys worthy for to synke,
Allas ! I, katyf, whider may I fle ?
Who shal unto thy Sone my mene be ?
Who, but thy selfe, that art of pitee welle ?
Thou hast more routhe on oure adversité,
Than in this world myght any tonge telle.

R.

Redresse me, Moder, and *eke* me chastise !
For certeynly my fadres chastisyng
That dar I nat abiden in no wise,
So hidouse is his ryghtful rekenyng.
Moder ! of whom our mercy gan to springe,
Be ye my juge, and eke my soules leche,
For ever in yow is pitee *aboundynge*
To eche that wil of pité yow beseche.

S.

Soth is, that he ne graunteth noo pitee
Withoute the ; for God of his goodnesse
Foryeveth noon, but hyt lyke unto thee :
He hath the made vikaire and maistresse
Of alle this worlde, and eke governesse
Of hevене, and he represseth his justise
After thy wille : and therfore witnessse
He hath the crowned in so rialle wise.

T.

Temple devoute ! ther God hathe his wonynge,
 Fro whiche these misbeleved deprived been,
 To yow my soule penytent I brynge,
 Receyve me, I kan no ferther fleeen.
 With thornes venymouse, O hevене Quene !
 For which the erthe acursed was ful yore,
 I am so wounded, as ye may wel seene,
 That I am lost almost, hit smert so sore,

V.

Virgyne ! that art so noble of apparayle,
 That ledest us into the hye toure
 Of Paradyse, thou me wysse and counsayle,
 How I may have thy grace and thy socoure :
 Alle have I ben in filthe and in erreure,
 Lady ! unto that contrey thou me adjourne,
 The cleped is thy benche of fressh floure,
 Ther as that mercye ever shal sojourne.

X.

Christe thy Sone that in this worlde alyght
 Upon a crois to suffre hys passioun,
 And eke suffrede that Longius hys herte pighte,
 And made hys herte blode to renne adoun,
 And alle was this for my savacioun :
 And I to him am fals and eke unkynde,
 And yet he wol not my dampnacioun :
 This thanke I yow, socour of alle mankynde !

Y.

Ysaac was figure of his dethe certeyne,
 That so ferforth his fader wolde obeye,

That hym ne roughte nothing to be sleyno :
 Ryght so thy Sone lyste, as a lambe, to deye :
 Now, Lady ful of mercy ! Y you preye
 Sith he his mereye mesured so large,
 Be ye nat skant, for al we synge and seye,
 That ye been fro vengeaunce ay oure targe.

Z.

Zacharye yow clepeth the opene welle,
 That wasst^h synful soule out of hys gilte ;
 Therefore this lesson ought I wele to telle,
 That, nere thy tendre herte, we were spilt.
 Now, Lady *brighte* ! sith thou kanste and wilt
 Been to the sede of Adam mercyable,
 Brynge us to that paleyce that ys bilte
 To penytentys, that been to mereye able.

EXPLICIT.





CHAUCER'S DREAM.

WHEN Flora the queene of pleasaunce,
Hadd~~e~~ whole achieved thobeysaunce
Of the fresh and newe season,
Thorow out every region,
And with her mantle whole covert
That winter made hadde discovert
Of aventure, withoute light,
In May, I lay upon a night
Alone, and on my lady thoughte,
And how the lord that her wroughte, 10
Couth well entaile in imagery
And shewed hadde great maistry,
When he in so little space
Made such a body and a face,
So great beauty with swich features
More than in other creatures ;
And in my thoughtes as I lay
In a lodge out of the way,
Beside a well in a forest,
Where after hunting I tooke rest, 20
Nature and kind so in me wroughte,
That halfe on sleepe they me broughte,

And gan to dreame to my thinking,
 With mind of knowliche like making,
 For what I dreamed, as me thoughte,
 I saw it, and I slepte nought ;
 Wherefore is yet my fulle beleeve,
 That some goode spirit that eve,
 By meane of some curious port,
 Bare me, where I saw payne and sport ; 30
 But whether it were I woke or slepte,
 Well wot I of, I lough and wepte,
 Wherefore I woll in remembraunce,
 Put whole the payne, and the pleasaunce,
 Which was to me axen and hele,
 Woulde God ye wist it every dele,
 Or at the least, ye might o night
 Of such another have a sight,
 Although it were to you a payne,
 Yet on the morow ye woulde be fayne, 40
 And wish it mighte longe dure ;
 Then might ye say ye hadde good cure,
 For he that dreameth and weneth he see,
 Much the better yet may hee
 Wite what, and of whom, and where,
 And eke the lasse it woll hindere,
 To thinke I see this with mine eene,
 Iwis this may not dreame kene,
 But signe or signifaunce
 Of hasty thing souning pleasaunce, 50
 For on this wise upon a night,
 As ye have heard, withoute light,
 Not all wakyng, ne full on sleepe,
 About such houre as lovers weepe
 And erie after *here* ladies grace,

Befell me this wonder cace,
 Which ye shall heare and all the wise,
 So wholly as I can devise,
 In playne English evill written,
 For sleepe writer, well ye witten, 60
 Excused is, though he do mis,
 More than one that waking is,
 Wherefore here of your gentilnesse,
 I you requyre my boistousnesse
 Ye lete passe, as thing rude,
 And heareth what I woll conelude ;
 And of the endityng taketh no heed,
 Ne of the tearmes, so God you speed,
 But let all passe as nothing were
 For thus befell, as ye shall here. 70

Within an yle me thought I was,
 Where wall and yate was all of glasse,
 And so was closed round about
 That leavelesse none come in ne out,
 Uneouth and straunge to beholde,
 For every yate of fine golde
 A thousand fanes, aie turning,
 Entuned had, and briddes singing,
 Divers, and on each fane a paire,
 With open mouth again *here* ; 80
 And of a sute were all the toures,
 Subtily corven after floures,
 Of uneouth colours during aye,
 That never been none seene in May,
 With many a small turret hie,
 But man on live could I non sic,
 Ne creatures, save ladies play,
 Which were such of *here* array

That, as me thought, of geodlihead
 They passeden all and womanhead ; 90
 For to behold hem daunce and singe,
 It seemede like none earthly thinge,
 Such was *here* uneouth countinaunce
 In every play of right usaunce ;
 And of one age everichone
 They seemed all, save onely one,
 Which had of yeeres suffisaunce,
 For she mighte neyther sing ne daunce,
 But yet her countenance was so glad,
 As she so fewe yeeres had had 100
 As any lady that was there,
 And as little it did her dere,
 Of lustines to laugh and tale
 As she hadde full stuffed a male
 Of disportes and newe playes :
 Fayre hadde she been in her daies,
 And maistresse seemede well to be
 Of all that lusty companie ;
 And so she might, I you ensure,
 For one the conningeste creature 110
 She was, and so said everichone,
 That ever her knew, there faylede none,
 For she was sober and well avised,
 And from every fault disguised,
 And nothing usede but faith and truth ;
 That she nas young it was great ruth,
 For every where and in ech place,
 She governed her, that in grace
 She stode alway with poore and riche,
 That, at a word, was none her liche, 120
 Ne halfe so able maistres to be

To such a lusty companie.

Befell me so, when I avised
 Hadde the yle that me suffised,
 And whole thestate every where,
 That in that lusty yle was there,
 Which was more wonder to devise
 Than the joieux paradise,
 I dare well saye, for floure ne tree,
 Ne thing wherein pleasaunce mighte bee 130
 There faylede none, for every wight
 Hadde they desirede, day and night,
 Riches, heale, beauty, and ease,
 With every thing that hem mighte please,
 Thinke and have, it coste no more ;
 In such a country there before,
 Had I not bene, ne hearde telle
 That lives creature mighte dwelle.
 And when I hadde thus all aboute
 The yle avised throughout 140
 The state, and how they were arayed,
 In my heart I were well payed,
 And in my selfe I me assured
 That in my body I was well ured,
 Sith I might have such a graee
 To see the ladies and the place,
 Which were so faire, I you ensure,
 That to my dome, though that nature
 Would ever strive and do her paine,
 She shoulde not con ne mow attaine 150
 The leaste feature to amende,
 Though she would all her conning spende,
 That to beautie might availe,
 It were but paine and lost travaile,

Such part in *here* nativitie
 Was hem alarged of beautie,
 And eke they had a thing notable
 Unto *here* death, ay durable,
 And was, that *here* beauty shoulde dure,
 Which was never seene in creature, 160
 Save onely there (as I trowe)
 It hath not be iwist ne knowe,
 Wherefore I praise with *here* conning,
 That during beautie, riche thing,
 Hadde they been of *here* lives certaine,
 They hadde been quite of every paine.

And when I wende thus all have seene,
 The state, the riches, that mighte beene,
 That me thought impossible were
 To see one thing more than was there, 170
 That to beauty or glad conning
 Serve or availe might any thing;
 All sodainly, as I there stood,
 This lady that couthe so much good,
 Unto me came with smiling chere,
 And saide, "*Benedicite*, this yere
 Saw I never man here but you,
 Tell me how ye come hider now?
 And your name, and where ye dwelle?
 And whom ye seeke eke mote ye telle, 180
 And how ye come be to this place,
 The soth well told may cause you grace,
 And els ye mote prisoner be
 Unto the ladies here, and me,
 That have the governaunce of this yle:"
 And with that word she gan to smile,
 And so did all the lusty rout

Of ladies that stood her about.
 'Madame' (quod I) 'this night ipast,
 Lodged I was and slepte fast 193
 In a forest beside a welle,
 And now am here, how should I telle?
 Wot I not by whose ordinance,
 But onely Fortunes purveiance,
 Which puteth many, as I gesse,
 To travaile, paine, and businesse,
 And letteth nothing for *here* truth,
 But some sleeth eke, and that is ruth,
 Wherefore, I doubt her brittilnes,
 Her variance and unsteadfastnes, 200
 So that I am as yet afraid,
 And of my being here amaid,
 For wonder thing seemeth me,
 Thus many freshe ladies to see,
 So faire, so cunning, and so yonge,
 And no man dwelling hem amonge:
 Not I not how I hider come,
 Madame,' (quod I) 'this all and some.
 What should I faine a long processe
 To you that seeme such a princesse? 210
 What please you commaund or saye,
 Here I am you to obaye,
 To my power, and all fulfille,
 And prisoner bide at your wille,
 Till ye duly enformed be
 Of every thing ye aske me.'

This lady there, right well apaid,
 Me by the hande tooke, and saide,
 'Welcome prisoner adventurus,
 Right glad am I ye have said thus, 220

And for ye doubtē me to displeasē,
 I will assay to do you easē:"
 And with that word, ye anon,
 She, and the ladies everichon
 Assembled, and to counsaile wente,
 And after that soone for me sente,
 And to me said on this manere,
 Word for word, as ye shall here.

‘ To see you here us thinke marvaile,
 And how withoute bote or saile, 230
 By any subtilty or wyle,
 Ye get have entre in this yle ;
 But not for that, yet shall ye see
 That we gentille women bee,
 Loth to displeasē any wight,
 Notwithstanding our greate right,
 And for ye shall well understonde
 The olde custome of this londe,
 Which hath continued many yere,
 Ye shall well wete that with us here 340
 Ye may not bide, for causes twaine,
 Which we be purposed you to saine.

‘ Thone is this, our ordinance,
 Which is of long continuance,
 Woll not, sothly we you telle,
 That no man here among us dwelle,
 Wherefore ye mote needs retourne,
 In no wise may ye here sojourne.

‘ Thother is eke, that our queene*
 Out of the realme, as ye may secne, 250
 Is, and may be to us a charge,
 If we lete you goe here at large,
 For which cause the more we doubtē,

To doe a fault while she is oute,
 Or suffer that may be noysaunce,
 Againe our old accustomaunce."

And whan I hadde these causes twaine
 I-heard, O God! *lo!* what a paine
 All sodainly about mine hart
 There came at ones and how smart, 260
 In creeping soft as who shoulde steale,
 Or doe me robbe of all mine heale,
 And made me in my thought so fraid,
 That in courage I stode dismaid.
 And standing thus, as was my grace,
 A lady came more than apace,
 With huge prease her about,
 And tolde how the queene without
 Was arived and woulde come inne,
 Well were they that thider mighte twinne, 270
 They hiede so they woulde not abide
 The bridling *here* horse to ride,
 By five, by sixe, by two, by three,
 There was not one abode with me,
 The queene to meet everichone,
 They went, and bode with me not one :
 And I, after a soft pase,
 Imagining how to purchase
 Grace of the queene, there to bide,
 Till good fortune some happy guide 280
 Me sende mighte, that woulde me bringe
 Where I was borne to my wonninge,
 For way ne foot *ne* knew I none,
 Ne witherward I niste to gone,
 For all was sea about the yle,
 No wonder though me liste not smile,

Seing the case uncouth and straunge,
And so in like a perilous chaunge ;
Imagining thus walking alone,
I saw the ladies everichone, 290
So that I mighte somewhat offere,
Sone after that I drew me nere,
And tho I was ware of the queene,
And how the ladies on their kneene,
With joyous wordes, gladly advised,
Her welcomede so that it suffisede,
Though she princessse hole hadde be
Of all environed is with see :
And thus avising, with chere sad,
All sodainly I was so glad, 300
That greater joy, as mote I thrive,
I trow hadde never man on live,
Than I tho, ne hearte more light,
When of my lady I hadde sight,
Which with the queene come was there,
And in one clothing both they were,
A knight also there well beseene,
I saw that come was with the queene,
Of whome the ladies of that yle
Had huge wonder longe while, 310
Till at the last right soberly,
The queene her selfe full cunningly,
With softe wordes in good wise,
Saide to the ladies young and nise,
' My sisters, how it hath befalle,
I trow ye know it one and alle,
That of long time here have I beene,
Within this yle biding as queene,
Living at ease, that never wighte

More parfit joy have ne mighte, 320
 And to you been of governance,
 Such as ye found in whole pleasance,
 In every thing as ye knowe,
 After our custome and our lowe,
 Which how they first founde were,
 I trow ye wote all the manere,
 And who *the* queene is of this yle,
 As I have been longe while,
 Ech seven yeeres not of usage,
 Visit the heavenly armitage, 330
 Which on a rocke so highe stonds,
 In strange sea out from all londs,
 That to make the pilgrimage
 Is called a long-perillous viage,
 For if the wind be not good frend,
 The journey dures to the end
 Of him that it undertaketh,
 Of twenty thousand one not scapeth ;
 Upon which rock groweth a tree,
 That certaine yeeres beareth apples three, 340
 Which three apples who may have,
 Been from all displeasaunce save,
 That in the seven yeere may falle,
 This wote ye well one and alle,
 For the first apple and the hext,
 Which groweth unto you next,
 Hath three vertues notable,
 And keepeth youth aie durable,
 Beauty and looke, ever in one,
 And is the best in everichone. 350
 ‘ The second apple red and grene,
 Onely with lookes of your yene,

You nourisheth in pleasaunce
 Better than partridge or fesaunce,
 And feedeth every lives wight
 Pleasantly with the sight.

‘ The third apple of the three,
 Which groweth lowest on the tree,
 Who it beareth may not faile
 That to his pleasaunce may availe. 360
 So your pleasure and beauty rich,
 Your during youth ever iliche,
 Your truth, your cunning, and your weale,
 Hath aye floured, and your good heale,
 Without sicknes or displeasaunce,
 Or thing that to you was noysaunce,
 So that ye have as goddesses,
 Lived above alle princeesses :
 Now is befall, as ye may see ;
 To gather these said apples three, 370
 I have not failed againe the day,
 Thitherward to take the way,
 Wening to speed as I had ofte,
 But whan I come, I find alofte
 My sister which that here stands,
 Having those apples in her hands,
 Avising hem and nothing said,
 But looked as she were well paid :
 And as I stood her to beholde,
 Thinking how my joyes were colde, 380
 Sith I those apples have ne mighte,
 Even with that so came this knyghte,
 And in his armes of me aware,
 Me tooke, and to his ship me bare,
 And saide, though him I never hadde seen,

Yet had I long his lady been,
 Wherefore I shoulde with him wende,
 And he woulde to his lives ende
 My servant be, and gan to singe
 As one that hadde wonne a rich thinge ; 390
 Tho were my spirits fro me gone,
 So sodainly everichone,
 That in me appearede but death,
 For I felte neither life ne breath,
 Ne good ne harme none I knew,
 The sodaine paine me was so new,
 That hadde not the hasty grace be
 Of this lady, that fro the tree
 Of her gentilnesse so hied
 Me to comfort, I hadde died, 400
 And of her three apples, one
 In mine hande there put anone,
 Which brought againe mind and breath,
 And me recoverede from the death,
 Wherefore, to her so am I holde,
 That for her alle things do I wolde,
 For she was lech of all my smart,
 And from great paine so quite mine hart,
 And, as God wote, right as ye heare,
 Me to comforte with friendly cheare 410
 She did her prowessse and her might,
 And truly eke so dide this knight,
 In that he eouth, and ofte said,
 That of my wo he was ill paid,
 And cursede the ship that hem there broughte,
 The mast, the master that it wroughte ;
 And as eeh thing mote have an end,
 My sister here your brother frend,

Con with her words so womanly
 This knight entreat, and conningly, 420
 For mine honour and his also,
 And saide that with her we shoulde go
 Both in her ship, where she was brought,
 Which was so wonderfully wrought,
 So cleane, so rich, and so araid,
 That we were both content and paid,
 And me to comfort and to please,
 And mine hearte to put at ease,
 She toke great paine in little while,
 And thus hath brought us to this yle, 430
 As ye may see, wherefore echone,
 I pray you thanke her, one and one,
 As heartily as ye canne devise,
 Or imagine in any wise.
 At once there tho men mighte scen
 A world of ladies fall on kneen
 Before my lady, that there about
 Was left none standing in the rout,
 But altogether they went at ones
 To kneele, they sparede not for the stones, 440
 Ne for estate, ne for *here* blood,
 Well shewede there they couth much good,
 For to my lady they made such feast,
 With suche wordes, that the least,
 So friendly and so faithfully
 Said was, and so cunningly,
 That wonder was, seing *here* youthe,
 To here the language they couthe,
 And wholly how they governed were,
 In thanking of my lady there, 450
 And said by will and maundement,

They were at her commaundement,
 Which was to me as great a joy,
 As winning of the towne of Troy
 Was to the hardy Greekes stronge,
 Whan they it wan with siege longe,
 To see my lady in such a place
 So received as she *tho* was :
 And when they talked had a while
 Of this and that, and of the yle, 460
 My lady, and the ladies there,
 Altogether as they were,
 The queene her selfe began to playe,
 And to the aged lady saye :
 ‘ Now seemeth you not good it were,
 Sith we be altogether here,
 To ordaine and devise the best,
 To set this knight and me at rest ?
 For woman is a feble wight
 To rere a warre against a knight, 470
 And sith he here is in this place,
 At my liste, danger or grace,
 It were to me a great villany
 To do him any tyranny,
 But faine I woulde, now will ye here,
 In his owne country that he were,
 And I in peace, and he at ease,
 This were a way us both to please,
 If it mighte be ; I you beseech,
 With him hereof ye fall in speech.’ 480
 This lady *tho* began to smile,
 Avising her a little while,
 And with glad chere she said anone,
 ‘ Madam, I will unto him gone,

And with him speake, and of him fele
 What he desireth every dele :'
 And soberly this lady tho,
 Her selfe and other ladies two
 She tooke with her, and with sad chere,
 Saide to the knight on this manere, 490
 ' Sir, the princes of this yle,
 Whom for your pleasance many mile
 Ye sought have, as I understonde,
 Till at the last ye have her fonde,
 Me sent hath here, and ladies twaine,
 To heare alle thing that ye saine,
 And for what cause ye have her sought,
 Faine woulde she wote, and whol your thought,
 And why you do her all this wo,
 And for what cause ye be her fo? 500
 And why, of every wight unware,
 By force ye to your ship her bare,
 That she so nigh was agone,
 That mind ne speech hadde she none,
 But as a painfull creature,
 Dying, abode her adventure,
 That her to see indure that paine,
 Here weell say unto you plaine,
 Right on your selfe ye did amisse,
 Seeing how she a princes is.' 510
 This knight, the which cowthe his good,
 Right of his truth meved his blood,
 That pale he woxe as any lead,
 And lookt as he woulde be dead,
 Blood was there none in nother cheke,
 Wordlesse he was and semede sicke,
 And so it provede well he was,

For withoute moving any paas,
 All sodainely as thing dying,
 He fell at once downe sowning, 526
 That for his wo this lady fraide,
 Unto the queene her hyed and saide,
 ' Cometh on anon as have ye blisse,
 But ye be wise, thing is amisse,
 This knight is dead or will be soone,
 Lo, where he lyeth in a swoone,
 Withoute word, or answering
 To that I have said, any thing
 Wherefore, I doubtē that the blame
 Mightē be hindering to your name, 530
 Which floured hath so many yere,
 So longe, that for nothing here,
 I would in no wise he dyede,
 Wherefore good were that ye hyede
 His life to save at the least,
 And after that his wo be ceast,
 Commaund him void, or dwelle,
 For in no wise dare I more melle
 Of thing wherein such perill is,
 As like is now to fall of this.' 540
 This queene right tho full of great feare,
 With all the ladies present there,
 Unto the knight came where he lay,
 And made a lady to him say :
 ' Lo, here the queene, awake for shame !
 What will ye doe, is this good game ?
 Why lye ye here, what is your mind ?
 Now is well scene your wit is blind,
 To see so many ladies here,
 And ye to make none other chere, 550

But as ye set hem all at noughte ;
 Arise, for his love that you boughte :
 But what she said, a word not one
 He spake, ne answer gave her none.
 The queene of very pittie tho,
 Her worship, and his like also,
 To save there she did her paine,
 And quoke for feare, and gan to saine
 For woe, ' Alas, what shall I doe ?
 What shall I say this man unto ? 560
 If he die here, lost is my name,
 How shal I play this perillous game ?
 If any thing be here amisse,
 It shall be said, it rigour is,
 Whereby my name impayre mighte,
 And like to die eke is this knighte :'
 And with that word her hand she laide
 Upon his brest, and to him saide,
 ' Awake my knight ! lo, it am I
 That to you speake, now tell me why 570
 Ye fare thus, and this paine endure,
 Seing ye be in eountry sure,
 Among such friends that would you heale,
 Your hertes ease eke and your weale,
 And if I wist what you might ease,
 Or know the thing that might you please,
 I you ensure it shoulde not faile,
 That to your heale you might availe :
 Wherefore, with all my heart I praye
 Ye rise, and let us talke and playe ; 580
 And see ! how many ladies here
 Be comen for to make good ehere.'
 All was for nought, for still as stone

He lay, and word spoke none.
 Long while was or he mighte braide,
 And of all that the queene hadde said,
 He wiste no word, but at the laste,
 'Mercy,' twice he cryede faste,
 That pittie was his voice to heare,
 Or to behold his painefull cheare, 590
 Which was not fained well to sein,
 Both by his visage and his eyn,
 Which on the queene at once he caste,
 And sighed as he woulde to-braste,
 And after that he shrighete so
 That wonder was to see his wo,
 For sith that payne was first named,
 Was never more wofull payne attained,
 For with voice dead he gan to plaine,
 And to himselfe these wordes saine, 600
 'I wofull wight full of malure,
 Am worse than dead, and yet dure,
 Maugre any payne or death,
 Against my will I fell my breath:
 Why nam I dead sith I ne serve,
 And sith my lady will me sterve?
 Where art thou Death, art thou agast?
 Well, shall we meete yet at the last,
 Though thou thee hide, it is for nought,
 For where thou dwelst thou shalt be sought;
 Maugre thy subtill double face, 611
 Here will I die right in this place,
 To thy dishonour and mine ease;
 Thy manner is no wight to please,
 What needes thee, sith I thee seche,
 So thee to hide my payne to eche?

And well wost thou I will not live,
Who woulde me all this world here give,
For I have with my cowardise,
Lost joy, and heale, and my servise, 620
And made my soveraigne lady so,
That while she liveth I trow my fo
She will be ever to her end,
Thus have I neither joy ne frend ;
Wote I not whether hast or sloth
Hath caused this now by my troth,
For at the hermitage full hie,
When I her saw first with mine eye,
I hiede till I was alofte,
And made my pace small and softe, 630
Till in mine armes I had her faste,
And to my ship bare at the laste,
Whereof she was displeased so,
That endles there seemed her wo,
And I thereof hadde so great fere,
That me repent that I come there,
Which hast I trow gan her displease,
And is the cause of my disease :'
And with that word he gan to cry,
' Now Death, Death !' twy or thry, 640
And motred wot I not what of slouth,
And even with that the queene, of routh,
Him in her armes tooke and sayde,
' Now mine owne knight, be not evill apaid
That I a lady to you sente
To have knowledge of your entente,
For, in good faith, I meante but well,
And would ye wist it every dele,
Nor will not do to you ywis ;'

And with that word she gan him kisse, 650
 And prayed him rise, and saide she woulde
 His welfare, by her truth, and tolde
 Him how she was for his disease
 Right sory, and faine would him please,
 His lyfe to save: these wordes tho
 She saide to him, and many mo
 In comforting, for from the paine
 She would he were delivered faine.
 The knight tho up caste his een,
 And whan he saw it was the queen, 660
 That to him hadde these wordes said,
 Right in his wo he gan to braide,
 And him up dresseth for to knele,
 The queene avising wonder wele:
 But as he rose he overthrew,
 Wherefore the queene, yet eft anew,
 Him in her armes anon tooke,
 And pitiously gan on him looke,
 But for all that nothyng she sayde,
 Ne spake not like she were well payd, 670
 Ne no chere made, nor sad ne light,
 But all in one to every wight
 There was seene conning, with estate,
 In her without noise or debate,
 For save onely a looke piteous,
 Of womanhead undispiteous,
 That she showed in countenance,
 For seemed her hearte from obeisance,
 And not for that she did her reine
 Him to recure from the peine, 680
 And his hearte to put at large,
 For her entent was to his barge

Him to bryng against the eve,
 With certaine ladies and take leve,
 And pray him of his gentilnesse,
 To suffer her thennesforth in peace,
 As other princes hadde before,
 And from thennesforth for evermore,
 She would him worship in all wise,
 That gentilnesse mighte devise, 690
 And payne her wholly to fulfille,
 In honour, his pleasure and wille.
 And during thus this knightes wo,
 Present the queene and other mo,
 My lady, and many another wight,
 Ten thousand shippes at a sight,
 I saw come over the wavy flood,
 With saile and ore, that as I stood
 Hem to behold, I gan marvaile
 From whom mighte come so many a saile, 700
 For sith the tyme that I was bore,
 Such a navie there before
 Had I not seene, ne so arayed,
 That for the sight my hearte playede
 To and fro within my breste
 For joy, long was or it woulde reste,
 For there was sailes full of floures,
 After castels with huge toures,
 Seeming full of armes brighte,
 That wonder lusty was the sighte, 710
 With large toppes, and mastes longe,
 Richly depeint, and rear amonge,
 At certain times gan repaire
 Smalle birdes, downe from thaire,
 And on the shippes bounds about

Sate and song with voice full out,
 Ballades and layes right joyously,
 As they cowth in *here* harmony,
 That you to write that I there see,
 Mine excuse is it may not be, 720
 For-why the matter were to long
 To name the birds and write *here* song :
 Whereof, anon, the tydings there
 Unto the queene soone brought were,
 With many alas, and many a doubt,
 Shewing the shippes there without.
 Tho gan the aged lady weepe,
 And said, ' Alas, our joy on sleepe
 Soone shall be brought, ye, long or night,
 For we deseried been by this knight, 730
 For certes, it may none other be,
 But he is of yond companie,
 And they be come him here to seche,
 And with that word her faylede speche.
 ' Withoute remedy we be destroid,'
 Full oft said all, and gan conclude,
 Holy at once at the laste,
 That best was shit *here* yates faste,
 And arme hem all in good langage,
 As they hadde done of old usage, 740
 And of faire wordes make *here* shot,
 This was *here* counsaile and the knot,
 And other purpose tooke they none,
 But armed thus forth they gone
 Toward the walles of the yle,
 But or they come there long while,
 They mette the greate lord of bove,
 That called is the god of love,

That hem avised with such chere,
 Right as he with hem angry were : 750
 Avayled hem not here walls of glasse,
 This mighty lord let not to passe,
 The shutting of *here* yates faste,
 All they had ordaind was but waste,
 For when his shippes hadde founde land,
 This lord anon, with bow in hand,
 Into this yle with huge prease
 Hiede fast, and woulde not cease
 Till he came there the knight *gan* lay ;
 Of queene ne lady by the way 760
 Tooke he no heede but forth paste,
 And yet all followed at the laste ;
 And when he came where lay the knight,
 Well shewed he he hadde great might,
 And forth the queene called anone,
 And all the ladies everichone,
 And to hem said, ‘ Is not thus routh,
 To see my servaunt for his trowth,
 Thus leane, thus sicke, and in this payne,
 And wot not unto whom to playne, 770
 Save onely one withoute mo,
 Which might him him heale and is his fo?’
 And with that word his heavy brow
 He shewed the queene and lookede row ;
 This mighty lord forth tho anone,
 With o looke her faultes echone
 He can her shew in little speech,
 Commaunding her to be his lech,
 Withouten more, shortly to saye, 779
 He thoughte the queene soone should obaye,
 And in his hond he shoke his bowe,

And saide right soone he woulde be knowe,
 And for she hadde so long refused
 His service, and his lawes not used,
 He let her wite that he was wroth,
 And bent his bow and forth he goth
 A pace or two, and even there
 A large draught, up to his eare,
 He drew, and with an arrow grounde
 Sharpe and new, the queene a wounde 790
 He gave, that pierced unto the hearte,
 Which afterward full sore gan smarte,
 And was not whole of many yeare ;
 And even with that, ' Be of good cheare,
 My knight,' (quod he) ' I will thee hele,
 And thee restore to parfite wele,
 And for each payne thou hast endured,
 To have two joyes thou art cured :'
 And forth he paste by the rout,
 With sober cheare walking about, 800
 And what he said I thoughte to heare,
 Well wist he which his servaunts were,
 And as he passed anon he fond
 My lady, and her tooke by the hond,
 And made her chere as a goddessse,
 And of beaute called her princesse,
 Of bounty eke gave her the name,
 And saide there was nothyng blame
 In her, but she was vertuous,
 Saving she woulde no pity use, 810
 Which was the cause that he her soughte,
 To putte that far out of her thoughte,
 And sith she hadde whole richesse
 Of womanhead and frendlinesse,

He said it was nothing sitting
 To voide pity his owne leggyng,
 And gan her preach and with her playe,
 And of her beauty told her aie,
 And saide she was a creature
 Of whom the name should endure, 820
 And in bookes full of pleasaunce
 Be put for ever in remembraunce,
 And, as me thoughte, more friendly
 Unto my lady, and goodlely
 He spake, than any that was there,
 And for thapples I trow it were,
 That she had in possession;
 Wherefore, long in procession,
 Many a pace, arme under other,
 He welke, and so dide with none other, 830
 But what he woulde commaund or saye,
 Forthwith needes all must obaye,
 And what he desired at the lest,
 Of my lady, was by request;
 And when they long together hadde beene,
 He broughte my lady to the queene,
 And to her saide, 'So God you speed,
 Shew grace, consente, that is need.'
 My lady tho, full conningly,
 Right well avised and womanly 840
 Downe gan to kneele upon the floures,
 Which Aprill nourished hadde with shoures,
 And to this mighty lord gan saye,
 'That pleaseth you, I woll obaye,
 And me restraine from other thought,
 As ye woll all thing shall be wrought.'
 And with that word kneeling she quoque;

That mighty lord in armes her tooke,
 And said, 'Ye have a servaunt one,
 That truer living is there none, 850
 Wherefore, good were, seeing his trouth,
 That on his paines ye hadde routh,
 And purpose you to heare his speeche,
 Fully avised him to leeche,
 For of one thyng ye may be sure,
 He will be yours while he may dure.'
 And with that word, right on his game,
 Me thought he lough, and tolde my name,
 Which was to me marvaile and fere,
 That what to do I niste there, 800
 Ne whether was me bet or none,
 There to abide, or thus to gone,
 For well wend I my lady wolde
 Imagen or deme that I hadde told
 My counsaile whole, or made complaint
 Unto that lord, that mighty saint,
 So verily each thing unsought
 He said, as he hadde knowne my thought,
 And tolde my trouth and mine unease
 Bet than I couth have for mine ease, 870
 Though I hadde studied all a weke,
 Well wiste that lord that I was seke,
 And woulde be leched wonder faine,
 No man me blame, mine was the paine:
 And when this lord had alle said,
 And longe with my lady plaid,
 She gan to smile with spirit glade,
 This was the answer that she made,
 Which put me there in double peine,
 That what to do, ne what to seine 880

Wist I not, ne what was the beste,
 Ferre was my herte then fro his reste,
 For, as I thoughte, that smiling signe
 Was token that the heart eneline
 Woulde to requests reasonable,
 Because smiling is favorable
 To every thing that shall thrive,
 So thought I tho; anon, blive,
 That wordlesse answeere in no toun
 Was tane for obligatioun, 900
 Ne called surety in no wise,
 Amongst hem that called been wise.
 Thus was I in a joyous dout,
 Sure and unsurest of that rout,
 Right as mine hearte thought it were,
 So more or lesse wexe my fere,
 That if one thought made it wele
 Another shent it every dele,
 Till, at the last, I couthe no more,
 But purposed, as I dide before, 900
 To serve truly my lives space,
 Awaiting ever the yeare of grace,
 Which may falle yet or I sterve,
 If it please her that I serve,
 And served have, and woll do ever,
 For thyng is none that me is lever
 Than her service, whose presence
 Mine Heaven is whole, and her absence
 An Hell, full of divers paines,
 Whych to the death full oft me straines. 910
 Thus in my thoughtes as I stood,
 That unneth felt I harme ne good,
 I saw the queene a little paas

Come where this mighty lord *tho* was,
 And kneelede downe in presence there
 Of all the ladies that there were,
 With sober countenaunce avised,
 In fewe wordes that well suffised,
 And to this lord, anon, present
 A bill, wherein whole her entent 920
 Was written, and how she besoughte,
 As he knew every will and thoughte,
 That of his godhead and his grace
 He woulde forgive all old trespase,
 And undispleased be of time past,
 For she would ever be stedfast,
 And in his service to the death
 Use every thought while she hadde breath ;
 And sight and wept, and saide no more ;
 Within was written all the sore 930
 At whyche bill the lord gan smile,
 And said he woulde within that yle
 Be lord and syre, both east and west,
 And cald it there his newe conquest,
 And in great councell tooke the queene,
 Long were the tales hem betweene,
 And over her bill he reade thrise,
 And wonder gladly gan devise
 Her features faire and her visage,
 And bad good thrift on that image, 940
 And saied he trowed her compleint
 Should after cause her be corseint,
 And in his sleeve he putte the bille,
 Was there none that knew his wille,
 And forth he walke apace about
 Beholding all the lusty rout,

Halfe in a thought with smiling chere,
 Till at the last, as ye shall here,
 He turned unto the queene ageine,
 And saide, 'To morne, here in this pleine, 950
 I woll ye be, and alle yours,
 That purposed ben to weare flours,
 Or of my lusty colour use,
 It may not be to you excuse,
 Ne none of youres in no wise,
 That able be to my servise,
 For as I said have here before,
 I will be lord for evermore
 Of you, and of this yle, and alle,
 And of all youres, that have shalle 960
 Joy, peace, ease, or in plesaunce
 Your lives use without noysaunce;
 Here will I in state be scene,'
 And turned his visage to the queene,
 'And you give knowledge of my wille,
 And a full answeere of your bille.'
 Was there no nay, ne wordes none,
 But very obeisaunt seemed echone,
 Queene and other that were there,
 Well seemed it they hadde great fere, 970
 And there tooke lodging every night,
 Was none departed of that night,
 And some to read olde romances,
 Hem occupied for *here* pleasances,
 Some to make verelaies and laies,
 And some to other diverse plaies:
 And I to me a romance tooke,
 And as I reading was the booke,
 Me thoughte the sphere hadde so runne,

That it was rising of the Sunne, 980
 And such a prees into the plaine
 Assemble gone, that with great paine
 One mighte for other go ne stande,
 Ne none take other by the hande,
 Withouten they distourbed were,
 So huge and great the prees was there.

And after that within two houres,
 This mighty lord all in floures
 Of divers colours many a paire,
 In his estate up in the aire, 990
 Well two fathom, as his hight,
 He set him there in all *here* sight,
 And for the queene and for the knight,
 And for my lady, and every wight
 In hast he sente, so that never one
 Was there absent, but come echone:
 And when they thus assembled were,
 As ye have heard me say you here,
 Withoute more tarrying, on hight,
 There to be seene of every wight, 1000
 Up stood among the prees above
 A counsayler, servaunt of Love,
 Which seemed well of great estate,
 And shewed there how no debate
 Owe ne goodly mighte be used
 In gentilnesse, and be excused,
 Wherefore, he said, his lordes wille
 Was every wight there shoulde be stille,
 And in pees, and one accord,
 And thus commaunded at a word, 1010
 And can his tongue to swiche language
 Turne, that yet in all mine age

Heard I never so conningly
 Man speake, ne halfe so faithfully,
 For every thing he saide there
 Seemed as it inscaled were,
 Or approved for very trewe :
 Swiche was his cunning language newe,
 And well according, to his chere,
 That where I be, me thinke I here 1020
 Him yet alway, when I mine one
 In any place may be alone :
 First con he of the lusty yle
 Alle thastate in little while
 Rehearse, and wholly every thing
 That causede there his lords comming,
 And every wele and every wo,
 And for what cause ech thing was so,
 Well shewed he there in easie speech,
 And how the sicke hadde need of leech : 1030
 And that whole was, and in grace,
 He tolde plainly why each thing was,
 And at the last he con conclude,
 Voided every language rude,
 And saide, 'That prinee, that mighty lord,
 Or his departing, would accord
 Alle the parties there present,
 And was the fine of his entent,
 Witnesse his presenee in your sight,
 Which sit among you in his might :' 1040
 And kneelede downe withouten more,
 And not o word *ne* spake he more.

Tho gan this mighty lord him dresse,
 With cheare avised, to do largesse,
 And said unto this knight and me,

' Ye shall to joy restored be,
 And for ye have ben true, ye twaine,
 I graunt you here for every paine
 A thousand joies every weeke,
 And looke ye be no lenger seeke. 1050
 And both your ladies, lo, hem here
 Take ech his own, beeth of good chere,
 Your happie day is new begunne,
 Sith it was rising of the Sunne,
 And to all other in this place
 I graunt wholly to stand in grace,
 That serveth truely, withoute slouth,
 And to avaunced be by trouth.'
 Tho can this knight and I downe kneele,
 Wening to doe wonder wele, 1060
 ' Seeing, O Lord, your greate mercy,
 Us hath enriched so openly,
 That we deserve may never more
 The leaste part, but evermore,
 With soule and body truely serve
 You and youres till we sterve."
 And to *here* ladies there they stode,
 This knight that couthe so mikel goode,
 Went in hast, and I also,
 Joyous, and glad were we tho, 1070
 And also rich in every thought,
 As he that all hath and ought nought,
 And hem besought in humble wise,
 Us taccepte to *here* service,
 And shew us of *here* friendly cheares,
 Which in *here* treasure many yeares,
 They hadde kept, us to great paine,
 And tolde how *here* servants twaine,

Were and woulde be, and so had ever,
And to the death chaunge woulde we never,
Ne doe offence, ne thinke like ille, 108c
But fill *here* ordinance and wille :
And made our othes freshe newe,
Our olde service to renewe,
And wholly *heres* for evermore,
We there become, what mighte we more ?
And well awaiting, that in slouth
We made ne fault, ne in our trowth,
Ne thoughte not do, I you ensure,
With our wille, where we may dure. 109c

This season past, againe an eve,
This lord of the queene tooke leve,
And said he would hastely returne,
And at good leisure there sojourne,
Both for his honour and for his ease,
Commaunding fast the knight to please,
And gave his statutes in papers,
And ordent divers officers,
And forth to ship the same night
He went, and soone was out of sight. 110c
And on the morrow, when the aire
Attempred was and wonder faire,
Early at rising of the *Sunne*,
After the night away was runne,
Playing us on the rivage,
My lady spake of her voyage,
And saide she made smalle journies,
And held her in straunge countries,
And forthwith to the queene wente,
And shewed her wholly her entente, 111c
And tooke her leave with cheare weeping,

That pittie was to see that parting :
 For to the queene it was a paine,
 As to a martyr new yslaine,
 That for her woe, and she so tender,
 Yet weepe I oft when I remember ;
 She offerde there to resigne,
 To my lady eight times or nine,
 Thastate, the yle, shortly to telle,
 If mighte it please her there to dwelle, 1120
 And saide for ever her linage
 Shoulde to my lady doe homage,
 And hers be hole withouten more,
 Ye, and all *heres* for evermore :
 ‘ Nay, God forbid,’ my lady ofte,
 With many conning word and softe,
 Saide, ‘ that ever such thing shoulde beene,
 That I consente shoulde, that a queene
 Of your estate, and so well named,
 In any wise shoulde be attamed ; 1130
 But woulde be faine with all my herte,
 What so befell, or how me smerte,
 To doe thing that you mighte please,
 In any wise, or be your ease :’
 And kissede there, and bad good night,
 For which leve wepte many a wight ;
 There mighte men here my lady praised,
 And such a name of her araised,
 What of cunning and friendlinesse,
 What of beauty with gentilnesse, 1140
 What of glad and friendly cheares,
 That she used in all her yeares,
 That wonder was here every wight,
 To say well how they did *here* might ;

And with a prees, upon the morrow,
To ship her brought, and what a sorrow
They made, when she should under saile,
That, and ye wist, ye woulde mervaile.
Forth goeth the ship, out goeth the sonde,
And I as a wood man unbonde, 1150
For doubt to be behinde there,
Into the sea withouten fere,
Anon I ran, till with a wawe,
All sodenly, I was overthrawe,
And with the water to and fro,
Backward and forward travailed so,
That mind and breath nigh was agone
For good ne harme knew I none,
Til at the last with hookes tweine,
Men of the ship with mikel peine, 1160
To save my life, dide such travaile,
That, and ye wist, ye woulde mervaile,
And in the ship me drew on hie,
And saiden alle that I woulde die,
And laide me long downe by the maste,
And of here clothes on me caste,
And there I made my testamente,
And wiste my selfe not what I mente,
But whan I said had what I woulde,
And to the mast my wo all tolde, 1170
And tane my leave of every wight,
And closed mine eyen, and lost my sight.
Avised to die, without more speche,
Or any remedy to seeche
Of grace new, as was great need :
My lady of my paine tooke heed,
And her bethought how that for trouth

To see me die it were great routh,
 And to me came in sober wise,
 And softly said, 'I pray you rise, 1186
 Come on with me, let be this fare,
 All shall be wel, have ye no care,
 I will obey, ye, and fulfille,
 Holy in all that lordes wille,
 That you and me not long ago,
 After his list commaundede so,
 That there againe no resistance
 May be withoute great offence,
 And, therefore, now *loke* what I say,
 I am and will be friendly aye, 1190
 Rise up, behold this avauntage,
 I graunte you inheritage,
 Peaceably withoute strive,
 During the daies of your live.'
 And of her apples in my sleve
 One she put, and tooke her leve
 In wordes few and saide, 'Good hele,
 He that all made, you send and wele :'
 Wherewith my paines, all at ones,
 Tooke such leave, that all my bones, 1200
 For the newe durensse pleasaunce,
 So as they couthe, desirede to daunce,
 And I as whole as any wight,
 Up rose, with joyous heart and light,
 Hole and unsicke, right wele at ease,
 And all forget hadde my disease,
 And to my lady, where she plaide,
 I went anone, and to her saide :
 'He that all joies persons to please
 First ordainede with parfite ease, 1210

And every pleasure can departe,
 Send you madame, as large a parte,
 And of his goodes such plenty,
 As he hath done you of beauty,
 With hele and all that may be thought,
 He send you all as he all wrought :
 Madame,' (quoth I) ' your servaunt trewe,
 Have I ben long, and yet will newe,
 Withoute change or repentaunce,
 In any wise or variaunce, 1226
 And so will do, as thrive I ever,
 For thing is none that me is lever
 Than you to please, how ever I fare,
 Mine hartes lady and my welfare,
 My life, mine hele, my lech also,
 Of every thing that doth me wo,
 My helpe at need, and my sureté
 Of every joy that longeth to me,
 My succours whole in alle wise,
 That may be thought or man devise, 1230
 Your grace, madame, such have I founde,
 Now in my need that I am bounde
 To you for ever, so Christ me save,
 For heale and live of you I have,
 Wherefore is reasoun I you serve,
 With due obeisaunce till I sterve,
 And dead and quicke be ever youres,
 Late, early, and at all houres.'
 Tho came my lady small alite,
 And in plaine English con consite 1240
 In wordes few, whole her entente
 She shewed me there, and how she mente
 To me-wardes in every wise,

Wholly she came at *here* devise,
 Withoute processe or long travell,
 Charging me to keepe counsell,
 As I woulde to her grace attaine,
 Of which commaundement I was faine,
 Wherefore I passe over at this time,
 For counsell cordeth not well in rime, 1250
 And eke the oth that I have swore,
 To breake me were better unbore,
 Why for untrue for evermore
 I shoulde be holde, that nevermore
 Of me in place shoulde be reporte
 Thing that availe might, or comforte
 To mewardes in any wise,
 And ech wight woulde me dispise
 In that they couth, and me repreve,
 Which were a thing sore for to greeve, 1260
 Wherefore hereof more mencion
 Make I not now ne long sermon,
 But shortly thus I me excuse,
 To rime a counsell I refuse.
 Sailing thus two daies or three,
 My lady towardes her countree,
 Over the waves high and greene,
 Which were large and deepe betweene,
 Upon a time me called, and saide
 That of my hele she was well paid, 1270
 And of the queene and of the yle,
 She talkede with me longe while,
 O all that she there hadde scene,
 And of the state, and of the queene,
 And of the ladies name by name,
 Two houres or mo, this was her game,

Till at the last the wind can rise,
And blew so fast, and in such wise,
The ship that every wight can saye,
'Madame, er eve be of this daye,' 1280
And God tofore, ye shall be there
As ye woulde fainest that ye were,
And doubte not within sixe hours,
Ye shall be there, as all is yours.'
At which wordes she gan to smile,
And saide that was no long while,
That they her set, and up she rose,
And all about the ship she gose,
And made good cheare to every wight,
Till of the land she had a sight, 1290
Of which sight glad, God it wot,
She was abashed and about,
And forth goeth, shortly you to telle,
Where she accustomed was to dwelle,
And received was, as good right,
With joyous cheere and heartes light,
And as a glad new aventure,
Pleasaunt to every creature,
With which landing tho I awoke,
And found my chamber full of smoke, 1300
My cheekes eke unto the eares,
And all my body wet with teares,
And all so feeble and in such wise
I was, that unneth might I rise,
So fare travailed and so faint,
That neither knew I kirke ne saint,
Ne what was what, ne who was who,
Ne avised what way I woulde go,
But by a venturous grace,

I rose and walkte, soughte pace and pace, 1310
 Till I a winding staire found,
 And held the vice aye in my hond,
 And upward softly so can creepe,
 Till I came where I thoughte to sleepe
 More at mine ease, and out of preace,
 At my good leisure, and in peace,
 Till somewhat I recomfort were
 Of the travell and greate feare
 That I endured hadde before,
 This was my thought withoute more, 1320
 And as a wight witlesse and faint,
 Withoute more, in a chamber paint
 Full of stories old and divers,
 More than I can now rehearse,
 Unto a bed full soberly,
 So as I mighte full southly,
 Pace after other, and nothing saide,
 Till at the last downe I me laide,
 And as my mind woulde give me leve,
 All that I dreamed hadde that eve, 1330
 Beforen all I can rehearse,
 Right as a child at schoole his verse,
 Doth after that he thinketh to thrive,
 Right so did I for all my live,
 I thoughte to have in remembraunce,
 Bothe the paine and the pleasaunce,
 The dreame whole, as it me befell,
 Which was as ye here me telle.
 Thus in my thoughtes as I lay,
 That happy or unhappy day, 1340
 Ne wot I not, so have I blame,
 Of thilke two which is the name:

Befell me so, that there a thoughte,
By processe new on sleepe me broughte,
And me governede so in a while,
That yet againe within the yle,
Methought I was, whereof the knight,
And of the ladies I had a sight,
And were assembled on a greene,
Knight and lady, with the queene, 1350
At which assembly there was said,
How they alle content and paid
Were wholly as in that thing,
That the knight there shoulde be king,
And they would all for sure wisse
Wedded be bothe more and lesse,
In remembraunce withoute more,
Thus they consente for evermore,
And was concluded that the knight
Departed shoulde the same night, 1360
And forthwith there tooke his voiage
To journey for his marriage,
And returne with such an hoste,
That wedded mighte be least and moste,
This was concluded, written and sealed,
That it mighte not be repealed
In no wise, but aie be firme,
And should all be within a tearme,
Withoute more excusation,
Both feast and coronation. 1370
This knight which hadde thereof the charge,
Anon into a little barge
I-brought was late against an eve,
Where of all he tooke his leave ;
Which barge was as a mannes thought,

After his pleasure to him brought,
 The queene herselfe accustomed aye
 In *thilke* same barge to playe,
 It needeth neither mast ne rother,
 I have not heard of such another, 1380
 No maister for the governaunce,
 Hie sayled by thought and pleasaunce,
 Withoute labour, east and west,
 Alle was one, calme or tempest,
 And I wente with at his request,
 And was the first praied to the fest.
 Whan he came in-*to* his countree,
 And passed hadde the wavy see,
 In an haven deepe and large
 He left his rich and noble barge, 1390
 And to the court, shortly to telle,
 He wente, where he wont was to dwelle,
 And was received as good right,
 As heire, and for a worthy knight,
 With alle the states of the lond,
 Which came anon at his firste sond,
 With glade spirits full of trouth,
 Loth to do fault or with a slouth,
 Attainte be in any wise ;
Here riches was *here* olde servise, 1400
 Which ever trew hadde be fonde,
 Sith first inhabit was the londe,
 And so received there her king,
 That forgotten was no thing,
 That owe to be done ne mighte please,
 Ne *here* souveraine lord do ease,
 And with hem, so shortly to saye,
 As they of custome hadde done aye,

For seven yere past was and more,
 The father, the olde wise and hore 1410
 King of the land tooke *tho* his leve
 Of all his barons on an eve,
 And told hem how his dayes past
 Were all, and comen was the last,
 And hartily prayed hem to remember
 His sonne, which yong was and tender,
 That borne was *here* prince to be,
 If he returne to that countree
 Mighte, by adventure or grace,
 Within any time or space, 1420
 And to be true and friendly aye,
 As they to him hadde bene alway :
 Thus he hem prayde, withoute more,
 And tooke his leave for evermore.
 Knowen was, how tender in age,
 This younge prince a great viage
 Uncouth and straunge, honours to seehe,
 Tooke in honde with little speeche,
 Which was to seeke a princeesse
 That he desirede more than richesse, 1430
 For her greate name that flourede so,
 That in that time there was no mo
 Of her estate, ne so well named,
 For borne was none that ever her blamed :
 Of which princees somewhat before,
 Here have I spoke, and some will more.
 So thus befell as ye shall heare,
 Unto *here* lord they made such cheare,
 That joy was there to be present
 To see their troth and how they mente, 1440
 So very glad they were ech one,

That hem among there was no one,
 That desirede more richesse,
 Than for *here* lord such a princesse,
 That they mighte please, and that were faire,
 For fast desirede they an heire,
 And saide great surety were ywis.
 And as they were speaking of this,
 The prince himselve him avised,
 And in plaine English undisguised, 1450
 Hem shewed hole his journeye,
 And of *here* counsell gan hem preye,
 And told how he ensured was,
 And how his day he mighte not passe,
 Without diffame and greate blame,
 And to him for ever a shame,
 And of *here* counsell and advise,
 There he prayth hem once or twice,
 And that they woulde within ten daies,
 Advise and ordaine him such waies,
 So that it were no displeasaunce,
 Ne to this realme over great grievaunce,
 And that he have mighte to his feast,
 Sixty thousand at the least,
 For his intent within short while
 Was to returne unto his yle
 That he came fro, and kepe his day,
 For nothing would he be away.
 To counsaile tho the lords anon,
 Into a chamber everychone, 1470
 Together went, hem to devise,
 How they mighte best and in what wise,
 Purveye for *here* lords pleasaunce
 And the realmes continuaunce

Of honor, which in it before
 Hadde continued evermore.
 So, at the last, they founde the waies,
 How within the nexte ten daies,
 All mighte with paine and diligence
 Be done, and cast what the dispence 1486
 Mighte draw, and in conclusion,
 Made for ech thing provision.
 Whan this was done, wholly tofore
 The prince, the lordes all before
 Come, and shewed what they hadde done,
 And how they couthe by no reason
 Finde that within the ten daies,
 He mighte departe by no waies,
 But woulde be fifteene, at the least,
 Or he returne mighte to his feast : 1490
 And shewed him every reason why
 It mighte not be so hastily,
 As he desirede, ne his day
 He mighte not keepe by no way,
 For divers causes wonder greate :
 Which, whan he heard, in such an heate
 He fell, for sorow and was seke,
 Still in his bedde whole that weke,
 And nigh the tother for the shame,
 And for the doubt, and for the blame 1500
 That on him mighte be aret,
 And oft upon his brest he bet,
 And said, 'Alas, mine honour for aye,
 Have I here lost cleane this day,
 Dead would I be ! alas, my name
 Shall aye be more henceforth in shame,
 And I dishonoured and repreved,

And never more shall be beleved :
 And made swich sorow, that in trowth,
 Him to behold it was great routh : 1510
 And so endured the dayes fiftene,
 Till that the lordes on an even
 Him come, and tolde they ready were,
 And shewed in few wordes there,
 How and what wise they hadde purveyd
 For his estate, and to him said,
 That twenty thousand knights of name,
 And forty thousand without blame,
 All come of noble ligné,
 Togider in a compané, 1520
 Were lodged on a rivers side,
 Him and his pleasure there tabide.
 The prince tho for joy up rose,
 And where they lodged were, he goes
 Withoute more that same nighte,
 And these his supper made to dighte,
 And with hem bode till it was dey,
 And forthwith to take his journey,
 Leving the streight, holding the large,
 Till he came to his noble barge ; 1530
 And when this prince, this lustie knight,
 With his people in armes brighte,
 Was comen where he thought to pase,
 And knew well none abiding was
 Behind, but all were there present,
 Forthwith anon all his intent
 He told hem there, and made his cries
 Through his oste that day twies,
 Commaunding every lives wight,
 There being present in his sight, 1540

To be the morow on the rivage,
 Where he *beginne* would his viage.
 The morrow come, the cry was kept,
 Fewe was there that night that slept,
 But trussed and purveied for the morrow,
 For fault of ships was all *here* sorrow,
 For save the barge, and other two,
 Of shippes there saw I no mo :
 Thus in *here* doubttes as they stode,
 Waxing the sea, comming the floode, 1550
 Was cried, 'To ship goe every wighte,'
 Then was but hie, that hie mighte,
 And to the barge me thought echone
 They wente, without was left not one,
 Horse, male, trusse, ne bagage,
 Salad, speare, gard-brace, ne page,
 But was lodged and roome ynough,
 At which shipping me thought I lough,
 And gan to marvaile in my thought,
 How ever such a ship was wrought, 1560
 For what people that can encrease,
 Ne never so thicke mighte be the prease,
 But all hadde roome at *here* wille,
 There was not one was lodged ille,
 For as I trow, my selfe the last
 Was one, and lodged by the mast.
 And where I looked I saw such rome,
 As all were lodged in a towne.
 Forth goth the ship, said was the creed,
 And on *here* knees for *here* good speed, 1570
 Downe kneeled every wight a while,
 And praiede faste that to the yle
 They mighte come in safety,

The prince and all the company,
 With worship and withoute blame,
 Or disclaunder of his name,
 Of the promise he shoulde retourne,
 Within the time he dide sojourne,
 In his londe bidding his host,
 This was *here* prayer of least and most ; 1580
 To keepe the day it mighte not been,
 That he appointed hadde with the queen,
 To retourne withoute slouth,
 And so assured had his trowth,
 For whiche fault this prince, this knight,
 During the time slepte not a night,
 Such was his wo and his disease,
 For doubt he shoulde the queene displease.
 Forth goeth the ship with suche speed,
 Right as the prince for his great need 1590
 Desire would after his thoughte,
 Till it into the yle him broughte,
 Where in hast upon the sand,
 He and his people tooke the land,
 With hartes glad, and chere light,
 Weening to be in Heaven that night :
 But or they passeden a while,
 Entring in toward that yle,
 All clad in blacke with chere piteous,
 A lady which never dispiteous 1600
 Hadde be in all her life tofore,
 With sory chere, and harte to-tore,
 Unto this prince where he gan ride,
 Come and said, ' Abide, abide,
 And have no hast, but fast retourne,
 No reason is ye here sojourne,

For your untruth hath us discried,
 Wo worth the time we us alliede
 With you, that are so soone untrewe,
 Alas, the day that we you knewe! 1610
 Alas, the time that ye were bore,
 For all this lond by you is lore!
 Accursed be he you hider broughte,
 For all your joy is turnd to nought,
 Your acquaintance we may complaine,
 Which is the cause of all our paine.
 'Alas, madame,' quoth tho this knight,
 And with that from his horse he light,
 With colour pale, and cheekes lene,
 'Alas, what is this for to mene? 1620
 What have ye said, why be ye wroth?
 You to displease I woulde be loth,
 Know ye not well the promesse
 I made have to your princesse,
 Which to perfourme is mine intent,
 So mote I speed, as I have ment,
 And as I am her very trewe,
 Withoute change or thoughtes newe,
 And also fully her servand,
 As creature or man livand 1630
 May be to lady or princesse,
 For she mine Heaven and whole richesse
 Is, and the lady of mine heale,
 My worldes joy and all my weale,
 What may this be, whence cometh this speech?
 Tell me, madame, I you beseech,
 For sith the first of my living,
 Was I so fearfull of nothing,
 As I am now to heare you speake;

For doubt I feele mine hearte breake ; 1640
 Say on, madame, tell me your wille,
 The remenaunt is it good or ille ?
 ' Alas,' (quod she) ' that ye were bore,
 For, for your love this land is lore !
 The queene is dead, and that is ruth,
 For sorrow of your great untruth ;
 Of two partes of the lusty route,
 Of ladies that were there aboute,
 That wont were to talke and play,
 Now *aren* dead and cleane away, 1650
 And under earth tane lodging newe ;
 Alas, that ever ye were untrewē !
 For when the time ye set was past,
 The queene to counsaile sone in hast,
 What was to doe, and said great blame
 Your acquaintaunce cause would and shame,
 And the ladies of *here* advise
 Prayed, for need was to be wise,
 In eschewing tales and songs,
 That by hem make would ille tongs, 1660
 And sey they were lightly conquest,
 And prayed to a poore feast,
 And foule had *here* worship weived,
 When so unwisely they conceived,
Here rich treasour, and *here* heale,
 Here famous name, and *here* weale,
 To put in such an aventure,
 Of which the sclander ever dure
 Was like, without helpe of appele,
 Wherefore they need had of counsele, 1670
 For every wight of hem woulde say
Here closed yle an open way

Was become to every wight,
 And well apprevd by a knight,
 Which he alas, without paysaunce,
 Hadde soone acheved thobeisaunce :
 All this was moved at counsell thrise,
 And concluded daily twice,
 That bet was die withoute blame
 Than lose the riches of *here* name, 1680
 Wherefore, the deathes acquaintance
 They chese, and left have *here* pleasaunce,
 For doubt to live as repreved,
 In that they you so soone belceved,
 And made *here* othes with one accord,
 That eate ne drinke, ne speake word,
 They shoulde never, but ever weping
 Bide in a place withoute parting,
 And use *here* dayes in penaunce,
 Without desire of allegeaunce, 1690
 Of which the truth, anon, con prove,
 For-why the queen forthwith her leve
 Toke at hem all that were present,
 Of her defaults fully repent,
 And diede there withouten more :
 Thus are we lost for evermore ;
 What should I more hereof rehearse ?
 Comen within, come see her herse,
 Where ye shall see the piteous sight,
 That ever yet was shewen to knight, 1700
 For ye shall see ladies stonde,
 Ech with a great rod in *hire* honde,
I-clad in black, with visage white,
 Ready each other for to smite,
 If any be that will not wepe,

Or who that maketh countenance to slepe ;
 They be so bet, that aU-so blewe
 They be as cloth that died is newe,
 Such is their parfite repentance ;
 And thus they kepe *here* ordinance, 1710
 And will do ever to the death,
 While hem endureth any breath.'

This knight tho in armes twaine,
 This lady tooke and gan her saine,
 'Alas, my birth ! wo worth my life !'
 And even with that he drew a knife,
 And through gowne, doublet, and sherte,
 He made the blood come from his herte,
 And set him downe upon the greene,
 And full repent closed his eene, 1720
 And save that ones he drew his breath,
 Without more thus he tooke his death.
 For which cause the lusty hoast,
 Which in a battaile on the coast,
 At once for sorrow such a cry
 Gan rere thorow the company,
 That to the Heaven heard was the sowne,
 And under therth als fer adowne,
 That wilde beastes for the feare
 So sodainly afrayed were, 1730
 That for the doubt, while they mighte dure,
 They ran as of *here* lives unsure,
 From the woodes unto the plaine,
 And from the valleys the highe mountaine
 They sought, and ran as beastes blinde,
 That cleane forgotten had *here* kinde.
 This wo not ceased, to counsaile wente
 These lords, and for that lady sente,

And of avise what was to done,
 They her besoughte she say woulde sone. 1740
 Weeping full sore, all clad in blake,
 This lady softly to hem spake,
 And saide, ' My lordes, by my trouth,
 This mischiefe it is of your slouth,
 And if ye hadde that judge woulde right,
 A prince that were a very knight,
 Ye that ben of astate echone,
 Die for his fault should one and one ;
 And if he hold hadde the promesse,
 And done that longeth to gentilnesse, 1750
 And fulfilled the princes behest,
 This hastie farme hadde bene a feast,
 And now is unrecoverable,
 And us a slaunder aye durable ;
 Wherefore, I say, as of counsaile,
 In me is none that may availe,
 But, if ye list, for remembraunce
 Purvey and make such ordinaunce,
 That the queene, that was so meke,
 With all her women, dede or seke, 1760
 Might in your land a chappell have,
 With some remembraunce of her grave,
 Shewing her end with the pity,
 In some notable olde city,
 Nigh unto an high way,
 Where every wight mighte for her pray,
 And for all hers that have ben trewe ;
 And even with that she changed hewe,
 And wise wished after the death,
 And sight, and thus passed her breath. 1770
 Then saide the lordes of the hoste,

And so conclude least and moste,
 That they would ever in houses of thacke
Here lives lead, and weare but blacke,
 And forsake all *here* pleasaunces,
 And turn all joy to penaunces,
 And beare the deade prince to the barge,
 And named hem should have the charge;
 And to the hearse where lay the queen,
 The remenaunt went, and down on kneen, 1780
 Holding *here* hondes on high, con erie,
 'Merey, merey,' everich thrie,
 And cursede the time that ever slouth
 Should have such masterdome of trouth.
 And to the barge a long mile,
 They bare her forth, and in a while
 Alle the ladies one and one,
 By companies were brought echone,
 And past the sea and tooke the land,
 And in new herses on a sand, 1790
I-put and brought were all anon,
 Unto a city closed with stone,
 Where it hadde been used aye
 The kinges of the land to lay,
 After they raigned in honours,
 And writ was which were conquerours,
 In an abbey of nunnes which were blake,
 Which accustomed were to wake,
 And of usage rise ech a night
 To pray for every lives wight; 1800
 And so befell as in the guise,
 Ordeint and said was the servise,
 Of *thilke* prince and of the queen,
 So devoutly as mighte been,

And after that about the hereses,
 Many orisones and verses,
 Withoute note full softly,
 Said were and that full heartily,
 That all the night till it was day,
 The people in the church con pray 1810
 Unto the holy Trinitie,
 Of these soules to have pitie.

And when the night ipast and ronne
 Was, and the newe day begonne,
 The yonge morrow with rayes rede,
 Which from the Sunne over all con sprede,
 Atempered clere was and faire,
 And made a time of wholsome aire,
 Befell a wonder ease and strange,
 Among the people and gan change 1820
 Soone the word and every woo
 Unto a joy, and some to two :
 A bird, all fedred blew and greene,
 With brighte rayes like gold betweene,
 As smalle thred over every joynt,
 All full of colour strange and coint,
 Uncouth and wonderfull to sighte,
 Upon the queenes herse con lighte,
 And song full low and softly,
 Three songes in her harmony, 1830
 Unletted of every wight,
 Till, at the last, an aged knight
 Which seemed a man in great thought
 Like as he set all thing at nought,
 With visage and eien all forwept
 And pale, as man longe unslept,
 By thilke hereses as he stood

With hasty hondling of his hood
 Unto a prince that by him paste
 Made the bridde somewhat agast, 1840
 Wherefore she rose and left her song,
 And departe from us among,
 And spread her winges for to passe
 By the place he entred was,
 And in his hast, shortly to telle,
 Him hurt, that backward downe he fell,
 From a window richly ipoint
 With lives of many divers seint,
 And bet his wings and bledde faste,
 And of the hurt thus died and paste, 1850
 And lay there well an houre and more,
 Till, at the last, of briddes a score
 Come and sembled at the place
 Where the window ibroken was,
 And made swiche waimentacioun,
 That pity was to heare the soun,
 And the warbles of *here* throtes,
 And the complaint of *here* notes,
 Which from joy cleane was reversed,
 And of hem one the glas soone persed, 1860
 And in his beke of colours nine,
 An herbe he broughte flouresse, all greene,
 Ful of smalle leaves and plaine,
 Swart and longe with many a vaine,
 And where his fellow lay thus dede,
 This hearbe down laide by his hede,
 And dressed it full softly,
 And hong his head and stood thereby,
 Which hearb, in lesse than halfe an houre,
 Gan over all knit, and after floure 1870

Full out and wexe ripe the seede,
 And right as one another feede
 Would, in his beake he tooke the graine,
 And in his fellowes beake certaine
 It put, and thus, within the third,
 Up stood and pruned him the bird,
 Which dead hadde be in all our sight,
 And both together forth *here* flight
 Tooke singing from us, and *here* leve,
 Was none disturb hem woulde ne greve ; 1880
 And when they parted were and gone
 Thabbesse the seedes soone echone
I-gadred had, and in her hand
 The herb she tooke, well avisand
 The leafe, the seed, the stalke, the floure,
 And said it had a good savour,
 And was no common herb to finde,
 And well approved of uncouth kinde,
 And than other more vertuouse,
 Who so have it mighte for to use 1890
 In his neede, flowre, leafe, or graine,
 Of *here* heale mighte be certaine ;
 And laid it downe upon the herse
 Where lay the queene, and gan reherse,
 Echone to other that they hadde scene,
 And taling thus the sede wex greene,
 And on the drie herse gan springe,
 Which thoughte me a wondrous thinge,
 And after that floure and newe seed,
 Of which the people all tooke heed, 1900
 And said, it was some great miracle,
 Or medicine fine more than triacle,
 And were well done there to assay,

If it might ease in any way
 The corsés, which with torché light,
 They waked hadde there all that night.
 Soone dide the lordes there consente,
 And all the people thereto contente,
 With easie wordes and little fare,
 And made the queenes visage bare, 1910
 Which shewed was to all about,
 Wherefore in swoone fell whole the rout,
 And were so sory, most and leaste,
 That long of weeping they not ceaste,
 For of *here* lord the remembraunce
 Unto hem was such displeasaunce,
 That for to live they called a paine,
 So were they very true and plaine ;
 And after this, the good abbesse
 Of the graines gan chese and dresse 1920
 Three, with her fingers cleane and smalle,
 And in the queenes mouth by tale,
 One after other full easily,
 She putte and full conningly,
 Which shewede soone such vertue,
 That preved was the medicine true,
 For with a smiling countenaunce
 The queene uprose, and of usaunce,
 As she was wont, to every wight
 She made good cheere, for which sight 1930
 The people kneeling on the stones,
 Thoughte they in Heaven were soule and bones ·
 And to the prince where he lay,
 They wente to make the same assay ;
 And whan the queene it understood,
 And how the medicine was good,

She prayede she might have the graines
 To releve him from the paines
 Which she and he hadde both endured,
 And to him went, and so him curede, 1940
 That within a little space,
 Lusty and fresh on live he was
 And in good hele and hole of speech,
 And lough, and said, 'Gramerey leech,'
 For which the joy throughout the town,
 So great was that the belles sown
 Afraied the people, a journey
 About the city every way,
 And come and askede cause and why,
 They rongen were so stately? 1950
 And after that the queene, thabbesse
 Made diligence, or they woulde cesse,
 Such, that of ladies soone a rout
 Shewing the queene was all about,
 And called by name echone and tolde,
 Was none forgotten young ne olde ;
 There mighte men see joyes newe,
 When the medicine fine and trewe,
 Thus restored had every wight,
 So well the queene as the knight, 1960
 Unto perfit joy and hele,
 That fleting they were in such wele
 As folke that would in no wise,
 Desire more perfit paradise.
 And thus, whan passed was the sorrow,
 With mikel joy soone on the morrow,
 The king, the queene, and every lord,
 With all the ladies by one accord,
 A generall assembly

Great cry throughout the country, 1970
 The which after as *here* intent
 Was turned to a parliament,
 Where was ordained and avised
 Every thing and devised,
 That please mighte to most and leaste,
 And there concluded was the feaste,
 Within the yle to be yholde
 With full consent of young and olde,
 In the same wise as before,
 As thing shoulde be withouten more ; 1930
 And shipped and thither wente,
 And into straunge realmes sente
 To kinges, queenes, and duchesses,
 To divers princes and princesses,
 Of *here* linage, and can pray
 That it mighte like hem at that day
 Of marriage, for *here* sport,
 Come see the yle and hem disport,
 Where shoulde be jousts and turnaies,
 And armes done in other waies, 1990
 Signifying over all the day,
 After Aprille within May ;
 And was avised that ladies tweine,
 Of good estate and well beseine,
 With certaine knightes and squiers,
 And of the queenes officers,
 In manner of an embassade,
 With certain letters closed and made,
 Shoulde take the barge and departe,
 And seeke my lady every parte, 2000
 Till they her founde for any thing,
 Both charged have queene and king,

And as *here* lady and maistresse,
 Her to beseke of gentilnesse,
 At *thilke* day there for to been,
 And oft her recommaund the queen,
 And prayeth for all loves to haste,
 For, but she come, all wolle be waste,
 And *al* the feast a businesse
 Withoute joy or lustinesse : 2010
 And tooke hem tokens and good speed
 Praide God send, after *here* need.
 Forth wente the ladies and the knights,
 And were out fourteene daies and nights,
 And broughte my lady in *here* barge,
 And had well sped and done *here* charge ;
 Whereof the queene so hartily glade,
 Was, that, in soth, such joy she hadde
 When *thilke* ship approched lond,
 That she my lady on the sond 2020
I-met, and in armes so constraine,
 That wonder was behold hem twaine,
 Which to my dome during twelve houres,
 Neither for heat ne watry shoures,
 Departede not no company,
 Saving herselfe but none hem by,
 But gave hem leisour at *here* ease,
 To rehearse joy and disease,
 After the pleasure and courages
 Of *here* young and tender ages : 2030
 And after with many a knight
I-brought were, where, as for that night,
 They partede not, for to pleasaunce,
 Content was hert and countenaunce
 Both of the queene and my maistresse.

This was that night *here* businesse :
 And on the morrow with huge rout,
 This prince of lordes him about,
 Come and to my lady saide
 That of her comming well apaid 2040
 And glad he was, and full conningly
 Her thanked and full heartily,
 And lough and smiled, and said, 'ywis,
 That was in doubt in safety is :'
 And commaundede do diligence,
 And spare for neither gold ne spence,
 But make ready, for on the morow
 Wedded, with saint John to borrow,
 He woulde be, withouten more,
 And let hem wite this lesse and more. 2050
 The morow come, and the service
 Of mariage, in such a wise
 Said was, that with more honour
 Was never prince ne conquerour
I-wedde, ne with such company
 Of gentilnesse in chivalry,
 Ne of ladies so greate route,
 Ne so beseen, as all aboute
 They were there, I certifie
 You on my life withouten lie. 2060

And the feast hold was in tentis,
 As to telle you mine entent is,
 In a rome, a large plaine
 Under a wood in a champaine,
 Betwixt a river and a welle,
 Where never had abbay, ne sellie
 Ben, ne kirke, house, ne village,
 In time of any maunes age :

And durede three monthes the feaste,
 In one estate and never ceaste, 2070
 From early the rising of the Sonne,
 Till spent the day was and yronne,
 In justing, dauncing, and lustinesse,
 And all that sownede to gentilnesse.

And, as me thoughte, the second morrow,
 When ended was all olde sorrow,
 And in surety every wight
 Hadde with his lady slept a night,
 The prince, the queene, and all the rest,
 Unto my lady made request, 2080

And her besought oft and praied
 To mewards to be well apaied,
 And consider mine olde trowth,
 And on my paines have routh,
 And me accept to her servise,
 In such forme and in such wise,
 That we both mighte be as one,
 Thus prayede the queene, and everichone :
 And, for there shoulde be no nay,
 They stinte justing all a day, 2090

To pray my lady and requere
 Be content and out of fere,
 And with good hearte make friendly cheare,
 And said it was a happy yeare :
 At which she smiled and said, ywis,
 " I trow well he my servaunt is,
 And woulde my welfare, as I triste,
 So would I his, and would he wiste
 How, and I knewe that his trowth
 Continue woulde withoute slouth, 2100
 And be such as ye here report,

Restraining both courage and sport,
 I couthe consent at your request,
 To be i-named of your fest,
 And do after your usaunce,
 In obeying your pleasaunce ;
 At your request this I consent,
 To please you in your entent,
 And eke the souveraine above
 Comanded hath me for to love, 2110
 And before other him prefer,
 Against which prince may be no wer,
 For his power over all raigneth,
 That other woulde for nought him paineth,
 And sith his will and yours is one,
 Contrary in me shall be none."
 Tho (as me thoughte) the promise
 Of marriage before the mese
 Desired was of every wight
 To be imade the same night, 2120
 To put away all maner doute
 Of every wight thereaboute,
 And so was do ; and on the morrow,
 When every thought and every sorrow
 Dislodged was out of mine herte,
 With every wo and every smerte,
 Unto a tent prince and princesse,
 Me thoughte, broughte me and my maistresse,
 And saide we were at full age
 There to conclude our marriage, 2130
 With ladies, knightes, and squiers,
 And a great host of ministers,
 With instruments and sounes diverse,
 That longe were here to rehearse,

Which tent was church perochiall,
 Ordaint was in especiall,
 For the feast and for the sacre,
 Where archbishop, and archdiacre,
 Songe full oute the servise,
 After the custome and the guise, 2140
 And the churches ordinaunce;
 And after that to dine and daunce
 Brought were we, and to divers plaies,
 And for our speed ech with praies,
 And merry was most and leaste,
 And said amended was the feaste,
 And were right glad lady and lord,
 Of the marriage and thaccord,
 And wished us heartes pleasaunce,
 Joy, hele, and continuance, 2150
 And to the ministrils made request,
 That in encreasing of the fest,
 They woulde touchen *here* cords,
 And with some new joyeux accords,
 Moove the people to gladnesse,
 And praiden of all gentilnesse,
 Ech to paine hem for the day,
 To shew his cunning and his play.
 Tho beganne sownes mervelous
 Entuned with accords joyous, 2160
 Round about alle the tentes,
 With thousandes of instrumentes,
 That every wight to daunce hem painede,
 To be merry was none that fainede,
 Which sowne me troubled in my sleepe,
 That fro my bedde forth I lepe,
 Wening to be at *thilke* feast,

But when I woke all was iceast,
 For ther nas lady ne creature,
 Save on the walles olde portraiture 2170
 Of horsmen, haukes, and houndes,
 And hurte deere full of woundes,
 Some like bitten, some hurt with shot,
 And, as my dreame, seemed that was not ;
 And when I wake, and knew the trowth,
 And ye hadde seen, of very routh,
 I trow ye would have wept a weke,
 For never man yet halfe so seke ;
 I went escaped with the life,
 And was for fault that sword ne knife 2180
 I finde ne mighte my life tabridge,
 Ne thing that kervede, ne had edge,
 Wherewith I mighte my woful paines,
 Have voided with bleeding of my vaines.
 Lo, here my blisse, lo, here my paine,
 Which to my lady I do complaine,
 And grace and mercy her requere,
 To ende my wo and busie fere,
 And me accepte to her servise,
 After her serviee in such avise, 2190
 That of my dreame the substaunce
 Mighte once turne to cognisaunce,
 And cognisaunce to very preve
 By full consent and goode leve,
 Or elles without more I pray,
 That thilke night, or it be day,
 I mote unto my dreame returne,
 And sleeping so, forth aie sojourne
 About the yle of pleasaunce,
 Under my ladies obeisaunce, 2200

In her servise, and in such wise,
 As it please her may to devise,
 And grace ones to be accepte,
 Like as I dreamed when I slepte,
 And dure a thousand yeare and ten,
 In her good will, Amen! Amen!

FAIREST of faire, and goodliest on live,
 All my secret to you I plaine and shrive,
 Requiring grace and of complaint,
 To be healed or martyred as a saint; 2210
 For by my trowth I sweare, and by this booke,
 Ye may both heale and slea me with a looke.

Go forth mine owne true hart innocent,
 And with humblesse, do thine observaunce,
 And to thy lady on thy knees present
 Thy servise new, and think how great pleasance
 It is to live under thobeisance
 Of her that may with her lookes soft
 Give thee the blisse that thou desirest ofte.

Be diligent, awake, obey, and drede, 2220
 And not too wild *be* of thy countenaunce,
 But meeke and glad, and thy nature feede,
 To do each thing that may her pleasance,
 When thou shalt sleep, have aie in remembrance
 Thimage of her which may with lookes soft
 Give thee the blisse that thou desirest ofte.

And if so be that thou her name finde
 Written in booke, or *elles* upon walle,
 Looke that thou, as servaunt true and kinde,

Thine obeisaunce, as she were there withalle ; 2230
Faining in love is breeding of a falle
From the grace of her, whose lookes softe
May give the blisse that thou desirest ofte.

Ye that this ballade reade shalle,
I pray you keepe you from the falle.





THE BOKE OF THE DUCHESS;

OR, THE DETHE OF BLANCHE.



HAVE grete wonder, be this lyghte,
How that I lyve; for day ne nyghte
I may nat slepe welnygh noght,
I have so many an ydel thoght,

Purely for defaulte of slepe,
That, by my trouthe I take no kepe
Of noothinge, how hyt commeth or gooth.
Ne me nys nothyng leve nor looth;
Al is ylyche goode to me,
Joye or sorowe, wher so hyt be. 10
For I have felynge in nothyng,
But, as yt were a mased thyng,
Always in poynt to falle adoun;
For sorwful ymagynacioun
Ys alway hooly in my mynde.

And wel ye woote, agaynes kynde
Hyt were to lyven in thys wyse;
For nature wolde nat suffyse,
To noon erthely creature,
Nat longe tyme to endure 20
Withoute slepe, and be in sorwe.
And I ne may, ne nyght ne morwe,

Slepe ; and thys melancolye
 And drede I have for to dye,
 Defaulte of slepe and hevynesse,
 Hath *sleyn* my spirite of quyknesse,
 That I have loste al lustyhede ;
 Suche fantasies ben in myn hede,
 So I not what is best too doo.

But men myght axe me, why soo 36
 I may not sleepe, and what me is.
 But natheles, who *axeth* this,
 Leseth his axing trewely ;
 My selven cannot *telle* why
 The soothe ; but trewely as I gesse,
 I hold it *to* be a sicknes
 That I have suffred this eight yere,
 And yet my boote is never the nere.
 For there is phisicien but one,
 That may me heale, but that is done ; 40
 Passe we over untill efte ;
 That wil not be, mote nedes be lefte ;
 Our firste matere is good to kepe.

So whan I sawe I mighte not slepe,
 Til now late this other night
 Upon my bedde I sate upright,
 And bade one reche me a booke,
 A romaunce, and it me toke
 To rede, and drive the night awaye :
 For me it thoughte beter playe, 50
 Then either atte chesse or tables.

And in this boke were written fables,
 That clerkes had in olde time,
 And other poets, put in rime,
 To rede, and for to be in minde,

While men loved the lawe in Kinde.
 This boke ne speake but of suche thinges,
 Of quenes lives, and of kinges,
 And many other thinges smale.
 Amonge al this I fonde a tale
 That thoughte me a wonder thing.

60

This was the tale :—There was a king
 That hight Seyes ; and had a wife,
 The beste that mighte beare lyfe,
 And this quene hight Aleyone.
 So it befil, therafter sone,
 This king wol wenden over se.
 To tellen schortly, whan that he
 Was in the see, thus in this wise,
 Soche a tempest *tho* gan to rise,
 That brake her maste, and made it falle,
 And cleft *here* schippe, and dreint hem alle,
 That never was founde, as it telles,
 Bord, ne man, ne nothing elles.
 Right thus this king Seys loste his life.

70

Now for to speake of Aleyone his wife :—
 This lady that was left at home,
 Hath wonder that the king ne come
 Home, for it was a longe terme.
 Anone her herte began to yerne ;
 And for that, her thought evermo
 It was not wele ; her thoughte so.
 She longede so after the king,
 That certes it were a pitous thing
 To tel her hertely sorowful life,
 That she hadde, this noble wife.
 For him, alas ! she loved alderbeste,
 Anone sche sente both este and weste

80

To seke him, but they founde him nought.

‘Alas,’ quoth she, ‘that I was wrought! 90
 And where my lord, my love, be dede?
 Certes I nil never eate brede,
 I make avowe to my God here,
 But I mowe of my lord here.’

Soche sorowe this lady to her toke,
 That trewely I, which made this boke,
 Hadde suche pittee and suche routhe
 To rede hir sorwe, that by my trowthe
 I ferde the worse al the morwe
 And after, to thenken on hir sorwe. 100

So whanne this lady koude here noo worde,
 That no man myghte fynde hir lord,
 Ful ofte she swouned, and sayde, ‘Alas!’
 For sorwe ful nygh woode she was;
 Ne she koude no rede but oon,
 But doune on knees she sate anoon,
 And wepte, that pittee was to here.

‘A! mercy, swete lady dere!’
 Quod she, to Juno hir goddessse,
 ‘Helpe me out of thys distresse, 110
 And yeve me grace my lord to se
 Soone, or wete wher so he be,
 Or how he fareth, or in what wise;
 And I shal make yowe sacrificse,
 And hooly youres become I shal,
 With gode wille, body, hert, and al.
 And, but thow wylte this, lady swete,
 Sende me grace to slepe and mete
 In my slepe somme certeyn sweven,
 Wher thorgh that I may knowe even 120
 Whethir my lorde be quyke or ded.’

With that worde she henge doun the hed,
 And felle a swowne, as colde as stoon.
 Hyr women kaught hir up anoon,
 And brougthen hir in bed al naked ;
 And sche, for weped and for waked,
 Was wery ; and thus the dede slepe
 Fil on hir, or she toke kepe,
 Throgh Juno, that had herde hir bone,
 That made hir to slepe sone. 130

For as she prayede, ryght so was done
 Indede ; for Juno ryght anone
 Calledē thus hir messagere
 To doo hir erande, and he come nere.
 Whan he was come, she bad hym thus :—

‘ Go bet,’ quod Juno, to Morpheus ;
 ‘ Thou knowest hym wel, the god of slepe ;
 Now understonde wel, and take kepe.
 Sey thus on my halfe, that he
 Go faste into the grete se, 140

And byd him that, on alle thyngē,
 That he take up Seys body, the kynge,
 That lyeth ful pale, and nothyngē rody.
 Bid hym erepe into the body,
 And doo hit goon to Aleyone
 The quene, ther she lyeth allone ;
 And shewe hir shortly, hit ys no nay,
 How hit was dreynt thys other day ;
 And do the body speke ryght soo,
 Ryght as hyt was woned to doo, 150
 The whiles that hit was alyve ;—
 Goo now faste, and hye the blyve.’

This messenger toke leve and wente
 Upon hys wey, and never ne stente

Til he come to the derke valeye,
 That stant betwexe roches tweye.
 Ther never yet grew corne ne gras,
 Ne tre, ne noght that oughte was,
 Beste, ne man, ne noght elles,
 Save that there were a fewe welles
 Come rennyng fro the clyffes adoun,
 That made a dedely slepyng soun ;
 And ronnen down ryght by a cave,
 That was under a rokke ygrave
 Amydde the valey, wonder depe.
 There these goddys lay and slepe,
 Morpheus and Eclympasteyre,
 That was the god of slepes eyre,
 That slepe, and dide noon other werke.

This cave was also as derke
 As helle pitte, overal aboute,
 They hadde good leyser for to route,
 To envye who myghte slepe beste.
 Some henge her chyn upon hir broste,
 And slept upryght hir hed yhedde ;
 And somme lay naked in her bedde,
 And slepe whiles the dayes laste.

This messenger come fleyng faste,
 And cried, ‘ O how ! awake anoon ! ’
 Hit was for noght, there herde hym noon.
 ‘ Awake ! ’ quod he, ‘ Who ys lythe there ? ’
 And blew his horne ryght in here eere,
 And cried, ‘ Awaketh ! ’ wonder hye.

This god of slepe, with hys oon ye
 Caste up, and axede, ‘ Who clepeth there ? ’
 ‘ Hyt am I, ’ quod this messagere.
 Juno bad thow shuldest goon.’

And tolde hym what he shulde doon,
 As I have tolde yow here tofore,
 Hyt ys no nede reherse hyt more ; 190
 And went hys wey whan he hadde sayede.

Anoon this god of slepe abrayede
 Out of hys slepe, and gan to goon,
 And dyd as he hadde bede hym doon ;
 Tooke up the dreynthe body sone,
 And bare hyt forth to Alcyone
 Hys wife, the quene, ther as she lay,
 Ryght even a quarter before day,
 And stood ryght at hys beddys fete,
 And called hir ryght as she hete 200

By name, and sayede :—‘ My swete wyfe,
 Awake ! let be your sorwful lyfe !
 For in your sorwe there lyth no rede ;
 For certes, swete, I am but dede,
 Ye shul me never on lyve yse.
 But, goode swete herte *loke* that ye
 Bury my body ; for, suche a tyde,
 Ye mowe hyt fynde the see besyde.
 And farewel swete, my worldes blysse !
 I praye God youre sorwe lysse ; 210
 To lytel while oure blysse lasteth !’

With that hir eyen up she casteth,
 And sawe noght :—‘ Alas !’ quod she, for sorwe,
 And deyede within the thridde morwe.

But what she sayede more in that swowe,
 I may not telle yow as now,
 Hyt were to longe for to dwelle ;
 My firste matere I wil yow telle,
 Wherfore I have tolde you this thyng,
 Of Alcione, and Seys the kynge. 220

For thus moche dar I saye welle,
 I hadde be dolven every delle,
 And ded, ryght thorgh defaulte of slepe,
 Yif I ne hadde redde, and take kepe
 Of this tale nexte before ;
 And wol I telle yow wherfore,
 For I ne myghte, for bote ne bale,
 Slepe, or I hadde redde thys tale
 Of this dreynthe Seys the kynge,
 And of the goddis of slepynge.

230

Whan I hadde redde thys tale wel,
 And overloked hit everydel,
 Me thoghte wonder yf hit were so ;
 For I hadde never herde speke, or tho,
 Of noo goddis, that koude make
 Men to slepe, ne for to wake ;
 For I ne knewe never God but oon.
 And in my game I sayede anoon,
 (And yet me lyst ryght evel to pleye,
 Rather than that Y shulde deye
 Thorgh defaulte of slepynge thus,
 I wolde yive thilke Morpheus,
 Or hys goddesse, dame Juno,
 Or somme wight ellis, I ne roghte who,
 To make me slepe, and have some reste,—
 I wil yive hym the alder-beste
 Yifte, that ever he abode hys lyve.
 And here onwarde, ryght now as blyve,
 Yif he wol make me slepe a lyte,
 Of downe of pure dowves white,
 I wil yif him a federbedde,
 Rayed with golde, and ryght wel cledde,
 In fyne blak satyn de owter mere,

240

250

And many a pelowe, and every bere
 Of clothe of Reynes to slepe softe,
 Him thar not nede to turnen ofte.
 And I wol yive hym al that fallys
 To a chaumbre; and al hys hallys,
 I wol do peynte with pure golde,
 And tapite hem ful manyfolde, 260
 Of oo sute; this shal he have,
 Yf I wiste where were hys eave,
 Yf he kan make me slepe sone,
 As did the goddesse, quene Aleyione.
 And thus this ylke god Morpheus
 May wynne of me moo fees thus
 Than ever he wanne: and to Juno,
 That ys hys goddesse, I shal soo do,
 I trow that she shal holde hir payede.

I hadde unnethe that worde ysayede, 270
 Ryght thus as I have tolde hyt yow,
 That sodeynly, I nyste how,
 Suche a luste anoon me tooke
 To slepe, that ryght upon my booke
 I fil aslepe; and therwith evene
 Me mette so ynly swete a swevene,
 So wonderful, that never yitte
 Y trow no man hadde the wytte
 To konne wel my sweven rede.

No, not Joseph, withoute drede, 280
 Of Egipte, he that redde so,
 The kynges metynge, Pharao,
 No more than koude the lest of us.

Ne nat skarsly Macrobeus,
 He that wrote al thavysyon
 That he mette of *kyng* Scipion,

The noble man, the Affrikan,
 Suche merveyles fortunede than,
 I trowe arede my dremes even.
 Loo, thus hyt was ; thys was my sweven. 290
 Me thoghte thus, that hyt was May,
 And in the dawninge, *ther* I laye
 Me mette thus in my bed al naked,
 And lokede forth, for I was waked
 With smale foules, a grete hepe,
 That had afrayed me out of my slepe,
 Thorgh noyse and swettenesse of her songe.
 And as me mette, they sate amonge
 Upon my chambre roofe wythoute,
 Upon the tyles overal aboute ; 300
 And songe everych in hys wyse
 The moste solempne servise
 By noote, that ever man, Y trowe,
 Had herde. For somme of hem songe lowe,
 Somme high, and al of oon aeorde.
 To telle shortly att oo word,
 Was never herde so swete a steven,
 But hyt hadde be a thyng of heven,
 So mery a soun, so swete entewnes,
 That, certes, for the toune of Tewnes, 310
 I nolde, but I had herde hem synge,
 For al my chambre gan to rynge,
 Thorgh syngynge of her armonye ;
 For instrument nor melodye
 Was no-where herde yet halfe so swete,
 Nor of aeorde *ne* halfe so mete.
 For ther was noon of hem that feynede
 To synge, for eche of hem hym peynede
 To fynde oute of mery crafty notys ;

They ne sparede not her throtys. 323
 And, soothe to seyn, my chambre was
 Ful wel depeynted, and with glas
 Were alle the wyndowes wel yglasyd
 Ful clere, and nat an hoole yerasyd,
 That to beholde hyt was grete joye.
 For holy al the story of Troye
 Was in the glasynge ywrought thus ;
 Of Ector, and of kynge Priamus,
 Of Achilles, and of kynge Lamedon,
 And eke of Medea and of Jason, 334
 Of Paris, Eleyne, and of Lavyne ;
 And alle the wallys, with colouris fyne
 Were peynted, bothe text and glose,
 And al the Romaunce of the Rose.
 My windowes were shette echon,
 And through the glas the sonne shon
 Upon my bed with bryghte bemys,
 With many glade, gilde stremys ;
 And eke the welken was so faire,
 Blewe, bryghte, clere was the ayre, 340
 And ful atempre, for sothe, hyt was ;
 For nother to colde nor hote yt nas,
 Ne in al the walkene was a clowde.

And as I lay thus, wonder lowde
 Me thocht I herde an hunte blowe,
 Tassay hys horne, and for to knowe
 Whether hyt were clere, or horse of soune.

And I herde goynge, bothe uppe and doune,
 Men, hors, houndes, and other thyng,
 And alle men speke of huntynge, 350
 How they wolde slee the hert with strengtho,
 And how the hert had upon lengthe

So much embosed, Y not now what.

Anoon ryght whan I herde that,
 How that they wolde on huntynge goon,
 I was ryght glad ; and up anoon
 Tooke *I* my hors, and forthe I wente
 Out of my chambre ; I never stente,
 Til I come to the felde withoute ;
 Ther overtoke Y a grete route 360
 Of huntens and eke of foresterys,
 And many relayes and lymerys ;
 And hyed hem to the forest faste,
 And *I* with hem. So at the laste
 I axed oon ladde a lymere,
 ‘ Say, felowe ! whoo shal hunte here ?’
 Quod I ; and he answered ageyn,
 ‘ Sir, themperour Octovyen,’
 Quod he, ‘ and ys here faste by.’
 ‘ A goddys halfe, in goode tyme !’ quod I ; 370
 ‘ Go we faste !’ And gan to ryde.
 Whan we come to the forest syde,
 Every man didde ryght anoon,
 As to huntynge fille to doon.

The mayster hunte, anoon, fote hote,
 With a grete horne blewe thre mote,
 At the uncouplynge of hys houndys.
 Withynne a while the herte founde ys,
 I-hallowed, and rechased faste
 Longe time ; and so at the laste 380
 This hart rused, and staale away
 Fro alle the houndes a prevy way
 The houndes hadde overshotte hym alle,
 And were upon a defaulte yfalle.
 Therwyth the hunte, wonder faste,

Blewe a forleygne at the laste.

I was go walked fro my tree,
 And as I wente, there came by mee
 A whelpe, that fauned me as I stode,
 That hadde yfolowed, and koude no goode. 90

Hyt come and crepte to me as lowe,
 Ryght as hyt hadde me yknowe ;
 Hylde doun hys hede, and joyned hys erys,
 And leyde al smoothe doun hys herys.

I wolde have kaught hyt ; and anoon
 Hyt fledde, and was fro me agoon.
 And I hym folwed, and hyt forthe wento
 Doun by a flowry grene wente

Ful thikke of gras, ful softe and swete,
 With flourys fele, faire under fete, 400

And litel used, hyt semede thus ;
 For both Flora, and Zephirus,
 They two, that make floures growe,
 Hadde made her dwellynge ther I trowe.

For hit was on to beholde,
 As thogh therthe envye wolde
 To be gayer than the heven ;
 To have moo floures swiche seven,
 As in the walkene sterris be.

Hyt hadde forgete the poverttee 410

That wynter, thorgh hys colde morwes
 Hadde made hyt suffre ; and his sorwes
 Alle was forgeten, and that was sene ;
 For al the woode was waxen grene ;
 Swetnesse of dewe hadde made hyt waxe.

Hyt ys no nede eke for to axe
 Where ther were many grene greves,
 Or thikke of trees, so ful of leves ;

And every tree stode by hymselfe
 Fro other, wel ten fete other twelve. 420
 So grete trees, so huge of strengthe,
 Of fourty, fifty fedme lengthe,
 Clene, withoute bowgh or stikke,
 With croppes *brode*, and eke as thikke,
 They were not an ynche asonder,
 That hit was shadewe overal under.
 And many an herte and many an hynde
 Was both before me and behynde.
 Of faunes, sowres, bukkes, does,
 Was ful the woode, and many roes, 430
 And many sqwireles, that sete
 Ful high upon the trees and ete,
 And in hir maner made festys.
 Shortly, hyt was so ful of bestys,
 That thogh Argus, the noble counter
 Sete to rekene in hys counter,
 And rekene with his figuris tenne,
 For by tho figures mowe *alle kenne*,
 Yf they be crafty, rekene and noumbre,
 And tel of every thinge the noumbre, 440
 Yet shulde he fayle to rekene evene
 The wondres me mette in my swevene.
 But forthe they romede ryght wonder faste
 Doune the woode; so at the laste
 I was war of a man in blak,
 That sete, and hadde turned his bak
 To an ooke, an huge tree.
 ‘Lorde!’ thought I, ‘who may that be?
 What ayleth hym to sitten here?’
 Anoone ryght *tho* I wente nere. 450
 Than founde I sitte, even upryght,

A wonder welfarynge knyght,
 (By the maner me thoghte soo)
 Of good mochel, and ryght yonge therto,
 Of the age of foure and twenty yere,
 Upon hys berde but lytel here,
 And he was clothed al in blake.
 I stalked even unto hys bake,
 And there I stode as stille as ought.
 The soth to saye, he sawe me nought ; 460
 For-why he henge hys hede adoun,
 And with a dedely sorwful soun,
 He made of ryme tenne vers or twelfe,
 Of a compleynt *unto* hymselfe,
 The moste pitee, the moste rowthe
 That ever I herde ; for by my trowthe
 Hit was gret wonder that Nature
 Myghte suffre any creature
 To have suche sorwe, and be not ded.
 Ful petuose pale, and nothyng red, 470
 He sayed a lay, a maner songe,
 Withoute noote, withoute songe ;
 And was thys, for ful wel I kan
 Reherse hyt ; ryght thus hyt began :—
 ‘ I have of sorwe so grete wone,
 That joye get I never none,
 Now that I see my lady bryghte,
 Which I have loved with al my myghte,
 Is fro me dede, and ys agoon.
 Allas ! Dethe, what ayleth thee, 480
 That thou noldest have taken me
 Whan that thou toke my lady swete ?
 That was so faire, so fresh, so fre,
 So goode, that men may wel se,

Of al goodenesse she hadde no mete.'

Whan he hadde made thus his compleynte,
 His sorwful herte gan faste faynte,
 And his spiritis wexen dede ;
 The bloode was fled for pure drede
 Doun to hys herte, to make hym warme, 490
 For wel hyt felede the hert had harme ;
 To wete eke why hyt was adrad
 By kynde, and for to make hyt glad ;
 For hit ys membre principal
 Of the body ; and that made al
 Hys hewe chaunge, and wexe grene
 And pale, for ther noo bloode ys sene
 In no maner lym of hys.

Anoon therwith, whan I sawgh this,
 He ferde thus evel there he sete, 500
 I went and stooode ryght at his fete,
 And grette hym ; but he spake noght,
 But arguede with his oune thoght,
 And in hys wytte disputede faste,
 Why, and how hys lyfe myghte laste ;
 Hym thought hys sorwes were so smerte,
 And lay so colde upon hys herte.

So throug hys sorwes and hevvy thoght,
 Made hym that he herde me noght,
 For he hadde welnygh loste hys mynde, 510
 Thogh Pan, that men clepe the god of kynde,
 Were for hys sorwes never so wrothe.
 But at the last, to sayne ryght sothe,
 He was war of me, how Y stooode
 Before hym, and did of myn hoode,
 And had ygret hym, as I best koude.
 Debonayrly, and nothyng lowde,

He sayde, ' I prey the be not wrothe,
I herde the not, to seyn the sothe,
Ne I sawgh the not, syr, trewely.' 520

' A goode sir, no fors!' quod Y;
' I am ryght sory, yif I have oughte
Distroubled yow out of your thoughte;
Foryive me, yif I have mystake.'

' Yis, thamendys is lyght to make,'
Quod he, ' for ther lyeth noon therto;
Ther ys nothyng mis-sayde, nor do.'

Loo! how goodely spake thys knyghte,
As hit hadde be another wyghte;
And made hyt nouthertowgh ne queynte. 530
And I sawe that, and gan me aqueynte
With hym, and fonde hym so trefable,
Ryght wonder skylful and resonable,
As me thoghte, for al hys bale;
Anoon ryght I gan fynde a tale
To hym, to loke wher I myght oughte
Have more knowynge of hys thoughte.

' Sir quod I, ' this game is doon;
I holde that this hert be goon;
These huntys konne hym no wher see.' 540

' Y do no fors therof,' quod he;
' My thoughte ys there on never a dele.'
' Be oure lorde!' quod I, ' Y trow yow wele;
Ryght so me thenketh by youre chere.
But, sir, oo thyng wol ye here?—
Me thynketh in grete sorowe I yow see;
But certys, sir, yif that yee
Wolde ought discovre me youre woo,
I wolde, as wys God helpe me soo!
Amende hyt, yif I kan or may. 550

Ye mowe preve hyt be assay ;
 For, by my trouthe, to make yow hool
 I wol do alle my power hool.
 And telleth me of your sorwes smerte,
 Paraventure hyt may ese your herte,
 That semeth ful seke under your syde.
 With that he loked on me asyde,
 As who sayth, ' Nay, that wol not be.'
 ' Graunt merey ! goode frende,' quod he,
 ' I thanke the, that thow woldest soo ; 560
 But hyt may never the rather be doo.
 No man ne may my sorwe glade,
 That maketh my hewe to fal and fade ;
 And hath myn understondynge lorne,
 That me ys woo that I was borne.
 May noght make my sorwes slyde,
 Nought *alle* the remedies of Ovyde,
 Ne Orpheus, god of melodye ;
 Ne Dedalus, with his playes slye ; 570
 Ne hele me may noo phisicien,
 Noght Ypoeras, ne Galyen ;
 Me ys woo that I lyve houres twelve.
 But whoo so wol assaye hymselfe,
 Whether his herte kan have pitee
 Of any sorwe, lat him see me.
 Y wrechehe, that deth hath made al naked
 Of al the blysse that ever was maked,
 Yworthe, worste of *alle* wyghtys,
 That hate my dayes and my nyghtys ;
 My lyfe, my lustes, be me loothe 580
 For al wel-fare, and I be wroothe.
 The pure deth ys so ful my foo,
 That I wolde deye, hyt wolde not soo ;

For whan I folwe hyt, hit wol flee ;
 I wolde have hym, hyt nyl nat me.
 This ys my peyne wythoute rede,
 Alway deyinge, and be not dede.
 That Thesiphus that lyeth in helle,
 May not of more sorwe telle.
 And who so wiste alle, be my trouthe, 590
 My sorwe, but he hadde rowthe
 And pitee of my sorwes smerte,
 That man hath a fendely herte.
 For whoso seeth me firste on morwe,
 May seyn he hath mette with sorwe ;
 For Y am sorwe, and sorwe ys Y ;
 Allas ! and I wol telle thee why ;
 My *joye* is tourned to pleynynge,
 And al my lawghtre to wepyng ;
 My glade thoghtys to hevynesse, 600
 In travayle ys myn ydelnesse,
 And eke my reste ; my wele is woo,
 My goode ys harme, and evermoo
 In wrathe ys turned my pleyng,
 And my delyte into sorwyng ;
 Myn hele ys turned into sekennesse,
 In drede ys al my sykernesse ;
 To derke ys turned al my lyghte,
 My wytte ys foly, my daye ys nyghte.
 My love ys hate, my slepe wakyng, 610
 My merthe and meles ys fastyng ;
 My countenaunce ys nyceté,
 And al abawed, where so I be ;
 My pees is pledyng, and in werre.
 Allas, how myght I fare werre ?
 My boldenesse ys turned to schame,

For fals Fortune hath pleyde a game
 Atte the chesse with me, allas the while !
 The trayteresse fals and ful of gyle,
 That al behoteth, and nothyng halte, 620
 She gothe upryght, and yet she halte,
 That baggeth foule, and loketh faire,
 The dispitouse debonaire,
 That skorneth many a creature.
 An ydole of fals portrayture
 Ys she, for she wol soone varien.
 She is the mownstres hede ywrien,
 As fylthe, over ystrawed with flourys.
 Hir moste worschippe and hir flourys
 To lyen, for that ys hyr nature. 630
 Withoute feythe, lawe, or mesure,
 She ys fals ; and ever lawghynge
 With one yghe, and that other wepynge.
 That ys broght up, she sette al down ;
 I lykne hyr to the scorioun,
 That ys a fals flatteryng beste ;
 For with his hede he maketh feste,
 But al amydde hys flatteryng,
 With hys tayle hyt wol styng,
 And envenyme, and so wol she. 640
 She ys thenvyouse Charité,
 That ys ay fals, and semeth wele
 So turneth she hyr false whele
 Aboute, for hyt ys nothyng stable,
 Now by the fire, now at table.
 For many oon hath she thus yblent,
 She is pley of enchaument,
 That semeth oon, and ys not soo.
 The false thefe ! what hath she doo,

Trowest thou? by oure Lorde, I wol the seye:—
 At the chesse with me she gan to pleye; 651
 With hir false draughtes dyvers
 She staale on me, and toke my fers;
 And whan I sawgh my fers awaye,
 Allas! I kouthe no lenger playe;
 But seyde, farewel, swete! ywys,
 And farewel, al that ever ther ys!
 Therwith Fortune seyde, ‘chek here!’
 And ‘mate’ in the myd poynt of the chekkere,
 With a pounne errante, allas! 660
 Ful craftier to pleye she was
 Than Athalus, that made the game
 First of the chesse, so was hys name.
 But God wolde I had oones or twyes,
 Ykoude, and knowe the jeupardyes,
 That kowde the Greke Pythagoras,
 I shulde han pleyde the bet at ches,
 And kept my fers the bet therby.
 And thogh wherto? for trewely
 I holde that wysshe not worthe a stree: 670
 Hyt hadde be never the bet for me.
 For Fortune kan so many a wyle,
 Ther be but fewe kan hir begile,
 And eke she ys the lasse to blame.
 My selfe, I wolde have do the same,
 Before God, *had* I be as she;
 She oghte the more excused be.
 For this I say yet more therto,—
 Had I be God, and myghte have do
 My wille, whan she my fers kaughte, 680
 I wolde have drawe the same draughte:
 For, also wys God yive me reste!

I dar wel swere, she tooke the beste.
 But through that draught I have lorne
 My blysse ; allas, that I was borne !
 For evermore Y trowe, trewely,
 For al my wille, my luste holly
 Ys turned ; but yet what to doone ?
 Be oure Lorde, hyt ys to deye soone ;
 For nothyng I leve hyt noght, 690
 But lyve and deye ryght in this thoght.
 For there nys planete in firmament,
 Ne in ayre ne in erthe noon element,
 That they ne yive me a yifte, eechoon,
 Of wepyng, whanne I am alloon.
 For whan that I avise me wel,
 And bethenke me everydel,
 How that ther lyeth in rekenyng
 Inne my sorwe for nothyng ;
 And how ther levyth noo gladnesse 700
 May glade me of my distresse ;
 And how I have loste suffisaunce
 And therto I have no plesaunce :
 Than may I saye, I have ryght noght.
 And whan al this falleth in my thoght,
 Allas ! than am I overcome,
 For that ys doon is not to come.
 I have more sorowe than Tantale.'

And whan I herde hym telle thys tale
 Thus pitously, as I yow telle, 710
 Unnethe myght I lenger dwelle :
 Hyt dyde myn herte so moche woo.

' A, goode sir !' quod I, ' say not soo !
 Have some pitee on your nature,
 That formede yow to creature.

Remembreth yow of Socrates ;
 For he ne countede nat thre strees
 Of nocht that Fortune koude doo.
 ‘ No,’ quod he, ‘ I kan not soo.’
 ‘ Why so, good syr ? yis parde !’ quod Y ; 720
 ‘ Ne *seye* nocht soo ; for trewely,
 Thogh ye hadde loste the ferses twelve,
 And ye for sorwe mordred your selve,
 Ye sholde be dampned in this eas,
 By as goode ryght as Medea was,
 That slogh hir children for Jason ;
 And Phillis also for Demophon
 Henge hir selfe, so weylawaye !
 For he hadde broke his terme deye
 To come to hir. Another rage 730
 Hadde Dydo, the quene eke of Cartage,
 That slough hir selfe, for Eneas
 Was fals ; which a foole she was !
 And Eequo died, for Nareissus
 Nolde nat love hir ; and ryght thus
 Hath many another foly doon.
 And for Dalida diede Sampson,
 That slough hymselfe with a piler.
 But ther is no man alyve here
 Wolde for o fers make this woo.’ 740
 ‘ Why so ? quod he ; ‘ hyt ys not soo ;
 Thou woste ful lytel what thou menyst,
 I have loste more than thow wenyst.’
 Loo ! sir, *how* may that be ?’ quod I.
 ‘ Goode sir, telle me al hooly,
 In what wyse, how, why and wherfore,
 That ye have thus youre blysse lore ?’
 ‘ Blythely !’ quod he ; ‘ come, sytte adoun !

I telle hyt the up a condicioun,
 That thou shalt hooly with al thy wytte 750
 Do thyn entente to herkene hitte.
 ‘Yis, syr’—‘Swere thy trouthe therto—
 ‘Glady—Do thanne holde hereto.’
 ‘I shal ryght blythely, so God me save,
 Hooly with al the witte I have,
 Here yow as wel as I kan.
 ‘A goddys halfe ! quod he, and began :—
 ‘Syr,’ quod he, ‘sith ferste I kouthe
 Have any maner wytte fro youthe,
 Or kyndely understondynge, 760
 To comprehende in any thyng
 What love was, in myn oun wytte,
 Dredeles, I have ever yitte
 Be tributarye, and yive rente
 To Love hooly, with goode entente,
 And throgh plesaunce become his thralle,
 With goode wille, body, hert, and alle.
 Al this I putte in his servage,
 As to my lorde, and did homage ;
 And ful devoutely I prayed hym *tho*, 770
 He shulde besette myn herte so,
 That hyt plesaunce to hym were,
 And worshippe to my lady dere.
 ‘And this was longe, and many a yere
 (Or that myn herte was set owhere)
 That I dide thus, and nyste why ;
 I trowe hit come me kyndely.
 Peraventur I was therto moste able,
 As a white walle, or a table ;
 For hit ys redy to cachche, and take 780
 Al that men wille theryn make.

Whethir so men wille portrey or peynte,
Be the werkes never so queynte.

‘ And thilke tyme I ferde ryght so,
I was able to have lerned tho,
And to have kende as wel, or better
Paraunter, other arte or letre ;
But for love came firste in my thoght.
Therefore I forgate hyt noght.

I ches love to my firste crafte, 790
Therefore hit ys with me ylafte ;
For-why I toke hyt of so yonge age,
That malyce hadde my corage
Nat that tyme turned to nothyng,

Thorgh to mochel knowlachyng.
For that tyme Yowthe, my maistresse,
Governede me in ydelnesse ;

For hyt was in my firste youthe,
And thoo ful lytel goode Y couthe,
For alle my werkes were flyttyng, 800
That tyme, and al my thoght varyinge.

Al were to me ylyche goode
That I knewe thoo, but thus hit stode.

‘ Hit happede that I came on a day
Into a place, ther that I say
Trewely the fayrest companye
Off ladyes, that evere man with ye
Hadde sene togedres in oo place.
Shal I clepe hyt happe, other grace,
That broghte me there ? nay, but Fortune, 810
That ys to lyen ful comune ;

The false trayteresse pervers !
God wolde I koude clepe hir wers ;
For now she worcheth me ful woo,

And I wol telle sone why soo.

‘ Amonge these ladyes thus echoon,
 Sothe to seyn, I sawgh oon
 That was lyke noon of the route ;
 For I dar swere, withoute doute,
 That as the somerys sonne bryghte 820
 Ys fairer, clerer, and hath more lyghte
 Than any other planete in hevene,
 The moone, or the sterres sevene ;
 For al the worlde, so hadde she
 Surmountede hem al of beauté,
 Of maner, and of comelynesse,
 Of stature, and of so wel sette gladnesse ;
 Of godelyhede, and so wel beseye ;
 Shortly what shal Y seye ?
 By God, and by *his* halwes twelve, 830
 Hyt was my swete, ryght al hir selve.
 She hadde so stedfaste countenaunce,
 So noble porte, and meyntenaunce.
 And Love, that hadde wel herd my boone,
 Had espyed me thus soone,
 That she ful sone, in my thocht,
 As helpe me God, so was Y kaught
 So sodenly, that I ne toke
 No maner counseyl, but at hir loke,
 And at myn herte ; for-why hir eyen 840
 So gladly, I trow, myn herte seyen,
 That purely tho myn oune thocht
 Seyde, hit were beter serve hir for noght,
 Than with another to be wel.
 And hyt was sothe, for every del,
 I wil anoon ryght telle the why.

‘ I sawgh hir daunce so comelely.

Carole and synge so swetely,
Lawghe, and pleye so womanly,
And loke so debonairly ; 850
So goodely speke and so frendly ;
That certes Y trowe that evermore,
Nas seyne so blysful a tresore.
For every heer upon hir hede,
Soth to seyne, hyt was not rede,
Ne nouthur yelow, ne broune hyt nas ;
Me thoghte most lyke *gold* hyt was.
And which eyen my lady hadde !
Debonaire, goode, glade, and sadde,
Symple, of goode mochel, nocht to wyde. 860
Therto hir looke nas not asyde,
Ne owerwert, but besette so wele,
Hyt drew and tooke up everydele
Alle that on hir ganne beholde.
Hir eyen semed anoon she wolde
Have mercy, (foolys wenden soo)
But hyt was never the rather doo ;
Hyt nas no counterfeted thyng,
Hyt was hir oun pure lokyng,
That the goddesse, dame Nature, 870
Hadde made hem opene by mesure,
And cloos ; for were she never so glad,
Hyr lokyng was not foly sprad,
Ne wildely, thogh that she pleyde ;
But ever, me thought, hir eyen seyde,
' Be God, my wrathe ys al foryive !'
Therwith hir lyste so wel to lyve,
That dulnesse was of hir adrad.
She nas to sobre, ne to glad ;
In alle thynges more mesure, 880

Hadde never, I trowe, creature.
 But many oon with hir loke she herte,
 And that sate hyr ful lytel at herte ;
 For she knewe nothyng of her thoght.
 But whether she knew, or knew it noght,
 Algate she ne rought of hem a stree.
 To gete hyr love noo nerre was he
 That woned at home, than he in Ynde ;
 The formest was alway behynde.
 But goode folke over al other, 890
 She loved as man may do hys brother ;
 Of whiche love she was wounder large,
 In skilful placis that bere echarge.
 But which a visage hadde she thertoo !
 Allas ! myn hert ys wonder woo,
 That I ne kan diseryven hyt.
 Me lakketh both Englyssh and wit,
 For to undo hyt, at the fulle ;
 And eke my spiritis be to dulle,
 So grete a thyng for to devyse ; 900
 I have no witte that kan suffise
 To comprehende hir beauté ;
 But thus moche dar I sayn, that she
 Was white, rody, fressh and lyvely hewed,
 And every day hir beauté newed,
 And negh hir face was alderbest ;
 For, certys, Nature hadde swieh lest,
 To make that faire, that trewely she
 Was hir chefe patrone of beauté,
 And chefe ensample of al hir werke, 910
 And mounstre ; for be hyt never so derke,
 Me thynkyth I se hir ever moo.
 And yet, more over, thogh alle thoo

That ever levede were now alyve,
 Ne sholde han founde to diskryve
 In al hir face a wikked sygne,
 For hit was sad, symple, and benygne.

‘ And which a goodely, softe speche,
 Hadde that swete, my lyves leche !
 So frendely, and so wel ygrounded, 920
 Up al resoun so wel yfounded,
 And so tretable to alle goode,
 That I dar swere wel by the roode,
 Of eloquence was never founde
 So swete a sownynge facounde ;
 Ne trewer tonged, ne skorned lasse,
 Ne bet koude hele, that by the masse,
 I durste swere, thogh the pope hit songe,
 That ther was never yet through hir tonge,
 Man ne woman gretely harmed ; 930
 As for hit was al harme hyd.
 Ne lasse flaterynge in hir worde,
 That purely, hir symple recorde,
 Was founde as trewe as any bonde,
 Or trouthe of any mannys honde.
 Ne chyde she koude never a delo,
 That knoweth al the worlde ful wele.

‘ But swiche a fairenesse of a nekke
 Hadde that swete, that boon nor brekke
 Nas ther noon seen that mys-satte ; 940
 Hyt was white, smothe, streght, and pure flatte.
 Withouten hole or canel boon ;
 As be semynge, hadde she noon.

‘ Hyr throte, as I have now memoyre,
 Semed a rounde toure of yvoyre,
 Of goode gretenesse, and noight to grete,

And goode faire White she hete,
 That was my lady name ryghte.
 She was bothe faire and bryghte,
 She hadde not hir name wronge. 950
 Ryght faire shuldres, and body longe
 She had ; and armes every lyth,
 Fattyssh, flesshy, nat grete therwith ;
 Ryght white handes, and nayles rede,
 Rounde brestes ; and of good brede
 Hyr hippes were ; a streight flat bakke ;
 I knewe on hir noon other lakke,
 That al hir lymmes nere pure sywyng,
 In as ferre as I hadde knowyng.
 Therto she koude so wel pleye 960
 Whan that hir lyst, that I dar seye,
 That she was lyke to torche bryght,
 That every man may take of lyght
 Ynogh, and hyt hathe never the lesse.
 Of maner and of comlynesse,
 Ryght so ferde my lady dere.
 For every wight of hir manere
 Myghte cacheche ynogh, yif that he wolde,
 Yif he had eyen hir to beholde.
 For I dar swere wel, yif that she 970
 Had amonge ten thousande be,
 She wolde have be, at the lest,
 A chefe meroure of al the fest,
 Thogh they hadde stonde in a rowe,
 To mennys eyen, *that* koude have knowe.
 For wher so men hadde pleyed or wakyd,
 Me thoghte the felysshyppe as naked
 Withouten hir, that sawgh I oones,
 As a corowne withoute stones.

Trewely she was to myn eye, 980
 The soleyne fenix of Arabye ;
 For ther lyveth nevyr but oon,
 Ne swieh as she, ne knowe I noon.
 To speke of godenesse, trewely she
 Had as moche debonairyeté,
 As ever had Hester in the Bible,
 And more, yif more were possyble.
 And sothe to seyn, therwythalle
 She had a wytte so generalle,
 So hoole enclyned to alle goode, 990
 That al hir wytte was set by the rode,
 Withoute malyee, upon gladnesse.
 And therto I sawgh never yet a lesse
 Harmeful than she was in doynge,
 I sey not that she ne hadde knowynge
 What harme was, or elles she
 Hadde koude no good, so thenketh me.
 And trewely, for to speke of trouthe,
 But she had hadde, hyt hadde be routhe.
 Therof she hadde so moche hyr dele, 1000
 And I dar seyn, and swere hyt wele,
 That Trouthe hymselfe, over al and alle,
 Hadde chose hys maner principalle
 In hir, that was his restynge place.
 Therto she hadde the moste grace,
 To have stedefaste perseveraunee,
 And esy attempry governaunee,
 That ever I knewe, or wyste yitte,
 So pure suffraunt was hir wytte.
 And resoun gladly she understoode, 1010
 Hyt folowed wel, she koude goode.
 She usede gladly to do wel ;

These were hir maneres every del.

‘ Therwith she lovede so wel ryght,
She wronge do wolde to no wyght ;
No wyght myghte doo hir noo shame,
She lovede so wel hir oun name.

‘ Hyr lust to holde no wyght in honde,
Ne, be thou siker, she wolde not fonde,
To holde no wyght in balaunce,

1024

By halfe word, ne by countenaunce,
But yif men wolde upon hir lye.
Ne sende men into Walakye,
To Pruyse, and to Tartarye,
To Alysaundre, ne into Turkye,
And byd him faste anoon that he
Goo hoodeles into the drye se,
And come home by the Carrenare ;
And seye ‘ Sir, be now ryght ware,
That I may of yow here seyn,

1030

Worshyppe, or that ye come ageyn.

‘ She ne usede no suche knakkes smale,
But wherfor that Y telle my tale ;—

Ryght on thys same, as I have seyde,
Was hooly al my love *i*-leyde ;
For, certes, she was that swete wife,
My suffisaunce, my luste, my lyfe,
Myn happe, myn hele, and al my blysse,
My worldys welfare, and my goddesse,
And I hooly hires, and every del.’

1040

‘ By oure Lorde !’ quod I, ‘ I trowe you wel !
Hardely, your love was wel besette ;
I not how ye myght have doo bette.’
‘ Bette ? ne no wyght so wele,’ quod he.
‘ Y trowe hyt wel, sir,’ quod I, ‘ pardé !’

‘Nay, leve hyt wel :’—‘Sire, so do I;
I leve yow wel, that trewely
Yow thoughte that she was the beste,
And to beholde, the alderfayreste,
Who soo hadde loked hir with your eyen.’ 1050

‘With myn? nay, alle that hir seyen,
Seyde and swore hyt was soo.

And thogh they ne hadde, I wolde thoo
Have loved best my lady free,

Thogh I had hadde al the beauté
That ever had Alcibyades;

And al the strengthe of Ercules;

And therto hadde the worthynesse

Of Alysaunder; and al the rychesse

That ever was in Babyloyne, 1060

In Cartage, or in Macedoyne,

Or in Rome, or in Nynnyvé;

And *therto* also as hardy be,

As was Ector, so have I joye,

That Achilles slough at Troye;

(And therfore was he slayn alsoo

In a temple; for bothe twoo

Were slayne, he and Antylegyus;

And so seyth Dares Frygius,

For love of Polixena) 1070

Or ben as wise as Mynerva;

I wolde ever, withoute drede

Have loved hir, for I moste nede.

‘Nede? Nay trewely I gabbe nowe!

Noght nede; and I wol telle howe.

For of goode wille myn hert hyt wolde,

And eke to love hir I was holde,

As for the fairest and the beste.

She was as good, so have I reste,
 As ever was Penolopee of Grece, 1084
 Or as the noble wife Lucrece,
 That was the best, (he telleth thus
 The Romayne Tytus Lyvyus,)
 She was as good, and nothyng lyke,
 Thogh hir stories be autentyke ;
 Algate she was as trewe as she.

‘ But wherfore that I telle the,
 Whan I firste my lady say ?
 I was ryght yonge, sothe to say,
 And ful grete nede I hadde to lerne, 1090
 Whan myn herte wolde yerne.
 To love hyt was a grete empryse,
 But as my wytte koude beste suffise,
 After my yonge childely wytte,
 Withoute drede, I besette hytte,
 To love hir in my beste wyse,
 To do hir worshippe, and the servise
 That I koude thoo, be my trouthe
 Withoute feynynge, outhur slouthe.
 For wonder feyne I wolde hir se. 1100
 So mochel hyt amended me,
 That whan I sawgh hir first amorwe,
 I was warished of al my sorwe
 Of al day after ; til hyt were eve
 Me thoghte nothyng myghte me greve,
 Were my sorwes never so smerte.
 And yet she sytte so *in* myn herte,
 That, by my trouthe, Y nolde nought
 For al thys worlde, oute of my thought
 Leve my lady ; noo, trewely !’ 1110

‘ Now by my trouthe, sir,’ quod I,

‘ Me thynketh ye have suche a chaunee
As shryfte, withoute repentaunee.’

‘ Repentaunee? nay, fy!’ quod he,
‘ Shulde Y now repente me
To love? nay, certis, than were I wel
Wers than was Achetofel,

Or Anthenor, so have I joye!
The traytour that betraysede Troye:

Or the false Genelloun,

1129

He that purchasede the tresoun
Of Rowlande, and of Olyvere.

Nay, while I am alyve here,
I nyl foryete hir never moo.’

‘ Now, goode syr,’ quod I thoo,

‘ Ye han wel tolde me here before,

Hyt ys no nede to reherse more,

How ye sawgh hir firste, and where;

But wolde ye telle me the manere,

To hire which was your firste speche,

1130

Therof I wolde yow beseche;

And how she knewe first your thoght,

Whether ye loved hir or noght;

And telleth me eke what ye have lore,

I herde yow telle here before.

Yee, he seyde, ‘ thow nost what thou menyst,

I have lost more than thou wenyst.’

‘ What losse ys that?’ quod I thoo,

‘ Nyl she not love yow? ys hyt soo?

Or have ye oght doon amys,

1140

That she hathe lefte yow? ys hyt this?

For Goddys love, telle me alle.’

‘ Before God,’ quod he, ‘ and I shalle.

I say ryght as I have seyde,

On hir was al my love leyde,
 And yet she nyste hyt nat never a del,
 Noght longe tyme, leve hyt wel ;
 For ryght be siker, I durste noght,
 For al this worlde, tel hir my thoght ;
 Ne I wolde have wraththed hir trewely. 1150
 For wostow why ? she was lady
 Of the body ; she hadde the herte.
 And who hath that may not asterte.

‘ But for to kepe me so fro ydelnesse,
 Trewely I dide my besynesse
 To make songes, as I best koude.
 And ofte tyme I songe hem loude,
 And made songes, this a grete dele,
 Althogh I koude not make so wele
 Songes, ne knowe the arte al, 1160
 As koude Lamekys sone, Tuballe,
 That founde out firste the art of songe.
 For as hys brothres hammers ronge,
 Upon hys anvelet, up and downe,
 Therof he tooke the firste sowne.
 But Grekes seyn of Pitagoras,
 That he the firste fynder was
 Of the arte ; Aurora telleth soo ;
 But therof no fors of hem twoo.
 Algatis songes thus I made, 1170
 Of my felynge, myn herte to glade :
 And, loo ! thys was alther firste,
 I not wher hyt were the werste.

‘ Lorde ! hyt maketh myn herte lyght,
 Whan I thenke on that swete wyght,
 That is so semely on to se,
 And wisshe to God hit myghte so be

That she wolde holde me for hir knyght,
My lady that is so fayre and bryght.

‘ Now have I tolde the, sothe to say, 1180

My firste songe. Upon a day,

I bethoghte me what woo

And sorwe that I suffrede thoo

For hir, and yet she wyst hyt noght,

Ne tel hir, durst I nat, my thoght.

Allas! thoght I, Y kan no rede!

And but I telle hir, I am but dede;

And yif I telle hyr, to seye ryght sothe,

I am adred she wol be wrothe,

Allas! what shal I thanne doo? 1190

In this debate I was so woo,

Me thoghte myn herte brast atweyne.

So, at the last, sothe to sayne,

I bethoghte me that Nature,

Ne formede never in creature,

So moche beauté trewely

And bounté, wythoute mercy.

‘ In hope of that, my tale I tolde,

With sorwe, as that I never sholde,

For nedys; and mawgree myn hede 1200

I most have tolde hir, or be dede:

I not wel how that I beganne,

Ful evel reherse hyt I kan;

And eke, as helpe me God withalle,

I trowe hyt was in the dismalle,

That was the woundes of Egipte;

For many a worde I overskipte

In my tale for pure fere,

Lest my wordys mys-sette were.

With sorweful herte, and woundes dede, 1210

Softe, and quakyng for pure drede
 And shame, and styntyng in my tale
 For ferde, and myn hewe al pale,
 Ful ofte I wexe bothe pale and rede ;
 Bowynge to hir I heng the hede,
 I durste nat ones loke hir on,
 For witte, maner and al was goon.
 I seyde : ‘ Mercy,’ and no more ;
 Hyt nas no game, hyt sate me sore.

‘ So at the laste, sothe to seyne, 1220
 Whan that myn herte was come ageyne,
 To telle shortly al my speche,
 With hool hert; I gan hir beseche
 That she wolde be my lady swete ;
 And swore, and gan hir hertely hete
 Ever to be steiffast and trewe,
 And love hir ełwey fresshly newe,
 And never othel lady have,
 And al hir worshippe for to save,
 As I best koude ; I swore hir this, 1230
 For youres is alle that ever ther ys,
 For evermore, myn herte swete !
 And never to false yow, but I mete,
 I nyl, as wysse God helpe me soo !

‘ And whan I hadde my tale ydoo,
 God wote she acountede nat a stree
 Of al my tale, so thoghte me.
 To telle shortly ryght as hyt ys
 Trewely hire answeere hyt was this ;
 I kan not now wel counterfete 1240
 Hyr wordys, but this was the grete
 Of hir answeere ; she sayde, ‘ Nay !’
 Al o’terly : allas ! that day,

The sorwe I suffred and the woo,
 That trewely Cassandra, that soo
 Bewaylede the destruccioun
 Of Troye, and of Ilyoun,
 Hadde never swich sorwe as I thoo.

I durste no more say thertoo,
 For pure fere, but stale away. 1250

And thus I lyvede ful many a deye,
 That trewely I hadde no nede,
 Ferther than my beddes hede,
 Never a day to seche sorwe ;
 I fonde hyt redy every morwe,
 For-why I loved hyr in no gere.

‘ So hit befel another yere,
 I thoughte ones I wolde fonde,
 To do hir knowe, and understonde
 My woo ; and she wele understode, 1260

That I ne wilnede thynges but gode
 And worshippe, and to kepe hir name,
 Over alle thynges, and dred hir shame,
 And was so besy hir to serve,
 And pitee were I shulde sterve,
 Syth that I wilnede noon harme, ywys.

‘ So whan my lady knewe al thys,
 My lady yaf me, al hooly,
 The noble yifte of hir merey,
 Savyng her worshippe by alle weyes ; 1270
 Dredles, I mene noon other weyes.

And therwith she yaf me a rynge ;
 I trowe hyt was the firste thynges.

But yif myn herte was iwaxe
 Gladde, that is no nede to axe.

As helpe me God, I was as blyve

Reysed, as fro dethe to lyve,
 Of *alle* happes the alderbeste,
 The gladdest and the moste at reste.
 For trewely that swete wyght, 1280
 Whan I hadde wrong, and she the ryght,
 She wolde alway so goodely
 Foryeve me so debonairely,
 In al my yowthe, in *alle* chaunce,
 She tooke me in hir governaunce.
 Therwyth she was alway so trewe,
 Our joye was ever ylyche newe ;
 Our hertys werne so evene a payre,
 That never nas that oon contrayre
 To that other, for noo woo : 1290
 For sothe ylyche they suffrede thoo
 Oo blisse and eke oo sorwe bothe ;
 Ylyche they were bothe glade and wrothe,
 Al was us oon, withoute were.
 And thus we lyvede ful many a yere,
 So wel I kan nat telle how.'

' Sir !' quod I, ' where is she now ?'
 ' Now ?' quod he, and stynte anoon ;
 Therewith he waxe as dede as stoon,
 And seyde, ' Allas, that I was bore ! 1300
 That was the losse ! *and* herebefore
 I tolde thee that I hadde lorne,
 Bethenke how I seyde here before,
 Thow wost ful lytel what thow menyst,
 I have lost more than thow wenyst.
 God wote, allas ! ryght that was she.'
 ' Allas ! sir, how ? what may that be ?'
 ' She ys ded :'—' Nay ?'—' Yis, be my trouthe !'
 ' Is that youre losse ? be God, hyt ys routhe !'

And with that worde, ryght anoon, 1310
 They ganne to strake forth; al was doon,
 For that tyme, the herte huntynge.

With that me thoght that this kyng,
 Gan homewarde for to ryde,
 Unto a place was ther besyde,
 Which was from us but a lyte,
 A longe castel with wallys white,
 Be seynt Johan, on a ryche hille,
 As me mette; but thus hyt fille.

Ryght thus me mette, as I yow telle, 1320
 That in the castell ther was a belle,
 As hyt hadde smyte oures twelve;
 Therewyth I awooke my selve,
 And fonde me lyinge in my bedde;
 And the booke that I hadde redde,
 Of Aleyone and Seys the kyng,
 And of the goddys of slepyng,
 I fond hyt in myn honde ful evene.
 Thoght I, thys ys so queynt a swevene,
 That I wol, be processe of tyme, 1330
 Founde to put this swevene in ryme,
 As I kan best, and that anoon;
 This was my swevene; now hit ys doon!



OF QUENE ANELYDA AND FALSE
ARCYTE.

THOU ferse God of armes, Mars the rede,
That in thy frosty contré called Traee,
Within thy grisly temples ful of drede,
Honoured art as patroun of that place!
With thee, Bellona, Pallas, ful of grace!
Be presente, and my songe contynew and guye;
At my begynnyng thus I to the crye.

‘ For hit ful depe is sonken in my mynde,
With pitous hert, in Englyssh to endyte
This olde storie, in Latyn which I fynde, 10
Of quene Analida and fals Arcite,
That elde, which al can frete and bite,
(As hit hath freten mony a noble storie)
Hath nygh devoured out of oure memorie.

‘ Be favorable eke thou Polymnya
On Parnaso that hathe thy sustres glade,
By Elyeon, not fer from Cirrea,
Syngest with vois memorial in the shade,
Under the laurer, which that may not fade,

And do that I my shippe to haven wyne, 20
 First folow I Stace, and after him Corynne.

*Jamque domos patrias Cithice post aspera gentis,
 Prelia laurigero subeuntem Thesea curru,
 Letifici plausus missusque ad sidera vulgi, &c.*

When Theseus, with werres longe and grete,
 The aspre folke of Cithe had overcome,
 Tho, laurer crowned, in his chare, gold bete,
 Home to his contré houses is he come ;
 For whiche the peple blisful al and somme,
 So eriden, that to the sterres hit wente, 30
 And him to honouren dide al her entente.

Beforne this duke, in signe of victorie,
 The trompes come, and in his baner large,
 The ymage of Mars ; and in token of glorie,
 Men myghte sene of tresoure mony a charge,
 Mony a bright helme, and mony a spere and targe,
 Meny a fresh knyght, and mony a blysful route,
 On hors, on fote, in al the felde aboute.

Ipólita his wife, the hardy quene
 Of Cithea, that he conquered hadde, 40
 With Emelye her yonge suster shene,
 Faire in a chare of golde he with hym ladde,
 That al the grounde about her char she spradde
 With brightnesse of beauté in her face,
 Fulfilled of largesse and of alle grace.

With his tryumphe, and laurer crowned thus,
 In al the floure of fortunes yevyng,

Let I this noble prince, *this* Theseus,
 Towarde Athenes in his wey ryding,
 And founde I wol *inne* shortly to bringe, 63
 The sleye wey of that I gan to write,
 Of quene Anelida and fals Areite.

Mars, whiche that thro his furieuse course of ire,
 The olde wrethe of Juno to fulfille,
 Hath set the peples hertis bothe on fire
 Of Thebes and Grece, and everiche other to kille
 With blody speres, restede never stille,
 But throng now her, now ther, amonge hem bothe,
 That everyche other slough, so were they wrothe.

For when Amphiorax and Tydeus, 64
 Ipomedon and Prothonolope also
 Wer ded, and slayn proude Campaneus,
 And when the wreeches Thebans bretheren two
 Were slayn, and kyng Adrastus home ago,
 So desolat stode Thebes and so bare,
 That no wight coude remedie of his care.

And when the olde Creon gan espye,
 How that the blood roial was broght adoun,
 He helde the cité by his tyrafinye,
 And dyde the gentils of that regioun 7
 To ben his frendes, and duellen in the toune.
 So what for love of him, and what for awe,
 The noble folke wer to the toune idrawe.

Among *alle* these, Anelida the quene
 Of Ermony was in that toune duellyng,
 That fairer was then is the sunne shene,

Thoroghout the worlde so gan her name springe,
 That her to seen had every wyght likynge ;
 For, as of trouthe, is ther noon her ilyche,
 Of al the wymen in this worlde riche. 80

Yonge was this quene, of twenty yer of elde,
 Of mydil stature, and of suche fairenesse,
 That Nature had a joy hir to behelde,
 And for to speken of her stidfastnesse,
 She passede bothe Penelope and Lueresse,
 And shortly, yf she shal be comprehended,
 In her myghte nothing been amended.

This Theban knyght eke, for sothe to seyne,
 Was yonge, therto withal a lusty knyght,
 But he was double in love, and nothing pleyne, 90
 And subtil in that crafte, overe eny wyght,
 And with his kunnyng whan this lady bryght:
 For so ferforthe he can her trouthe assure,
 That she him trusted over eny creature.

What shuld I seyn ? she loveth Arcyte so
 That when that he was absent eny throw,
 Anoon her thought her herte brast atwo ?
 For in her sight to her be bare hym low,
 So that she wende have al his hert yknowe ;
 But he was fals, hit nas but feyned chere, 100
 As nedeth not to men suche craft to lero.

But nevertheles ful mykel besynesse
 Had he, er that he myght his lady wynne,
 And swor he wolde dyen for distresse,

Or from his wit he seyde he wolde twynne.
 Alas the while! for hit was routhe and synne,
 That she upon his sorowes wolde rewe,
 But nothing thinketh the fals as doth the trewe.

Her fredom fonde Arcite in suche maner,
 That al was his that she hath, both moche and lyte;
 Ne to no creatur ne made she chere, 111
 Ferther then it lykede to Arcite;
 Ther was no lak with *whiche* he myght hir wite,
 She was so ferforth yevin hym to plese,
 That al that lyked him hit dyd her herte ese.

Ther nas to her no maner lettre isente
 That touched love, from eny maner wyght,
 That she ne shewed hit him er hit was brent;
 So pleyn she was, and did her *fulle* myght,
 That she nyl hiden nothing from her knyght, 120
 Lest he of eny untrouthe her upbreyde;
 Withoute bode his herte she obeyde.

And eke he made him jelouse over her,
 That what that eny man *hadde* to her seyde,
 Anoon he wolde preyen her to swere
 What was that worde, or make hym evel apaide;
 Then wende she out of her wyt have breyd,
 But *alle* was but sleght and flaterie;
 Withoute love he feynede jelousye.

And *alle* this toke she so debonerly, 130
 That al his wil, her thocht hit skilful thing;
 And ever the lenger she loved him tendirly,
 And did him honour as he wer a kyng.

Her hert was wedded to him with a ringe ;
 For so ferforth upon trouthe is her entent,
 That wher he gooth, her herte with him wente.

When she shal ete, on him is so her thoght,
 That wel unnethe of mete toke she kepe ;
 And whenne she was to her reste broght,
 On him she thoght ay til that she slepe ; 140
 When he was absent, prevely she wepe.
 Thus lyveth feire Anelida the quene,
 For fals Arcite, that did her al this tene.

This fals Arcite, of his newfanglenesse,
 For she to hym so louly was and trewe,
 Toke lesse deynté for her stidfastnesse,
 And saw another lady, proude and newe,
 And ryght anon he clad him in her hewe,—
 Wot I not whethir in white, rede, or grene,—
 And falsede fair Anelida the quene. 150

But neverthelesse, grete wonder was hit noon
 Thogh he were fals, for hit is the kynde of man,
 Sith Lamek was, that is so longe agoon,
 To ben in love as fals as evere he can ;
 He was the firste fader that began
 To loven two, and was in bigamy.
 And he fonde tentes first, but-yf men lye.

This fals Arcite sumwhat most he feyne,
 When he wex fals, to coveren his traitorie,
 Ryght as an hors, that can both bite and pleyne ;
 For he bar her on honde of trecherie, 161
 And swore he coude her doublenesse espie,

And al was falsnes that she to him mente ;
Thus swore this thefe, and forthe his way he wente.

Alas ! what herte myght endure hit,
For routhe or wo, her sorow for to telle ?
Or what man hath the cunnyng or the wit ?
Or what man *mighte* within the chambre duelle,
Yf I to him rehersen shal the helle
That suffreth feyr Anelida the quene, 170
For fals Arcite, that did her al this tene ?

She wepith, wailleth, and swouneth pitously,
To grounde dede she falleth as a stoon ;
Craumpysssheth her lymes erokedly ;
She speketh as her wit wer al agoon ;
Other colour then asshen hath she noon,
Ne non other worde speketh she moche or lyte,
But ‘ Mercie ! cruel herte myn, Arcite !’

And thus endureth, til that she was so mate
That she ne hath foot, on which she may sustene,
But for languisshing evere in this estate, 181
Of which Arcite hath nother routhe ne tene ;
His herte was elleswher newe and grene ;
That on her wo, ne deyneth him not to thinke ;
Him rekketh never wher she flete or synke.

His newe lady holdeth him so narowe
Up by the brydil, at the staves ende,
That every worde he dred hit as an arwe ;
Her daunger made him bothe bowe and bende,
And as her luste, made him turne or wende ; 190
For she ne graunted him in her lyvyng,
No grace, whi that he hath lust to singe :

But drof hym forthe, unnethe list her knowe
 That he was servaunt unto her ladishippe ;
 But lest that he wer proude, she helde him lowe.
 Thus serveth he, withoute *mete* or sippe,
 She sent him now to londe, *and* now to shippe,
 And for she yafe him daunger al his fille,
 Therfor she had him at her oune wille.

Ensample of this, ye thriſtie wymmen alle, 200
 Take here Anelida and fals Arcite,
 That for her list hym her dere herte calle,
 And was so meke, therfor he loved her lyte ;
 The kynde of mannes hert is to delyte
 In thing that straunge is, also God me save !
 For what he may not gete, that wolde they have.

Now turne we to Anelida ageyn,
 That pyneth day be day in langwisshinge ;
 But when she sawe that her ne gat no geyn,
 Upon a day, ful sorowfully wepinge, 210
 She cast her for to make a compleynyng ;
 And with her oune honde she gan hit write,
 And sent *it* to her Theban knyght Arcite.

THE COMPLEYNT OF FAIRE ANELYDA UPON
 FALS ARCYTE.

‘ So thirled with the poynt of remembraunce,
 The suerde of sorowe, ywhet with fals plesaunce,
 My herte bare of blis, and blake of hewe,
 That turned is to quakyng al my daunce,

My suerte into a whaped countenaunce,
 Sith hit availeth not *for* to ben trewe :
 For who-so truest is, hit shal hir rewe, 220
 That serveth love, and dothe her observaunce
 Alwey to oon, and chaungeth for no newe.

‘ I wot my self as wel as eny wight,
 For I loved oon, with al my hert and myght
 More then my self an hundred thousand sithe,
 And cleped him my hertis life, my knyght,
 And was al his, as fer as hit was ryght,
 And when that he was glad, then was I blithe,
 And his disese was my deth as swithe,
 And he ayein, his trouthe me had iplyght, 230
 For everemore hys lady me to kythe.

‘ Alas ! now hath he left me causeles,
 And of my wo he is so routheles,
 That with a worde him list not ones deyne,
 To bring ayen my sorowful hert in pes,
 For he is caght up in another les ;
 Ryght as *him* list, he laugheth at my peyne,
 And I ne can myn herte not restreyne
 That I ne love him alwey neveretheles,
 And of al this I not to whom me pleyne. 240

‘ And shale I pleyn, (alas ! the harde stounde !)
 Unto my fo, that yafe my hert a wounde,
 And yet desireth that myn harme be more ?
 Nay, certis ! ferther wol I never founde
 Non other helpe my sores for to sounde ;
 My destany hath shapen hit *so* yore,
 I wil non other medecyne ne lore,

I wil ben ay ther I was ones bounde,
That I have seide, be seide for evermore.

‘ Alas ! wher is become your gentillesse ? 250
 Youre wordes ful of plesaunce and humblesse ?
 Your observaunces in soo low manere ?
 And your awayting, and your besynesse,
 Upon me that ye calden your maistresse,
 Your sovereigne lady in this worlde here ?
 Alas ! is ther nother worde ne chere,
 Ye vouchesafe upon myn hevynesse ?
 Alas ! youre love, I bye hit al to dere.

‘ Now certis, suete, thogh that ye
 Thus causeles the causer be, 260
 Of my dedely adversyté,
 Your manly resoun oght it to respite,
 To slene your frende, and namely me,
 That never yet in no degre
 Offended yow, as wisly he
 That al wote of wo my soule quyte.

‘ But for I shewed yow, Arcite,
 Al that men wolde to me write,
 And was so besy yow to delyte,
 My honor safe meke, kynde, and fre, 270
 Therfor ye put on me this wite :
 And of me rekke not a myte,
 Thogh the suerde of sorow byte
 My woful herte, thro your cruelté.

‘ My swete foo, why do ye so for shame ?
 And thenke ye that furthered be your name,

To love a newe, and ben untrewē? Nay!
 And put yow in selaunder now and blame,
 And do to me adversité and grame,
 That love yow most, God wel thou wost! alway?
 And come ayein, and be al pleyn somme day, 281
 And turne al this, that hath be mys, to game;
 And 'al foryeve,' while that I lyve may.

'Lo, herte myn, al this is for to seyn,
 As wheder shal I prey or elles pleyn?
 Whiche is the way to doon yow to be trewe?
 For either mot I have yow in my cheyn,
 Or with the dethe ye mot departe us tweyn;
 Ther ben non other mene weyes newe,
 For God so wisly upon my soule rewe, 290
 As verrely ye sleen me with the peyn;
 That may ye se unfeyned of myn hewe.

'For thus ferforthe have I my dethe soght,
 My self I mourdre with my prevy thoght;
 For sorowe and routhe of your unkyndnesse,
 I wepe, I wake, I fast, al helpeth noght;
 I weyve joy that is to speke of oght,
 I voyde companye, I fle gladnesse;
 Who may avaunt hir beter of hevynesse,
 Then I? and to this plyte have ye me broght, 300
 Withoute gilt, me nedith no witnesse.

'And shal I prey, and weyve womanhede?
 Nay! rather dethe, then do so foule a dede,
 And axe mercie, an giltles what nede?
 And yf I pleyn what lyfe I lede,
 Yow rekketh not; that know I out of drede,

And if I to yow myn othes bede,
 For myn exeuse, a skorne shal be my mede,
 Your chere floureth, but wol not sede,
 Ful longe agoon I oght have taken hede ; 319

‘ For thogh I hadde yow to morowe ageyn,
 I myght as wel holde Apprile fro reyn,
 As holde yow to make yow be stedfast.
 Almyghty God, of trouthe the sovereign!
 Wher is the trouthe of man? who hath hit slayn?
 Who that hem loveth, she shal hem fynde as faste,
 As in a tempest is a roten mast.
 Is that a tame best, that is ay feyn
 To renne away, when he is lest agaste?

‘ Now mercie, swete, yf I myssey ! 320
 Have I seyde oght amys, I prey?
 I not, my wit is al away.
 I fare as dothe the songe of chanteplure ;
 For now I pleyn, and now I pley,
 I am so mased that I dey,
 Arcite hath borne away the key
 Of al my worlde, and my good aventure.

‘ For in this worlde ther is no creature,
 Walkynge in more discomfiture,
 Then I, ne more sorowe endure, 336
 And yf I slepe a furlonge wey or tweye,
 Then thenketh me that your figure
 Before me stont clad in asure,
 Efte to suere yet a newe assure,
 For to be trew, and mercie me to preye.

‘The longe nyght, this wonder sight I drye,
 And on the day for this afray I dye,
 And of al this ryght noght, ywis, ye reche,
 Ne neveremo myn yen two be drie,
 And to your routhe, and to your trouthe I crie ;
 But, welaway ! to fer be they to feche, 341
 Thus holdeth me my destany a wreche,
 But me to rede out of this drede or guye,
 Ne may my wit, so weyke is hit, not streche.

‘Then ende I thus, sith I may do no more,
 I yif hit up for now and evermore ;
 For I shal never este put in balaunce
 My seknernes, ne lerne of love the lore ;
 But as the swan, I have herd seyde ful yore,
 Ayeins his dethe shal singen his penaunce, 350
 So singe I here the destany or chaunce,
 How that Arcite, Analida so sore
 Hath thirled with the poynt of remembraunce.’

[Whan that Annelyda, this woful quene,
 Hath of her hande written in this wyse,
 With face deed, betwyxe pale and grene,
 She fel a-swoune ; and sythe she gan to ryse,
 And unto Mars avoweth saerifyse
 Within the temple, with a sorouful chere,
 That shapen was, as ye may plainly here.]

EXPLICIT.



THE HOUSE OF FAME.

GOD turne us every dreme, to goode !
For hyt is wonder, be the roode,
To my wytte, what causeth swevenes
Eyther on morwes, or on evenes ;
And why theffecte folweth of somme,
And of somme hit shal never come ;
Why that is an avisioun,
And why this is a revelacioun ;
Why this a dreme, why that a swevene,
And nocht to every man *i-lyche* evene ; 16
Why this a fantome, why these oracles,
I not : but who-so of these meracles
The causes knoweth bet then I,
Devyne he ; for I certainly
Ne kan hem nocht, ne never thinke
To besely my wytte to swinke,
To knowe of hir significaunce
The gendres, neyther the distaunce
Of tymes of hem, ne the causis,
For-why this is more then that cause is ; 20
As yf folkys complexiouns,
Make hem dreme of reflexiouns ;
Or ellis thus, as other sayne,
For to grete feblenesse of her brayne,

By abstinence, or by sekenesse,
 Prisoun, stewe or grete distresse ;
 Or ellis by disordynaunce,
 Or naturell acustumaunce,
 That somme man is to curiouse
 In studye, or melancolyouse ; 30
 Or thus, so inly ful of drede,
 That no man may hym bote bede ;
 Or ellis that devocioun
 Of somme, and contemplacioun,
 Causeth suche dremes ofte ;
 Or that the cruelle lyfe unsofte
 Whiche these ilke lovers leden,
 Oft hopen over moche or dreden,
 That purely here impressions
 Causeth hem avisions ; 40
 Or yf that spiritis have the myght
 To make folke to dreme anyght ;
 Or yf the soule, of propre kynde,
 Be so parfit as men fynde,
 That yt forwote that ys to come,
 And that hyt worneth al and some
 Of everyche of her adventures,
 Be avisions, or be figures,
 But that oure flesh ne hath no myght
 To understonde hyt aryght, 50
 For hyt is warned to derkly ;
 But why the cause is, noght wote I,
 Wel worth of this thyng grete clerky's,
 That trete of this, and other werkes ;
 For I of noon opinioun
 Nyl as now make mensyoun ;
 But oonly that the holy roode

Turne us every dreme to goode ;
 For never sith that I was borne,
 Ne no man elles me beforne, 60
 Mette, I trowe stedfastly,
 So wonderful a dreme as I,
 The tenthe day now of Decembre ;
 The which, as I kan yow remembre,
 I wol yow telle everydele.

But at my begynnyng, trusteth wele,
 I wol make invocacioun,
 With special devocioun
 Unto the god of slepe anoon,
 That dwelleth in a cave of stoon, 70
 Upon a streme that cometh fro Lete,
 That is a floode of helle unswete,
 Besyde a folke men clepeth Cymerie ;
 There slepeth ay this god unmerie,
 With his slepy thousande sones,
 That alwey for to slepe hir wone is ;
 That to this god that I of rede,
 Prey I, that he wolde me spede,
 My swevene for to telle aryght,
 Yf every dreme stonde in his myght 80
 And he that mover ys of alle
 That is and was, and ever shalle,
 So yive hem joye that hyt here,
 Of alle that they dreme to-yere ;
 And for to stonde in grace
 Of her loves, or in what place
 That hem were levest for to stonde,
 And shelde hem fro poverte and shonde,
 And fro unhappe and eche disese,
 And send hem alle that may hem plesse, 90

That take hit wele and skorne hit noghte
 Ne hyt mysdeme in her thoght,
 Thorgh maliciouse entencioun.
 And who-so, thorgh presumpeioun,
 Or hate, or skorne, or thorgh envye,
 Dispite, or jape, or vilanye,
 Mysdeme hyt, pray I Jhesus God,
 That dreme he barefote, dreme he shod,
 That every harme, that any man
 Hath had sythen the worlde began, 100
 Befalle him thereof, or he sterve,
 And graunt he mote hit ful deserve,
 Loo, with suche a conclusioun,
 As had of his avisioun
 Cresus, that was kyng of Lyde,
 That high upon a gebet dide.
 This prayer shal he have of me ;
 I am no bet in charityé.

Now herkeneth, as I have yow seyde,
 What that I met or I abreyde. 110
 Of Decembre the tenthe day,
 Whan hit was nyght, to slepe I lay,
 Ryght ther as I was wonte to done,
 And fille on slepe wonder sone,
 As he that wery was for-goo
 On pilgrymage myles two
 To the corseynt Leonarde,
 To make lythe of that was harde.

But as I slepte, me mette I was
 Withyn a temple ymade of glas ; 120
 In whiche ther were moo ymages
 Of golde, stondynge in sondry stages,
 And moo ryche tabernacles,

And with perré moo pynacles,
 And moo curiouse portreytures,
 And queynt maner of figures
 Of golde werke, then I sawgh ever.

But certeynly I nyste never
 Wher that I was, but wel wyste I,
 Hyt was of Venus redely,

130

This temple; for in portreyture,
 I sawgh anoon ryght hir figure
 Naked fletynge in a see.

And also on hir hede, pardé,
 Hir rose garlonde white and rede,
 And hir combe to kembe hyr hede,
 Hir dowves, and daun Cupido,
 Hir blynde sone, and Vulcano,
 That in his face was ful broune.

But as I romed up and doune,
 I fonde that on a walle ther was
 Thus writen on a table of bras:—

140

‘ I wol now say yif I kan,
 The armes, and also the man,
 That first came, thorgh his destanee,
 Fugityfe of Troy countree,
 In Itayle, with ful moche pyne,
 Unto the strondes of Lavyne.’

And tho began the story anoon,
 As I shal telle yow eehoon.

150

First sawgh I the destruccioun
 Of Troy, thorgh the Greke Synoun,
 With his false forswerynge,
 And his chere and his lesynge
 Made the hors broght into Troye,
 Thorgh which Troyens lost al her joye

And aftir this was grave, allas,
 How Ilyoun assayled was
 And wonne, and kynge Priam yslayne,
 And Polite his sone, certayne, 150
 Dispitously of daun Pirrus.

And next that sawgh I how Venus
 Whan that she sawgh the castel breude,
 Doune fro the hevene gan descende,
 And bad hir sone Eneas flee ;
 And how he fled, and how that he
 Escaped was from al the pres,
 And tooke his fader, Anchises,
 And bare hym on hys bakke away,
 Cryinge ‘ Allas and welaway !’ 170
 The whiche Anchises in hys honde
 Bare the goddessse of the londe,
 Thilke that unbrende were.

And I saugh next in al hys fere,
 How Creusa, daun Eneas wife,
 Which that he lovede as hys lyfe,
 And hir yonge sone Iulo,
 And eke Askanius also,
 Fledden ekewith drery ehere,
 That hyt was pitee for to here ; 180
 And in a forest as they wente,
 At a turnyng of a wente,
 How Creusa was yloste, allas !
 That dede, not I how she was ;
 How he hir soughte, and how hir goste
 Bad hym to flee the Grekes oste,
 And seyde he most unto Itayle,
 As was hys destanye, sauns faille,
 That hyt was pitee for to here,

When hir spirite gan appere 190
 The wordes that she to hym seyde,
 And for to kepe hir sone hym preyde.

Ther sawgh I grave eke how he,
 Hys fader eke, and his meynee,
 With hys shippes gan to sayle
 Towardes the contree of Itaylle,
 And streight as that they myghte goo.

Ther saugh I the, crewel Juno,
 That art daun Jupiteres wife,
 That hast yhated, al thy lyfe, 200
 Alle the Troyanysshe bloode,
 Renne and crye, as thou were woode,
 On Eolus, the god of wyndes,
 To blowe oute of alle kyndes
 So lowde, that he shulde drenehe
 Lorde, lady, grome, and wenche
 Of al the Troyan nacioun,
 Withoute any savaeioun.

Ther saugh I suche tempeste aryse,
 That every herte myght agryse, 210
 To see hyt peynted on the walle.

Ther saugh I graven eke withalle,
 Venus, how ye, my lady dere,
 Wepyng with ful woful chere,
 Prayen Jupiter an hye
 To save and kepe that navye
 Of the Trojan Eneas,
 Sythe that he hir sone was

Ther saugh I Joves Venus kysse,
 And graunted of the tempest *lysse*. 220

Ther saugh I how the tempest stente,
 And how with alle pyne he wente,

And prevely toke arryvage
 In the contree of Cartage ;
 And on the morwe how that he,
 And a knyghte highte Achate,
 Mette with Venus that day,
 Goynge in a queynt array,
 As she hadde ben an hunteresse,
 With wynde blowynge upon hir tresse ; 230
 How Eneas gan hym to pleyne,
 Whan that he knewe hir, of his peyne ;
 And how *y*-dreynte his shippes were,
 Or elles lost, he nyste where ;
 How she gan hym comfort thoo,
 And bad hym to Cartage goo,
 And ther he shulde his folke fynde,
 That in the see were lefte behynde.
 And, shortly of this thyng to pace,
 She made Eneas so in grace 240
 Of Dido, quene of that contree,
 That, shortly for to telle, she
 Became hys love, and lete hym doo
 That that weddyng longeth too.
 What shulde I speke it more queynte,
 Or peyne me my wordes peynte,
 To speke of love? hyt wol not be ;
 I kannot of that faculté.
 And eke to telle the manere
 How they aqueynteden in fere, 250
 Hyt were a longe processe to telle,
 And over longe for yow to dwelle.
 Ther sawgh I grave, how Encas
 Tolde Dido every caas,
 That hym was tyd upon the see.

And aftir grave wás how shee
 Made of hym, shortly at oo worde,
 Hyr lyfe, hir love, hir luste, hir lorde ;
 And did hym al the reverence,
 And leyde on hym alle dispence, 260
 That any woman myghte do,
 Wenynge hyt had al be so,
 As he hir swore ; and herby demede
 That he was good, for he suche semede.

Allas, what harme doth apparence,
 Whan hit is fals in existence !
 For he to hir a traytour was ;
 Wherefore she slowe hir selfe, alas !

Loo, how a woman dothe amys,
 To love hym that unknowe ys ! 270
 For, be Cryste, lo thus yt fareth ;
 Hyt is not al golde that glareth.
 For, al-so browke I wel myn hede,
 Ther may be under godelyhede
 Kevered many a shrewde vice ;
 Therefore be no wyght so nyce,
 To take a love oonly for chere,
 Or for speche, or for frendly manere ;
 For this shal every woman fynde,
That some man, of his pure kynde 280
Wol shewen outward the fairest,
Til he have caught that what him lest ;
And than wol he causes fynde,
 And sweren how that she ys unkynde,
 Or fals, or prevy double was.
 Alle this sey I be Eneas
 And Dido, and her nyce lest,
 That loved al to sone a gest ;

Therefore I wol seye a proverbe,
 That he that fully knoweth therbe, 290
 May savely ley hyt to his ye;
 Withoute drede, this ys no lye.

But let us speke of Eneas,
 How he betrayed hir, alas!
 And lefte hir ful unkyndely.

So whan she saw al utterly,
 That he wolde hir of trouthe fayle,
 And wende fro hir to Itayle,
 She gan to wringe hir hondes two.
 ‘Allas!’ quod she, ‘what me ys wo!’ 300

Allas! is every man thus trewe,
 That every yere wolde have a newe,
 Yf hit so longe tyme dure?

Or elles three, peraventure?

As thus:—of *oon* he wolde have fame

In magnyfyng of hys name;

Another for frendshippe, seyth he;

And yett ther shal the thridde be,

That shal be take for delyte,

Loo, or for synguler profite.’ 310

In suche wordes gan to pleyne

Dydo of hir grete peyne,

As me mette redely;

None other auttour alegge I.

‘Allas!’ quod she, ‘my swete herte,

Have pitee on my sorwes smerte,

And slee me not! goo noght away!

‘O woful Dido, weleaway!’

Quod she to hir selfe thoo.

‘O Eneas! what wol ye doo?’ 320

O, that your love, ne your bonde,

That ye han sworne with your ryght honde,
 Ne my crewel deth,' quod she,
 ' May holde yow stille here with me !
 O, haveth of my deth pitee !
 Ywys my dere herte, ye
 Knowen ful wel that never yit,
 As fer-forth as ever I hadde wytte,
 Agylte yowe in thoght ne dede.
 O, have ye men suche godelyhede 330
 In speche, and never a dele of trouthe ?
 Allas, that ever hadde routhe
 Any woman on any man !
 Now see I wel, and telle kan,
 We wrecheded wymmen konne noon arte ;
 For certeyne, for the more parte,
 Thus we be served everychone.
 How sore that ye men konne grone,
 Anoon as we have yow receyved,
Certainly we ben deceyved ; 340
 For, though your love laste a sesoun,
 Wayte upon the conclusyoun,
 And eke how that ye determynen,
 And for the more part diffynen.
 O, weleaway that I was borne !
 For thorgh yow is my name lorne,
 And al youre actes red and songe
 Over al thys londe, on every tonge.
 O wikke Fame! for ther nys
 Nothinge so swifte, lo, as she is. 350
 O, sothe ys, every thyng ys wyste,
 Though hit be kevered with the myste.
 Eke, though I myghte dure ever,
 That I have do rekever I never,

That I ne shal be seyde, allas,
 Y-shamed be thourgh Eneas,
 And that I shal thus juged be :—
 Loo, ryght as she hath done, now she
 Wol doo eftesones hardely.

Thus seyth the peple prevely.³⁶⁹
 But that is do, *nis* not to done ;
 For al hir compleynt ne al hir moone,
 Certeynly avayleth hir not a stre.

And when she wiste sothely he
 Was forthe unto his shippes agoon,
 She into hir chambre wente anoon,
 And called on hir suster Anne,
 And gan her to compleyne thanne ;
 And seyde, that she cause was,
 That she first loved *hym*, alas,³⁷⁰
 And thus counseyllled hir thertoo.
 But what ! when this was seyde and doo,
 She rofe hir selfe to the herte,
 And dyede thorgh the wounde smerte.
 But al the maner how she dyede,
 And al the wordes that she seyde,
 Who-so to knowe hit hath purpos,
 Rede Virgile in Eneydos,
 Or the epistile of Ovyde,
 What that she wrote or that she dyde ;³⁸⁰
 And nor hyt were to longe tendyte,
 Be God, I wolde hyt here write.

But, weleaway ! the harme, the routhe,
 That hath betyd for suche untrouthe,
 As men may ofte in bokes rede,
 And al day se hyt yet in dede,
 That for to thynke hyt a tene is.

Loo Demophon, duke of Athenys,
 How he forswore hym ful falsly,
 And trayied Phillis wikkidly, 390
 That kynges doghtre was of Trace,
 And falsly gan hys terme pace ;
 And when she wiste that he was fals,
 She honge hir selfe ryght be the hals,
 For he had doo hir suehe untrouthe ;
 Loo ! was not this a woo and routhe ?

Eke lo how fals and reccheles
 Was to Breseyda Achilles,
 And Paris to Enone,
 And Jason to Isiphile, 400
 And eft Jason to Medea,
 Ereules to Dyanira ;
 For he left her for Yole,
 That made hym cache his dethe, pardé.

How fals eke was he, Theseus ;
 That, as the story telleth us,
 How he betrayed Adriane ;
 The devel be hys soules bane !
 For had he lawghed, had he loured,
 He moste have be devoured, 410
 Yf Adriane ne had ybe.
 And, for she had of hym pité,
 She made hym fro the dethe escape,
 And he made hir a ful fals jape ;
 For aftir this, withyn a while,
 He lefte hir slepynge in an ile,
 Deserte allone, ryght in the se,
 And stale away, and lete hir be ;
 And tooke hir suster Phedra thoo
 With him, and gan to shippe goo. 420

And yet he had yswore to hire,
 On alle that ever he myghte swere,
 That so she saved hym hys lyfe,
 He wolde have take hir to hys wife,
 For she desirede nothing ellis,
 In certeyne, as the booke tellis,

But to excusen Eneas
 Fullyche of al his trespas,
 The booke seyth Mercuré sauns fayle,
 Bade hym goo into Itayle,
 And leve Auffrikes regioun,
 And Dido and hir faire toun.

130

Thoo sawgh I grave how that to Itayle
 Daun Eneas is goo for to assayle ;
 And how the tempest al began,
 And how he lost hys sterisman,
 Which that the stere, or he toke kepe,
 Smote overe borde, loo, as he slepe.

And also sawgh I how Sybile
 And Eneas, beside an yle,
 To helle wente, for to see
 His fader Anchyses the free.
 How he ther fonde Palinurus,
 And Dido, and eke Deiphebus,
 And every torment eke in helle
 Sawgh he, which is longe to telle.
 Which who-so willeth for knowe,
 He most rede many a rowe
 On Virgile or in Claudian,
 Or Daunte, that hit telle kan.

410

450

Tho sawgh I grave al the aryvayle
 That Eneas had in Itayle ;
 And with kynge Latyne hys trctee,

And alle the batayles that hee
 Was at hymselfe, and eke hys knyghtis,
 Or he had al ywonne hys ryghtis ;
 And how he Turnus reft his lyfe,
 And wanne Lavinia to his wife ;
 And alle the mervelouse signals
 Of the goddys celestials ; 460
 How mawgree Juno, Eneas
 For al hir sleight and hir compas,
 Acheved alle his aventure ;
 For Jupiter tooke of hym cure,
 At the prayer of Venus,
 The whiche I prey alwey save us,
 And us ay of oure sorwes lyghte.


When I hadde seene al this syghte
 In this noble temple thus,
 ‘ A lorde !’ thought I, ‘ that madest us, 470
 Yet sawgh I never suche noblesse
 Of ymages, ne suche richesse,
 As I saugh grave in this chirche ;
 But not wote I whoo did hem wirche,
 Ne where I am, ne what contree.
 But now wol I goo oute and see,
 Ryght at the wicket, yf Y kan
 See oughtwhere stiryng any man,
 That may me telle where I am.’

When I oute at the dores came, 480
 I faste aboute me behelde,
 Then sawgh I but a large felde,
 As fer as that I myghte see,
 Withouten toune, or house, or tree,
 Or bussh, or gras, or eryd londe ;
 For al the felde nas but sonde,

As smale as man may se yet lye
 In the desert of Lybye ;
 Ne no maner creature,
 That ys yformed be nature, 190
 Ne sawgh *I* me to rede or wisse.
 ‘ O Criste,’ thought I, ‘ that art in blysse,
 Fro fantome and illusioun
 Me save !’ and with devocioun
 Myn eyen to the hevене I caste.
 Thoo was I war at the laste,
 That faste be the sonne, as hye
 As kenne myght I with myn ye,
 Me thought I sawgh an egle sore,
 But that hit semede moche more 500
 Then I had any egle seyne.
 But, this as soothe as deth certeyne,
 Hyt was of golde, and shone so bryght,
That never sawgh men such a syght,
But-if the hevене hadde ywonne
Al newe of God another sonne ;
So shon the egles fetheres bryghte,
 And somewhat dounwarde gan hyt lyghte.

EXPLICIT LIBER PRIMUS.

LIBER SECUNDUS.


 OW herkeneth every maner man,
 That Englissh understonde kan,
 And listeneth of my dreame to lere ;
 For now at erste shullen ye here
 So sely an avisyoun,
 That I saye ne Cipioune,

Ne kynge Nabugodonosor,
 Pharoo, Turnus, ne Elcanor,
 Ne mette suche a dreame as this.
 Now faire blisfulle, O Cipris, 10
 So be my favor at this tyme!
 And ye me to endite and ryme
 Helpeth, that on Parnaso dwelle,
 Be Elicon the clere welle.

O Thought, that wrote al that I mette,
 And in the tresorye hyt shette
 Of my brayne! now shal men se
 Yf any vertu in the be,
 To tellen al my dreame aryght;
 Now kythe thyn engyne and myght! 20

This egle of whiche I have yow tolde,
 That shone with fethres as of golde,
 Which that so highe gan to sore,
 I gan beholde more and more,
 To se her beauté and the wonder;
 But never was ther dynt of thonder,
 Ne that thyng that men calle foudre,
 That smote sommetyme a toure to powdre,
 And in his swifte comynge brende,
 That so swithe gan descende, 30
 As this foule when hyt behelde,
 That I a-roume was in the felde;
 And with hys grymme pawes stronge,
 Withyn hys sharpe nayles longe,
 Me, floyng, in a swappe he hente,
 And with hys sours ayene up wente,
 Me caryng in his clawes starke,
 As lyghtly as I were a larke,
 How high, I cannot telle yow,

For I came up, Y nyste how. 40
 For so astonyed and asweved
 Was every vertu in my heved,
 What with his sours and with my drede,
 That al my felynge gan to dede ;
 For-whi hit was to grete affray.
 Thus I longe in hys clawes lay,
 Til at the last he to me spake
 In mannes vois, and seyde, ‘ Awake !
 And be *thou* not agaste, for shame !’
 And callede me *tho* by my name. 50
 And for I sholde the bet abreyde,
 Me mette, ‘ awake’ to me he seyde,
 Ryght in the same vois and stevene,
 That useth oon I koude nevene ;
 And with that vois, soth for to seyne,
 My mynde came to me ageyne,
 For hit was goodely seyde to me,
 So was hyt never wonte to be.
 And herewithalle I gan to stere,
 As he me in his fete to-bere, 60
 Til that he felt that I had hete,
 And felte eke *tho* myn herte bete.
 And thoo gan he me to disporte,
 And with wordes to comforte,
 And sayede twyes, ‘ Seynt Mary !
 Thou arte noyouse for to cary,
 And nothyng ne dith *it*, pardee ;
 For, al-so wis God helpe me,
 As thou noon harme shalt have of this ;
 And this caas that betydde the is, 70
 Is for thy lore and for thy prowē,
 Let see ! darst thou yet loke nowe ?

Be ful assured, boldely,
 I am thy frende.' And therewith I
 Gan for to wondren in my mynde.
 'O God,' thought I, 'that madeste kynde,
 Shal I noon other weyes dye?
 Wher Joves wol me stellefye,
 Or what thinge may this sygnifye?
 I neyther am Ennok, ne Elye, 80
 Ne Romulus, ne Ganymede,
 That was ybore up, as men rede,
 To hevене with daun Jupiter,
 And made the goddys botiller.'
 Loo, this was thoo my fantasye!
 But he that bare me gan espye,
 That I so thought and seyde this:—
 'Thow demest of thy-selfe amys;
 For Joves ys not theraboutē,
 I dar wel putte the out of doute, 90
 To make of the as yet a sterre.
 But er I bere the moche ferre,
 I wol the telle what I am,
 And whider thou shalt, and why I cam
 To do thys, so that thou take
 Goode herte, and not for fere quake.'
 'Gladly,' quod I. 'Now wel,' quod he:
 'First, I, that in my fete have the,
 Of which thou haste a fere and wonder,
 Am dwellynge with the god of thonder, 100
 Whiche that men callen Jupiter,
 That dooth me flee ful ofte fer
 To do al hys comaundement.
 And for this cause he hath me sent
 To the: now herke, be thy trouthe!

Certeyn he hath of the routhe,
 That thou so longe trewely
 Hast served so ententyfly
 Hys blynde neviwe Cupido,
 And faire Venus also, 110
 Withoute guerdoun ever yitte,
 And neverthelesse hast set thy witte,
 (Although in thy hede ful lytel is)
 To make songes, dytees, and bookys
 In ryme, or elles in cadence,
 As thou best canst in reverence
 Of Love, and of hys servantes eke,
 That have hys servyse soght, and seke ;
 And peynest the to preyse hys arte,
 Although thou haddest never parte ; 120
 Wherfore, al-so God me blesse,
 Joves halt hyt grete humblesse,
 And vertu eke, that thou wolt make
 A nyghte ful ofte thyn hede to ake,
 In thy studye so writest,
 And evermo of love enditest,
 In honour of hym and preysynges,
 And in his folkes furtherynges,
 And in hir matere al devisest,
 And nocht hym nor his folke dispisest, 125
 Although thou maiste goo in the daunce
 Of hem that hym lyst not avaunce.
 Wherfore, as I seyde, ywys,
 Jupiter considereth *wel* this ;
 And also, beausir, other thynges ;
 That is, that thou hast no tydynges
 Of Loves folke, yf they be glade,
 Ne of nocht elles that God made ;

And nocht oonly fro ferre contree,
 That ther no tydyngge cometh to thee, 140
 Not of thy verray neyghebors,
 That duelle almoste at thy dors,
 Thou herist neyther that nor this,
 For when thy labour doon al ys,
 And hast ymade rekenynges,
 Instid of reste and newe thynges,
 Thou goost home to thy house anoon,
 And, also dombe as any stoon,
 Thou sittest at another booke,
 Tyl fully dasewyd ys thy looke, 150
 And lyvest thus as an heremyte,
 Although thyn abstynence ys lyte.
 And therefore Joves, thorgh hys grace,
 Wol that I bere the to a place,
 Which that hight the House of Fame,
 To do the somme disport and game,
 In somme recompensacioun
 Of labour and devocioun
 That thou hast had, loo ! causeles,
 To Cupido the rechcheles. 160
 And thus this god, thorgh his merite,
 Wol with somme maner thinge the quyte,
 So that thou wolt be of goode chere.
 For truste wel that thou shalt here,
 When we be come there as I seye,
 Mo wonder thynges, dar I leye,
 Of Loves folke moo tydynges,
 Both sothe-sawes and leysinges ;
 And moo loves newe begonne,
 And longe yserved loves wonne ; 170
 And moo loves casuelly,

That betyde, no man wote why,
 But as a blende man stert an hare ;
 And more jolytee and fare,
 While that they fynde love of stele,
 As thinketh hem, and over al wele ;
 Mo discordes, and moo jealousies,
 Mo murmures, and moo novelries,
 And moo dissymulacions,
 And feyned reparacions ;
 And moo berdys in two oures
 Withoute rasour or sisoures
 Ymade, then greynes be of sondes ;
 And eke moo holdynge in hondes,
 And also mo renoveilaunces
 Of olde forleten aqueyntaunces ;
 Mo love-dayes, and acordes
 Then on instrumentes ben cordes ;
 And eke of loves moo eschaunges,
 Than ever cornes were in graunges ;
 Unnethe maistow trowen this ?
 Quod he. ‘ Noo, helpe me God so wys !’
 Quod I. ‘ Noo ? why ?’ quod he. ‘ For hytte
 Were impossible to my witte,
 Though hadde Fame alle the pies
 In alle a realme, and alle the spies,
 How that yet he shulde here al this,
 Or they espie hyt.’—‘ O yis, yis !’
 Quod he, to me, ‘ that kan I preve
 Be resoun, worthy for to leve,
 So that thou yeve thyn advertence
 To understonde my sentence.

180

190

200

‘ First shalt thou here where she dwelleth,
 And so thyn oune boke hyt tellith,

Hir paleys stant as I shal sey
 Ryght even in-myddes of the wey
 Betwexen hevене, erthe, and see ;
 That whatsoever in al these three
 Is spoken either prevy or aperte,
 The aire therto ys so overte,
 And stant eke in so juste a place,
 That every sounē mot to hyt pace,
 Or what so cometh fro any tonge,
 Be hyt rouned, red, or songe,
 Or spoke in suerté or in drede,
 Certeyn hyt moste thider nede.

210

‘ Now herkene wel ; for-why I wille
 Tellen the a propre skille,
 And worche a demonstracioun
 In myn ymagynacioun.

220

‘ Geffrey, thou wost ryght wel this,
 That every kyndely thyngē that is,
 Hath a kyndely stede ther he
 May best in hyt conserved be ;
 Unto whiche place every thyngē,
 Thorgh his kyndely enclynyngē,
 Moveth for to come to,
 Whan that it is away therfro.
 As thus, loo, thou maist al day se
 That any thingē that hevy be,
 As stoon or lede, or thyngē of wight,
 And bere hyt never so hye on hight,
 Lat goo thyn hande, hit falleth doune.
 Ryght so sey I, be fire, or sounē,
 Or smoke, or other thynges lyghte,
 Alwey they seke upward on highte,
 While eche of hem is at his large ;

230

Lyghte thinges upwarde, and dounwarde charge.
 And for this cause mayste thou see,
 That every ryver to the see 240
 Enclyned ys to goo by kynde.
 And by these skilles, as I fynde,
 Hath fyssh duellynge in floode and see,
 And trees eke in erthe bee.
 Thus every thinge by this reasoun
 Hath his propre mansyoun,
 To which he seketh to repaire,
 As there hit shulde not apaire.
 Loo, this sentence ys knowen kouthe 250
 Of every philosophres mouthe,
 As Aristotile and daun Platoun,
 And other clerkys many oon,
 And to confirme my reasoun,
 Thou wost wel this, that speche is soun,
 Or elles no man myght hyt here ;
 Now herke what Y wol the lere.

‘ Soune ys nocht but eyre ybroken,
 And every speche that ys yspoken,
 Lowde or pryvee, foule or faire,
 In his substaunce ys but aire ; 260
 For as flaumbe ys but lyghted smoke,
 Ryght soo soune ys *but* aire ybroke.
 But this may be in many wyse,
 Of which I wil the twoo devyse,
 As soune that cometh of pipe or harpe.
 For whan a pipe is blowen sharpe,
 The aire ys twyst with violence,
 And rent : loo, this ys my sentence ;
 Eke, whan men harpe strynges smyte,
 Whether hyt be moche or lyte, 270

Loo, with the stroke the ayre to-brekoth ;
Right so hit breketh whan men speketh.

Thus wost thou wel what thinge is speche.

‘ Now hennesforthe Y wol the teche,

How every speche, or noyse, or soun,

Thurgh hys multiplicacioune,

Thogh hyt were piped of a mouse,

Mote nede come to Fames House.

I preve hyt thus :—Take hede now

Be experience, for yf that thou 280

Throwe on water now a stoon,

Wel wost thou hyt wol make anoon

A litel roundelle as a sercle,

Paraventure brode as a coverele ;

And ryght anoon thou shalt see wele,

That sercle wol cause another whele,

And that the thridde, and so forth, brother,

Every sercle causynge other,

Wydder than hymself *erst* was.

And this fro roundel *to* compas, 290

Eche aboute other goynge,

Caused of othres sterynge,

And multiplynge evermoo,

Til that hyt be so fer ygoo

That hyt at bothe brynkes bee.

Although thou mowe hyt not ysee

Above, hyt gooth yet *ay* under,

Although thou thenke hyt a grete wounder.

And who-so seyth of trouthe I varye,

Bid hym proven the contrarye. 300

And ryght thus every worde, ywys,

That lowde or pryvee yspoken ys,

Moveth first an ayre aboute,

And of thys movynge, out of doute,
 Another ayre anoon ys meved,
 As I have of the watir preved,
 That every cercle causeth other.
 Ryght so of ayre, my leve brother ;
 Everych ayre other stereth
 More and more, and speche up bereth, 310
 Or voys, or noyse, or worde, or soun,
 Aye through multiplicacioun,
 Til hyt be atte House of Fame ;—
 Take yt in ernest or in game.

‘ Now have I tolde, yf ye have in mynde,
 How speche or soun, of pure kynde
 Enclyned ys upwarde to meve ;
 This mayst thou fele wel I preve.
 And that sum place *or stede*, ywys,
 That every thyng enclyned to ys, 320
 Hath his kyndelyche stede :
 That sheweth hyt, withoute drede,
 That kyndely the mansioun
 Of every speche, of every soun,
 Be hyt eyther foule or faire,
 Hath hys kynde place in ayre.
 And syn that every thyng that is
 Out of hys kynde place, ywys,
 Moveth thidder for to goo,
 Yif hyt away *may* be therfro, 330
 As I before have preved the,
 Hyt seweth, every soun, pardé,
 Moveth kyndely to pace,
 Al up into his kyndely place.
 And this place of which I telle,
 Ther as Fame lyst to duelle,

Ys sette amyddys of these three,
 Hevene, erthe, and eke the see,
 As most conservatyf the soun.
 Than ys this the conclusyoun, 340
 That every speche of every man,
 As Y the telle first began,
 Moveth up on high to pace
 Kyndely to Fames place.

‘ Telle me this *now* feythfully,
 Have I not preved thus symply,
 Withouten any subtilité
 Of speche, or grete prolyxité
 Of termes of philosophie,
 Of figures of poetrie, 340
 Or coloures of retorike ?

Pardee, hit oughthe the *wel* lyke ;
 For harde langage, and hard matere
 Ys encombrouse for to here
 Attones ; wost thou not wel this ?
 And Y answered and seyde, ‘ Yis.’
 ‘ A ha !’ quod he, ‘ lo, so I can,
 Lewdely to a lewed man
 Speke, and shewe hym swyche skiles,
 That he may shake hem be the biles. 360
 So palpable they shulden be.

But telle me this now pray Y the,
 How thenketh the my conclusyoun ?
 ‘ A goode persuasioun,’
 Quod *I*, ‘ hyt is ; and lyke to *be*,
 Ryght so as thou hast preved me.’
 ‘ Be God,’ quod he, ‘ and as I leve,
 Thou shalt have yet, or hit be eve,
 Of every word of thys sentenceo,

A preve by experience ;
 And with thyn eres heren wel,
 Toppe and taylle, and everidel,
 That every word that spoken ys,
 Cometh into Fames House, ywys,
 As I have seyde ; what wilt thou more ?'
 And with this word upper to sore,
 He gan and seyde, ' Be seynt Jame,
 Now wil we speken al of game.

370

' How fairest thou ?' quod he to me.
 ' Wel,' quod I. ' Now see,' quod he,
 ' By thy trouthe, yonde adoune,
 Wher that thou knowest any toune,
 Or hous, or any other thinge.
 And whan thou hast of ought knowynge,
 Looke that thou warne me,
 And Y anoon shal telle the,
 How fer that thou art now therfro.'

380

And Y adoun to loken thoo,
 And behelde feldes and playnes,
 And now hilles, and now mountaynes,
 Now valeys, and now forestes,
 And now unnethes grete bestes ;
 Now ryveres, now citees,
 Now tounes, and now grete trees,
 Now shippes seylynge in the see.

390

But thus sone in a while hee
 Was flowen fro the grounde so hye,
 That al the worlde, as to myn ye,
 No more semede than a prikke ;
 Or elles was the aire so thikke
 That Y ne myghte not discerne.
 With that he spak to me as yerne,

400

And seyde: “ Seestow any token,
Or ought that in this world of spoken?”

I seyde, ‘ Nay.’ ‘ No wonder nys,’
Quod he, ‘ for half so high as this,
Nas Alexandre Macedo
Ne the kynge, daun Cipio,
That saw in dreame, at poynt devys,
Helle and erth, and paradys; 410
Ne eke the wrechehe Didalus,
Ne his childe, nyse Ykarus,
That fleegh so highe, that the hete
His wynges malte, and he fel wete
In myd the see, and ther he dreynt,
For whom was maked moch compleynt.

‘ Now turne upward,’ quod he, ‘ thy face,
And beholde this large place,
This eyre; but loke thou no be
Adrad of hem that thou shalt se; 420
For in this regioun certeyn,
Dwelleth many a citezeyn,
Of which that speketh daun Plato.
These ben eyrysshe bestes, lo!’
And so saw Y alle that meynnee,
Boothe goone and also flee.
‘ Now,’ quod he thoo, ‘ east up thyn ye;
Se yonder, loo, the galoxie,
Whiche men clepeth the melky weye,
For hit ys white: and somme, parfeye, 430
Kallen hyt Watlynge strete,
That ones was ybrente wyth hete,
Whan the sonnes sonne, the rede,
That highte Phetoun, wolde lede
Algate his fader carte, and gye.

The carte hors gonne wel espye,
 That he koude no governaunce,
 And gan *he* for to lepe and taunce,
 And beren hym now up, now down,
 Til that he sey the Scorpioun, 440
 Whiche that in heven a synge is yit.
 And he for ferde lost hys wyt
 Of that, and lat the reynes goon
 Of his hors ; and they anoon
 Gonne up to mounten, and down descende,
 Til both the ayre and erthe brende ;
 Til Jubiter, loo, atte laste
 Hym slowe, and fro the *carte* caste.
 Loo, ys it not a mochil myschaunce,
 To lat a foole han governaunce 450
 Of thing that he can not demeyne ?'

And with this word, sothe for to seyne,
 He gan upper alwey for to sore,
 And gladded me ay more and more,
 So feythfully to me spake he.

Tho gan I loken under me,
 And behelde the ayerisshe bestes,
 Cloudes, mystes, and tempestes,
 Snowes, hayles, reynes, wyndes,
 And *hir* gendrynge in hir kyndes, 460
 Alle the wey thurgh whiche I came ;
 ' O God,' quod Y, ' that made Adam,
 Moche is thy myght and thy noblesse.'

And thoo thought Y upon Boesse,
 That writ of thought may flee so hye,
 With fetheres of philosophye,
 To passen everyche elemente ;
 And whan he hath so fer ywente,

Than may be seen, behynde hys bak,
 Cloude, and erthe, that Y of spak. 479

Thoo gan Y wexen in a were,
 And seyde, 'Y wote wel Y am here ;
 But wher in body or in gost,
 I not ywys, but God, thou wost !'
 For more clere entendement,
 Nas *me* never yit ysent.

And than thought Y on Marcian,
 And eke of Anteclaudian,
 That sooth was her describeioun
 Of alle hevenes regioun, 480
 As fer as that Y sey the preve ;
 Therefore Y kan hem now beleve.

With that this egle began to crye,
 'Lat be,' quod he, 'thy fantasye,
 Wilt thou lerne of sterres aught ?'
 'Nay, certainly,' quod Y, 'ryght naught.'
 'And why ? For Y am now to olde.'
 'Elles I wolde the have tolde,'
 Quod he, 'the sterres names, lo,
 And al the hevenes sygnes ther to, 490
 And which they ben.' 'No fors,' quod I.
 'Yis, pardee,' quod he, 'wostow why ?

For whan thou redest poetrie,
 How goddes gonne stellifye
 Brides, fische, best, or him, or here,
 As the ravene or eyther bere,
 Or Arionis harpe fyne,
 Castor, Poley, or Delphyne,
 Or Athalantes doughtres sevene,
 How aile these arne set in hevene ; 500
 For though thou have hem ofte on honde,

Yet nostow not wher that they stonde.'
 'No fors,' quod Y, 'hyt is no nede,
 I leve as wele, so God me spede,
 Hem that write of this matere,
 Alle though I knew her places here ;
 And eke they semen here so bryghte,
 Hyt shulde shenden al my syghte,
 To loke on hem.' 'That may wel be,'
 Quod he. And so forthe bare he me 510
 A while, and than he gan to crye,
 That never herd I thing so hye,
 'Now up the hede, for alle ys wele ;
 Seynt Julyane, loo, bon hostele !
 Se here the House of Fame, lo !
 Maistow not heren that I do ?'
 'What ?' quod I. 'The grete soun,'
 Quod he, 'that rumbleth up and doun
 In Fames House, ful of tydynges,
 Bothe of feire speche and chidynges, 520
 And of fals and that soth compounded ;
 Herke wel ; hyt is not rouned.
 'Herestow not the grete swogh ?'
 'Yis, perde,' quod Y, 'wel ynogh.'
 'And what soun is it lyke ?' quod hee.
 'Peter ! betynge of the see,'
 Quod Y, 'ayen the roches holowe,
 Whan tempest doth the shippes swalowe,
 And lat a man stonde, out of doute,
 A myle thens, and here hyt route. 530
 Or elles lyke the last humblynge
 After a clappe of oo thundringe,
 When Joves hath the aire ybete
 But yt doth me for fere swete.'

‘Nay, drede the not therof,’ quod he,
 Hyt is nothings wille biten the,
 Thou shalt non harme have truely.’

And with this word both he and Y
 As nygh the place arryved were,
 As men may casten with a spere. 540
 I nyste how, but in a strete
 He sette me fair *upon* my fete,
 And seyde, ‘Walke forth a pace,
 And take thyn aventure or case,
 That thou shalt fynde in Fames place.’

‘Now,’ quod I, ‘while we han space
 To speke, or that I goo fro the,
 For the love of God, telle me,
 In sooth, that wil I of the lere,
 Yf thys noyse that I here 550
 Be, as I have herd the tellen,
 Of folke that down in erthe dwellen,
 And cometh here in the same wyse,
 As I the herde, or this, devyse?
 And that there lives body nys
 In al that hous that yonder ys,
 That maketh al this loude fare?’

‘Noo,’ quod he, ‘by seynte Clare!
 And also wis God rede me,
 But o thinge wil Y warne the, 560
 Of the whiche thou wolt have wonder.
 Loo, to the House of Fame yonder,
 Thou wost how cometh every speche,
 Hyt nedeth noght este the to teche.
 But understonde now ryght wel this,
 Whan any speche ycomen ys
 Up to the paleys, anon ryght

Hyt wexeth lyke the same wight,
 Which that the worde in erthe spak,
 Be hyt clothed rede or blak ; 570
 And so were hys lyknesse,
 And spake the word, that thou wilt gesse
 That it the same body be,
 Man or woman, he or she.
 And ys not this a wonder thyng ?
 ‘ Yis,’ quod I tho, ‘ by heven kynge !’
 And with this worde, ‘ Farewel,’ quod he,
 ‘ And here I wol abyden the,
 And God of hevene sende the grace,
 Some goode to lerne in this place.’ 580
 And I of him toke leve anoon,
 And gan forthe to the paleys goon.

EXPLICIT LIBER SECUNDUS.

LIBER TERTIVS.

O God of science and of lyght,
 Apollo, thurgh thy grete myght,
 This lytel laste boke thou gye !
 Nat that I wilne for maistrye
 Here art poetical be shewed.
 But, for the ryme ys lyght and lewed,
 Yit make hyt sumwhat agreable,
 Though somme vers fayle in a sillable ;
 And that I do no diligence,
 To shewe crafte, but o sentence. 10
 And yif devyne vertu thow,
 Wilt helpe me to shewe now,

That in myn hede ymarked ys,
 (Loo, that is for to menen this,
 The Hous of Fame for to descryve)
 Thou shalt *tho se me* go as blyve
 Unto the next laurer Y see,
 And kysse yt, for hyt is thy tree.
 Now entreth in my brest anoon.

Whan I was fro thys egle goon, 20
 I gan beholde upon this place.
 And certein, or I ferther pace,
 I wol yow al thys shape devyse
 Of hous and citee ; and al the wyse
 How I gan to thys place aproche,
 That stood upon so hygh a roche,
 Hier stant there noon in Spayne.
 But up I clombe with alle payne,
 And though to clymbe grevede me,
 Yit I ententyf was to see, 30
 And for to powren wondre lowe,
 Yf I koude eny weyes knowe
 What maner stoon this roche was,
 For hyt was lyke a thyng of glas,
 But that hyt shoon ful more clere ;
 But of what congeled matere
 Hyt was, nyste I redely.
 But at the laste espied I,
 And founde that hit was everydele,
 A roche of yse, and not of stele. 40
 Thought I, ‘ By seynt Thomas of Kent,
 This were a feble fundament,
 To bilden on a place hye ;
 He ought him lytel glorifye
 That heron bilte, God so me save !’

Tho sawgh I the *oon* halfe ygrave
 With famouse folkes names fele,
 That had yben in mochel wele,
 And her fames wide yblowe.
 But wel unnethes koude I knowe
 Any lettres for to rede
 Hir names be ; for, oute of drede,
 They were almost of thowed so,
 That of the lettres *oon* or two
 Were molte away of every name,
 So unfamouse was wox hir fame ;
 But men seyn, ‘ what may ever laste ? ’

50

Thoo gan I in myn herte caste,
 That they were molte away with hete,
 And not away with stormes bete.
 For on that other syde I say
 Of this hille, that northewarde lay,
 How hit was writen ful of names,
 Of folkes that hadden grete fames
 Of olde tymes, and yet they were
 As fressh as men hadde writen hem here
 The selfe day, ryght or thatoure
 That I upon hem gan to poure.
 But wel I wiste what yt made ;
 Hyt was conserved with the shade,
 Alle this wrytynge that I sigh,
 Of a castel stooode on high ;
 And stooode eke on so colde a place,
 That hete hyt myghte not deface.

60

70

Thoo gan I up the hille to goone,
 And fonde upon the cop a woone,
 That alle the men that ben on lyve
 Ne han the kunnyng to describe

The beauté of that ylke place,
 Ne coude casten no compace 80
 Swich another for to make,
 That myght of beauté be hys make ;
 Ne wonderlyche so ywrought,
 That hyt astonyeth yit my thought,
 And maketh alle my wytte to swynke
 On *thilke* castel to bethynke.
 So that the grete beauté
The caste, the curiosité
 Ne kan I not to yow devyse,
 My wit ne may me not suffise. 90
 But natheles alle the substance
 I have yit in my remembrance ;
 For-why me thoughte, by seynte Gyle,
 Alle was of stone of beryle,
 Bothe castel and the toure,
 And eke the halle, and every boure,
 Wythouten pces or joynynges.
 But many subtile compassinges,
 As rabewyures and pynacles,
 Ymageries and tabernacles, 100
 I say ; and ful eke of wyndowes,
 As flakes falle in grete snowes.
 And eke in ech of the pynacles
 Weren sondry habitacles,
 In whiche *stode*, alle withoute,
 Ful the castel alle aboute,
 Of al maner of mynstralles,
 And gestiours, that tellen tales
 Bothe of wepinge and of game,
 Of alle that longeth unto Fame. 110
 There herd I pleyen upon an harpe

That sowneth bothe wel and sharpe,
 Orpheus ful craftely,
 And on the syde faste by
 Sat the harper Orioun
 And Eacides Chiroun.
 And other harpers many oon,
 And the grete Glascurioun.
 And smale harpers with her glees,
 Saten under hym in sees ;
 And gunne on hym upwarde to gape,
 And countrefet hym as an ape,
 Or as crafte countrefeteth kynde.

12c

Tho saugh I stonden hym behynde,
 A-fer fro hem, alle be hemselfe,
 Many thousand tymes twelve,
 That maden lowde menstralcies
 In cornemuse and shalmyes,
 And many other maner pipe,
 That craftely begunne to pipe,
 Bothe in doucet and in riede,
 That ben at festes with the bride.
 And many flowte and liltyng horne,
 And pipes made of grene corne,
 As han thise lytel herde gromes,
 That kepen bestis in the bromes.

130

Ther saugh I than Atileris,
 And of Athenes daun Pseustis,
 And Marcia that lost her skynne,
 Bothe in face, body, and chynne,
 For that she wolde envien, loo,
 To pipen bet than Apollo.

140

There saugh I fames, olde and yonge,
 Pipers of alle Duche tonge,

To lerne love-daunces, sprynges,
Reues, and these straunge thynges.

Tho saugh I in another place,
Stonden in a large space
Of hem that maken blody soun,
In trumpe, beme, and claryoun ; 150
For in feight and blodeshedynges
Ys used gladly clarionynges.

Ther herd I trumpen, Messenus,
Of whom that speketh Vergilius.

There herd I trumpe Joab also,
Theodomas, and other mo,
And alle that usede clarioun,
In Cataloigne and Aragoun,
That in her tyme famous were
To lerne, saugh I trumpe there. 160

Ther saugh I sit in other sees,
Pleyinge upon sondry gleees,
Whiche that I kannot nevene,
Moo than sterres ben in hevене,
Of whiche I nyl not now ryme,
For ese of yow, and losse of tyme :
For tyme ylost, this knowen ye,
Be no way may recovered be.

There saugh I pleyen jugelours,
Magiciens, and tregetours, 170
And phitonisses, charmeresses,
Olde wiches, sorceresses,
That use exorsisaciouns,
And eke thes fumygaciouns ;
And clerkes eke, which konne wel
Alle this magikes naturel,
That craftely doon her ententes,

To maken, in certeyn ascendentes,
 Ymages, lo, through which magike,
 To make a man ben hool or syke. 190

Ther saugh I the quene Medea,
 And Circes eke, and Calipsa.

Ther saugh I Hermes Ballenus,
 Limeote, and eke Symon Magus.
*(Ther sawgh I tho, and knew by name,
 That by such art doon men han fame.)*

Ther saugh I Colle Tregetour
 Upon a table of sygamour
 Pleyen an uncouth theynge to telle ;
 Y saugh him carien a wynd-melle 190
 Under a walshe-note shale.

What shuld I make lenger tale,
 Of alle the pepil Y ther say,
 Fro hennes into domesday ?

Whan I had al this folkys beholde,
 And fonde me louse and noght yholde,
 And oft I musede longe while
 Upon these walles of berile,
 That shoone ful lyghter than a glas,
 And made wel more than hit was, 200
 To semen every thyng, ywis,
 As kynde thyng of Fames is ;
 I gan to romen til I fonde
 The castel yate on my ryght honde,
 Which that so wel y-corven was,
 That never suche another nas ;
 And yit it was be aventure
 Ywrought, as often as be cure.

Hyt nedeth noght yow more to tellen,
 To make yow to longe duellen, 210

Of these yates florissinges,
 Ne of compasses, ne of kervynges,
 Ne how they hat in masoneries,
 As corbetz, (*ful of imageries.*)
 But, Lord! so faire yt was to shewe,
 For hit was alle with gold behewe.
 But in I went, and that anoon;
 Ther mette I crynge many oon,
 ‘A larges, larges! hald up wel!
 God save the lady of thys pel, 220
 Our oune gentil lady Fame,
 And hem that wilnen to have name
 Of us!’ Thus herd Y erien alle,
 And faste comen out of halle,
 And shoon nobles and sterlynges.
 And somme erouned were as kynges,
 With corounes wroght ful of losynges;
 And many ryban, and many frenges
 Were on her clothes trewely.

Thoo atte last aspyed Y 230
 That pursevauntes and herauldes,
 That erien ryche folkes laudes,
 Hyt weren; alle and every man
 Of hem, as Y yow tellen ean,
 Had on him throwen a vesture,
 Whiche that men elepen a cote armure,
 Enbrowded wonderlyche ryche,
 As though ther nere nought ylyche.
 But noght wyl I, so mote Y thryve,
 Ben aboute to dyscryve 240
 Alle these armes that ther weren,
 That they thus on her cotes beren
 For hyt to me were impossible;

Men myghte make of hem a bible,
 Twenty foote thykke Y trowe.
 For certeyn who-so koude i-knowe
 Myghte ther alle the armes seen,
 Of famouse folke that han ybeen
 In Auffrike, Europe, and Asye,
 Syth first began the chevalrie.

250

Loo! how shulde I now tel al thys?
 Ne of the halle eke what nede is,
 To tellen yow that every walle
 Of hit, and flore, and roof, and alle,
 Was plated half a foote thikke
 Of gold, and that nas no thyng wikke,
 But, for to prove in alle wyse,
 As fyne as ducat in Venyse,
 Of whiche to litel al in my pouche is?
 And they wer set as thik of nouchis
 Fyne, of the fynest stones faire,
 That men reden in the Lapidaire,
 As greses grownen in a mede.
 But hit were alle to longe to rede
 The names; and therfore I pacc.
 But in this lusty and ryche place,
 That Fames halle called was,
 Ful moche prees of folke ther nas,
 Ne crowdyng, for to mochil prees.
 But al on hye, above a dees,
 Sit in a see imperialle,
 That made was of a rubee alle,
 Which that a carbuncle ys ycalled,
 Y saugh perpetually ystalled,
 A femynyne creature;
 That never formed by nature

260

270

Nas suche another thing yseye.
 For altherfirst, soth for to seyo,
 Me thoughte that she was so lyte,
 That the lengthe of a cubite, 280
 Was lengere than she *semede* be ;
 This was gret marvaylle to me,
 Hir *self* tho so wonderly streighte,
 That with hir fete the erthe she reighte,
 And with her hed she touched hevене,
 Ther as shynen sterres sevene.
 And therto eke, as *to* my witte,
 I saugh a gretter wonder yitte,
 Upon her eyen to beholde,
 But certeyn Y hem never tolde. 290
 For as feele yen hadde she,
 As fetheres upon foules be,
 Or weren on the bestes foure,
 That Goddes trone gunne honoure,
 As Johan writ in thapocalips.
 Hir heere that oundye was and crips,
 As burned gold hyt shoon to see.
 And sothe to tellen also shee
 Had also fele up stondyng, eres
 And tonges, as on bestes heres ; 300
 And on hir fete wexen saugh Y
 Partriches winges redely.

But, Lorde ! the perry and the richesse
 I saugh sitting on this godesse !
 And, Lord ! the hevenysshe melodye,
 Of songes ful of armonye,
 I herd aboute her trone ysonge,
 That al the paleys walles ronge !
 (So songe the myghty Muse, sho

That eleped ys Caliope, 310
 And hir eighte sustren eke
 That in her faee semen meke)
 And evermo eternally,
 They synge of Fame as thoo herd Y,
 ‘Heryed be thou and thy name,
 Goddesse of renoun or Fame.’

Tho was I war, loo, atte laste,
 As I myn eyen gan up caste,
 That thys ilke noble quene
 On her shuldres gan sustene 320
 Bothe armes, and the name
 Of thoo that hadde large fame ;
 Alexander, and Hercules,
 That with a shert hys lyfe les !
 And thus fonde Y syttyng this goddesse,
 In noble honour and rychesse ;
 Of which I stynte a while nowe,
 Other thinge to tellen yowe.

Tho saugh I stonde on eyther syde,
 Streighte down to the dores wide, 330
 Fro the dees many a pelere
 Of metal, that shoon not ful clere,
 But though they ner of no rychesse,
 Yet they were made for gret noblesse,
 And in hem gret sentence.
 And folkes of digne reverence,
 Of whiche I wil yow telle fonde,
 Upon the piler saugh I stonde.

Alderfirste loo ther I sighe,
 Upon a piler stonde on highe, 340
 That was of lede and yren fyne,
 Hym of secte Saturnyne,

The Ebrayke Josephus the olde,
 That of Jewes gestes tolde ;
 And he bare on hys shuldres hye,
 The fame up of the Jurye.
 And by hym stonden other sevene,
 Wise and worthy for to nevene,
 To helpen him bere up the charge,
 Hyt was so hevy and so large. 350
 And for they writen of batayles,
 As wel as other olde mervayles,
 Therfor was, loo, thys pilere,
 Of whiche that I yow telle here,
 Of lede and yren bothe ywys.
 For yren Martes metal ys,
 Which that God is of batayle. .
 And the lede withouten faille,
 Ys, loo, the metal of Saturne,
 That hath a ful large whele to turne. 360
 Thoo stoden forthe on every rowe
 Of hem, which that I koude knowe,
 Though I hem nocht be ordre telle,
 To make yow to longe to duelle.
 These, of whiche I gynne rede,
 There saugh I stonde, out of drede,
 Upon an yren piler stronge,
 That peynted was, al endelonge,
 With tigres blode in every place,
 The Tholauson that highte Stace, 370
 That bare of Thebes up the fame
 Upon his shuldres, and the name
 Also of cruelle Achilles.
 And by him stood, withouten lees,
 Ful wonder hye on a pilere

Of yren, he, the gret Omere ;
 And with him Dares and Tytus
 Before, and eke he Lollius,
 And Guydo eke de Columpnis,
 And Englyssh Gaunfride eke, ywis. 386
 And eche of these, as have I joye,
 Was besye for to bere up Troye.
 So hevvy therof was the fame,
 That for to bere hyt was no game.
 But yet I gan ful wel espie,
 Betwex hem was a litil envye.
 Oon seyde that Omere *made* lyes,
 Feynynge in hys poetries,
 And was to Grekes favorable ;
 Therfor held he hyt but fable. 390

Tho saugh I stonde on a pilere,
 That was of tynned yren clere,
 That Latyn poete Virgile,
 That bore hath up longe while
 The fame of pius Eneas.

And next hym on a piler was
 Of coper, Venus clerke, Ovide,
 That hath ysowen wonder wide
 The grete god of loves name.
 And ther he bare up wel hys fame, 400
 Upon this piler also hye,
 As I myght hyt see *with* myn ye :
 For-why this halle of whiche I rede,
 Was woxen on high, the length, and brede,
 Wel more be a thousande dele,
 Than hyt was erst, that saugh I wel.

Thoo saugh I on a piler by,
 Of yren wrought ful sturnily,

The grete poete, daun Lucan,
 And on hys shuldres bare up than, 410
 As high as that Y myghte see,
 The fame of Julius, and Pompé.
 And by him stoden alle these clerkes,
 That writen of Romes myghty werkes,
 That yif Y wolde her names telle,
 Alle to longe most I dwelle.

And next him on a piler stode
 Of soulfre, lyke as he were woode,
 Daun Claudian, the sothe to telle,
 That bare up *than* the fame of helle, 420
 Of Pluto, and of Proserpyne,
 That quene ys of the derke pyne.

What shulde I more telle of this?
 The halle was al ful, ywis,
 Of hem that writen al of the olde gestes,
 As ben on trees rokes nestes ;
 But hit a ful confuse matere
 Were *alle* the gestes for to here,
 That they of write, and how they hight.
 But while that Y beheld thys syght, 430
 I herd a noyse aprochen blyve,
 That ferd as been doon in an hive,
 Ayen her tyme of oute fleyinge ;
 Ryght suche a maner murmurynge,
 For al the world hyt semede me.

Tho gan I loke aboute and see,
 That ther come entryng into the halle,
 A ryght grete companye withalle,
 And that of sondry regiouns,
 Of alles-kynnes eondicions, 440
 That duelle in erthe under the mone,

Pore and ryche. And also sone
 As they were come into the halle,
 They gonne down on knees falle,
 Before this ilke noble quene,
 And seyde, 'Graunte us, lady shene,
 Eche of us of thy grace a bone !'
 And somme of hem she grauntede sone,
 And somme she wernede wel and faire ;
 And somme she grauntede the contraire 450
 Of her axyng outterly.
 But this I sey yow trewely,
 What her cause was, Y nyste.
 For of this folke ful wel Y wiste,
 They hadde good fame eche deserved,
 (Although they were diversely served.)
 Ryght as her suster, dame Fortune,
 Ys wonte to serven in comune.

Now herke how she gan to paye
 That gonne her of her grace praye, 460
 And ryght lo, al thys companye
 Seyden sooth, and noght a lye.

'Madame,' quod they, 'we be
 Folke that here besechen the,
 That thou graunte us now good fame,
 And let our werkes han that name.

In ful recompensacioun
 Of good werkes, yive us good renoun.'

'I werne yow hit,' quod she, 'anoon,
 Ye gete of me good fame noon, 470
 Be God ! and therfore goo your wey.'

Allas,' quod they, 'and welaway !
 Telle us what may your cause be.'

'For me *ne* lyst hyt noght,' quod she,

‘ No wyght shal speke of yow, ywis,
 Good ne harme, ne that ne this.’
 And with that worde she gan to calle
 Her messangere that was in halle,
 And *bad* that he shulde faste goon,
 Upon the peyne to be blynde *anoon*, 480
 For Eolus the god of wynde,
 ‘ *In Trace there ye shul him finde*,
 And bid him bring his clarioun,
 That is ful dyvers of his soun,
 And hyt *is* cleped Clere Laude,
 With which he wonte is to hiraude
 Hem that me list ypreised be :
 And also bid him how that he
 Brynge his other clarioun,
 That highte Sclaundre in every toun, 490
 With which he wonte is to diffame
 Hem that me liste, and do him shame.

This messenger gan faste goon,
 And founde where in a cave of stoon,
 In a contree *that* highte Trace,
 This Eolus, with harde grace,
 Helde the wyndes in distresse,
 And gan hem under him to presse,
 That they gonne as beres rore,
 He bonde and pressed hem so sore. 500

This messenger gan faste erie,
 ‘ Ryse up,’ quod he, ‘ and faste hye,
 Til *that* thou at my lady be ;
 And take thy clarioun eke with the,
 And spede the forth.’ And he anoon,
 Toke to a man that highte Tritoun,
 Hys clarions to bere thoo,

And lete a certeyn wynde to goo,
 And blewe so hydously and hye,
 That hyt ne lefte not a skye 510
 In alle the welkene longe and brode.

This Eolus no where abode,
 Til he was come to Fames fete,
 And eke the man that Triton hete ;
 And ther he stode as stille as stoon.
 And herwithal ther come anon
 Another huge companye
 Of goode folke and gunne crie,
 ‘ Lady graunte us good fame
 And latoure werkes han that name, 520
 Now in honour of gentillesse,
 And also God your soule blesse !
 For we han wel deserved hyt,
 Therefore is ryght that we ben wel quyt.’

‘ As thryve I,’ quod she, ‘ ye shal faylle,
 Good werkes shal yow nocht availle
 To have of me good fame as now.
 But wete ye what? Y graunte yow,
 That ye shal have a shrewde fame,
 And wikkyd loos and worse name, 530
 Though ye good loos have *wel* deserved.
 Now goo your wey for ye be served ;
 Have doon ! Eolus, let see !
 ‘ Take forth thy trumpe anon,’ quod she ;
 ‘ That is ycleped Sklauder lyght,
 And blow her loos, that every wight
 Speke of hem harme and shrewdenesse,
 In stede of good and worthynesse.
 For thou shalt trumpe alle the contraire,
 Of that they han don wel or fayre.’ 540

Allas, thought I, what adventures
 Han these sory creatures,
 For they amonges al the pres,
 Shul thus be shamed gilteles!
 But what! hyt moste nedes be.
 What dide this Eolus, but he
 Toke out hys blake trumpe of bras,
 That fouler than the Devel was,
 And gan this trumpe for to blowe,
 As al the worlde shuld overthrowe. 550
 That throughtout every regioun,
 Wente this foule trumpes soun,
 As swifte as pelet out of gonne,
 Whan fire is in the poudre ronne.
 And suche a smoke gan out-wende,
 Out of his foule trumpes ende,
 Blak, bloo, grenyssh, swart, *and* rede,
 As dothe where that men melte lede,
 Loo, alle on high fro the tuelle.
 And therto oo thing saugh I welle, 560
 That the ferther that hit ran,
 The gretter wexen hit began,
 As dooth the ryver from a welle,
 And hyt stank as the pitte of helle.
 Allas, thus was her shame yronge,
 And giltesse on every tonge.

Tho come the thridde eompanye,
 And gunne up to the dees to hye,
 And down on knes they fille anoon,
 And seyde, ' We ben everychoon 570
 Folke that *han* ful truely
 Deservede fame ryghtfully,
 And praye yow hit mot be knowe,

Ryght as hit is, and forth y-blowe.'

'I graunte,' quod she, 'for me leste
That now your goode werkes be wiste ;
And yet ye shul han better loos,
In dispite of alle your foos,
Than worthy is, and that anoon :
Late now,' quod she, 'thy trumpe goon, 580
Thou Eolus, that is so blake ;
And out thyn other trumpe take
That highte Laude, and blowe yt soo
That thugh the worlde her fame goo,
Esely and not to faste,
That hyt be knowen atte laste.'

'Ful gladly, lady myn,' he seyde ;
And oute hys trumpe of golde he brayde
Anoon, and set hyt to his mouthe,
And blew it est, and west, and southe, 590
And northe, as lowde as any thunder,
That every wight hath of hit wonder,
So brode hyt ran or than hit stynte.
And, certes, al the breth that wente
Out of his trumpes mouthe smelde,
As men a potte ful of bawme helde
Amonge a basket ful of roses ;
This favour did he til her loses.

And ryght with this Y gan aspye,
Ther come the ferthe companye, 600
(But certeyn they were wonder fewe)
And gunne stonden in a rewe,
And seyden, 'Certes, lady bryghte,
We han doon wel with al our myghte,
But we ne kepen have no fame.
Hide our werkes and our name,

For Goddys love! for certes we
 Han certeyn doon hyt for bounté,
 And for no maner other thinge.'

'I graunte yow alle your askynge,' 610
 Quod she; 'let your werkes be dede.'

With that aboute Y elywe myn hede,
 And saugh anoon the fifte route
 That to this lady gunne loute,
 And down on knes anoon to falle;
 And to hir thoo besoughten alle,
 To hiden her goode werkes eke,
 And seyden, they yeven noight a leke
 For no fame, ne suche renoun;
 For they for contemplacioun, 620
 And Goddes love, hadde ywrought,
 Ne of fame wolde they nought.

'What?' quod she, 'and be ye woode?
 And wene ye for to doo goode,
 And for to have of that no fame?
 Have ye dispite to have my name?
 Nay, ye shul lyen everyehoon!
 Blowe thy trumpes and that anoon,'
 Quod she, 'thou, Eolus yhote,
 And rynge this folkes werkes be note, 630
 That alle the worlde may of hyt here.'
 And he gan blowe hir loos so elere,
 In his golden clarioun,
 That thurgh the worlde wente the soun,
 Also kenely, and eke so softe,
 But atte last hyt was on lofte.

Thoo come the sexte companye,
 And gunne fast on Fame erie.
 Ryght verraly in this manere

They seyden :—‘ Mercy, lady dere ! 640
 To telle certeyn as hyt is,
 We han doon neither that ne this,
 But ydel al oure lyfe ybe.
 But, natheles, yet preye we,
 That we mowe han as good fame,
 And gret renoun and knowen name,
 As they that han doon noble gestes,
 And acheved alle her lestes,
 As wel of love as other thyng ;
 Alle was us never broche ne ryng, 650
 Ne elles nought from wymmen sent ;
 Ne ones in her *herte* yment,
 To make us oonly frendly chere,
 But myghten temen us upon bere,
 Yet lat us to peple seme
 Suche as the worlde may of us deme,
 That wommen loven us for wode.
 Hyt shal doon us a moche goode,
 And to oure herte as moche avaylle
 The countrepese, ese, and travaylle, 660
 As we hadde wonne hyt with labour ;
 For that is dere boght honour,
 At regard of oure gret ese.
 And yet thou most us more plese ;
 Let us be holden, eke therto,
 Worthy, wise, and goode also,
 And riche, and happy unto love.
 For Goddes love that sit above,
 Thogh we may not the body have
 Of wymmen, yet, so God yow save, 670
 Leet men gliwe on us the name ;
 Sufficeth that we han the fame.’

' I graunte,' quod she, ' be my trouthe !
 Now Eolus, withouten slouthe,
 Take out thy trumpe of golde,' quod she,
 ' And blow as they han axed me,
 That every man wene hem at ese,
 Though they goon in ful badde lese.'
 This Eolus gan hit so blowe,
 That through the worlde hyt was yknowe. 630

Thoo come the seventh route anoon,
 And fel on knees everychoon,
 And seyde, ' Lady, graunte us sone
 The same thing, the same bone,
 That this nexte folke han doon.'

' Fy on yow,' quod she, ' everychoon !
 Ye maisty swyne, ye ydel wrechches,
 Ful of roten slowe techches !
 What? false theves ! or ye wolde,
 Be famous good, and nothing nolde 690
 Deserve why, ne never ye roughte
 Men rather yow hangen oughte !
 For ye be lyke the swynte catte,
 That wolde have fissh ; but wastow whatte ?
 He wolde nothings wete his clowes.
 Yvel thriste come to your jowes,
 And eke to myn yif I hit graunte,
 Or do yow favour yow to avaunte !
 Thou Eolus, thou kynge of Trace,
 Goo, blowe this folke a sory grace,' 700
 Quod she, ' anoon ; and wostow how,
 As I shal telle *yow* ryght now.
 Sey, These ben that wolden honour
 Have, and do nos-kynnes labour,
 Ne doo no good, and yet han lawde ;

And that men wende that bele Isawde,
 Ne coude hem noight of love werne ;
 And yet she that grynt *atte* querne,
 Ys alle to good to ese her herte.'

This Eolus anoon up sterte,
 And with his blake clarioun
 He gan to blasen out a soun,
 As lowde as beloweth wynde in helle.
 And eke therwith, sothe to telle,
 This sounne was so ful of japes,
 As ever mowes were in apes.
 And that went al the worlde aboute,
 That every wight gan on hem shoute,
 And for to lawgh as they were wode ;
 Suche game fonde they in her hode.

710

720

Tho come another companye,
 That had ydoon the trayterye,
 The harme *and* greter wikkednesse,
 That any herte kouthe gesse ;
 And prayed her to han good fame,
 And that she nolde doon hem no shame,
 But yeve hem loos and good renoun,
 And do hyt blowe in a clarioun,
 ' Nay, wis !' quod she, ' hyt were a vice ;
 Al be ther in me no justice,
 Me *ne* lyst not to doo hyt nowe,
 Ne this nyl I graunte yowe.'

730

Tho come ther lepynge in a route,
 And gunne choppen al aboute
 Every man upon the crowne,
 That alle the halle gan to sowne,
 And seyden, ' Lady, leefe and dere,
 We ben suche folkes as ye mowe here.

To telle al the tale aryght,
 We ben shrewes every wyght, 740
 And han delyte in wikkednes,
 As goode folke han in godenes;
 And joye to be knowen shrewes,
 And ful of vices and wikked thewes;
 Wherefore we prayen yow a rowe,
 That oure fame suche be y-knowe,
 In alle thing ryght as hit is.
 Y graunte hyt yow,' quod she, 'ywis.
 But what art thou that seyst this tale,
 That werest on thy hose a pale, 750
 And on thy tipet suche a belle?
 'Madame,' quod he, 'sothe to telle,
 I am that ylke shrewe, ywis,
 That brende the temple of Ysidis
 In Athenes, loo. that citee.'
 'And wherfor didest thou so?' quod she.
 'By my thrift,' quod he, 'madame,
 I wolde fayn han hadde a fame,
 As other folke hadde in the toune,
 Alle-though they were of grete renoune 760
 For her vertue and her thewes,
 Thought Y, as gret fame han shrewes,
 (Though hit be noight) for shrewedenesse
 As goode folke han for godenesse;
 And sith I may not have that oon,
 That other nyl Y noight forgoon.
 And for to gette of fames hire,
 The temple set Y alle a-fire.
 Now doon, our loos be blowen swithe,
 As wisly be thou ever blythe.' 770
 'Gladly,' quod she. 'Thow Eolus,

Herestow not what this folke prayen us?
 'Madame, yis, ful wel,' quod he,
 'And I wil trumpen *hit*, parde!
 And toke his blake trumpe faste,
 And gan to puffen and to blaste,
 Til hyt was at the worldes ende.

With that Y gan aboute wende,
 For oon that stode ryght at my bake,
 Me thoughte goodely to me spake, 780
 And seyde, 'Frende, what is thy name?
 Artow come hider to han fame?'
 'Nay, forsothe, frende!' quod I;
 'I cam noght hyder, graunt mercy
 For no suche cause, by my hede!
 Sufficeth me, as I were dede,
 That no wight have my name in honde.
 I wote my-self best how Y stonde,
 For what I drye or what I thynke,
 I wil my selfe alle hyt drynke, 790
 Certeyn for the more parte,
 As ferforthe as I kan myn arte.'
 'But what doost thou here?' quod he.
 Quod Y, 'That wyl Y tellen the,
 The cause why Y stonde here.
 Somme newe tydyngis for to lere,
 Somme newe thinge, Y not what,
 Tydynges other this or that,
 Of love, or suche thinges glade.
 For, certeynly, he that me made 800
 To come hyder seyde me
 Y shulde bothe here and se,
 In this place, wonder thynges;
 But these be no suche tydynges

As I mene of.—‘Noo?’ quod he.
 And I answerede, ‘Noo pardé!
 For wel Y wote ever yit,
 Sith that first Y hadde wit,
 That somme folke han desired fame
 Diversly, and loos and name; 810
 But certeynly I nyste howe,
 Ne where that Fame duelled, er now; ;
 And eke of her descripcioun,
 Ne also her condicioun,
 Ne the ordre of her dome,
 Unto the tyme Y thidder come.’
 ‘Why than, loo, be these tydynges,
 That thou now hider brynges,
 That thou hast herde?’ quod he to me;
 ‘But now, no fors; for wel Y se 820
 What thou desirest for to lere.
 Come forth, and stonde no lenger here,
 And Y wil the, withouten drede,
 In suche another place lede,
 Ther thou shalt here many oon.’
 Tho gan I forthe with hym goon,
 Oute of the castel, sothe to seye.
 Tho saugh Y stond in a valeye,
 Under the castel faste by,
 An house, that domus Dedaly, 830
 That Laboryntus ycleped ys,
 Nas made so wonderlych ywis,
 Ne half so queyntelych ywrought.
 And evermo, so swyft as thought,
 This queynte hous aboute wente,
 That nevermo stille hyt stente.
 And theroute come so grete a noyse,

That had hyt stonde upon Oyse,
 Men myght hyt han herd esely
 To Rome, Y trowe sikerly. 840

And the noyse which I have herde,
 For alle the world right so hyt ferde,
 As dooth the rowtyng of the stoon,
 That from thengyne ys leten goon.

And al thys hous of whiche Y rede,
 Was made of twigges, salwe, rede,
 And green eke, and somme weren white,
 Swiche as men to these cages thwite,
 Or maken of these panyers,
 Or elles hattes or dossers ; 850

That for the swough and for the twygges,
 This house was also ful of gygges,
 And also ful eke of chirkynges,
And of many other werkynge ;—
 And eke this hous hath of entrees
 As feele as of leves ben on trees,
 In somer whan they grene ben,
 And on the rove men may yet seen
 A thousand holes, and wel moo,
 To leten wel the soune oute goo. 860

And *eke* be day in every tyde
 Been *alle* the dores opened wide,
 And *they* be nyght echoon unshette,
 Ne porter ther is noon to lette
 Ne maner tydynges in to pace ;
 Ne never rest is in that place,
 That hit nys filde ful of tydynges,
 Other loude or of whisprynges ;
 And over alle the houses angles,
 Ys ful of rounynges and of jangles, 870

Of werres, of pes, of mariages,
 Of restes, of labour, and of viages,
 Of abood, of deeth, of lyfe,
 Of love, of hate, acorde, of stryfe,
 Of loos, of lore, and of wynnynghes,
 Of hele, of sekenesse, of bildynges,
 Of faire wyndes, of tempestes,
 Of qwalme of folke, and eke of bestes ;
 Of dyvers transmutaeions,
 Of estates and eke of regions ;
 Of trust, of drede, of jelousye,
 Of witte, of wynnynge, of folye ;
 Of plenté, and of grete famyne,
 Of chepe, of derthe, and of ruyne ;
 Of good or mysgovernment,
 Of fire, and of dyvers accident.

886

And loo, thys hous of which I write,
 Syker be ye, hit nas not lyte ;
 For hyt was sixty myle of lengthe,
 Alle was the tymber of no strengthe ;
 Yet hyt is founded to endure,
 While that hit lyst to Aventure,
 That is the moder of tydynges,
 As the see of welles and of sprynges ;
 And hyt was shapen lyke a eage.

890

‘ Certys,’ quod Y, ‘ in al myn age,
 Ne saugh Y suehe a hous as this.’

And as Y wondrede me, ywys,
 Upon this hous, tho war was Y,
 How that myn egle, faste by,
 Was perched hye upon a stoon ;
 And I gan streghte to hym goon,
 And seyde thus :—‘ Y preye the

900

That thou a while abide me
 For goddis love, and lete me seen
 What wondres in this place been ;
 For yit paraventure Y may lere
 Somme good theron, or sumwhat here
 That leef me were, or that Y wente.'

 ' Petre ! that is myn entente,' 910
 Quod he to me ; ' therfore Y duelle,
 But certeyn oon thyng I the telle,
 That, but I bringe the therinne,
 Ne shalt thou never kunne gynne
 To come into hyt, out of doute,
 So faste hit whirleth, lo, aboute.
 But sithe that Jovys, of his grace,
 As I have seyde, wol the solace,
 Fynally with these thinges,
 Unkouth the syghtes and tydynges, 920
 To passe with thyn hevynesse,
 Soch routhe hath he of thy distresse,
 (That thou suffrest debonairly,
 And wost thy-selfen outtirly,
 Disesperat of alle blys,
 Syth that fortune hath made amys
 The frot of al thyn hertes reste
 Languish and eke in poynt to breste,)
 That he through hys myghty merite,
 Wol do than ese, al be hyt lyte, 930
 And yaf in expresse commaundement,
 To whiche I am obedient,
 To further the with al my myght,
 And wisse and teche the aryght,
 Where thou maist most tydynges here,
 Shaltow here anoon many oon lere.'

With *thilke* worde he ryght anoon,
 Hente me up bytwexe his toon,
 And at a wyndowe yn me broghte,
 That in this hous was, as me thoghte; 940
 And therwithalle me thought hit stente,
 And nothingse hyt aboute wente;
 And me set in the flore adoun.

But whiche a congregacioun
 Of folke, as I saugh rome aboute,
 Some within and some withoute,
 Nas never seen, ne shal ben eft,
 That, certys, in the worlde nys left,
 So many formed be Nature,
 Ne dede so many a creature, 950
 That wel unnethe in that place
 Hadde Y a fote brede of space,
 And every wight that I saugh there,
 Rouned in *eche* others ere,
 A newe tydyng prevely,
 Or elles tolde alle oppenly
 Ryght thus, and seyde, 'Nost not thou
 That ys betyd, *late or now*.'

'No,' quod he, 'Telle me what.'
 And than he tolde hym this and that, 960
 And swore therto that hit was sothe,
 'Thus hath he sayde,' and 'Thus he dothe,'
 And 'Thus shal hit be,' and 'Thus herde Y seye,'
 'That shal be founde, that dare I leye.'
 That alle the folke that ys a lyve,
 Ne han the kunnyng to discryve,
 Tho thinges that I herde there,
 What aloude, and what in ere.
 But al the wonder most was this:—

Whan oon had herde a thinge, ywis, 970
 He come forthright to another wight,
 And gan him tellen anon ryght,
 The same *thyng*e that him was tolde,
 Or hyt a forlonge way was olde,
 But gan sommewhat for to eche
 To this tydyng in this speche
 More than hit ever was.

And nat so sone departed nas
 That he fro him thoo he ne mette
 With the thridde ; and, or he lette 980
 Any stounde, he told hym als ;
 Were the tydyng sothe or fals,
 Yit wolde he telle hyt natheles,
 And evermo with more eneres,
 Than yt wase erst. Thus north and southe,
 Went every mothe fro mouthe to mouthe,
 And that eneresing evermoo,
 As fire ys wont to quyk and goo
 From a sparke sprongen amys,
 Tille alle a citee brent up ys. 990

And whan that *hit* was ful yspronge,
 And woxen more on every tonge
 Than ever hit was, and went anoon
 Up to a wyndowe out to goon,
 Or but hit myghte oute there paece,
 Hyt gan oute crepe at somme crevace,
 And flygh forthe faste for the nones.

And somtyme saugh I thoo, at ones
 A lesyng and a sad sothe-sawe,
 That gonne of aventure thrawe, 1000
 Out to a wyndowe for to paece ;
 And, when they metten in that place,

They were acheke bothe two,
 And neyther of hem most out goo;
 For other so they gonne crowde,
 Til eche of hem gan erien lowde,
 ‘Lat me go first!’—‘Nay, but let me!
 And here I wol ensuren the
 Wyth the *vowes* that thou wolt do so,
 That I shal never fro the go, 1010
 But be thyn oune sworn brother!
 We wil us medle eche with other,
 That no man, be they never so wrothe,
 Shal han *that on or two*, but bothe
 At ones, al beside his leve,
 Come we *a morwe* or on eve,
 But we cried or stille yrouned.’
 Thus saugh I fals and sothe, compounded,
 Togeder fle for oo tydyng.

Thus oute at holes gunne wringe 1020
 Every tydyng streght to Fame;
 And she gan yeve eche hys name,
 After hir disposicioun,
 And yaf hem eke duracioun,
 Some to wexe and *wane* sone,
 As dothe the faire white mone,
 And lete hem goon. Ther myght Y seen
 Wenged wondres faste fleen,
 Twenty thousand in a route,
 As Eolus hem blew aboute. 1030

And, lord! this hous in *alle* tymes
 Was ful of shipmen and pilgrimes,
 With scrippes bret-ful of leseyns,
 Entremedled with tydynges,
 And eke allone be herselfe.

O, many a thousand tymes twelve
 Saugh I eke of these pardoners,
 Currours, and eke messangers,
 With boystes crammed ful of lyes,
 As ever vessel was with lyes. 1045

And as I alther-fastest wente
 About, and did al myn entente,
 Me for to pleyen and for to lere,
 And eke a tydyng for to here,
 That I had herd of somme contré
 That shal not now be tolde for me ;
 For hit no nede is, redely ;
 Folke kan hit synge bet than I.
 For alle mote oute other late or rathe,
 Alle the sheves in the lathe. 1050

I herde a grete noyse withalle
 In a corner of the halle,
 Ther men of love tydynges tolde,
 And I gan thiderwarde beholde ;
 For I saugh rennyng every wight,
 As fast as that they hadden myght ;
 And everyche criede, ' What thing is that ?'
 And somme sayde ' I not never what.'
 And whan they were alle on an hepe,
 Tho behynde begunne up lepe, 1060
 And clamben up on other faste,
 And up the noyse an-highen kaste,
 And troden faste on otheres heles,
 And stampen, as men doon after eles.

Atte laste I saugh a man,
 Whiche that I nat, ne kan,
 But he semed for to be
 A man of grete auctorité.

And therewithalle I abrayde
Out of my sleepe, halfe afraide ; 1070
Remembring welle what I hadde seene,
And how hye and ferre I hadde beene
In my goost ; and hadde gret wonder
Of that the god of thunder
Hadde let me knowen ; and began to write
Lyke as yee have herd me endite.
Wherefore to study and rede alway,
I purpose to do day by day.

Thus in dreaming and in game,
Endeth this lytel booke of Fame. 1080

HERE ENDETH THE BOOKE OF FAME.





THE PROLOGUE OF NINE GOODE
WYMMEN.

A THOUSANDE tymes I have herd telle,
There ys joy in hevене, and peyne in
helle,
And I acorde wel that it ys so ;

But, natheles, yet wot I wel also,
That ther is noon dwellyng in this countree,
That eythir hath in hevене or helle ybe,
Ne may of hit noon other weyes witen,
But as he hath herd seyde, or founde it writen ;
For by assay ther may no man it preve.

But God forbede but men shulde leve 10
Wel more thing then men han seen with eye !
Men shal not wenen every thing a lye
But-yf hymselfe yt seeth, or elles dooth ;
For, God wot, thing is never the lasse sooth,
Thogh every wight ne may it not ysee.
Bernarde, the monke, ne saugh nat alle pardé !
Than mote we to bokes that we fynde,
(Thurgh which that olde thinges ben in mynde)
And to the doctrine of these olde wyse,
Yeve credence, in every skylful wise, 20
That tellen of these olde apprevd stories,
Of holynesse, of regnes, of victories,
Of love, of hate, and other sondry thynges,

Of whiche I may not maken rehersynges ·
 And yf that olde bokes were away,
 Ylorne were of remembraunce the key.
 Wel ought us, thanne, honouren and beleve
 These bokes, there we han noon other preve.

And as for me, though than I konne but lyte,
 On bokes for to rede I me delyte, 10
 And to hem yive I feyth and ful credence,
 And in myn herte have hem in reverence
 So hertely, that ther is game noon,
 That fro my bokes maketh me to goon,
 But yt be seldom on the holy day,
 Save, certeynly, whan that the monethe of May
 Is comen, and that I here the foules synges,
 And that the floures gynnen for to sprynges,
 Fairewel my boke, and my devocioun!

Now have I thanne suche a condicioun, 40
 That of alle the floures in the mede,
 Thanne love I most thise floures white and rede,
 Suche as men callen daysyes in her toune.
 To hem have I so grete affeccioun,
 As I seyde erst, whanne comen is the May,
 That, in my bed ther daweth me no day,
 That I nam uppe and walkyng in the mede,
 To seen this floure ayein the sonne sprede,
 Whan it up rysith erly by the morwe ;
 That blisful sight softneth al my sorwe, 50
 So glad am I, whan that I have presence
 Of it, to doon it alle reverence,
 As she that is of alle floures flour,
 Fulfilled of al vertue and honour,
 And evere ilike faire, and fressh of hewe.
 And I love it, and evere ylike newe,

And ever shal, til that myn herte dye ;
 Al swere I nat, of this I wol nat lye,
 Ther lovede no wight hotter in his lyve.
 And, whan that hit ys eve, I renne blyve, 60
 As sone as evere the sonne gynneth weste,
 To seen this flour, how it wol go to reste,
 For fere of nyght, so hateth she derkenesse !
 Hire chere is pleynty sprad in the brightnesse
 Of the sonne, for ther yt wol unclose.
 Allas, that I ne had Englyssh, ryme, or prose,
 Suffisant this flour to preyse aryght !
 But helpeth ye that han konnyng and myght,
 Ye lovers, that kan make of sentement ;
 In this ease oghte ye be diligent, 70
 To forthren me somewhat in my labour,
 Whethir ye ben with the leef or with the flour,
 For wel I wot, that ye han herbiforne
 Of makynge ropen, and lad away the corne ;
 And I come after, glenyng here and there,
 And am ful glad yf I may fynde an ere
 Of any goodly word that ye han left.
 And thogh it happen me rehereen eft
 That ye han in your fresshe songes sayede,
 Forbereth me, and beth not evele apayede, 80
 Syn that ye see I do yt in the honour
 Of love, and eke in service of the flour,
 Whom that I serve as I have witte or myght.
 She is the elerensse and the verray lyght,
 That in this derke worlde me wynt and ledyth,
 The hert in-with my sorwful brest yow dredith,
 And loveth so sore, that ye ben verrayly,
 The maistresse of my witte, and nothing I.
 My worde, my werkes, ys knyht so in youre bond

That as an harpe obeieth to the hond, 90
 That maketh it sounē after his fyngerynge,
 Ryght so mowe ye oute of myn herte bringe
 Swich vois, ryght as yow lyst, to laughe or pleyne;
 Be ye myn gide, and lady sovereyne.
 As to my erthely God, to yowe I calle,
 Bothe in this werke, and *in* my sorwes alle.

But wherfore that I spake to yive credence
 To olde stories, and doon hem reverence,
 And that men mosten more thyng beleve
 Then they may seen at eighe or elles preve; 100
 That shal I seyn, whanne that I see my tyme;
 I may nat all attones speke in ryme.
 My besy gost, that trusteth alwey newe,
 'To seen this flour so yong, so fressh of hewe,
 Constreynedē me with so gredy desire,
 'That in myn herte I feele yet the fire,
 'That made me to ryse er yt wer day,
 And this was now the firste morwe of May,
 With dredful hert, and glad devocioun
 For to ben at the resurreccioun 110
 Of this flour, whan that yt shulde unclose
 Agayne the sonne, that roos as rede as rose,
 That in the brest was of the beste that day,
 That Agenores doghtre ladde away.
 And doune on knes anoon ryght I me sette,
 And as I koude, this fresshe flour I grette,
 Knelyng alwey, til it unclosed was,
 Upon the smale, softe, swote gras,
 That was with floures swote enbrouded al,
 Of swich swetnesse, and swich odour over-al, 120
 That for to speke of gomme, or herbe, or tree,
 Comparisoun may noon ymaked be;

For yt surmounteth pleynty alle odoures,
 And of riche beauté of floures.
 Forgeten hadde the erthe his pore estate
 Of wyntir, that him naked made and mate,
 And with his swerd of colde so sore greved ;
 Now hath thatempresonne alle that releved
 That naked was, and clad yt new agayn.
 The smale foules, of the seson fayn, 130
 That of the panter and the nette ben scaped,
 Upon the foweler, that made hem awhaped
 In wynter, and distroyed hadde hire broode,
 In his dispite hem thoghte yt did hem goode
 To syng of hym, and in hir songe dispise
 The foule cherle, that for his coveytise,
 Had hem betrayed with his 'sophistrye.
 This was hire songe, ' The foweler we deffye,
 And al his craftes.' And somme songen clere 140
 Layes of love, that joye it was to here,
 In worshippyng and in preysing of hir make ;
 And, for the newe blisful somers sake,
 Upon the braunches ful of blosmes softe,
 In hire delyt, they turned hem ful ofte,
 And songen, 'Blessed be seynt Valentyne !
 For on his day I chees yow to be myne,
 Withouten repentyng, myn herte swete !'
 And therewithalle hire bekes gonne meete,
 Yeldyng honour, and humble obeysaunces 150
 To love, and diden hir othere observaunces
 That longeth onto love, and to nature ;
 Construeth that as yow lyst, I do no cure.
 And thoo that hadde doon unkyndenesse,
 As dooth the tydif, for newfangelnesse,
 Besoghte mercy of hire trespassyng,

And humblely songe hire repentyng,
And sworn on the blosmes to be trewe,
So that hire makes wolde upon hem rewe,
And at the laste maden hire acorde.
Al founde they Daunger for a tyme a lord, 160
Yet Pitee, thurgh his stronge gentil myght,
Forgaf, and made mercy passen ryght
Thurgh Innocence, and ruled Curtesye.
But I ne elepe yt nat innocence folye,
Ne fals pitee, for vertue is the mene,
As Ethike seith, in swich maner I mene.
And thus thise foweles, voide of al malice,
Acordeden to love, and laften vice
Of hate, and songe alle of oon acorde,
'Welcome Somer, oure governour and lorde.' 170
And Zepherus, and Flora gentilly
Yav to the floures, softe and tenderly,
Hire swoote breth, and made hem for to sprede,
As god and goddessse of the floury mede.
In whiche me thocht I myghte, day by day,
Dwellen alwey, the joly monyth of May,
Withouten slepe, withcuten mete or drynke.
Adoune ful softely I gan to synke,
And lenyng on myn elbowe and my syde,
The longe day I shoope me for tabide 180
For nothing ellis, and I shal nat lye,
But for to loke upon the daysie ;
That men by reson wel it calle may
The daisie, or elles the ye of day,
The emperice, and floure of floures alle.
I pray to God that faire mote she falle,
And alle that loven floures, for hire sake :
But, natheles, ne wene nat that I make

In preysing of the flour agayn the leef,
 No more than of the corne agayn the sheef: 190
 For as to me nys lever noon ne lother,
 I nam withholden yit with never nother.
 Ne I not who serveth leef, ne who the flour,
 Wel browken they her service or labour,
 For this thing is al of another tonne,
 Of olde storye, er swiche thinge was begonne.

Whan that the sonne out of the south gan weste,
 And that this floure gan close, and goon to reste,
 For derknesse of the nyght, the which she dredde,
 Home to myn house full swiftly I me spedde 200
 To goon to reste, and erly for to ryse,
 To seen this flour sprede, as I devyse.
 And in a litel herber that I have,
 That benched was on turves fressh ygrave,
 I bad men sholde me my couche make ;
 For deyntee of the newe someres sake,
 I bad hem strawen floures on my bed.
 Whan I was leyde, and hadde myn eyen hed,
 I fel on slepe, in-with an houre or twoo,
 Me mette how I lay in the medewe thoo, 210
 To seen this flour that I love so and drede ;
 And from a fer come walkyng in the mede
 The God of Love, and in his hande a quene,
 And she was clad in real habite grene ;
 A fret of gold she hadde next her heer,
 And upon that a white corowne she beer,
 With flourouns smale, and, I shal nat lye
 For al the worlde ryght as a daysye
 Ycorouned ys with white leves lyte,
 So were the flowrouns of hire coroune white ; 220
 For of oo perle, fyne, oriental,

Hire white coroune was imaked al,
 For which the white coroune above the grene
 Made hire lyke a daysie for to sene,
 Considered eke hir fret of golde above.
 Yclothed was this myghty God of Love
 In silke enbrouded, ful of grene greves,
 In-with a fret of rede rose leves,
 The fresshest syn the worlde was first begonne.
 His gilte here was corowned with a sonne 230
 In stede of golde, for hevynesse and wyghte ;
 Therwith me thoght his face shoon so brighte
 That wel unnethes myght I him beholde ;
 And in his hande me thoght I saugh him holde
 Two firy dartes, as the gledes rede,
 And aungelyke hys wynges saugh I sprede.
 And, al be that men seyn that blynd ys he,
 Algate me thoghte that he myghte se ;
 For sternely on me he gan byholde,
 So that his loking dooth myn herte colde. 240
 And by the hande he helde this noble quene,
 Corowned with white, and clothed al in grene,
 So womanly, so benigne, and so meke,
 That in this world, thogh that men wolde seke,
Half of hire beuté shulde men nat fynde
 In creature that formed ys by kynde.
 And therefore may I seyn, as thynketh me,
 This songe in preysyng of this lady fre.

Hyd, Absalon, thynne gilte tressis clere ;
 Ester, ley thou thy mekenesse al adown ; 250
 Hyde, Jonathas, al thy frendly manere ;
 Penelopee, and Marcia Catoun,
 Make of youre wifhode no comparysoun ;

Hyde ye youre beautes, Ysoude and Eleyne,
My lady comith, that al this may disteyne.

Thy faire body lat yt nat appere,
Lavyne ; and thou Lucesse of Rome tounne,
And Polixene, that boghten love so dere,
And Cleopatre, with al thy passyoun,
Hyde ye your trouthe of love, and your renoun, ²⁶⁰
And thou, Tesbé, that hast of love suche peyne,
My lady comith, that al this may disteyne.

Hero, Dido, Laudomia, alle yfere,
And Phillis, hangyng for thy Demophoun,
And Canace, espied by thy chere,
Ysiphile betrayed with Jasoun,
Maketh of your trouthe neythir boost ne soun,
Nor Ypermystre, or Adriane, ye tweyne,
My lady cometh, that all this may dysteyne.

This balade may ful wel ysongen be, 270
As I have seyde erst, by my lady fre ;
For certeynly al thise mowe nat suffise,
To apperen wyth my lady in no wyse.
For as the sonne wole the fire disteyne,
So passeth al my lady sovereyne,
'That ys so good, so faire, so debonayre,
I prey to God that ever falle hire faire.
For nadde comfort ben of hire presence,
I hadde ben dede, withouten any defence,
For drede of Loves wordes, and his chere, 280
As, when tyme ys, hereafter ye shal here.

Behynde this God of Love upon the grene
I saugh comyng of ladyes nientene
In real habite, a ful esy paas ;

And after hem come of wymen swich a traas,
 That syn that God Adam hadde made made of erthe,
 The thridde part of mankynde, or the ferte,
 Ne wende I nat by possibilitee,
 Had ever in this wide worlde ybee,
 And trewe of love, these women were echon. 290
 Now whether was that a wonder thing or non,
 That ryght anon, as that they gonne espye
 This flour, which that I clepe the daysie,
 Ful sodeynly they stynten al attones,
 And knelede doune, as it were for the nones,
 And songen with o vois, 'Heel and honour
 To trouthe of womanhede, and to this flour
 That bereth our alder pris in figuryng,
 Hire white corowne beryth the witnessynge?'
 And with that word, a-compas enviroun, 300
 They setten hem ful softly adoun.
 First sat the God of Love, and syth his quene
 With the white corowne, clad in grene;
 And sithen al the remenaunt by and by,
 As they were of estaat, ful curteysly,
 Ne nat a worde was spoken in the place,
 The mountaunce of a furlong wey of space.
 I, knelyng by this floure, in good entente
 Aboode, to knowen what this peple mente,
 As stille as any ston; til at the laste 310
 This God of Love on me hyse eighen caste,
 And seyde, 'Who kneleth there?' and I answerde
 Unto his askynge, whan that I it herde,
 And seyde, 'It am I,' and come him nere,
 And salwed him. Quod he, 'What dostow here,
 So nygh myn oun floure, so boldely?
 Yt were better worthy trewely

A worme to neghen ner my flour than thow.'
 'And why, sire,' quod I, 'and yt lyke yow?
 'For thow,' quod he, 'art therto nothing able. 320
 Yt is my relyke, digne and delytable,
 And thow my foo, and al my folke werreyest,
 And of myn olde servauntes thow mysseyest,
 And hynderest hem, with thy translacioun,
 And letttest folke from hire devocioun
To serve me, and holdest it folye
 To serve Love. Thou maist it nat denye,
 For in pleyne text, withouten nede of glose,
 Thou hast *translated* the Romaunce of the Rose,
 That is an heresy e ayeins my lawe, 330
 And makest wise folke fro me withdrawe;
 And of Cresyde thou hast seyde as the lyste,
 That maketh men to wommen lasse triste,
 That ben as trewe as ever was any steel,
 Of thyn answer avise the ryght weel,
 For thogh thou reneyed hast my lay,
 As other wrecches han doon many a day,
 By seynte Venus, that my moder ys,
 If that thou lyve, thou shalt repenten this
 So cruelly, that it shal wele be sene.' 340

Thoo spake this lady, clothed al in greene,
 And seyde, 'God, ryght of youre curtesye,
 Ye moten herken yf he can replye
 Agayns al this that ye have to him meved;
 A God ne sholde nat be thus agreved,
 But of hys deitee he shal be stable,
 And therto gracious and merciabile.
 And yf ye nere a God that knowen alle,
 Thanne myght yt be as I yow tellen shalle;
 This man to yow may falsly ben accused, 350

Ther as by right him oughte ben excused ;
 For in youre courte ys many a losengeour,
 And many a queinte totolere accusour,
 That tabouren in youre eres many a sown,
 Ryght aftir hire ymagynacioun,
 To have youre daliance, and for envie.
 Thise ben the causes, and I shal nat lye,
 Envie ys lavendere of the court alway ;
 For she ne parteth neither nyght ne day,
 Out of the house of Cesar, thus seith Dante ; 360
 Who so that gooth, algate she wol nat wante.

‘ And eke, parauntere, for this man ys nyce,
 He myghte doon yt, gessyng no malioe ;
 For he useth thynges for to make,
 Hym rekketh nocht of what matere he take ;
 Or him was boden maken thilke tweye
 Of somme persone, and durste yt nat withseye ;
 Or him repenteth outrely of this.
 He ne hath nat doon so grevously amys,
 To translaten that olde clerkes writen, 370
 As thogh that he of malice wolde editen,
 Despite of Love, and had himselfe yt wrought.
 This shoolde a ryghtwis lord have in his thought,
 And nat be lyke tirauntes of Lumbardye,
 That han no reward but at tyrannye.
 For he that kynge or lorde ys naturel,
 Hym oghte nat be tiraunt ne crewel,
 As is a fermour, to doon the harme he kan ;
 He moste thinke yt is his leege man,
 And is his tresour, and his gold in cofre. 380
 This is the sentence of the philosophre :
 A kyng to kepe hise leeges in justice,
 Withouten doute that is his office.

Al wol he kepe hise lordes in hire degree,
 As it ys ryght and skilful that they bee
 Enhaunced and honoured, and most dere,
 For they ben half goddys in this world here,
 Yit mote he doon bothe ryght to poore and ryche,
 Al be that hire estaate be nat yliche ;
 And han of poore folke compassyoun. 390
 For loo, the gentil kynde of the lyoun !
 For whan a flye offendith him or biteth,
 He with his tayle away the flye smyteth
 Al esely ; for of his gentrye
 Hym deyneth nat to wreke hym on a flie,
 As dooth a curre, or elles another best.
 In noble corage oughte ben arest,
 And weyen every thing by equitye,
 And ever have rewarde unto his owen degree.
 For, syr, yt is no maistrye for a lorde 405
 To dampne a man, without answeere of worde,
 And for a lorde, that is ful foule to use.
 And it so be, he may hym nat excuse,
 But asketh mercy with a dredeful herte,
 And profereth him, ryght in his bare sherte,
 To ben ryght at your owen jugement,
 Than oght a God, by short avysement,
 Consydre his owne honour, and hys trespas ;
 For syth no caus of dethe lyeth in this caas,
 Yow oghte to ben the lyghter merciabile ; 415
 Leteth youre ire, and beth sumwhat tretable !
 The man hath served yow of his kunnyng,
 And furthred wel youre lawe in his making.
 Al be hit that he kan nat wel endite,
 Yet hath he made lewde folke delyte
 To serve you. in preysinge of your name.

He made the book that hight the Hous of Fame,
 And eke the Deeth of Blaunche the Duchesse,
 And the Parlement of Foules, as I gesse,
 And al the Love of Palamon and Arcite 420
 Of Thebes, thogh the storye ys knowen lyte ;
 And many an ympne for your haly dayes,
 That highten Balades, Roundels, Virelayes.
 And for to speke of other holynesse,
 He hath in proce translated Boece,
 And made the Lyfe also of Seynt Cecile.
 He made also, goon ys a grete while,
 Origenes upon the Maudeleyne.

Hym oughte now to have the lesse peyne,
 He hath maade many a lay, and many a thyng. 430

‘ Now as ye be a God, and eke a kynge,
 I your Alceste, whilom quene of Trace,
 I aske yow this man, ryght of your grace,
 That ye him never hurte in al his lyve,
 And he shal sweren to yow, and that blyve,
 He never more shal agilten in this wyse,
 But shal maken, as ye wole devyse,
 Of wommen trewe in lovyng al hire lyf,
 Wher so ye wol, of mayden or of wyf,
 And forthren yow as muche as he mysseyde, 440
 Or in the Rose, or elles in Creseyde.’

The God of Love answerede hire anoon,
 ‘ Madame,’ quod he, ‘ it is so long agoon
 That I yow knewe so charitable and trewe,
 That never yit, syn that the worlde was newe,
 To me ne founde Y better noon than yee ;
 If that ye wolde save my degree,
 I may ne wol nat *werne* your requeste ;
 Al lyeth in yow, dooth wyth hym as yow liste.

I al foryewe withouten lenger space ; 456
 For who-so yeveth a yifte or dooth a grace,
 Do it bytyme, his thank ys wel the more,
 And demeth ye what he shal do therfore.
 Goo thanke now my lady here,' quod he.
 I roos, and doune I sette me on my knee,
 And seyde thus :—' Madame, the God above
 Foryelde yow that the God of Love
 Han maketh me his wrathe to foryive,
 And grace so longe for to lyve,
 That I may knowe soothly what ye bee, 460
 That han me holpe, and put me in this degree.
 But trewely I wende, as in this eas
 Naught have agilt, ne doon to love trespas ;
 For-why a trewe man, withouten drede,
 Hath nat to parten with a theves dede.
 Ne a trewe lover oghte me not to blame,
 Thogh that I spake a fals love-re som shame.
 They oghte rather with me for to holde,
 For that I of Creseyde wroot or tolde,
 Or of the Rose, what-so myn auctour mente, 470
 Algate, God woot, yt was myn entente
 To forthren trouthe in love, and yt cheryce,
 And to ben war fro falsnesse and fro vice,
 By swiche ensample ; this was my menyng.'
 And she answerde, ' Lat be thyn arguynge,
 For love ne wol nat countrepleted be
 In ryght ne wrong, and lerne that of me ;
 Thou hast thy grace, and holde the ryght therto.
 Now wol I seyn what penance thou shalt do
 For thy trespas, understonde yt here :— 480
 Thou shalt while that thou lyvest, yere by yere,
 The moste partye of thy tyme spende

In making of a glorious legende,
 Of goode wymmen, maydenes, and wyves,
 That weren trew in lovyng al hire lyves ;
 And telle of false men that hem bytraien,
That al here lyf ne don nat but asayen
 How many women they may doon a shame,
 For in your worlde that is now holde a game.
 And thogh the lyke nat a lovere bee, 490
 Speke wel of love ; this penanee yive I the.
 And to the God of Love I shal so preye,
 That he shal charge his servauntes, by any weye,
 To forthren thee, and wel thy labour quyte :
 Goo now thy weye, this penaunce ys but lyte.
 And whan this book ys made, yive it the quene
 On my byhalfe, at Eltham, or at Sheene.'

The god of love gan smyle, and than he seyde:—
 ' Wostow,' quod he, ' wher this be wyf or mayde,
 Or queene, or countesse, or of what degre, 500
 That hath so lytel penance yiven thee,
 That hast deserved sore for to smerte ?
But pité renneth soone in gentil herte :
 That maistow seen, she kytheth what she ys.'
 And I answerde, ' Nay, sire, so have I blys,
 No more, but that I see wel she is good.'
 ' That is a trewe tale, by myn hood !'
 Quod Love, ' and thou knowest wel, pardee,
 If yt be so that thou avise the.
 Hastow nat in a book lyth in thy eheste, 510
 The grete goodnesse of the quene Aleeste,
 That turned was into a dayesye ?
 She that for hire housbonde chees to dye,
 And eke to goon to helle, rather than he,
 And Ercules rescowed hire, pardé,

And broght hir out of helle agayne to blys?'
 And I answerde ageyn, and sayde, 'Yis,
 Now knowe I hire. And is this good Alceste,
 The dayesie, and myn owene hertes reste?
 Now fele I weel the goodnesse of this wyf, 520
 That both after hir deth, and in hir lyf,
 Hir grete bounté doubleth hir renoun.
 Wel hath she quyt me myn affeccion,
 That I have to hire flour the dayesye.
 No wonder ys thogh Jove hire stellyfye,
 As telleth Agaton, for *hire* goodenesse,
 Hire white corowne berith of hyt witesse;
 For also many vertues hadde shee,
 As smale *florouns* in hire corowne bee.
 In remembraunce of hire and in honoure 530
 Cibella maade the dayesye and the floure
 Ycrowned al with white, as men may see,
 And Mars yaf to hire a corowne reede, pardee,
 In stede of rubyes sette among the white.'
 Therwith this queene wex reed for shame a lyte,
 Whanne she was preysed so in hire presence.
 Thanne seyde Love, 'A ful grete neelgence
 Was yt to the, that ilke tyme thou made,
 'Hyd Absolon thy tresses' in balade,
 That thou forgate hire in thy songe to sette, 540
 Syn that thou art so gretly in hire dette,
 And wost wel that kalender ys shee
 To any woman that wol lover bee:
 For she taught al the crafte of fyne lovyng,
 And namely of wyfhode the lyvyng,
 And alle the boundes that she oghte kepe;
 Thy litel witte was thilke tyme aslepe.
 But now I charge the upon thy lyfe,

That in thy legende thou make of thys wyfe,
 Whan thou hast other smale ymaade before ; 550
 And fare now wel, I charge thee na more.
 But er I goo, thus muche I wole the telle,
 Ne shal no trewe lover come in helle.
 Thise other ladies sittynge here arowe,
 Ben in thy balade, yf thou kanst hem knowe,
 And in thy bookes alle thou shalt hem fynde ;
 Have hem in thy legende now alle in mynde,
 I mene of hem that ben in thy knowyng.
 For here ben twenty thousande moo sittyng
 Thanne thou knowest, goode wommen alle, 560
 And trewe of love for oght that may byfalle ;
 Make the metres of hem as the lest ;
 I mot goon home, the sonne draweth west,
 To Paradys, with al thise companye ;
 And serve alwey the fresshe daysye.
 At Cleopatre I wole that thou begynne,
 And so forthe, and my love so shalthou wynne ;
 For lat see now what man that lover be,
 Wol doon so stronge a peyne for love as she.
 I wot wel that thou maist nat al yt ryme, 570
 That swiche lovers dide in hire tyme ;
 It were to long to reden and to here ;
 Sufficeth me thou make in this manere,
 That thou reherce of al hir lyfe the grete,
 After this oldē auctours lysten for to trete.
 For who-so shal so many a storye telle,
 Sey shortly or he shal to longe dwelle.
 And with that worde my bokes gan I take,
 And ryght thus on my legende gan I make.

INCIPIT LEGENDA CLEOPATRIE MAR-
TIRIS, EGIPTI REGINE.



AFTER the deth of Tholomé the kyng,
 That al Egipte hadde in his governyng,
 Regned hys queene Cleopataras ;
 Til on a tyme befel ther swich a cas,
 That out of Rome was sent a senatour,
 For to conqueren regnes and honour,
 Unto the toune of Rome, as was usaunce,
 To have the worlde at hir obeysaunce,
 And sooth to seye, Antonius was his name.
 So fil yt, as Fortune hym oght a shame, 10
 Whanne he was fallen in prosperitee,
 Rebel unto the toune of Rome ys hee.
 And over al this, the suster of Cesar
 He lasfe hir falsly, er that she was war,
 And wold algates han another wyf,
 For which he took with Rome and Cesar strif.
 Natheles, forsooth this ilke senatour,
 Was a full worthy gentil werreyour,
 And of *his* deeth it was ful gret damage.
 But Love hadde brought this man in swich a rage, 20
 And him so narwe bounden in his laas,
 Alle for the love of Cleopataras,
 That al the worlde he sette at noo value ;
 Hym thoghte ther was nothing to him so due
 As Cleopataras for to love and serve ;
 Hym roghte nat in armes for to sterve
 In the defence of hir and of hir ryght.

This noble queene ek lovede so this knyght,
 Thurgh his desert and for his chivalrye ;
 As certeynly, but-yf that bookes lye, 30
 He was of persone, and of gentillesse,
 And of discrecion, and of hardynesse,
 Worthy to any wight that liven may ;
 And she was faire, as is the rose in May.
 And to maken shortly is the beste,
 She wax his wif, and hadde him as hir leste.

The weddyng and the feste to devyse,
 To me that have ytake swich emprise,
 Of so many a storye for to make,
 Yt were to longe, lest that I sholde slake 40
 Of thing that beryth more effecte and charge ;
 For men may overlade a shippe or barge.
 And forthy, to effect than wol I skyppe,
 And al the remenaunt I wol let yt slyppe.

Octovyan, that woode was of this dede,
 Shoop him an oost on Antony to lede,
 Al outerly for his destructioun,
 With stoute Romaynes, crewel as lyoun ;
 To shippe they wente, and thus I let hem sayle.

Antonius, that was war, and wol nat fayle 50
 To meten with thise Romaynes, yf he may,
 Took eke his rede, and booth upon a day
 His wyf and he and al hys oost forthe wente
 To shippe anon, no lenger they ne stente,
 And in the see hit happed hem to mete.
 Up gooth the trumpe, and for to shoute and shete,
 And paynen hem to sette on with the sonne ;
 With grisly sounne out gooth the grete gonne,
 And hertely they hurtelen al attones,
 And fro the toppe doune cometh the grete stones.

In gooth the grapenel so ful of crokes, 61
 Amonge the ropes, and the sheryng hokes ;
 In with the polax preseth he and he ;
 Byhynde the maste begynneth he to fle,
 And out agayn, and dryveth hym over borde ;
 He styngeth hym upon hys speres orde ;
 He rent the sayle with hokes lyke a sithe ;
 He bryngeth the cuppe, and biddeth hem be blithe ;
 He poureth pesen upon the hacches slidre,
 With pottes ful of lyme, they goon togedre. 70
 And thus the longe day in fight they spende
 Til at the last, as every thing hath ende,
 Antony is shent, and put hym to the flyghte,
 And al hys folke to-goo, that best goo myghte.
 Fleeth ek the queene with al hir purple sayle,
 For strokes which that went as thik as hayle ;
 No wonder was, she myght it nat endure.
 And whan that Antony saugh that aventure,
 ‘ Allas,’ quod he, ‘ the day that I was borne !
 My worshippe in this day thus have I lorne !’ 80
 And for dispeyre out of hys wytte he sterte,
 And roof hymself anoon thurghout the herte,
 Er that he ferther went out of the place.
 Hys wyf, that koude of Cesar have no grace,
 To Egipte is fled, for drede and for distresse.
 But herkeneth ye that speken of kyndenesse.
 Ye men that falsly sweren many an oothe,
 That ye wol dye yf that your love be wroothe,
 Here may ye seen of women which a trouthe.
 This woful Cleopatrie hath made swich routhe, 90
 That ther nys tonge noon that may yt telle.
 But on the morowe she wol no lenger dwelle,
 But made hir subtil werkmen make a shryne
 Of alle the rubees and the stones fyne

In al Egipte that she koude espye ;
 And put ful the shryne of spicerye,
 And let the corps enbawme ; and forth she fette
 This dede corps, and in the shryne yt shette.
 And next the shryne a pitte than dooth she grave,
 And alle the serpentes that she myght have, 100
 She put hem in that grave, and thus she seyde :—
 ‘ Now, love, to whom my sorweful hert obeyde,
 So ferforthely, that fro that blisful houre
 That I yow swor to ben al frely youre ;
 (I mene yow, Antonius, my knyght,)
 That never wakyng in the day or nyght,
 Ye nere out of myn hertes remembraunce,
 For wele or woo, for earole, or for daunce ;
 And in my self this covenant made I thoo,
 That ryght swieh as ye felten wele or woo, 110
 As ferforth as yt in my powere lay,
 Unreprovable unto my wifhood ay,
 The same wolde I felen, life or deethe ;
 And thilke covenant while me lasteth breethe
 I wol fulfille ; and that shal wel be scene,
 Was never unto hir love a trewer queene.’
 And wyth that worde, naked, with ful good herte,
 Amonge the serpents in the pit she sterte.
 And ther she chees to han hir buryinge.
 Anoon the neddres gonne hir for to styngre, 120
 And she hir deeth receeveth with good chere,
 For love of Antony that was hir so dere.
 And this is storial, sooth it ys no fable.
 Now er I fynde a man thus trewe and stable.
 And wolde for love his deeth so frely take,
 I prey God latoure hedes nevere ake !

INCIPIIT LEGENDA TESBE BABILON,
MARTIRIS.

AT Babiloyne whylom fil it thus
 The whiche toune the queene Simyramus
 Leet diehen al about, and walles make
 Ful hye, of harde tiles wel ybake :
 There were dwellynge in this noble toune,
 Two lordes, which that were of grete renoune,
 And woneden so neigh upon a grene,
 That ther nas but a stoon wal hem betwene,
 As ofte in grette tounes ys the wone.
 And sooth to seyn, that o man had a sone, 10
 Of al that londe oon the lustieste ;
 That other had a doghtre, the faireste
 That esteward in the worlde was tho dwellynge.
 The name of everyche gan to other sprynge,
 By wommen that were neyghebores aboute ;
 For in that contre yit, wythouten doute,
 Maydenes ben ykept for jelousye
 Ful streyte, leste they diden somme folye.

This yonge man was cleped Piramus,
 Tesbé highte the maide (Naso seith thus). 20
 And thus by reporte was hir name yshove,
 That as they wex in age, wax hir love.
 And certyne, as by reson of hir age,
 Ther myghte have ben betwex hem mariage,
 But that hir fadres nold yt not assente,
 And booth in love ylike soore they brente,

That noon of al hir frendes myghte yt lette.
 But prevely sommtyme yit they mette
 Be sleight, and spoken somme of hire desire,
 As wre the glede and hotter is the fire; 30
 Forbeede a love, and it is ten times so woode.

This wal, which that bitwixe hem bothe stooode,
 Was cloven atwoo, right fro the toppe adoune,
 Of olde tyme, of his foundacioun.

But yit this clyft was so narwe and lite
 Yt was nat scene, deere ynogh a myte;
 But what is that that love kannat espye?
 Ye lovers twoo, yf that I shal nat lye,
 Ye founden first this litel narwe clifte,
 And with a soun as softe as any shryfte, 40

They leete hir wordes thurgh the clifte pace,
 And tolden, while that they stoden in the place,
 Al hire compleynt of love, and al hire woo.

At every tyme whan they dorste soo,
 Upon the o syde of the walle stood he,
 And on that other syde stood Tesbé,
 The swoote soun of other to receyve.

And thus *here* wardeyns wolde they disceyve,
 And every day this walle they wolde threete,
 And wisse to God that it were doune ybete. 50

Thus wolde they seyn:—‘Allas, thou wikked walle!
 Thurgh thyn envye thow us lettest alle!

Why nyltow cleve, or fallen al atwo?

Or at the leeste, that thow wouldest so,

Yit woldestow but ones let us meete,

Or oones that we myghte kyssen sweete,

Than were we covered of oure cares colde.

But natheles, yit be we to the holde,

In as muche as thou suffrest for to goon

Our wordes thurgh thy lyme and eke thy stoon, 69
Yet oghte we with the ben wel apayede.'

And whan these idel wordes weren sayde,
The colde walle they wolden kyssen of stoon,
And take hir leve, and foorth they wolden goon.
Alle this was gladly in the evetyde,
Or wonder erly, lest men it espyede.
And longe tyme they wroght in this manere,
Til on a day, whan Phebus gan to clere,
Aurora with the stremes of hire hete,
Hadde dried uppe the dewe of herbes wete, 70
Unto this clyfte, as it was wont to be,
Come Piramus, and after come Tesbé.
And plighthen trouthe fully in here faye,
That ilke same nyght to steele awaye,
And to begile hire wardeyns everychone,
And forth out of the citee for to gone.
And, for the feeldes ben so broode and wide,
For to meete in o place at o tyde,
They sette markes; hire metyng sholde bee
Ther kyng Nynus was graven, under a tree; 80
(For olde payens, that ydoles heriede,
Useden thoo in feeldes to ben beriede)
And faste by *his* grave was a welle.
And shortly of this tale for to telle,
This covenant was affermed wonder faste,
And longe hem thoghte that the sonne laste,
That it nere *goon* under the see adoune.

This Tesbé *hath* so greeete affeccion,
And so grete lykyng Piramus to see,
That whan she seigh hire tyme myghte bee, 90
At nyght she stale away ful prevely,
With hire face ywympled subtilly.

For al hire frendes, for to save hire trouthe,
 She hath forsake ; alas, and that is routhe,
 That ever woman wolde be so trewe,
 To trusten man, but she the bet hym knewe !
 And to the tree she gooth a ful goode paas,
 For love made hir so hardy in this caas ;
 And by the welle adoune she gan hir dresse.
 Allas ! than comith a wilde leonesse 100
 Out of the woode, withouten more arreste,
 With blody moouth of strangelynge of a beste,
 To drynken of the welle ther as she sat.
 And whan that Tesbé had espyed that,
 She ryst hire up, with a ful drery herte,
 And in a cave, with dredful foot she sterte,
 For by the moone she saugh yt wel withalle.
 And as she ranne, hir wympel leet she falle,
 And tooke noon hede, so soore she was awhaped,
 And eke so glad that she was escaped ; 110
 And ther she sytte, and darketh wonder stille.
 Whan that this lyonesse hath dronke hire fille,
 Aboute the welle gan she for to wynde,
 And ryght anoon the wympil gan she fynde,
 And with hir blody mouth it al to-rente.
 Whan this was don, no lenger she ne stente,
 But to the woode hir wey than hath she nome.
 And at the laste this Pirus ys come,
 But al to longe, alas, at home was hee !
 The moone shoone, men myghte wel ysee, 120
 And in hys wey, as that he come ful faste,
 Hise eighen to the grounde adoune he caste ;
 And in the sonde as he behelde adoune,
 He seigh the steppes broode of a lyoun ;
 And in his herte he sodeynly agroos,

And pale he wex, therwith his heer aroos,
 And nere he come, and founde the wimpel torne.
 ‘Allas,’ quod he, ‘the day that I was borne!
 This oo nyght wol us lovers boothe slee!
 How shulde I axen mercy of Tesbee, 130
 Whan I am he that have yow slayne, allas?
 My byddyng hath i-slayn yow in this caas!
 Allas, to bidde a woman goon by nyghte
 In place thereas a peril fallen myghte!
 And I so slowe! allas, I ne hadde bee
 Here in this place, a furlong wey or yee!
 Now what lyon that be in this foreste,
 My body mote rente, or what beste
 That wilde is, gnawen mote he now my herte!’
 And with that worde he to the wympel sterte, 140
And kiste it ofte, and wepte on it ful sore;
 And seyde, ‘Wympel, allas! ther nys no more,
 But thou shalt feele as wel the blode of mé,
 As thou hast felt the bledynge of Tesbé.’
 And with that worde he smot hym to the herte;
 The blood out of the wounde as brode sterte
 As water, whan the conduyte broken ys.

Now Tesbé, which that wyste nat this,
 But syttyng in hire drede, she thoghte thus:—
 ‘Yf it so falle that my Piramus 150
 Be comen hider, and may me nat fynde,
 He may me holden fals, and ek unkynde.’
 And oute she comith, and after hym gan espion,
 Booth with hire hert, and with hire eighen;
 And thoghte, ‘I wol him tellen of my drede,
 Booth of the lyonesse and al my dede.’
 And at the laste hire love than hath she founde,
 Betynge with his helis on the grounde,

Al blody; and therwithal abak she sterte,
 And lyke the wawes quappe gan hir herte, 180
 And pale as boxe she wax, *and* in a throwe
 Avised hir, and gan him wel to knowe,
 That it was Piramus, hire herte dere.

Who koude write which a dedely chere
 Hath Tesbé now? and how hire heere she rente?
 And how she gan hir selve to turmente?
 And how she lyth and swowneth on the grounde?
 And how she wepe of teres ful his wounde?
 How medeleth she his blood with hir compleynte?
 How with his blood hir selven gan she peynte?
 How clippeth she the dede corps? *allas!* 171
 How dooth this woful Tesbé in this cas?
 How kysseth she his frosty mouthe so colde?
 Who hath doon this? and who hath ben so bolde
 To sleen my leefe? O speke Piramus!
 I am thy Tesbé, that thee calleth thus!
 And therwithal she lyfteth up his heed.

This woful man that was nat fully deed,
 Whan that he herde the name of Tesbé crien,
 On hire he caste his hevy dedely eyen, 180
 And doune agayn, and yeldeth up the gooste.

Tesbe rist uppe, withouten noyse or booste,
 And saugh hir wympel and his empty shethe,
 And eke his swerde, that him hath doon to dethe.
 Than spake she thus:—‘Thys woful hande,’ quod
 she,

‘Ys strong ynogh in swiche a werke to me;
 For love shal me yive strengthe and hardynesse,
 To make my wounde large ynogh, I gesse.
 I wole the folowen deede, and I wol be
 Felawe, and cause eke of thy deeth,’ quod she. 190

‘ And thogh that nothing save the deth oonly,
 Myghte the fro me departe trewely,
 Thou shal noo more now departe fro me
 Than fro the deth, for I wol goo with the.

‘ And now ye wrecched jelouse fadres oure,
 We that weren whilome children youre,
 We prayen yow, withouten more envye
 That in oo grave we moten lye,
 Syn love hath us broght this pitouse ende.
 And ryghtwis God to every lover sende, 200
 That loveth trewely, moore prosperité
 Than ever hadde Piramus and Tesbé.
 And let noo gentile woman hire assure,
 To putten hire in swiche an aventure.
 But God forbede but a woman kan
 Ben as trewe and lovyng as a man,
 And for my parte I shal anoon it kythe.’
 And with that worde his swerde she took as-swithe,
 That warme was of hire loves blood, and hoote,
 And to the herte she hire selven smoot. 210

And thus are Tesbé and Piramus agoo.
 Of trewe men I fynde but fewe moo
 In al my bookes, save this Piramus,
 And therefore have I spoken of hym thus.
 For yt is deyntee to us men to fynde
 A man that kan in love be trewe and kynde.

Here may ye seen, what lover so he be,
 A woman dar and kan as wel as he.

INCIPIT LEGENDA DIDONIS, MARTIRIS
CARTHAGINIS REGINE.



GLORIE and honour, Virgile Mantuan,
Be to thy name ! and I shal as I kan
Folowe thy lanterne as thou goste byforn,
How Eneas to Dido was forsworne,
In thyne Eneyde. And of Naso wol I take
The tenour and the grete effectes make.

Whan Troy *i*-brought was to destruccion
By Grekes sleight, and namely by Synon,
Feynyng the hors offred unto Minerve,
Thurgh which that many a Trojan moste sterve, 10
And Ector had after his deeth appered ;
And fire so woode, it myghte nat ben stered,
In al the noble tour of Ylion,
That of the citee was the cheef dungeon ;
And al the contree was so lowe ybrought,
And Priamus the kyng fordoon and noght ;
And Eneas was charged by Venus
To fleen away ; he tooke Aseanius
That was his sone in his ryght hande and fledde,
And on his bakke he baar, and with him ledde 20
His olde fader, eleped Anchises ;
And by the wey his wyf Creusa he lees,
And mochel sorowe hadde he in his mynde,
Er that he koude his felawshippe fynde.
But at the laste, whan he hadde hem founde,
He made him redy in a certeyn stounde,
And to the see ful faste he gan him hye,

And sayleth forth with al his companye
Towarde Ytaylor, as wolde destanee.

But of his aventures in the see, 8,
Nys nat to purpos for to speke of here,
For it acordeth nat to my matere.
But as I seyde, of hym and of Dydo
Shal be my tale, til that I have do.

So longe he saylled in the salte see,
Til in Lybye unneth arryved he,
So was he with the tempest al to-shake.
And whan that he the havene had ytake,
He had a knyghte was called Achates, 40
And him of al his felawshippe he ches
'To goon with him, the contree for tresppe.
He toke with him na more companye,
But forth they goon, and lafte hise shippes ride,
His fere and he, withouten any guyde.

So longe he walketh in this wildernessse,
Til at the last he mette an hunteresse,
A bowe in hande, and arwes hadde shee ;
Hire clothes were knytte unto the knee.
But she was yit the fairest creature 50
That ever was yformed by nature ;
And Eneas and Achates she grette,
And thus she to hem spak whan she hem mette.

'Sawe ye,' quod she, 'as ye han walked wide,
Any of my sustren walke yow besyde,
With any wilde boor or other beste,
That they han hunted to in this foreste,
Ytukked up, with arwes in hire cas?'

'Nay soothly, lady!' quod this Eneas ;
'But by thy beauté, as yt thynketh me,
Thou myghtest never erthely woman be, 60

But Phebus suster artow, as I gesse.
 And yf so be that thou be a goddesse,
 Have mercy on oure labour and oure woo.'

'I nam no goddesse soothely,' quod she thoo;
 'For maydens walken in this contree here,
 With arwes and with bowe, in this manere.
 This is the regne of Libie ther ye been,
 Of which that Dido lady is and queene.'
 And shortly tolde al the occasioun
 Why Dido come into that regioun, 70
 Of which as now me lusteth nat to ryme;
 It nedeth nat, it nere but los of tyme.
 For this is al and somme; it was Venus
 His owene moder, that spake with him thus;
 And to Cartage she bad he sholde him dighte,
 And ranysshed anoon out of his sighte.
 I koude folwe worde for worde Virgile,
 But it wolde lasten al to longe while.

This noble queene, that eleped was Dido,
 That whilom was the wife of Sieheo, 80
 That fairer was than the bryghte sonne,
 This noble toun of Cartage hath begonne;
 In which she regneth with so grete honoure,
 That she was holde of alle quenes floure,
 Of gentillesse, of fredome, of beautee,
 That wel was him that myght hir oones see.
 Of kynges and of lordes so desired,
 That al the worlde hire beauté hadde yfired,
 She stode so wel in every wyghtes grace.

Whan Eneas was come unto that place, 90
 Unto the maistre temple of al the toun,
 Ther Dido was in hir devocioun,
 Ful prively his wey than hath he nome.

Whan he was in the *large* temple come,
 I kannat seye yf that hit be possible,
 But Venus hadde him maked invisible;
 Thus seith the booke, withouten any les.

And whan this Eneas and Achates
 Hadden in the temple ben over-alle,
 Than founde they depeynted on a walle, 100
 How Troy and al the londe destrued was.
 ‘Allas, that I was born!’ quod Eneas.
 ‘Thurghout the worlde oure shame is kid so wide
 Now it is peynted upon every side.
 We that weren in prosperitec,
 Be new disclaundred, and in swiche degre,
 No lenger for to lyven I ne kepe.’
 And with that worde he braste out for tó wepe
 So tendirly that routhe it was to seene.

This fresshe lady, of the citee queene, 110
 Stode in the temple, in hire estat royalle,
 So richely, and eke so faire withalle,
 So yonge, so lusty, with hire eighen glade,
 That yf that God that hevenc and erthe made,
 Wolde han a love, for beauté and goodenesse,
 And womanhode, and trouthe, and semlynesse,
 Whom sholde he loven but this lady swete?
 Ther nys no woman to him halfe so mete.
 Fortune, that hath the worlde in governaunce,
 Hath sodeynly broght in so newe a chaunce, 120
 That never yit was in so fremde *a cas*.
 For al the companye of Eneas,
 Which that he wende han loren in the see,
 Aryved ys noght fer fro the citee.
 For which the grettest of his lordes, some
 By aventure ben to the citee come

Unto that same temple for to seke
 The queene, and of hire socour hir beseke ;
 Swich renowne was ther spronge of hir goodnesse.

And whan they hadde tolde al hire distresse,
 And al hir tempeste and hire harde cas, 131
 Unto the queene appered Eneas,
 And openly beknew that it was he.

Who hadde joy thanne, but his meynee,
 That hadden founde hire lord, hire governour ?

The queeno sawgh they dide him swich honour,
 And had herde ofte of Eneas er thoo,
 And in hir herte hadde routhe and woo,
 That ever swiche a noble man as hee
 Shal ben dishereted in swiche degree. 140

And sawgh the man, *that he* was lyke a knyghte,
 And suffisaunt of persone and of myghte,
 And lyke to ben a verray gentilman.

And wel hys wordes he besette kan,
 And hadde a noble visage for the noones,
 And formed wel of brawnes and of boones ;
 And after Venus hadde swich fairenesse,
 That no man myghte be half so faire I gesse,
 And wel a lorde him semede for to bee.

And for he was a straunger, somewhat shee 150
 Lyked him the bette, as God do boote,
 To somme folke often newe thinge is swoote.

Anoon hire herte hath pitee of his woo,
 And with pitee, love come alsoo ;
 And thus for pitee and for gentillesse,
 Refreshed mote he ben of his distresse.

She seyde, certes, that she sory was,
 That he hath had swich peril and swiche cas ;
 And in hire frendely speche, in this manere

She to him spake, *and seyde as ye may here.* 180

‘ Be ye nat Venus sone and Anehises?

In good faythe, al the worshippe and eneres
That I may goodly doon yow, ye shal have ;
Youre shippes and your meynee shal I save.’

And many a gentil worde she spake him too,
And comaunded hire messageres goo

The same day, withouten any faylle,
Hys shippes for to seke and hem vitaylle.

Ful many a beeste she to the shippes sente,
And with the wyne she gan hem to presente, 170

And to hire royalle paleys she hire spedde,
And Eneas alwey with hire she ledde.

What nedeth yow the feste to diseryve?

He never better at ese was his lyve.

Ful was the feste of deyntees and richesse,
Of instruments, of songe, and of gladnesse,
And many an amoureuse lokyng and devys.

This Eneas is comen to Paradyse

Out of the swolowe of helle ; and thus in joye
Remembreth him of his estaat in Troye. 180

To daunsyng chambres ful of parements,
Of riche beddes, and of pavements,

This Eneas is ladde after the meete.

And with the queene whan that she hadde seete,
And spieces parted, and the wyne agoon,

Unto hyse chambres was he lad anoon

To take his ease, and for to have his reste

With al his folke, to doon what so hem leste.

Ther nas coursere wel ybridled noon,

Ne stede for the justyng wel to goon, 190

Ne large palfrey, esy for the noones,

Ne juwel frette ful of riche stoones,

Ne sakkcs ful of gold, of large wyghte,
 Ne rubee noon that shyneth by nyghte,
 Ne gentil hawteyn faukone heroueer,
 Ne hound for hert, or wilde boor or deer,
 Ne coupe of golde, with floryns newe ybette,
 That in the londe of Lybye may ben gette,
 That Dido ne hath hit Eneas isente ;
 And al is payed, what that he hath spente. 200
 Thus kan this honourable queene hir gestic calle,
 As she that kan in fredome passen alle.

Eneas soothly eke, withouten les,
 Hath sent to his shippe by Achates
 After his sone, and after ryeche thynges,
 Booth ceptre, clothes, broches, and eke rynges ;
 Somme for to were, and somme for to presente
 To hire, that alle thise noble thinges him sente ;
 And bad hys sone how that he sholde make
 The presentynge, and to the queene it take. 210

Repeyred is this Achates agayne,
 And Eneas ful blysfyl is and fayne,
 To seen his yonge sone Ascanius.
 For unto him yt was reported thus,
 That Cupido, that is the god of love,
 At prayere of his moder hye above,
 Hadde the liknesse of the childe ytake,
 This noble queene enamoured to make
 On Eneas. But of that scripture
 Be as be may, I make of yt no cure. 220
 But sooth is this, the queene hath made swich chere
 Unto this childe that wonder is to here ;
 And of the present that his fader sente,
 She thanked him *ful* ofte in goode intente.

Thus is this queene in pleasaunce and in joye,

With al this newe lusty folke of Troye.
 And of the dedes hath she moore enquired
 Of Eneas, and all the storie lered
 Of Troye; and al the longe day they tweye
 Entendeden for to speke and for to pleye. 239
 Of which ther gan to bredden swich a fire,
 That sely Dido hath now swich desire
 With Eneas hir newe geste to deele,
 That she loste hire hewe and eke hire heele.

Now to theeffecte, now to the fruyt of al,
 Why I have tolde this storye, and tellen shal.

Thus I bygynne:—It fil upon a nyght,
 Whan that the moone upreysed hadde hire lyght,
 This noble queene unto hire reste wente.
 She siketh soore, and gan hire selfe turmente; 240
 She waketh, walwithe, maketh many a brayde,
 As doone these lovers, as I have herde sayde;
 And at the laste, unto hire suster Anne
 She made hir mone, and ryght thus spake she thanne.

‘Now dere suster myn, what may it be
 That me agasteth in my dreame?’ quod she.
 ‘This ilke Trojane is so in my thoghte,
 For that me thinketh he is so wel ywroghte,
 And eke so likely to ben a man,
 And therwithal soo mykel good he kan, 250
 That al my love and lyf lyth in his eure.
 Have ye nat herde hym telle his aventure?
 Now certes, Anne, yif that ye rede me,
 I wil fayne to him ywedded be;’
 (This is theeffect; what sholde I more seyn?)
 ‘In him lith alle, to doo me lyve or deyn.’

Hir suster Anne, as she that kouth hire goode,
 Seyde as hire thoght, and somedel yt withstoode.

But herof was so longe a sermonyng,
Yt were to longe to make rehersyng. 260

But, finally, yt may nat be withstonde ;
Love woll love, for no wyght wol yt wonde.

The dawenyng upryst oute of the see,
This amoureuse queene chargeth hire meynne
The nettes dresse, and speres brood and kene ;

An huntynge wol this lusty fresshe queene,
So priketh hire this newe joly woo.

To hors is al hire lusty folke ygoo ;
Unto the courte the houndes ben ybroughte,
And up on coursere, swyfte as any thoughte, 270

Hir yonge knyghtes heven al aboute,
And of hir women eke an houghe route.

Upon a thikke palfrey, paper white,
With sadel rede, enbroudet with delyte,

Of golde the barres, up enbosed heighe,
Sitte Dido, al in golde and perrey wreighe.

And she is faire as is the bryghte morwe,
That heeleth seke folkes of nyghtes sorwe.

Upon a coursere, startlyng as the fire,
Men myghte turne him with a lytel wire, 280

Sitte Eneas, lyke Phebus to devyse,
So was he fressh arrayed in hys wyse.

The fomy bridel, with the bitte of golde,
Governeth he ryght as himselfe hathe wolde.

And fourth this *noble* queene, this lady ride
On huntynge, with this Trojan by hire syde.

The heerde of hertes founden ys anoon,
With ‘Hay! goo bet! prike thou! lat goon, lat goon !

Why nyl the lyoun comen, or the bere,
That Y myght hym ones meten with this spere?’ 290

Thus seyn thise yonge folke, and up they kille

But as in love alday it happeth soo,
 That oon shal lawghen at anotheres woo ;
 Now lawghed Eneas, and is in joye,
 And more riches than ever was in Troye.

O sely woman, ful of innocence,
 Ful of pitee, of trouthe, and conscience, 330
 What maked yow to men to trusten soo ?
 Have ye suche rewthe upon hir feyned woo,
 And han suche ensamples olde yow beforne ?
 Se ye nat alle how they ben forsworne ?
 Where se ye oon that he ne hath lafte his leefe ?
 Or ben unkynde, or don hir some myscheefe ?
 Or pilled hir, or bosted of hys dede ?
 Ye may as wel hit seen as ye may rede.
 Take hede now of this grete gentilman,
 This Trojan, that so wel hire plese kan, 340
 That feyneth him so trewe and obeysinge,
 So gentil, and so privy of his doynge ;
 And kan so wel doon al his obeysaunce
 To hir, at festes and at daunce,
 And whan she gooth to temple, and home agayne,
 And fasten til he hath his lady sayne ;
 And beren in his devyses for hire sake
 Wot I not what ; and songes wolde he make,
 Justen, and doon of armes many thynges,
 Send hire letres, tokens, broches, and rynges. 350
 Now herkneth how he shal his lady serve.

Ther as he was in peril for to sterve
 For hunger and for myscheef in the see,
 And desolate, and fledde fro his contree,
 And al his folke with tempeste al to-driven,
 She hath hir body and eke hir reame yiven
 Into his hande, theras she myghte have beene

Of other lande than of Cartage a queene,
And lyved in joy ynogh; what wolde ye more?

This Eneas, that hath thus depe yswore, 360
Ys wery of his crafte within a throwe;
The hoothe erneste is al overblowe.

And prively he dooth his shippes dyghte,
And shapeth him to steele away by nyghte.

This Dido hath suspesion of this,
And thoughte wel that hit was al amys;
For in his bedde he lythe a nyght and siketh,
She asketh him anoon what him mysliketh;
'My dere herte which that I love mooste?'

'Certes,' quod he, 'thys nyght my fadres gooste
Hath in my slepe me so sore turmentede, 371
And eke Mercure his message hath presentede,
That nedes *to* the conqeste of Ytayle
My destany is soone for to sayle,
For whiche me thynketh, brosten ys myn herte.'
Therwith his false teeres oute they sterte
And taketh hir within his armes twoo.

'Ys that in ernest?' quod she; 'wol ye soo?
Have ye nat sworne to wife me to take?
Allas, what woman wol ye of me make? 380
I am a gentil woman, and a queene;
Ye wol nat fro your wyfe thus foule fleene!
That I was borne, alas! what shal Y doo?'

To telle in short, this noble queene Dido
She seketh halwes, and doothe sacrificise;
She kneleth, crieth, that routhe is to devyse;
Conjureth him, and profereth him to bee
Hys thral, hys servant, in the lest degre.
She falleth him to foote, and swowneth there,
Disshevely with hire bryghte gelte here, 390

And seith, 'Have mercy! let me with yow ryde;
 These lordes, which that wonnen me besyde,
 Wol me destroien oonly for youre sake.
 And ye wole now me to wife take,
 As ye han sworn, than wol I yive yow leve
 To sleen me with your swerd now soone at eve,
 For than shal I yet dien as youre wife.
 I am with childe, *and* yive my childe his lyfe!
 Mercy lorde, have pitee in youre thought!
 But al this thing avayleth hire ryght nought, 400
 For on a nyght sleping he let hir lye,
 And staal away upon his companye,
 And as a traytour forthe he gan to sayle
 Towarde the large countree of Ytayle.
 And thus hath he lefte Dido in woo and pyne,
 And weddid there a lady highte Lavyne.
 A clooth he lefte, and eke his swerde stondynge
 (Whan he fro Dido staale in *hire* slepynge,)
 Righte at hir beddes hed: so gan he hyc,
 Whanne that he staale away to his navye. 410

Which clooth, whan sely Dido gan awake,
 She hath *i*-kyste ful ofte for hys sake;
 And seyde, 'O swete clooth, while Jupiter hit leste,
 Take my soule, unbynde me of this *unreste*,
 I have fulfilled of fortune al the course.'
 And thus, alas, withouten hys socourse,
 Twenty tyme yswowned hath she thanne.
 And whan that she unto hir suster Anne
 Compleyned had, of which I may not write,
 So grete routhe I have hit for to endite, 420
 And bad hir noryce and hir sustren goon
 To feche fire, and other thinges anoon,
 And seyde that she wolde sacrifice;

And whan she myght hir tyme wel espye,
 Upon the fire of sacrifice she sterte,
 And with his swerde she roof hire to the herte.
 But, as myn auctour seythe, yit thus she seyde,
 Or she was hurte, beforne or she deide,
 She wroot a letter anoon, that thus biganne.

‘ Ryght so,’ quod she, ‘ as the white swanne ⁴³⁰
 Ayenst his deeth begynneth for to synge ;
 Ryght so to yow I make my compleynynge,
 Nat that I trowe to geten yow agayne,
 For wel I woot *that* hit is al in vayne,
 Syn that the goddys ben contrariouse to me.
 But syn my name ys loste thurgh yow,’ quod she,
 ‘ I may wel leese a worde on yow, or letter,
 Albeit I shal be never the better.
 For thilke wynde that blew your shippe away,
 The same wynde hath blowe away your fay.’ ⁴⁴⁰
 But who-so wool al this letter have in mynde,
 Rede Ovyde, and in him he shal hit fynde.

EXPLICIT LEGENDA DIDONIS, MARTIRIS,
 CARTAGENIS REGINE.

INCIPIT LEGENDA YPSIPHILE ET MEDEE,
 MARTIRIS.



THOU roote of false lovers, duke Jason!
 Thou slye devourer, and confusyon
 Of gentil women, gentil creatures!
 Thou madest thy reclaymynge and thy
 lures

To ladies of thy staately aparaunce,
 And of thy wordes farsed with plesaunce,
 And of thy feyned trouthe, and thy manere,
 With thyne obeysaunce and humble chere,
 And with thy countrefeted peyn and woo!
 Ther other falsen oon, thou falseste twoo! 19
 O, ofte swore thou that thou woldest deye
 For love, whan thou ne felteste maladeye,
 Save foule delyte, which that thou callest love!
 If that I lyve, thy name shal be shove
 In Englyssh, that thy sleighte shal be knowe;
 Have at the, Jason! now thyn horn is blowe!
 But certes, it is bothe rowth and woo,
 That love with false lovers werketh soo;
 For they shalle have wel better and gretter chere
 Than he that hath i-bought love ful dere, 20
 Or had in armes many a bloody box.
 For ever as tender a capon eteth the fox,
 Though he be fals, and hath the foule betrayed,
 As shal the goode man that therfor payed;
 Alle thof he have to the capon skille and ryghte,
 The false fox wil have his part at nyghte.
 On Jason this ensample is wel yseene,
 By Isiphile and Medea the queene.

In Tessalye, as Ovyde telleth us,
 Ther was a knyght that highte Pelleus, 30
 That had a brother whiche that hight Eson.
 And whan for age he myghte unnethes gon,
 He yaf to Pelleus the governynge
 Of al his regne, and made him lorde and kyng.
 Of whiche Eson this Jason geten was;
 That in his tyme in al that lande ther nas
 Nat suche a famouse knyghte of gentillesse,

Of fredome, of strengthe, and of lustynessæ.
 After his fader deeth he bar him soo,
 That there nas noon that lyste ben his foo, 40
 But dide him al honour and companye.
 Of which this Pelleus hath grete envye,
 Imagynynge that Jason myghte bee
 Enhaunced so, and put in suche degree,
 With love of lordes of his regioun,
 That from hys regne he may be put adoun.
 And in his witte a nyghte compassed he
 How Jason myghte beste destroyed be,
 Withoute selaunder of his compassemente.
 And at the laste he tooke avysemente, 50
 To senden him into some fer contre,
 There as this Jason may distroyed be.
 This was his witte, al made he to Jasoun
 Grete chere of love and of affeccoun,
 For drede leste his lordes hyt espyede.
 So felle hyt so as fame renneth wide,
 Ther was suche tidynge overalle, and suche los,
 That in an ile that called was Colcos,
 Beyonde 'Troye estewarde in the see,
 That ther was a ram that men myghte see, 60
 That had a flees of golde, that shoon so bryghte,
 That no wher was ther suche another syghte,
 But hit was kept alway with a dragoun,
 And many other mervels up and down ;
 And with twoo booles maked al of bras,
 That spitten fire ; and mucche thinge ther was.
 But this was eke the tale nathelees,
 That who-so wolde wyne thilke flees,
 He moste booth, or he hit wyne myghte,
 With the booles and the dragoun fyghte ; 70

And kyng Otes lorde was of that ile.
 This Pelleus bethoughte upon this wile,
 That he his nevywe Jason wolde enhorte
 To saylen to that londe, him to disporte.
 And seyde, ' Neviwe, yf hyt myghte be,
 That suche worshippe myghte falle the,
 That thou this famouse tresor myghte wynne,
 And brynge hit my regyoun wythinne,
 It were to me grette plesaunce and honoure ;
 Thanne were I holde to quyte thy labour, 86
 And al the costes I wole my-selfe make ;
 And chese what folke thou wylte wyth the take.
 Let see nowe, darstow taken this viage ?'

Jason was yonge, and lustie of corage.
 And undertooke to doon this ilke emprise.
 Anoon Argus his shippes gan devyse.

With Jason wente the stronge Hereules,
 And many another that he with him ches.
 But who-so axeth who is with him goon,
 Let him rede Argonauticon, 96
 For he wol telle a tale longe ynoughe.
 Philoctetes anoon the sayle up droughe,
 Whan the wynde was good, and gan him hye
 Out of his contree called Tessalye.
 So longe he sayled in the salte see,
 Til in the ile of *Lemnos* arryved he.
 Al be this not rehersed of Guydo,
 Yet seyth Ovyde in hys Epistles so ;
 And of this ile lady was and queene,
 The faire yonge Ypsiphile the shene, 100
 That whilom Thoas doughter was, the kyunge.

Ypsiphyle was goon in hire pleyng,
 And romynge on the clyves by the see.

Under a brake anoon espiede shee
 Where lay the shippe that Jason gan arryve.
 Of hire goodnesse adoun she sendeth blyve,
 To weten, yf that any straunge wyghte
 With tempest thider were yblow anyghte,
 To doon hem socour, as was hir usaunce,
 To forthren every wyghte, and don plesaunce 110
 Of very bountee, and of curteysie.

This messagere adoun him gan to hye,
 And founde Jason and Ercules also,
 That in a cogge to londe were ygo,
 Hem to refresshen, and to take the eyre.
 The morwenyng atempree was and faire,
 And in hys wey this messenger hem mette ;
 Ful kunnyngely these lordes twoo he grette,
 And did his message, askynge hem anoon
 If they were broken, or woo begoon, 120
 Or hadde nede of lodesmen or vitayle ;
 For socoure they shulde nothings fayle,
For it was outerly the queenes wille.

Jason ansuerde mekely and stille ;
 ‘ My lady,’ quod he, ‘ thanke I hertely
 Of hire goodnesse ; us nedeth trewely
 Nothing as now, but that we wery bee,
 And come for to pley out of the see,
 ‘Til that the wynde be better in oure weye.’

This lady rometh by the clyffe to pleye 130
 With hire meynee, endelonge the stronde,
 And fyndeth this Jason and thyse other stonde
 In spekyng of this thinge, as I yow tolde.

This Ercules and Jason gan beholde
 How that the queene it was, and faire hir grette.
 Anoon ryght as they with this lady mette.

And she tooke hede, and knywe by hire manere,
 By hire array, by wordes, and by chere,
 That hit were gentil men of grete degree.
 And to the castel with hir ledeth shee 140
 These straunge folke, and dooth hem grete honour ;
 And axeth hem of travaylle and labour
 That they han suffred in the salte see ;
 So that withynne a day two or three
 She knywe by the folke that in his shippes bee,
 That hyt was Jason, full of renomee,
 And Ereules, that hadde the grete los,
 That soughten the adventures of Colcos.
 And did hem honour more than before,
 And with hem deled ever the lenger the more ; 150
 For they ben worthy folke withouten les.
 And, namely, she spake most with Ereules,
 To him hir herte bare, he shulde bee
 Sad, wise, and trewe, of wordes avyse,
 Withouten any other affeccion
 Of love, or any other ymaginacioun.

This Ereules hathe this Jason preysed,
 That to the sonne he hath hyt up reysed,
 That halfe so trewe a man ther nas of love
 Under the cope of hevене, that is above ; 160
 And he was wyse, hardy, secre, and ryehie ;
 Of these thre poyntes there nas noon hym liche.
 Of fredome passed he, and lustihede
 Alle thoo that lyven, or ben dede.
 Therto so grete a gentil man was he,
 And of Tessalye likly kynge to be.
 Ther nas no lakke, but that he was agaste
 To love, and for to speke shamefaste ;
 Him lever had himselfe to mordre and dye,

Than that men shulde a lover him espye. 170
 As wolde God that I hadde iyive
 My bloode and flessch, so that I myghte lyve
 With the bones, that he hadde oughe-where a wife
 For his estaat ! for suche a lusty lyfe
 She sholde lede with this lusty knyghte !
 And al this was compassed on the nyghte
 Betwix him Jason, and this Ercules.
 Of these twoo here was a shrewede les,
 To come to house upon an innocent,
 For to bedote this queene was her entent. 180
 This Jason is as coy as ys a mayde ;
 He loketh pitously, but nocht he sayde
 But freely yafe he to hir counselleres
 Yiftes grete, and to hire officeres,
 As God wolde that I leyser had and tyme,
 By processe al his wowyng for to ryme !
 But in this house yf any fals lover be,
 Ryght as himselfe now dothe, ryght so did he,
 With feynynge, and with every sotil dede.
 Ye gete no more of me, but ye wol rede 190
 The original that telleth al the cas.

The sothe is this, that Jason weddid was
 Unto this queene, and toke of hire substaunce
 What-so him lyste unto hys purveyaunce ;
 And upon hir begate he children twoo,
 And drough his saylle, and saugh hir never moo.
 A letter sente she to hym certeyn,
 Which were to longe to written and to seyn ;
 And him repreveth of his grete untrouthe,
 And prayeth him on hir to have some routhe. 200
 And of his children two, she sayede him this :
 That they be lyke of alle thinge, ywis,

To Jason, save they couthe nat begile.
 And prayede God, or hit were longe while,
 That she that had his herte yrefte hir fro,
 Most him fynden to hir untrewes alsoo ;
 And that she moste booth hir chilären spille,
 And alle thoo that suffreth hym his wille ;
 And trewe to Jason was she al hir lyve,
 And ever kept hir chaste, as for his wyve ; 210
 And hadde never she joye at hir herte,
 But dyede for his love of sorwes smerte.

To Colcos comen is this duke Jasoun,
 That is of love devourer and dragoun,
 As nature appeteth forme alwey,
 And from a forme to forme it passen may ;
 Or as a welle that were botomeles,
 Ryght so kan Jason *ne* have no pes,
 For to desiren, thurgh his appetite,
 To doon with gentil wymmen hys delyte ; 220
 This is his luste, and his felicité.
 Jason is romed forthe to the cité,
 That whylom cleped was Jasonicos,
 That was the maister toune of al Colcos,
 And hath ytolde the cause of his comynge
 Unto Æetes, of that contree kynge ;
 Praynge him that he moste doon his assay
 To gete the fese of golde, yf that he may.
 Of which the kynge assentith to hys bone,
 And dothe him honour as hyt is *to* done, 230
 So ferforthe, that his doghtre and his eyre,
 Medea, which that was so wise and feyre,
 That feyrer saugh ther never man with ye,
 He made hire doone to Jason companye
 Atte mete, and sitte by him in the halle.

Now was Jason a semely man withalle,
 And like a lorde, and had a grete renoun,
 And of his loke as rial as lyoun,
 And goodly of his speche, and famulere,
 And koude of love al crafte and arte plenere 240
 Withoute boke, and everyche observaunce.
 And as fortune hir oughte a foule meschaunce,
 She wex enamoured upon this man.

‘Jason,’ quod she, ‘for oght Y se or kan,
 As of this thinge the whiche ye ben aboute,
 Ye, and your-selfe ye put in moche doute ;
 For who-so wol this aventure acheve,
 He may nat wele astarten, as Y leve,
 Withouten dethe, but I his helpe be.
 But nathelesse, hit ys my wille,’ quod she, 250
 ‘To furtheren yow, so that ye shal nat dye,
 But turne sounde home to youre Tessalye.’

‘My ryghte lady,’ quod thys Jason, ‘thoo,
 That ye han of my dethe or of my woo
 Any rewarde, and doon me this honour,
 I wote wel, that my myght, ne my labour,
 May not deserve hit in my lyves day ;
 God thanke yow, ther Y ne kan nor may.
 Youre man am I, and louly yow beseche
 To ben my helpe, withoute more speche ; 260
 But certes for my dethe shal I not spare.’

Thoo gan this Medea to him declare
 The peril of this case, fro poynt to poynte
 Of hys batayle, and in what disjoynte
 He mote stonde ; of whiche no creature
 Save oonly she ne myght hys lyfe assure.
 And shortely, ryght to the poynt to goo,
 They been accorded ful betwex hem two,

That Jason shal hir wedde, as trewe knyght,
 And terme ysette to come soone at nyght 270
 Unto hir chambre, and make there hys oothe
 Upon the goddys, that he for leve ne loothe
 Ne shulde hire never falsen, nyght ne day,
 To ben hir husbonde while he lyve may,
 As she that from hys dethe hym saved there.
And here upon at nyght they mete yfere,
 And doth his oothe, and goothe with hir to bedde,
 And on the morwe upwarde he him spedde,
 For she hath taught him how he shal not faile
 The flese to wynne, and stynten hys batayle; 280
 And saved him his lyfe and his honour,
 And gete a name as a conquerour,
 Ryght thurgh the sleyghte of hir enchauntement.

Now hath Jason the fleese, and home ys went
 With Medea, and tresoures ful grete woone;
 But unwiste of hir fader she is goone
 To Tessalye, with duke Jason hir leefe,
 That afterwarde hath broght hir to myschefe.
 For as a traytour he ys from hire goo,
 And with hir lefte yonge children twoo, 290
 And falsly hath betrayed hir, allas!
 And ever in love a cheve traytour he was;
 And wedded yet the thridde wife anon,
 That was the doghtre of kynge Creon.

This ys the mode of lovyng and guerdoun,
 That Medea receyved of Jasoun
 Ryght for hir trouthe, and for hir kyndenesse,
 That loved hym beter thane hir-selfe, Y gesse;
 And lefte hir fadir and hire heritage.
 And of Jason this is *the* vassalage, 300
 That in hys dayes nas never noon yfounde

So fals a lover goynge on the grounde.
 And therefore in her letter thus she sayde,
 First whan she of hys falsnesse hym umbrayae .—
 ‘Why lykede me thy yelow heere to see,
 More than the boundes of myn honesté?
 Why lykede me thy youthe and thy fairenesse,
 And of thy tonge the infynyte graciousnesse?
 O, haddest thou in thy conquest ded ybe,
 Ful mykel untronthe hadde ther dyed with the!’
 Wel kan Ovyde hir letter in verse endyte. 311
 Which were as now to longe for me to write.

EXPLICIT LEGENDA YSIPHILE ET MEDEE
 MARTIRUM.

INCIPIT LEGENDA LUCRECIE ROME,
 MARTIRIS.



OW mote I sayne the xilynge of kynges
 Of Rome, for *the horrible doynges*
 Of the laste kyng Tarquynyus,
 As saythe Ovyde, and Titus Lyvyus.
 But for that cause telle I nat thys story,
 But for to preysen, *and* drawen to memory
 The *verray* wife, the *verray* Lueresse,
 That for hir wifehode, and hir stedfastnesse,
 Nat oonly that these payens hir comende,
 But that *i-cleped* ys in oure legende 19
 The grete Anstyne, hath grete compassyoun
 Of this Lueresse that starfe in Rome toun.

And in what wise I wol but shortly trete,
And of this thyng I touche wil but the grete.

Whan Ardea beseged was aboute
 With Romaynes, that ful sterne were and stoute,
 Ful longe lay the sege, and lytel wroghten,
 So that they were halfe ydel, as hem thoghten.
 And in his pley Tarquynyus the yonge
 Gan for to jape, for he was lyghte of tonge ; 20
 And sayde, that hyt was an ydel lyfe ;
 No man dide ther more than hys wife.
 ‘ And lat us speke of wives that is best ;
 Preise every man hys owne as him lest,
 And with oure speche let us ease oure herte.’

A knyght, that highte Colatyne, up sterte,
 And sayde thus :—‘ Nay, for hit ys no nede
 To trowen on the worde, but on the dede.
 I have a wife,’ quod he, ‘ that as I trowe
 Ys holden good of *alle* that ever hir knowe. 30
 Go we to Rome, to nyght, and we shul se.’
 Tarquynyus answerde, ‘ That lyketh me.’
 To Rome they be come, and faste hem dighte
 To Colatynes house, and doun they lyghte,
 Tarquynyus, and eke this Colatyne.
 The housbonde knywe the estres wel and fyne,
 And ful prevely into the house they goon,
 For at the gate porter was there noon :
 And at the chambre dore they abyde.
 This noble wyfe sate by hir beddys syde 40
 Disshevely, for no malice she ne thoghte,
 And softe wolle, sayeth our boke, that she wroghte,
 To kepen hir fro slouth and ydilnesse ;
 And bad hir servauntes doon hir besynesse ;
 And axeth hem, ‘ What tydynges heren ye ?

How sayne men of the sege ? how shal yt be ?
 God wolde the walles werne falle adoune !
 Myn housbonde ys to longe out of this tounne,
 For which the drede doth me so to smerte ;
 Ryght as a swerde hyt styngeth to myn herte, 50
 Whan I thenke on these or of that place.
 God save my lorde, I pray him for *his* grace !
 And therwithalle ful tendirly she wepe,
 And of hir werke she toke no more kepe,
 But mekely she let hire eyen falle,
 And thilke semblant sat hir wel withalle.
 And eke the teeres ful of hevyytee,
 Embelysshed hire wifely chastitee.
 Hire countenance ys to her herte digne,
 For they acorden in dede and in signe. 60
 And with that worde hir husbonde Colatyne,
 Or she of him was ware, come stertyng ynne,
 And sayede, ‘ Drede the nocht, for I am here ! ’
 And she anoon up roos, with blysfyl chere,
 And kyssed hym, as of wives ys the wone.
 Tarquynyus, this prowde kynges sone,
 Conceyved hath hir beauté and hir chere,
 Hire yelow heer, hir bounté, and hire manere,
 Hir hywe, hir wordes that she hath compleyned,
 And by no craft hire beauté was not feyned ; 70
 And kaughte to this lady suche desire,
 That in his herte brent as any fire
 So wodely that hys witte was foryeten,
 For wel he thoghte she shulde nat be geten.
 And ay the more he was in dispaire,
 The more he covetyth, and thought hir faire ;
 Hys blynde lust was al hys covetynge.
 On morwe, whan the brid began to syrge,

Unto the sege he cometh ful pryvely,
 And by himselfe he walketh sobrelly. 80
 The ymage of hir recording alwey newe ;
 Thus lay hir heer, and thus fressh was hir hewe.
 Thus sate, thus spake, thus spanne, this was hir
 chere,

Thus faire she was, and thys was hir manere.
 Al this conceyte hys herte hath new ytake,
 And as the see, with tempeste al to-shake,
 That after whan the storme ys al agoo,
 Yet wol the watir quappe a day or twoo ;
 Ryght so, thogh that hir forme were absent,
 The plesaunce of hir forme was present. 90
 But natheles, nat plesaunce, but delyte,
 Or an unryghtful talent with dispite,
 ‘ For mawgree hir, she shal my lemman be :
 Happe helpeth hardy man alway,’ quod he,
 ‘ What ende that I make, hit shal be soo !’
 And gyrt hym with his swerde, and gan to goo,
 And he forthe-ryght til he to Rome ys come,
 And al allon hys way than hath he nome,
 Unto the house of Colatyne ful ryght ;
 Doune was the sonne, and day hath lost hys lyght.
 And inne he come unto a prevy halke, 101
 And in the nyght ful thefely gan he stalke,
 Whan every wyght was to hys reste broght.
 Ne no wyghte had of tresoun suehe a thocht,
 Whether by wyndow, or by other gynne.
 With swerde ydrawe, shortly he cometh ynne
 There as she lay, thys noble wyfe Lueresse,
 And as she woke, hir bed she felte presse :
 ‘ What best ys that,’ quod she, ‘ that weyeth thus ?’
 ‘ I am the kynges sone Tarquynyus,’ 110

Quod he ; ‘ but and thow crye, or noyse make,
 Or yf thou any creature awake,
 Be thilke God that formede man on lyve,
 This swerde thurgh thyn herte shal Y ryve.’
 And therwithal unto hir throte he sterte,
 And sette the swerde al sharpe unto hir herte.
 No worde she spake, she hath no myght therto,
 What shal she sayne ? hir wytte ys al agoo !
 Ryght as a wolfe that *fint* a *lomb allone*,
 To whom shal she compleyne or make mone ? 120
 What ? shal she fyghte with an hardy knyghte ?
 Wel wote men a woman hath no myghte.
 What ! shal she crye, or how shal she asterte,
 That hath hir by the throte, with swerde at herte ?
 She axeth grace, and seyde al that she kan.

‘ Ne wolt thou nat ? ’ quod this cruelle man ;
 ‘ As wisly Jupiter my soule save,
 I shal in the stable slee thy knave,
 And lay him in thy bed, and lowde crye,
 That I the fynde in suche avowtrye ; 130
 And thus thou shalt be ded, and also lese
 Thy name, for thou shalt not chese.’
 Thise Romaynes wyfes loveden so hir name
 At thilke tyme, and dredden so the shame
 That what for fere of sklaundre, and drede of dethe,
 She loste both attones wytte and brethe ;
 And in a swowgh she lay, and woxe so ded,
 Men myghten smyten of hir arme or hed,
 She feleth nothings, neither foule ne feyre.

Tarquynus, thou art a kynges eyre, 140
 And sholdest as by lynage and by ryght
 Doon as a lorde and *as* a verray knyght,
 Why hastow doon dispite to chevalrye ?

Why hastow doon thys lady vylanye ?

Allas, of the thys was a vilenouse dede !

But now to the purpose ; in the story I rede,
Whan he was goon al this myschaunce ys falle.

Thys lady sent aftir hir frendes alle,

Fader, moder, housbonde, alle yfere,

And dysshevelee with hir heere elere, 150

In habyte suche as wymmen usede thoo

Unto the buryinge of hir frendes goo,

She sytte in halle with a sorowful syghte.

Hir frendes axen what hir aylen myghte,

And who was dede, and she sytte aye wepynge.

A worde for shame ne may she forthe out-brynge,

Ne upon hem she durste nat beholde,

But atte laste of Tarquyny she hem tolde

This rewful case, and al thys thing horryble.

The woo to telle hyt were impossible 160

That she and al hir frendes made attones.

Al hadde folkes hertys ben of stones,

Hyt myght have maked hem upon hir rewe,

Hire herte was so wyfely and so trewe.

She sayde that for hir gylt ne for hir blame

Hir housbonde shulde nat have the foule name ;

That nolde she *nat* suffre by no wey.

And they answerde alle unto hir fey,

That they forgaf hyt hyr, for hyt was ryght.

Hyt was no gilt ; hit lay not in hir myght. 170

And seyden hire ensamples many oon.

But al for noght, for thus she seyde anoon :

‘ Be as be may,’ quod she, ‘ of forgyfyng ;

Y wol not have noo forgyft for nothinge.’

But pryvely she kaughte forth a knyfe,

And therwithalle she rafte hir-selfe hir lyfe ;

And as she felle adoun she kaste hire loke,
 And of hir clothes yet hede she toke ;
 For in hir fallynge yet she hadde care,
 Lest that hir fete or suche thyng lay bare, 180
 So wel she lovede elenness, and eke trouthe !
 Of hir had al the toun of Rome routhe,
 And Brutus hath by hir chaste bloode swore,
 That Tarquyny shulde ybanysshed be therfore,
 And al hys kynne ; and let the peple calle,
 And openly the tale he tolde hem alle ;
 And openly let eary her on a bere
 Thurgh al the toun, that men may see and here
 The horryble dede of hir oppressyoun.
 Ne never was ther kynge in Rome toun 190
 Syn thilke day ; and she was holden there
 A seynt, and ever hir day yhalwed dere,
 As in hire lawe. And thus endeth Lucesse
 The noble wyfe, Titus beryth wittnesse.
 I telle hyt, for she was of love so trewe,
 Ne in hir wille she chaugede for no newe,
 And in hir stable herte, sadde and kynde,
 That in these wymmen men may al day fynde,
 Ther as they kaste hire herte, there it dwelleth.
 For wel I wot, that Criste himself telleth, 200
 That in Israel, as wyde as is the londe,
 That so grete feythe in al the londe he ne fonde,
 As in a woman ; *and* this is no lye.
 And as *for men*, loketh which tyrannye
 They doon al day, assay hem who-so lyst,
 The trewest ys ful brotil for to triste.

EXPLICIT LEGENDA LUCRECIE, ROME, MARTIRIS.

INCIPIT LEGENDA ADRIANE DE
ATHENES.

JUGE infernal Mynos, of *Crete* king,
Now cometh thy lotte; now com
mestow on the ryng.
Nat oonly for thy sake writen ys this
story,

But for to clepe ageyn unto memory
Of Theseus the grete untrew of love,
For which the goddis of heven above
Ben wrothe, and wreche han take for thy synne.
Be rede for shame! now I thy lyfe begynne.

Mynos, that was the myghty kynge of *Crete*,
That wan an hundred citees stronge and grete, 10
To scole hath sent hys sone Androgeus
To Athenes, of the which hyt happeth thus,
That he was slayne, lernynge philosophie,
Ryght in that citee, nat but for envye.

The grete Mynos of the whiche I speke,
His sones dethe ys come for to wreke,
And the citee besegeth harde and longe;
But natheles, the walles be so stronge,
And Nysus, that was kynge of that citee,
So chevalrouse, that lytel dredeth he; 20
Of Mynos or hys oste toke he no cure.
Til, on a day, befel an aventure,
That Nisus doghtre stode upon the walle,
And of the sege sawe the maner alle.
So hyt happede, that at a skarmysshynge,
She caste hir hert upon Mynos the kynge,

For hys beauté, and hys chevalrye,
 So sore, that she wende for to dye.
 And, shortly of this processe for to pace,
 She made Mynos wynnen thilke place, 30
 So that the citee was al at his wille,
 To saven whom hym lyst, or elles spille.
 But wikkidly he quytte her kyndenesse,
 And let hir drenche in sorowe and distresse,
 Ner that the goddys had of hir pité;
 But that tale were to longe as now for me.
 Athenes wanne this kynge Mynos also,
 As *Alcathoe* and other tounes mo;
 And this theeffect, that Mynos hath so dryven
 Hem of Athenes, that they mote hym yiven 40
 Fro yere to yere hir owne children dere
 For to be slayne, as ye shal after here.

Thys Mynos hath a monstre, a wikked beste,
 That was so cruelle that withouten areste,
 Whan that a man was broght into hys presence,
 He wolde hym ete; ther helpeth no defence.
 And every thridde yere, withouten doute,
 They casten lotte, as hyt came aboute,
 On ryche, on pore, he most hys sone take,
 And of hys childe he moste present make 50
 To Mynos, to save him or to spille,
 Or lat his best devoure him at his wille.
 And this hath Mynos doon *right* in dyspite,
 To wreke hys sone was sette all his delyte;
 And make hem of Athenes hys thralle
 Fro yere to yere, while he lyven shalle;
 And home he saileth whan this tounne ys worne
 This wikked custome is so longe yronne,
 Til of Athenes kynge Egeus,

Moste senden his oune sone Theseus, 60
 Sith that the lotte is fallen hym upon,
 To be deuoured, for grace is ther non.
 And forth is lad thys woful yonge knyght
 Unto the countree of kynge Mynos ful of myght,
 And in a prison fetred faste ys he,
 Til the tyme he shulde yfreten be.

Wel maystow wepe, O woful Theseus,
 That art a kynges sone, and dampned thus!
 Me thynketh this, that thow depe were yholde
 To whom that savede the fro cares colde. 70
 And now yf any woman helpe the,
 Wel oughtestow hir servant for to be,
 And ben hir trewe lover yere by yere!
 But now to come agayn to my matere.

The tour, ther this Theseus ys ythrowe,
 Doune in the bothome derke, and wonder lowe,
 Was joynynge to the walle of a foreyne,
 And hyt was longynge to the doghtren tweyne
 Of Mynos, that in hire chambres grete
 Dweltene above the maystre strete 80
 Of Athenes in joy and in solace.
 Wot I not how hyt happede parease,
 As Theseus compleyned hym by nyghte,
 The kynges doghtre that Adriane hyghte,
 And eke hir suster Phedra, herden alle
 Hys compleynt, as they stode on the walle,
 And loked upon the bryghte mone;
 Hem liste nat goo to bedde so sone.
 And of hys woo they hadde compassyoun;
 A kynges sone to be in swiche prisoun, 90
 And be deuoured, thoughte hem grete pitee.
 Than Adriane spake to hir suster free,

And seyde, ' Phedra, leve suster dere,
 This woful lordes sone may ye not here,
 How pitously compleyneth he hys kynne,
 And eke his pore estate that he ys ynne ?
 And gilteles ; certes now hit ys routhe !
 And yf ye wol assente, by my trouthe,
 He shal be holpen, how soo that we doo.'

Phedra answerde, ' Ywys, me ys as woo 100
 For him, as ever I was for any man ;
 And to his helpe the beste rede that I kan,
 Ys, that we doon the gayler prively
 To come and speke with us hastely,
 And doon this woful man with him to come ;
 For yf he may the monstre overcome,
 Than were he quyte ; ther ys noon other bote !
 Lat us wel taste him at hys herte rote,
 That yf so be that he a wepne have,
 Wher that hys lyfe he dar kepe or save, 110
 Fighten with this fende and him defende.
 For in the prison, ther as he shal descende,
Ye wote wel that the best is in a place
 That nys not derke, and hath roume and eke space
 To welde an axe, or swerde, or staffe, or knyffe.
 So that me thenketh he shulde save hys lyffe ;
 Yf that he be a man, he shal do so.
 And we shal make *him* balles eke alsoo
 Of waxe and towe, that whan he gapeth faste,
 Into the bestes throte he shal hem caste, 120
 To sleke hys hunger, and encombre hys tethe.
 And ryght anoon whan that Theseus sethe
 The beste asleked, he shal on hym lepe
 To sleen hym or they comen more to *kepe*.
 This wepen shal the gayler, or that tyde,

Ful prively within the prisoun hyde :
 And for the house is crynkled to and fro,
 And hath so queynte weyes for to go,
 For yt is shapen as the mase is wrought ;
 Therto have I a remedy in my thoght, 130
 That by a clywe of twyne, as he hath goon,
 The same way he may returne anoon,
 Folwyng always the threde, as he hath come.
 And whan this beste ys overcome,
 Thanne may he fleen away out of this stede,
 And eke the gayler may he wyth him lede,
 And him avaunce at home in his contree,
 Syn that soo grete a lordes sone ys he.
 Thys ys my rede yf that ye dar hyt take ;
 What shulde I lenger *sermoun* of hyt make ?' 140
 The gayler cometh, and with hym Theseus,
 Whan these thynges ben acorded thus.
 Doune sytte Theseus upon hys knee,
 ' The ryghte lady of my lyfe,' quod he,
 ' Y sorwful man, ydampned to the deth,
 Fro yow, whiles that me lasteth breth,
 I wol not twynne aftir this aventure.
 But in youre servise thus I wol endure ;
 That as a wreechche unknowe I wol yow serve
 For evermore, til that myn herte sterve. 150
 Forsake I wol at home myn herytage,
 And, as I sayde, ben of your courte a page,
 Yf that ye vouchesafe that in this place,
 Ye graunte me to have suehe a grace,
 That I may have not but my mete and drinke ;
 And for my sustenaunce yet wol I swynke,
 Ryght as yow lyst ; that Mynos ne no wyght,
 Syn that he sawe me never with eighen syght,

Ne no man elles shal me konne espye,
 So slyly and so wele I shal me gye, 160
 And me so wel disfigure, and so lowe,
 That in this worlde ther shal no man me knowe,
 To han my lyfe, and to have presence
 Of yow, that doon to me this excellence.
 And to my fader shal I sende here
 This worthy man that is your gaylere,
 And him so guerdone that he shal wel bee
 Oon of the grettest men of my contree.
 And yif I durste sayne, my lady bryght,
 I am a kynges sone and eke a knyght, 170
 As wolde God, yif that hyt myghte bee,
 Ye weren in my contree alle three,
 And I with yow, to bere yow companye.
 Than shulde ye seen yf that I therof lye.
 And yf that I profre yow in lowe manere,
 To ben youre page and serven yow ryght here,
 But I yow serve as lowly in that place,
 I prey to Marce to yeve me suche grace,
 That shames dede on me ther mote falle,
 And dethe and poverte to my frendes alle, 180
 And that my spirite be nyghte mote goc
 After my dethe, and walke to and froo,
 That I mote of traytoure have a name,
 For which my spirite mot goo to do me shame!
 And yif ever Y clayme other degre,
 But ye vouchesafe to yeve hyt me,
 As I have seyde, of shames deth Y deye!
 And mercy, lady! I kan no more seye.'

A semely knyght was this Theseus to sec,
 And yonge, but of twenty yere and three. 190
 But whoso hadde yseen hys contenance,

He wolde have wepte for routhe of his penaunce :
 For which this Adriane in this manere,
 Answerde to hys profre and to hys chere.

‘ A kynges sone, and eke a knyght,’ quod she.
 ‘ To ben my servant in so lowe degre,
 God shelde hit, for the shame of wymmen alle,
 And lene me never suche a case befall !
 And sende yow grace and sleyght of hert also
 Yow to defende, and knyghtly sleen your fo ! 200
 And lene hereaftir I may yow fynde
 To me and to my suster here so kynde,
 That I ne repente not to yeve yow lyfe !
 Yet wer hyt better I were your wife,
 Syn ye ben as gentil borne as Y,
 And have a realme nat but faste by,
 Then that I suffrede your gentillesse to sterve,
 Or that I lete yow as a page serve ;
 Hyt is not profet, as unto your kynrede.
 But what is that, that man wol not do for drede ?
 And to my suster syn that hyt is so, 211
 That she mote goon with me yf that I goo.
 Or elles suffre deth as wel as I,
 That ye unto your sone as trewely,
 Doon hir be wedded at your home comynge.
 This ys the fynal ende of al this thyng ;
 Ye, swere hit here, upon al that may be sworne !’

‘ Yee, lady myn,’ quod he, ‘ or elles torne
 Mote I be with the Minotawre to morowe !
 And have here of myn herte bloode to borowe, 220
 Yif that ye wol ! Yf I hadde knyfe or spere,
 I wolde hit laten out, and theron swere,
 For then at erst, I wote ye wol me leve.
 By Mars, that ys chefe of my beleve,

So that I myghte lyven, and nat fayle
 To morowe for to taken *my* batayle,
 Y nolde never fro this place flee,
 Til that ye shulde the verray prefe see.
 For now, yf that the sothe I shal yow saye,
 I have loved yow ful many a daye, 230
 Thogh ye ne wiste nat, in my contree,
 And aldermoste desirede yow to see,
 Of any erthely lyvyng creature.
 Upon my trouthe I swere and yow assure,
 These seven yere I have your servant bee.
 Now have I yow, and also have ye mee,
 My dere hert, of Athenes duchesse !'

This lady smyleth at his stedfastnesse,
 And at hys hertely wordys, and at his chere,
 And to hir suster sayde in this manere :— 240

' And softly now, suster myn,' quod she,
 ' Now be we duchesses both I and ye,
 And sykered to the regals of Athenes,
 And both heraftir lykly to be queenes,
 And saved fro hys deth a kynges sone
 As ever of gentil wymen ys the wone,
 To save a gentilman, enforthe hir myght,
 In honest cause, and namely in his ryght.
 Me thinketh no wyght ought us hereof blame,
 Ne beren us therfore an evel name.' 250

And shortely of this matere for to make,
 This Theseus of hir hath leve ytake,
 And every poynt was performed in dede,
 As ye have in the covenant herde me rede ;
 Hys wepne, his clyw, hys thing that I have sayde
 Was by the gayler in the house ylayde,
 Ther as this Mynatowre hath hys dwellyng,

Ryght faste by the dorre at hys entrynge,
 And Theseus ys ladde unto hys dethe ;
 And forthe unto this Mynataure he gethe, 260
 And by the techynge of thys Adriane,
 He overcome thys beste and was hys bane,
 And oute he cometh by the clywe agayne
 Ful prively. When he thys beste hath slayne,
And by the gayler gotten hath a barge,
And of his wives tresure gan it charge,
And tok hys wif, and eke hir suster free,
 And by the gayler, and wyth hem alle three
 Ys stole away out of the londe by nighte,
 And to the contree of Ennopye hym dyghte, 270
 There as he had a frende of his knowynge.
 There festen they, there dauncen they and synge,
 And in hys armes hath thys Adriane,
 That of the beste hath kepte him from hys bane.
 And gate him there a noble barge anoon,
 And of his countre folke a grete woon,
 And taketh hys leve, and homewarde sayleth hee ;
 And in an yle, amydde the wilde see,
 There as ther dwelleth creature noon
 Save wilde bestes, and that ful many oon, 280
 He made his shippe a-londe for to sette,
 And in that ile halfe a day he lette,
 And sayde on the londe he moste him reste.
 Hys maryners han don ryght as hym leste ;
 And, for to telle schortly in thys case,
 Whanne Adriane hys wyfe aslepe was,
 For that hir suster fairer was than she,
 He taketh hir in hys honde, and forth gooth he
 To shyppe, and as a traytour stale hys way,
 While that thys Adriane aslepe lay, 290

The steppes of hys fete, there he hath fare,
 And to hir bedde ryght thus she speketh thoo:—
 ‘Thow bedd,’ quoth she, ‘that haste receyved
 twoo,

Thow shalt answere of twoo and not of oon,
 Where ys the gretter parte away i-goon?
 Allas, where shal I wreehed wyght become?
 For though so be that bote noon here come, 330
 Home to my contree dar I not for drede;
 I kan my selfe in this ease not rede.’

What shulde I telle more hir compleynyng?
 Hyt ys so longe hyt were an hevy thyng.
 In hyr epistil Naso telleth alle,
 But shortly to the ende tel I shalle.
 The goddys have hir holpen for pitee,
 And in the sygne of Taurus men may see
 The stones of hir corowne shyne elere;
 I wol no more speke of thys matere. 340
 But thus these false loveres kan begyle
 Hire trewe love; the devel quyte hym hys while!

EXPLICIT LEGENDA ADRIANE DE ATHENES.

INCIPIT LEGENDA PHILOMENE.



HOW yiver of the formes, that hast
 wroght
 The faire worlde, and bare hit in thy
 thoght
 Eternally or thow thy werke beganne,

Why madest thou unto the sklauder of manne,—
 Or al be that hyt was not thy doyinge,
 As for that *fine* to make suche a thyng,—
 Why suffrest thou that Tereus was bore,
 That ys in love so fals and so forswore,
 That fro thys worlde up to the firste hevene
 Corrupeth, whan that folke hys name nevene? 10
 And as to me, so grisly was hys dede,
 That whan that I this foule story rede,
 Myn eyen wexen foule and sore also;
 Yet laste the venym of so longe ago,
 That infecteth hym that wolde beholde
 The story of Tereus, of which I tolde.
 Of Trase was he lorde, and kynne to Marte,
 The cruelle god that stante with bloody darte,
 And wedded hadde he, with blisful chere,
 King Pandynes faire doghter dere, 20
 That hyghte Proygne, floure of hir contree;
 Thogh Juno *luste* nat at the feste bee,
 Ne Ymeneus, that god of weddyng is.
 But at the feste redy ben, ywys,
 The furies thre, with al hire mortel bronde.
 The owle al nyght about the balkes wonde,
 That prophete ys of woo and of myschaunce.
 This revel, ful of songe, and ful of daunce,
 Laste a fourtenyght or lytel lasse.
 But shortly of this story for to passe, 30
 (For I am wery of hym for to telle)
 Fyve yere hys wyfe and he togedir dwelle;
 Til on a day she gan so sore longe
 To seen hir suster, that she sawgh not longe,
 That for desire she nyste what to seye,
 But to hir husbonde gan she for to preye

For Goddys love, that she moste ones goon
 Hir suster for to seen, and come anoon.
 Or elles but she moste to hyr wende,
 She preyde hym that he wolde aftir hir sende. 40
 And thys was day be day al hir prayere,
 With al humblesse of wyfehode, worde and chere.

This Tereus let make hys shippes yare,
 And into Grece hymselfe ys forthe yfare,
 Unto hys fader in lawe, and gan hym preyde,
 To vouche-safe that for a moneth or tweye,
 That Philomene, his wyfes suster, myghte
 On Proigne hys wyfe but ones have a syghte ;
 ‘ And she shal come to yow agayne anoon,
 My selfe with hyr, I wil bothe come and goon, 50
 And as myn hertes lyfe I wol hir kepe.’

Thys olde Pandeon, thys kynge, gan wepe
 For tendernesse of herte for to leve
 Hys doghtre goon, and for to yive hir leve ;
 Of al thys worlde he lovede nothinge soo ;
 But at the laste leve hath she to go.
 For Philomene with salte teres eke
 Gan of hir fader grace to beseke,
 To seen hir sustre that hir longeth soo,
 And hym enbraeeth with hir armes twoo. 60
 And ther-with-alle so yonge and faire was she,
 That whan that Tereus sawgh hir beauté,
 And of array that ther nas noon hir lyche,
 And yet of bounté was she too so ryche,
 He caste hys firy hert upon hir soo,
 That he wol have hir how-soo that hyt goo,
 And with hys wiles kneled and so preyde,
 Til at the laste Pandeon thus seyde :—

‘ Now sone,’ quod he, ‘ that arte to me so dere,

I the betake my yonge doghtre dere, 70
 That bereth the key of al myn hertes lyfe.
 And grete wel my doghter and thy wyfe,
 And yeve hir leve sommetyme for to pleye,
 That she may seen me oones or I deye.
 And sothely he hath made him ryche feste,
 And to hys folke, the moste and eke the leste,
 That with him come: and yaf him yestes grete,
 And him conveyeth thurgh the maistir strete
 Of Athenes, and to the see him broghte,
 And turneth home; no malyce he ne thoghte. 80
 The ores pulleth forthe the vessel faste,
 And into Trace arryveth at the laste;
 And up into a forest he hir ledde,
 And into a cave pryvely hym spedde,
 And in this derke cave, yif hir leste,
 Or leste nought, he bad hir for to reste;
 Of which hir hert agrosse, and seyde thus:—
 'Where ys my suster, brother Tereus?'
 And therewithal she wepte tendirly,
 And quok for fere, pale and pitously, 90
 Ryghte as the lambe that of the wolfe ys byten,
 Or as the colver that of thegle ys smyten,
 And ys out of *his* claws forthe escaped,
 Yet hyt ys aferde and awhaped
 Lest hit be hent eftesones: so sate she.
 But utterly hyt may none other be,
 By force hath this traytour done a dede,
 That he hathe refte hir *hir* maydenhede
 Maugree hir hede, be strengthe and by his myght.
 Loo, heere a dede of men, and that aryght! 100
 She crieth 'Suster!' with ful longe stevene,
 And 'Fader dere! helpe me God in hevenc!'

Al helpeth nat. And yet this false thefe,
 Hath doon thys lady yet a more myschefe,
 For ferde lest she sholde hys shame crye,
 And done hym openly a vilanye,
 And with his swerde hire tonge of kerf he,
 And in a castel made hir for to be,
 Ful prively in prison evermore,
 And kept hir to his usage and to hys store, 110
So that she ne mighte never more asterte.

O sely Philomene, woo ys in thyn herte!
 Huge ben thy sorwes, and wonder smerte!
 God wreke the, and sende the thy bone!
 Now ys hyt tyme I make an ende sone.

This Tereus ys to hys wyfe yeome,
 And in hyse armes hath hys wyfe ynome,
 And pitously he wepe, and shoke hys hede,
 And swore hire that he fonde hir suster dede;
 For which the sely Proigne hath suche woo, 120
 That nyghe hire sorwful herte brake atwoo.
 And thus in teres lat I Proigne dwelle,
 And of hir suster forthe I wol yow telle.

This woful lady ylernd had in yowthe,
 So that she werken and enbrowden kowthe,
 And weven in stole the radevore,
 As hyt of wymmen hath be woved yore.
 And, shortly for to seyn, she hath hir fille
 Of mete and drynke, of clothyng at hire wille,
 And kouthe eke rede wel ynogh and endyte, 130
 But with a penne she kouthe nat write;
 But letteres kan she weve to and froo,
 So that by the yere was agoo,
 She hadde woven in a stames large,
 How she was broght from Athenes in a barge,

And in a cave how that she was broght,
 And al the thinge that Tereus hath wrought,
 She wave hyt wel, and wrote the story above,
 How she was served for hir suster love.

And to a knave a ryng she yaf anoon, 140
 And prayed hym by signes for to goon
 Unto the queene, and beren hir that clothe;
 And by sygne sworne many an othe,
 She shulde hym yeve what she geten myghte.

Thys knave anoon unto the queene hym dyghte
 And toke hit hir, and al the maner tolde.
 And whanne that Proigne hath this thing beholde,
 No worde she spake for sorwe and eke for rage,
 But feyned hyr to goon on pilgrymage
 To Bachus temple. And in a lytel stounde 150
 Hire dombe suster syttyng hath she founde
 Wepyng in the castel hir-self allone.

Allas, the woo, constreynt, and *eke* the mone
 That Proigne upon hir dombe suster maketh!
 In armes everych of hem other taketh;
 And thus I lat hem in her sorwe dwelle.

The remnant ys no charge for to telle,
 For this is al and somme, thus was she served,
 That never harme agylte ne deservede
 Unto thys cruelle man, that she of wyste. 160
 Ye may be war of men yif that yow lyste.
 For al be that he wol not for *the* shame
 Doon as Tereus, to lese hys name,
 Ne serve yow as a morderere or a knave,
 Ful lytel while shul ye trewe hym have.
 That wol I seyne, al were he nowe my brother,
 But hit so be that he may have another.

INCIPIT LEGENDA PHILLIS.

BY preve, at wel as by auctorité,
 That wikked frute cometh of wikked tree,
 That may ye fynde yf that hyt liketh yow.
 But for thys ende I speke thys as now,
 To telle yow of fals Demophone.

In love a falser herde I never none,
 But hit were hys fader Theseus ;
 God for hys grace fro suche oon kepe us !
 Thus these wymen prayen that hit here ;
 Now to theeffect turne I of my matere. 10

Distroyed ys of Troye the citee ;
 This Demophon come saylyng in the see
 Towarde Athenes to hys paleys large.
 With hym come many a shippe, and mony a barge
 Ful of folke, of whiche ful many oon
 Ys wounded sore, and seke, and woo begoon,
 And they han at a sege longe ylayne.
 Byhynde him come a wynde and eke a rayne,
 That shofe so sore, hys saylle myghte not stonde.
 Hym were lever than al the worlde a-londe, 20
 So hunteth hym the tempest to and fro !
 So derke hyt was, he kouthe no-wher go,
 And with a wawe brosten was hys stere.
 Hys shippe was rent so lowe, in suche manere,
 That carpenter koude hit nat amende.
 The see by nyght as any torche brende
 For wode, and posseth hym up and doune ;
 Til Neptunus hath of hym compassyoun,
 And *Thetis*, *Chorus*, *Triton*, and they alle,

And maden him upon a londe to falle, 33
 Wherof that Phillis lady was and quene,
 Lyeurgus doghtre, fayrer on to sene,
 Than is the floure ageyn the bryghte sonne.
 Unneth ys Demophoon to londe ywonne,
 Wayke and eke wery, and his folke forpynd
 Of werynesse, and also enfamyned,
 And to the dethe he was almoste ydreven,
 Hys wise folke counseyle han hym yeven,
 To seken helpe and socour of the quene,
 And loken what hys grace myghte bene, 40
 And make in that londe somme chevissaunce,
 To kepen hym fro woo and fro myschaunce.
 For seke he was, and almoste at the dethe ;
 Unnethe myght he speke, or drawe brethe ;
 And lyeth in Rhodepeya hym for to reste.
 Whan he may walke, hym thoght hit was the beste
 Unto the contree to seken for socoure.
 Men knewe hym welle and dide hym honoure ;
 For at Athenes duke and lorde was hee,
 As Theseus hys fader hath ybe, 50
 That in hys tyme was grete of renoun,
 No man so grete in al hys regioun ;
 And lyke hys fader of face and of stature,
 And fals of love ; hyt came hym of nature,
 As doothe the fox Renarde, the foxes sone ;
 Of kynde he koude hys olde fadres wone
 Withoute lore, as kan a drake swymme
 Whan hit ys kaught and caried to the brymme.
 Thys honourable quene doth him chere,
 And lyketh wel hys porte and hys manere. 54
 But I am agroteyd here beforne,
 To write of hem that in love ben forsworne

And eke to haste me in my legende,
 Which to performe, God me grace sende
 Therefore I passe shortly in thys wyse.
 Ye have wel herde of Theseus the gyse,
 In the betraysyng of faire Adriane,
 That of hir pitee kepte hym fro hys bane.
 At shorte wordes, ryght so Demophone,
 The same way, the same path hath gone, 70
 That did his false fader Theseus.

For unto Phillis hath he sworne thus,
 To wedden hir, and hir his trouthe plyghte,
 And piked of hyr al the good ho myghte,
 Whan he was hole and sounde, and had hys reste,
 And doth with Phillis what-so that him liste,
 As wel kouthe I, yif that me leste soo,
 Tellen al hys doynge, to and fro.

He sayede to hys contree moste him sayle,
 For ther he wolde hire weddyng apparayllo 80
 As fille to hir honour and hys also,

And openly he tok his leve tho,
 And to hir swore he wolde not sojourne,
 But in a moneth ageyn he wolde retourne.
 And in that londe let make hys ordynaunce,
 As verray lorde, and toke the obeisaunce,
 Wel and hombely, and his shippis dyghte,
 And home he gooth the nexte wey he myghte.
 For unto Phillis yet come he noight,
 And that hath she so harde and sore ybought, 90

Allas, that the story *doth* us recorde,
 She was hir oun dethe with a corde,
 Whanne that she segh that Demophon her trayede.
 But firste wrote she to hym, and faste hym prayede
 Ho wolde come and delyver hir of peyne,

As I reherse shal oo worde or tweyne.
 Me lyste nat vouche-safe on hym to swynke,
 Dispenden on hym a penne ful of ynke,
 For fals in love was he ryght as hys syre ;
 The Devel set hire soules both on a fire ! 100
 But of the letter of Phillis wol I wryte,
 A worde or tweyne althogh hit he but lyte.

‘Thyn hostesse,’ quod she, ‘O Demophone,
 Thy Phillis, which that is so woo begone,
 Of Rhodopey, upon yow *mot* compleyne,
 Over the terme sette betwix us tweyne,
 That ye ne holden forwarde, as ye seyde.
 Your anker, which ye in oure haven leyde,
 Hyght us that ye wolde comen out of doute,
 Or that the mone ones went aboute ; 110

But tymes foure, the mone hath *hid* hir face
 Syn that thylke day ye wente fro this place ;
 And foure tymes lyghte the worlde ageyn.
 But for al that, yet I shal soothly seyn,
 Yet hath the streme of *Sithon* nat *i*-brought
 From Athenes the shippe ; yet come hit noght.
 And yf that ye the terme rekne wolde,
 As I or other trewe lovers sholde,
 I pleyne nat, God wot ! beforne my day.’

But al hir letter wryten I ne may 120
 By ordre, for hit were to me a charge ;
 Hir letter was ryght longe, and therto large.
 But here and there, in ryme I have hyt layde
 There as me thoghte that she hath wel sayde.

She seyde, ‘The saylles cometh nat ageyn,
 Ne to the worde there nys no fey eerteyn,
 But I wote why ye come nat,’ quod she ;
 ‘For I was of my love to yow so fre.

And of the goddys that ye han forswore,
 That hire vengeaunce fal on yow therfore, 139
 Ye be nat suffisaunt to bere the peyne.
 To moche trusted I, wel may I seyne,
 Upon youre lynage and youre faire tonge,
 And on youre teres falsely out-wronge.
 How kouthe ye wepe soo be crafte?' quod she :
 ' May there suche teres i-feynede be ?
 Now certes yif ye wolde have in memorye,
 Hyt oughte be to yow but lytel glorie,
 To have a sely mayde thus betrayed ! 139
 To God,' quod she, ' prey I, and ofte have prayed,
 That hyt be nowe the grettest prise of alle,
 And moste honour that ever yow shal befallé.
 And when thyn olde aunectres peynted be,
 In which men may her worthynesse se,
 Then pray I God, thow peynted be also,
 That folke may reden, forth by as they go :—
 ' Lo this is he, that with his flaterye
 Betrayed hath, and doon hir vilanye,
 That was his trewe love in thoghte and dede.'
 ' But sothely of oo poynt yet may they rede, 150
 That ye ben lyke youre fader, as in this ;
 For he begiled Adriane, ywis,
 With suche an arte, and suche soteltee,
 As thou thy selven haste begiled me.
 As in that poynt, although hit be nat feire,
 Thou folwest *hym* certeyn, and art his eyre.
 But syn thus synfully ye me begile,
 My body mote ye seen, within a while
 Ryght in the havene of Athenes fletynge,
 Withouten sepulture and buryinge, 160
 Though ye ben harder then is any stone.'

And whan this letter was forthe sent anone,
 And knyw how brotel and how fals he was,
 She for dispeyre fordidde hir-self, allas!
 Suche sorowe hath she for *he* beset hire so!
 Be war ye wymmen of youre sotile fo!
 Syns yet this day men may ensample se,
 And as in love trusteth no man but me.

EXPLICIT LEGENDA PHILLIS.

INCIPIT LEGENDA YPERMYSTRE.



N Grece whilom weren brethren two
 Of which that oon was called Danoo,
 That many a sone hath of hys body
 wonne,
 As suche false lovers ofte konne.
 Amonge hys soncs alle there was oon,
 That aldermoste he loved of everychone.
 And whan this childe was borne, this Danoo
 Shope hym a name, and called hym Lyno.
 That other brother called was Egiste,
 That was in love as fals as ever hym lyste. 10
 And many a doghtre gate he in hys lyfe;
 Of which he gate upon his ryghte wife
 A doughter dere, and did hyt for to calle,
 Ypermystra, yongest of hem alle.
 The whiche childe, of hir natyvité,
 To alle goode thewes borne was she,
 As lykede to the goddes or she was borne.

That of the shefe she shulde be the corne.
 The wirates that we clepen destanye,
 Hath shapen hir, that she moste nedes be 20
 Pitouse, sad, wise, trewe as stele.
 And to this woman hyt acordeth wele ;
 For though that Venus yaf hir grete beauté,
 With Jubiter compouned so was she,
 That conscience, trouthe, and drede of shame,
 And of hir wyfehode for to kepe hir name,
 This thoghte hire was felicité as here.
 And rede Mars, was that tyme of the yere
 So feble, that his malice ys him rafte ;
 Repressed hath Venus hys cruelle crafte. 30
 And *what* with Venus, and other oppressyoun
 Of houses, Mars hys venym ys adoun,
 That Ypermystra dar not handel a knyfe
 In malyce, thogh she shulde lese hir lyfe.
 But natheles, as heven gan thoo turne,
 To badde aspectes hath she of Saturne,
 That made hir to dye in prisoun.
 And I shal after make mensioun,
 Of Danoo and Egistis also.
 And thogh so be that they were brethren twoo, 40
 For thilke tyme nas spared no lynage,
 Hyt lyketh hem to maken mariage
 Betwix Ypermestra and hym Lyno,
 And casten suche a day hyt shal be so,
 And ful accorded was hit wittirly.
 The array ys wroght, the tyme ys faste by
 And thus Lyno hath of his fadres brother
 The doghter wedded, and eche of hem hath other.
 The torches brennen, and the lampes bryghte.
 The sacrifices ben ful redy dyght, 50

Thencence out of the fire reketh sote,
 The floure, the lefe, ys rent up by the rote,
 To maken garlandes and corounes hye ;
 Ful ys the place of sounde of mynstraleye,
 Of songes amoureuse of mariage,
 As thilke tyme was the pleyne usage.
 And this was in the paleys of Egiste,
 That in his house was lorde, as hym lyste.
 And thus that day they driven to an ende ;
 The frendes taken leve, and home they wende ; 60
 The nyght ys comen, the bride shal go to bedde.
 Egiste to hys chambre fast hym spedde,
 And prively he let his doghter calle,
 Whanne that the house voyded was of alle.
 He loked on hys doghter with glad chere,
 And to hir spak as ye shal after here.

‘ My ryghte doghter, tresoure of myn herte,
 Syn firste day that shapen was my sherte,
 Or by the fatale sustren hadde my dome,
 So ny myn herte never thinge me come 70
 As thou, Ypermystra, daughter dere !
 Take hede what thy fader seythe the here,
 And wirke after thy wiser ever moo.
 For alderfirste, doghter, I love the soo
 That al the worlde to me nys halfe so lefe,
 Ne nolde rede the to thy myschefe,
 For al the good under the colde moone,
 And what I meene, hyt shal be seyde ryght soone,
 With protestacioun, as seyn these wyse,
 That but thou do as I shal the devyse, 80
 Thou shalt be ded, by hym that al hath wrought !
 At shorte wordes thou ne schapest nought
 Out of my paleyse or that thou be dede,

But thou consente and werke aftir my rede ;
Take this to the for ful conclusioun.'

This Ypermystra caste hir eyen doun,
And quoke as dooth the lese of aspe grene ;
Ded wex hir hewe, and lyke as ashe to sene ;
And seyde, ' Lorde and fader, al youre wille,
After my myght, God wote I shal fulfillle, 90
So hit be to me no confusioun.'

' I nyl,' quod he, ' have noon excepcioun.'
And out he laughte a knyfe as rasour kene.
' Hyde this,' quod he, ' that hyt be not *i*-sene ;
And whan thyn housbonde ys to bedde goo,
While that he slepeth kut hys throte atwoo ;
For in my dremes hyt is warned me,
How that my nevywe shal my bane be,
But which I not ; wherfore I wol be siker.
Yif thou say nay, we two shal make a byker, 100
As I have seyde, by him that I have sworne !'

This Ypermystra hath nygh hire wytte forlorne,
And, for to passen harmlesse of that place,
She graunted hym ; ther was noon other grace.
And therwithal a costrel taketh he tho
And seyde, ' Hereof a draught, or two,
Yife hym *to* drynke whan he gooth to reste,
And he shal slepe as longe as ever the leste,
The narcotikes and opies ben so stronge. 109
And goo thy way, lest that hym thynke to longe.

Oute cometh the bride, and with ful sobre chere,
As ys of maidenenes ofte the manere,
To chambre broght with revel and with songe.
And shortly, leste this tale be to longe,
This Lyno and she beth *i*-broght to bedde,
And every wight out at the dore hym spedde.


The nyght ys wasted and he felle aslepe ;
 Ful tenderly begynneth she to wepe ;
 She riste hir up, and dredefully she quaketh,
 As dothe the braunche that Zepherus shaketh, 120
 And hussht were alle in Argone that citee.
 As colde as eny froste now wexeth shee,
 For pite by the herte streyneth hir soo,
 And drede of dethe doth hir so moche woo,
 That thries down she fil in swich a were,
 She ryst hir up and stakereth her and there,
 And on hir handes faste loketh she.
 ‘ Allas, shal myn handes bloody be ?
 I am a mayde, and as by my nature,
 And be my semblant, and by my vesture, 130
 Myn handes ben nat shapen for a knyfe,
 As for to reve no man fro hys lyfe !
 What devel have I with the knyfe to doo ?
 And shal I have my throte korve a twoo ?
 Than shal I blede, allas, and be *i*-shende !
And nedes coste thys thing mot have an ende ;
 Or he or I mot nedes leseoure lyfe.
 Now certes,’ quod she, ‘ syn I am hys wyfe,
 And hathe my feythe, yet is hyt bet for me
 For to be ded in wyfely honesté, 140
 Than be a traytour lyvyng in my shame.
 Be as be may, for erneste or for game,
 He shal awake* and ryse and go hys way
 Out at this goter, or that hyt be day.’
 And wepte ful tendirly upon his face,
 And in hir armes gan hym to embrace,
 And hym she roggeth and awaketh softe,
 And at the wyndow lepe he fro the lofte,
 Whan she hath warned hym and doon hym bote.

This Lyno swyft was and lyght of foto, 150
And from hir ranne a ful goode pace.
This sely womman ys so wayke, allace,
Helveles, so that er she ferre wente,
Her crewel fader did hir for to hente.

Allas, Lyno, why art thou so unkynde?
Why ne hast thou remembred in thy mynde,
And taken hir, and ledde hir forthe with the?
For when she saw that goon away was he,
And that she myghte not so faste go,
Ne folowen hym, she sate *hir* doun ryght thoo, 150
Til she was kaught and fetred in prisoun.
This tale ys sayde for this conclusioun.

HERE ENDETH THE LEGENDE OF GOODE WOMEN.

END OF VOL. V.





PR
1850
1891
V.5

THE LIBRARY
UNIVERSITY OF CALIFORNIA
Santa Barbara


STACK COLLECTION

THIS BOOK IS DUE ON THE LAST DATE
STAMPED BELOW.

~~DEC 6 7 11 22~~ K

APR 7 1986 88 R

RETD MAR 11 1988 44



3 1205 00687 4687

De

UC SOUTHERN REGIONAL LIBRARY FACILITY



AA 001 373 799 4

